

48740/B.

SMITH, T.



Digitized by the Internet Archive
in 2019 with funding from
Wellcome Library

<https://archive.org/details/b30526449>





IACOBUS USSERIVS ARCHIEPISCOPUS
ARMACHANUS TOTIVS HIBERNIÆ PRIMAS

V I T Æ

Quorundam

ERUDITISSIMORUM

E T

ILLUSTRIUM VIRORUM.

Quorum Nomina exstant in pagina sequenti.

Scriptore

T H O M A S M I T H O,

S. Theol. Doctore & Ecclesiæ Anglicanæ Presbytero.

L O N D I N I,

Apud DAVIDEM MORTIER in Via dicta de Strand ad Insigne Erasmi.

M D C C V I I.

- I. JACOBUS USSERIUS, Archiepiscopus Armachanus, & totius Hiberniæ Primas;
- II. JOANNES COSINUS, Episcopus Dunelmensis;
- III. HENRICUS BRIGGIUS, Geometriæ in Academia Oxoniensi Professor Savilianus;
- IV. JOANNES BAINBRIDGIUS, Astronomiæ in Academia Oxoniensi Professor Savilianus;
- V. JOANNES GRAVIUS, Astronomiæ in Academia Oxoniensi Professor Savilianus.
- VI. PETRUS JUNIUS, Ser. Regis JACOBI, primi *Britanniarum* Monarchæ, Præceptor, & magnus *Scotiæ* Eleemosynarius;
- VII. PATRICIUS JUNIUS, Ser. R. R. JACOBO I. & CAROLO I. *Britanniarum* Monarchis à Bibliothecis;
- VIII. JOANNES DEE, Mathematicus Anglus.





LECTORI.



Ntequam ad perlegendas hasce, quæ sequuntur, in hac Sylloge comprehensas Vitas admittaris, ut pauca quædam in antecessum, præmisso hoc brevi prologo quasi galeato, noris, & tua & mea non parum interesse, facilè mecum pro prudentia & candore tuo judicabis.

Non opus erit, heic laboriosè demonstrare conari, cùm id cuivis ex exteris, qui apud nos aliquanto tempore moram facientes, linguæ & moribus nostris assueverint, sit perspectissimum, Gentem *Anglorum* pro genio à natura insito, pro amore & admiratione virtutis, ubi ubi eminuerit, proque sensu pietatis & religionis, cives suos, cujuscunque ordinis, gradus, aut professionis, quotquot de patriâ, sive munificentia, sive in pace & bello gestis, sive studiis literarum, sive ingenii longè supra mediocritatem evecti monimentis, sive sapienti propagandæ aut contra quoslibet hostes defendendæ Veritatis zelo, sive pulcherrimis solidæ & ab omni fucò vacuæ sanctimonix exemplis, aut qualicunque modo, præclarè meriti sunt, debitis elogiis, non solis orationibus & concionibus, in exequiis solenni ritu habitis, in quibus defuncti pro rostris laudantur, sed iisdem, quæ alioqui inter pronuntiandum penitus evanescerent, aut publica luce donatis, aut justis amplisque interdum commentariis editis, ne diuturnitate tempo-

ris & ex vitio humanæ fragilitatis, cui non aliter succurri possit, ex hominum memoria penitus exciderent, utpote quovis marmore & ære perennioribus, prosequi, famamque in omne ævum duraturam, tum ut ipsis inter coelites receptis istiusmodi parentationes laudi, tum ut aliis ad eandem metam anhelantibus, ad easdem summas virtutes sive æmulandas, sive attingendas, sive ausu planè heroico superandas, incitamento forent, ad feros nepotes transmittere, egregiisque præconiis illustrare gratissimo mentis affectu consuevisse. Quod non de oratoriis amplificationibus tritisque commendationibus, è communibus locis peti solitis, sed de Historicis notitiis, in quibus illorum prosapia, educatio, mores, & excelsæ animi dotes, studiorum & totius vitæ ratio, erga sanctissimum Numen pietas, in Ecclesiam & Rempublicam literariam merita, dignitates, & memorabilia, quæ ad illos propiùs spectant, brevi compendio, tanquam in tabula, coram omnium oculis repræsentantur, intelligi velim. Hoc, tum conciones funebres propemodum innumeræ, tum enarrationes, illa omnia complexæ, aut separatim editæ, aut illorum operibus sæpenu-merò simul collectis præmissæ, testatissimum faciunt.

Interim diffiteri non licet, tum illorum, tum patriæ honori meliùs consuli posse, si ea quoque Latinè exstitissent, quo inter omnes gentes, quibus pietatis & eruditionis amor studiumque curæ & cordi sunt, tantarum virtutum fama, non angustis unius regionis limitibus coarctata, sed communi ista lingua, immortalis quidem & mutationis experte, vulgata diffunderetur. Sed nescio quo fato obvenit, quod plerisque nostratium, qui Latinè eleganter, & quidem optimè, scribere norint, sive popularium commodo unicè intentis, sive alienos plausus, neutiquam, præ modestia vix excusabili, captantibus, cum nos nobis ipsis amplum satis theatrum simus, longè aliter visum sit: sed ut omnibus ingenuis, harumque rerum curiosis, qui summarum virtutum divinorumque charismatum,

tum,

tum, ubi ubi per universum Artium & Scientiarum orbem in quibuscunque extenduntur, imagines, non lividis malignisve, sed lætis placidisque, oculis intuentur, palam fieret, tum in Patriæ decus, tum in commune literarum bonum, officii debiti jus & ratio à grata posteritate exigere videntur, ne fideli descriptore carentes, longa nocte oppressi ignotique jaceant. Hac ex parte de universis penè sui temporis viris, ingenio & doctrina præstantibus, & potissimum de suis *Gallis illustrissimus Thuanus*, de *Italibus Paulus Jovius*, de *Germanis Melchior Adamus*, præclare admodum meriti sunt: ut à cæteris recensendis in præsentia abstineam. Hoc autem opprobrium, quo à rigidis invidisque censoribus aspergimur, amoliri satagebat admodum reverendus in Christo Pater, D. *Joannes Fellus*, Episcopus *Oxonienfis*, de universa re literaria pariter ac de ista celeberrima Academia optimè meritis, quorundam Academicorum, quos isti negotio non impares & idoneos judicavit, in duobus tribusve voluminibus virorum apud nos maximè celebrium, qui in isthoc & superiori seculo floruerunt, vitas complexuris edendis operâ usus: & fanè id in effectum dedisset ille, cujus entheæ menti ac indefessæ industriæ nihil erat inaccessum, impervium nihil, nisi infausta tempora tunc ex malè sanis seditiosisque Schismaticorum & Democraticorum technis & insultibus ingruentia, ipsiusque mors, quæ paulo post secuta est, viz. x^o *Julii* die A. M. DC. LXXXVI. ineunte magno vitæ suæ climacterico, protenus obstitissent: de qua re in præfatione ad D. *Camdeni* Epistolas *Londini* 1691 editas fusè egi.

Ab illo tempore sanctum istud (sic enim appellabo) consilium, quod tunc penitus interciderat, intimis medullis infixum adeo indivulsè hærebat, ut huic Viri optimi proposito aliquatenus promovendo symbolam meam conferre magis magisque propenderem, post maturam seriamque deliberationem satis animo convictus horas subsecivas non posse aut de-

decentiùs aut utiliùs, quàm in contexendis magnorum Viro-
rum Vitis, collocari.

Horum famæ dum litaverim, conscientia recti, & bonis
literis benè pro virili mea merendi desiderio animatus, id
melius cessurum, nec temerè quidem, credidi, si eorundem
opusculis hætenus ineditis, sed ejusmodi, quæ decus & ho-
norem in Auctores refunderent, & publicæ literarum utilitati
essent inservitura, narrationes istæ, quas molitus sum, præ-
figerentur. In horum enim pretiosis, quæ aut in Bibliothecarum
archivis, aut in privatorum Museis latuere, reliquiis
eruellendis non segnem impendi operam, nec industriam & cu-
riositatem felix destituit eventus. Quo consilio, si non unicè,
saltem præcipuè, ductus, inter tot Heroas, quos utraque
Britannia, major minorque, produxit, omnium seculorum
memoria dignissimos, paucorum Vitas, quas jam damus, il-
lustrandas suscepi; ut brevi indicabo, hac unica monitione
præmissa, eas non eodem, quo exhibentur, ordine, nec si-
mul, sed aliquot annorum intervallis, prout siverit opportu-
nitas, conscriptas fuisse.

In fronte hujus Collectionis reverendissimi Viri, D. *Jaco-
bi Usserii*, Archiepiscopi *Armachani*, & totius *Hiberniæ*
Primatis, vitam, non ita pridem scriptam, tanquam
πρέσβωπον τηλαυγές, collocavi, tum ob eminentissimam, quam in
ista Ecclesia merito suo adeptus est, dignitatem, tum ob
summam doctrinam, quam Christianus orbis dudum agnovit
& miratus est: in qua me non pauca ex amplâ Reverendi Vi-
ri, *Richardi Parri* S. T. P. D. *Usserio* à sacris domesticis, &
cujus fidei & curæ Collectanea vastæ molis, ingensque Sche-
darum strues à moriente Patrono concredita erant, com-
mentatione, vernaculo nostro sermone exaratâ, Epistolis *Us-
serianis* A. 1686. *Londini* publicatis præfixa, adnotasse inge-
nuè & lubens fateor. Sed quàm multa ex iisdem Collecta-
neis, & præsertim Epistolis, quas, antequam in lucem pro-
du-

ducerentur, accuratè perlegi, item ex Schedis aliis, propria magni Auctoris manu descriptis, in Bibliotheca *Bodleiana* repositis, denique ex istorum temporum Historiis, quæ elucidandæ illius vitæ maximè inserviunt, in Adversaria mea, olim in privatum usum, cùm de iis edendis ne vel minima mentem subiisset cogitatio, congesta, addiderim, Tu ex levicula collatione, si sapis, & rectè judicare potes, facilè coram videbis. Et fanè, licèt tot tantisque subsidiis instructus, ab hoc labore quali quali omninò supersedissem, nisi ante quadriennium aut circiter Vir clarissimus, *Jacobus Tyrellus* Armiger, D. *Usserii* ex filia nepos, famæ Avi sui propagandæ studiosissimus, ut id muneris implere vellem, me exorasset, cujus suasis precibusque, & iis quidem crebrò repetitis, tandem cessi, quamprimùm à severioribus studiis, quibus tunc implicabar otium, & intermissionem obtinuissem.

Sequitur Vita reverendissimi Viri, D. *Joannis Cosini*, Episcopi *Dunelmensis*, cujus scribendæ hæc origo & causa fuit.

Cùm ineunte anno 1692. illustrissimus Vir *Henricus Comes Clarendoniensis*, Viri maximi, *Edwardi*, meritò ad dignitatem & titulum Comitis à serenissimo Rege, *Carolo II.* post restauratam Monarchiam evecti, & Cancellarii *Angliæ*, quorundam Aulicorum, quorum malè sanis consiliis & machinationibus illius inconcussa & incorrupta fides summæque virtutes obstruxerant, invidia prostrati, & à Patria, de qua optimè meruerat, iniquissimè proscripti, filius primogenitus, pro ingenti, quo erga me tunc ferebatur, & adhucdum fertur, affectu, in familiari, quo me dignari solet, sermone, se libellum autographum ejusdem *Cosini* de *statu & constitutione Ecclesiæ Anglicanæ*, Parentis rogatu *Parisis* 1652. scriptum, in Bibliotheca sua habere retulisset, facilè impetravi, ut usus illius mihi concederetur. Hunc summa cum delectatione lectum relectumque cum venia illius exscripsi, utpote animo, seria deliberatione habita, convictus, illum præcipuè

in exterorum , quo de nostræ Ecclesiæ politia , disciplina , doctrina , cultu sacro , aliisque cognati argumenti , melius informari possent , gratiam , in publicam lucem edi oportere. Sed fervor iste tunc propediem publicandi ex multis remoris , ab iniquitate temporum injectis , paulatim intermissus est , nec de illo amplius cogitatum. Post aliquot verò annos prius istud studium tamdiu sopitum revixit : & quo meliori & decentiori apparatu prodiret , quædam de Auctoris natalibus , educatione , studiis , muneribus , tum in Academia *Cantabrigiensi* , tum in Ecclesia administratis , de perpeffionibus sub infaustissimis Parlamentariæ rebellionis temporibus , de exilio in *Gallia* , de invicta adversus tum *Romanenses* tum *Puritanos* fortitudine & Veritatis contra utrosque tuendæ zelo , de illius post reditum in *Angliam* promotione ad Episcopalem ordinem , curaque pastoralis planè admiranda , denique de universæ vitæ , quantum expiscari licuit , ratione præmittere , apud me constitui. Harum rerum notitiam qualem qualem reverendus Vir , D. *Isaacus Basrius* , Archidiaconus *Northumbriæ* , in appendice ad concionem funebrem mense *Aprili* 1672. habitam , & sequente anno typis exclusam suppeditavit : sed hisce memoriis non satis contentus , duos tresve nobilissimos viros , aliosque , qui illum tum *Parisiis* , tum postea *Londini* & *Dunelmi* , familiariter norant , consului , quicquid , quod ad hoc propositum faceret , certiùs pleniùsque edocendus. Explorato quoque Testamento , in quo plura memorabilia continentur , quod in Archivis Curiae Prærogativæ servatur , inspectisque & ad incudem revocatis tum libris propriis , vel ab ipso vel post cineres conditos ab aliis editis , tum aliorum , ad eundem quoquo modo spectantibus , observationibus , libertate judicandi , prout Veritatis amor studiumque jusserint , interdum interposita ; inde deductis , animo recto & sincero , publicis malis , deplorando Schismate in publicæ pacis & communionis Ecclesiasticæ

sticæ detrimentum invec̃tis, obviam eundi, &, si id per Presbyteranorum aliorumque hujus ævi Sectariorum obstinationem licuit, aliquatenus medendi, compendiariam istam, quam jam edere placuit, narrationem contexui. Sed huic longæ & laboriosæ investigationi parcendum fuisset, si, quod admodum serò post historiolum diligentia nostra absolutam cognovi, exstitisset libellus, ab ipso D. *Cosino*, compositus sub hoc titulo, *Vitæ meæ ab initio i. e. ab anno 1595. usque ad annum 1665. brevis enarratio*: cujus fragmentum verè aureum *Anglicè* exaratum, de *Marci Antonii de Dominis*, Archiepiscopi *Spalatensis*, primo in *Angliam* adventu, illiusque cum D. *Overallo*, Episcopo *Norwicensi*, collatione, cui jussu Patroni interfuerat, de statu Ecclesiæ *Anglicanæ*, deque fidei & doctrinæ articulis in illa juxta antiquam fidem & religionem Ecclesiæ Catholicæ agnitis assertisque, in palatio *Lambethano* habita, in museo reverendi Viri D. *Joannis Tong*, *Branspethæ* propè *Dunelmum* Rectoris hodie reperitur: quod in mei gratiam unà cum altero *Notitiæ Ecclesiæ Anglicanæ*, qua de agitur, authentico exemplari, *Londinum* secum adtulit, utendum benignissimè & humanissimè permisit. Si integer, inquam, libellus ille mansisset, frustra mea, frustra aliorum desudasset industria, nihilque aliud nobis relictum fuisset, præter laudationes, quibus Vir summus esset cumulandus.

Cùm post mortem D. *Cosini*, de pretio & valore Schedarum, quas reliquit, hæredibus non satis constaret, vel nescio quo infelicissimo casu, sacræ istæ reliquiæ sparsæ & distractæ erant, quarum tamen pars in illorum, qui quanti æstimandæ essent benè norant, auspiciatò tandem devenit, ut favore, beneficio & perquam insigni humanitate reverendi & doctissimi Viri, D. *Joannis Smith*, Sacræ Theologiæ Professoris Ecclesiæ *Dunelmensis* Præbendarii, quocum frequens hac de re commercium literarum, occasione data, (opportunè intercedente

prænobili & reverendo, D. *Georgio Whelero*, Equite aurato, & Ecclesiæ *Anglicanæ* Presbytero, ejusdem quoque Ecclesiæ Cathedralis Præbendario) habui, duos libellos (tanquam pretiosas tabulas, ab isthoc infami naufragio servatas) à D. *Cosino*, dum in Gallia exularet, *Anglicè* conscriptos jam possideam: quorum unus *Vindicias ordinationum Ecclesiæ Anglicanæ* contra exceptiones & cavillationes cujusdam Pontificii Sacerdotis è gente nostra; alter *responsionem ad epistolam*, nobili feminæ *Anglæ*, ab alio Sacerdote *pro defensione communionis sub unica specie administrandæ* inscriptam, complectitur, unà cum epistola eruditissima D. *Cosini*, tunc temporis Collegii S. *Petri* apud *Cantabrigienses* Præfecti, ad D. *Samuelem Collinsum*, Collegii Regalis Præpositum A. 1635. de *Sabbato*: quo tempore acerrimæ apud nostrates de ista re lites incaluere; quæ inter D. *Cosini* opuscula *Anglica*, si quando nova editio fiet, inferi merebuntur. Nec hîc reticendum puto, præclarum libellum, sub *Selectæ Bibliothecæ Historicorum, tam Ecclesiasticorum, quàm Secularium*, titulo, olim ab eodem D. *Cosino Parisiis* exaratum fuisse, quem ab Auctore acceptum mihi Vir clarissimus, *Carolus Hattonus* Armiger, pro veteri amicitia benevolè impertitus est.

Inter Schedas *Gravianas*, de quibus mox dicam, duas, longas quidem, sed eruditissimas, D. *Henrici Briggii*, Geometriæ apud *Oxonieneses* Professoris *Saviliani*, ad *Christianum Severini Longomontanum* de opere illius Cyclometrico, in quo Auctor iste sibi mirè blanditus est, Epistolas, D. *Gravii* manu eleganter & accuratè exscriptas, uti & inter Schedas *Usserianas*, olim à D. *Tyrello* pro egregia humanitate sua mihi commodatas, quasdam D. *Johannis Bainbridgii*, Astronomiæ in eadem Academia Professoris *Saviliani*, Dissertationes varii argumenti, pridem prelo destinatas, reperi. Hinc ansam lætus arripui in edendis hisce posthumis Opusculis de utrisque differendi,

ut quales quantique essent, posteritati clariùs innotesceret.

D. *Joannis Gravii* vitam quorundam Virorum doctissimorum è Societate Regia *Londinensi*, in quam ante multos annos, quod hîc gratus agnosco, impar licèt & indignus, adscitus fuerim, rogatu, ducentis tantum exemplaribus è prelo exclusis, inter Amicos distribuendis, quorum ne unum quidem in Bibliopoliis vænire justis de causis volebam, sumptibus propriis edendam curavi. Ab illo tempore, quando de nostratibus eruditionis fama ubique inclarescentibus, per ætatem, percepto bonarum literarum gustu, pro modulo meo quali quali iudicium ferre liceret, ingenti erga D. *Gravii* memoriam, ob Scientiarum Mathematicarum, Linguarum Orientalium, politiorisque literaturæ studia, (quæ omnia in illo non leviusculè aut exiliter aut superficie tenus, sed pari perfectione ad miraculum usque convenerunt) celeberrimum, reverentia, cultu, & admiratione, potenti quasi genio impulsus, ferebar. Quod ut tandem aliquando testatum facerem, felicem obtigisse opportunitatem mihi seriò gratulabar. Cùm enim reverendus Vir, D. *Richardus Stubbessius*, Ecclesiæ de *East-Hamsted* in agro *Bercheriensi* Parochus, & Collegii *Wadhamensis Oxonii* pridem socius, schedas aliquot nostri *Gravii*, è vidua D. *Nicolai Gravii* fratris, Ecclesiæ Cathedralis *Dromorensis* in *Hibernia* Decani, ejusque hæredis testamentarii, illiusque ultimarum tabellarum, ut nos appellamus, *Executoris*, quæ ex communi patriæ incendio, rebelliumque deprædationibus & rapinis salvæ evaserint acceptas, præstantissimo Viro, D. *Edwardo Bernardo, Gravii*, post summos Viros, D. *Sethum Wardum*, postea Episcopum *Sarisburiensem*, & D. *Christophorum Wrennum*, Equitem auratum, in *Saviliana* Astronomiæ Cathedra tertio successori, communicasset, ille easdem pro amicitia sua, qua ab ineunte juventute eramus conjunctissimi, mihi perlegendas utendasque sta-

tim dedit. Illæ autem jam in Museo *Saviliano*, ad quod, illius & magni *Wallisii*, integerrimi quoque Amici, benevolentia, frequens, prout occasio ferebat, mihi concedebatur aditus, tanquam in æterna, sic enim augurari libet, sede, sapienti D. *Bernardi* cura repositæ, servantur. Sed cùm postea inaudivissem, D. *Stubbesium* alias D. *Gravii* schedas, non minoris habendas, apud se retinuisse, illum de hac re literis consului, qui petitioni meæ facilis annuebat, iis ad me promptè & benevolè transmissis, ut inde quicquid ad commune literarum bonum & *Graviani* nominis decus & honorem foret, ad libitum exscriberem. Ex hisce utrisque multa hausi excerptisque, quæ sub *Opusculorum Joannis Gravii* titulo, unà cum D. D. *Briggii* & *Bainbridgii*, lucubrationibus posthumis, quibus sequentes vitæ erant præfigendæ, edere pro certo apud me statuebam. Sed Bibliopolæ, quibus munus istud sine aliqua difficili conditione, imò gratis, obtuleram, planè recusarunt, inter alia, id ex novorum vectigalium impositione, præsertim flagrante, quo commercium transmarinum non parum interrumpitur, bello, cum suis commodis neutiquam consistere caussati. Ita, ut, quod res est, dicam, hisce speciosis, & planè frivolis excusationibus suam avaritiam & *μικροψυχίαν* texuere. Ideo cùm per hosce homunciones Opuscula ista in lucem publicam protrudere non liceret, ea ad auspiciatiora tempora reservare, tristis & invitus licèt, cogor. Penè hisce minutiis te interpellare dispuderet, nisi justa indignatio compulisset.

Quo pacto quibusque rationibus ad contexendas V V. Cl. D. *Petri Junii* Patris, & *Patricii Junii* filii, quas jam damus, Vitas, fuerim inductus, paucis accipe.

Cùm *Patricii Junii* Epistolas, puta ad *Frontonem Ducæum*, *Lucam Holstenium*, *Claudium Salmasium*, aliosque magnos, qui orbem literarium scriptorum suorum fama impleverint, Viros, scriptas, (de quibus, ut acceperam, reveren-

rendissimus in Christo Pater, *Guilielmus Sandcroftus* Archiepiscopus *Cantuariensis*, erat non parum sollicitus) cum illorum responso integras adhuc apud Virum Clarissimum, *Guilielmum Atwoodum* Jurisconsultum, ejusdem *Patricii* ex filia nepotem, servari ex certa fide didicissem, illum in ædibus *Cottonianis* quas codices MSS. ibi repositos inspiciendi causa sæpe adibat, circa annum 1691. conveni, prolatisque hac de re sermonibus, promptè se illas mihi cum reliquis schedis communicaturum spondit. Quod mox pro eximia sua humanitate & benevolentia abundè præstitit, meque novo beneficio ultra votum & expectationem cumulavit. Aperta enim cista ad me transmissa, ingentem schedarum non solius Avi, sed etiam Proavi, in quibus posterioribus, præter Epistolas elegantissimo stylo exaratas, multa Politica & Historica de *jure Regum Scotiae in insulas Orcadicas*, & de *legationibus illius in Daniam & Germaniam*, præsertim de nuptiis inter Regem *Jacobum VI. & Annam Danicam* ineundis, occurrunt, simul congestarum molem lætissimis oculis vidi, quas cum ab invicem, quò faciliori opera majorique cum fructu legerentur, separassem, de hoc thesauro literario reperto, & quasi ex tenebris eruto, admodum ferò triumphare coeperam. Ut verò omnes harum rerum cupidi & studiosi in hujus beneficii partem ope & industria mea admitterentur, multa, quæ rem literariam illustrarent, ex cumulo selecta, in unum volumen collegi, ea tunc temporis edendi consilio, ni mala tempora & Bibliopolarum pervicacia, quo minus voti compos fierem, omninò obstitissent.

Cùm in Commentario de Vita *Joannis Dee*, quem *Devum* Latiniori vocabulo appellare placet, ultimo quidem & recenti laboris nostri foetu, unde præcipuam materiam summaque illius capita, i. e. tum ex ipsius schedis MSS. autographis in Bibliotheca *Cottoniana* & Museo *Ashmoliano Oxonii* re-

repositis, & libris ab ipso editis, tum ex istorum temporum Historiis aut aliunde, hauserim, passim pro re nata ibi pateat, eademque hîc repetere omnino ingratum & tædiosum foret: *Relationis actionum, quas idem Joannes Deus cum quibusdam spiritibus* ab anno 1581. ad finem usque vitæ habuit, fidem & veritatem contra quorundam malè feriatorum hominum, qui existentiam, operationes, & apparitiones Dæmonum in dubium vocantes, istiusmodi narrationes pro fabulis commentisque, aut ex versutia, quâ credulorum menti oculisque illudi solet, excogitatis, aut ex melancholia & læso cerebro ortis, habent, vindicare omninò necessarium videbitur: nec quidem temerè, iniquè, & absque justis causis id à me expectabis: quod quidem paucis, neque enim proluxa defensione opus erit, præstabo, totum hoc negotium tuæ prudentiæ, pietati, & judicio permissurus.

Aliqui, *Kelleum* hæc omnia excogitasse, *Devoque* præversutia & astu fucum fecisse, utpote cui soli apparitiones istæ in Chrystallo factæ erant; & responsa & oracula inde enunciata, dum *Deus* qui totus ex sola hujus Interpretis & Internuntii, quicquid animo adlubuerit, pro more dictantis, fide pendebat, nihil horum aut viderit, aut audiverit, suspicantur; ac ideo omnem fidem & auctoritatem huic *Relationi*, licet propria manu, omnibus temporis, rerumque, quæ in istis actionibus intervenire, circumstantiis accuratissimè notatis, illo ipso tempore conscriptæ, ac si solerti varri impostoris ingenio esset adscribenda, abrogari volunt. Ita nasuti isti homines, temerè re neutiquam seriò perpenſa, aut ad severum examen revocata, sibi & aliis, de doctrina Dæmonum perperam sentientibus, ludos faciunt: sed quàm insulsè, quàm præter omne jus fasque, brevibus hisce probationibus, quas nemo prudens, aut modestus, ni fallor, nisi Rationi in istiusmodi rebus juxta communes differendi regulas exerendæ vim facere velit, jam producendis, ostendam.

De-

Devum hac ex parte nimium credulum agnoscimus, eò quod ad usque extremum vitæ halitum hos malignos Spiritus, quibuscum per plurimos annos frequens commercium congressumque solennem in modum habuit, pro bonis Dei angelis reputaverit, ab isthoc inveterato, eoque impio, errore neutiquam dimovendus. Sed quod ad fictam *Kellæi*, quam venditant, imposturam spectat, multa, quæ suspiciones istas frivolæ & omni ratione vacuas funditus subvertere, inque nihilum diffilare possint, intercedunt. *Kellæus* enim ille vix aut parum Latinam linguam intellexit, & Græcarum literarum erat penitus rudis. Unde ergo Latinas, Græcasque sententias, easque interdum longas, hisce Actionibus pro re nata, non rarò intermixtas, præsertim in illa, cui *Stephanus Rex Poloniæ* interfuit, Latinè peractâ? Unde admonitiones, exhortationes, prolixos sermones, interlocutiones, quavis occasione interpositas, revelationes de rebus metaphysicis, & potissimum Theologicis abstrusioris naturæ & argumenti, quæ ipsi in hoc literarum genere penitus inexercitato, aut fortasse cuiquam mortalium in mentem nunquam antea venissent, nec venire potuissent? & denique unde responsiones quæsitis accommodas, nisi aliundè acceptas, illius auribus ab assistentibus spiritibus clam infusas, & quasi secreta inferni halitus insufuratione commissas, expromere, & quidem expeditè & subtiliter, potuit? *Devo* maximè intento, & interdum nova dubia, quibus confestim erat satisfaciendum, pro re nata proponente, qui hæc universa dictata in charta subjecta exceperit. Ad hæc addi possit, tum alia planè mira, intervenientibus hisce spiritibus, quæ passim in Actis adnotantur, à *Devo* conspecta, in quibus cum oculis objicerentur, decipi nullatenus potuit, tum actiones hæc, relicto in *Bohemia Kellæo*, post reditum in *Angliam* fuisse continuatas; adeo ut commentum istud, quasi ille harum fraudum inventor & Architectus fuisset, evanescere necesse sit. Sed in hisce, de

quibus

quibus fusiùs in commentario egi, repetendis diutiùs immorari planè piget. Attamen nondum dimittendus es, antequam paucula alia addidero.

Dum nuper præclarissimi Viri, D. *Roberti Hookii*, Geometriæ in *Greshamensi* Collegio Professoris, grande operum posthumorum volumen, paulò ante editum, diligenti manu versavi, Prælectionem, ab eodem coram Societate Regia olim habitam, ibi insertam reperi, in qua acriter quidem contendit, historicam *Devi* narrationem juxta literalem sensum intelligi non oportere, sed omnes istas apparitiones cum spirituum nominibus, & universo varii vestitus, quem induisse perhibentur, & figurarum apparatu, dialogos, collocationes, & qualescunque voces, sive articulatas, sive sonos inconditos, à chrystallo sacrato prolatos, item preces & doxologias ad singularum actionum finem additas, aliaque illic memorata, ad Cryptographiam referenda esse; sub hisce involucris *Devum* longè aliud innuisse, & in animo habuisse; quem comminiscitur, (neque enim molliori vocabulo uti licet, cùm sit putidissimum commentum) à Regina *Elisabetha*, illiusque Consiliariis, in *Poloniam* & *Bohemiam*, ut arcana istorum Principum, quos adibat, consilia vafre exploraret, missum fuisse: ideo hoc obscurissimo commentandi genere, quo minus, si fortè in illorum manus ipsius schedæ, de quibus jam agitur, incidissent, suspicioni obnoxius foret, sibi pro prudentia sua cavisse; *Kelleum* ab illo in *Angliam* reversuro, ut idem propositum persequeretur, relictum; chrystallum illud sacratum, quod istiusmodi phænomena repræsentare, cæteraque mira ex vi artis Mechanicæ, ut credi voluit, producere statuit, illius summæ in Mathematicis Scientiis peritiæ adscribendum; denique famosum istum *Enochi* librum esse merè Cryptographicum, & Cabbalæ mysteriis refertum, claviumque, quas rimatus est *Devus*, ope, qualiacunque arcana in ejus commentariis ubique sparsa, & sive numeris sive mysticis sensibus,

sibus, ultra nimirum, quàm verba præ se ferant, comprehensa, explicari posse. Obtupui sanè, cùm hæc legerem, virum tam profundæ in rebus Physicis & Mathematicis eruditionis, nescio quo malo genio, & æstu animi abreptum, hæc insonnia, merasque affanias in isthoc sapientissimorum Virorum confesso proferre aut potuisse aut voluisse. De rationibus, quibus ad id audendum inductus fuerit, conjecturam hîc facere nolo. Illum autem è sepulchro, ad quod, ad ultimum istud amicitiae officium præstandum ab hærede invitatus, quamplurimisque istius Societatis Adsefforibus ipse quoque immixtus, deduxi, non effodiam, neque Amici mei, de quo, quod præfiscini dixerim, omni tempore, & præsertim quando lethali morbo decubuit, bene mereri studueram, memoriam dura & mordaci censura lædam & exagitabo. Illius verò famæ, ita audacter statuo, longè melius fuisset consultum, si Dissertationem istam, de qua vel ab ipso Auctore, qui mecum de studiis suis familiares miscere sermones non rarò solebat, nec à quoquam alio ne verbum quidem unquam antea inaudiverim, clarissimus Editor perpetuis tenebris aut flammis addixisset. Harum objectionum, quarum aliquæ sunt manifestò falsæ, cæteræ pura puta ingenii in phænomenis istis obtupescendis, excluso omni spirituum interventu, quasi vulgaris illa hypothesis, licèt divina & infallibili Scripturarum auctoritate firmata, licèt certa neutiquamque infida experientia, millies demonstrata, Philosopho profundioris judicii & indaginis esset prorsus indigna, hac ex parte infelicitè laborantis commenta, vel nuda repetitio ad refutationem abundè sufficere videtur, ut perlecto commentario meo, in quo, istis tunc penitus mihi incognitis, obviam iverim, pro sapientia tua facilè confiteberis.

Non quicquam valet ad elevandam horum Actorum fidem, quod similia quædam, h. e. quoad numerorum tabulas, barbaras voces, arcanorumque naturæ ostentationes in Stegano-

graphia *Trithemii*, addant si velint, in *Cornelii Agrippæ & Paracelsi* libris, in quibus legendis *Devus* non erat parum versatus; reperiri possint; cùm apud istos Auctores, an rectè an falsò Magiæ suspectos, jam non inquirò, ne millesima quidem pars documentorum & probationum, quæ in *Devianis* Actis elegantissimè & accuratissimè continua rerum gestarum serie referuntur, occurrat.

Hæc in genere & quasi tumultuariò, sine omni fuce doloque malo, huic *Vitarum Collectioni* præmittenda esse duxi. Tu verò, Lector, bene vale, & laboribus hisce nostris, quales quales sint, ad Dei gloriam tuamque utilitatem fruiere.

Westmonasterii decimo
Aprilis die A. Ch.
MDCCVI.

T. S.

C A T A L O G U S L I B R O R U M

Qui venales prostant *Londini* apud DAVIDEM MORTIER
in via dicta de *Strand* ad Insigne *Erasmii*.

Thesaurus Antiquitatum Romanarum, Continens Lectissimos quosque Scriptores qui Romanæ Reipublicæ Rationem, Disciplinam, Leges, Instituta, Sacra, Artesque Togatas ac Sagatas illustrarunt: Congestus à Jo. Geo. Grævio, cum variis Tabulis Æneis. 12. vol. *Fol.*

Thesaurus Antiquitatum Græcarum, in quo continentur effigies Virorum & Fœminarum illustrium. Item Variarum Regionum miranda, quæ celebrata apud antiquos saxisque & ære expressa occurrunt; adjecta brevi Descriptione Singulorum, quæ aut in eorum vita aut in horum proprietate spectabilia percipi & intelligi refert, Auctore Jac. Gronovio. 13. vol. *Fol.*

Atlas

C A T A L O G U S.

- Atlas Antiquus Sacer, Ecclesiasticus & Profanus collectus ex Tabulis Geographicis Nic. Sansonis Tabulas ordine collocavit & emendavit Joan. Clericus. *Amst.* 1706. *Fol.*
- Patini (Carol.) Imperatorum Romanorum Numismata & Ære Mediæ & Minimæ formæ. *Par.* 1696. *Fol.*
- Begeri (Laurent.) Thesaurus Palatinus sive Gemmarum & Numismatum quæ exstant in Electorali Cimeliarcho. *Heidelb.* 1685. *Fol.*
- Begeri Regum & Imperatorum Romanorum Numismata. *Coloniæ.* 1700.
- J. Bapt. Cottelerii, S. S. Patrum qui temporibus Apostolicis floruerunt, Barnabæ, Clementis, Hermæ, Ignatii, Polycarpi, &c. Opera. Notulas dispersit J. Clericus. 2. vol. *Amst.* 1700. *Fol.*
- Cypriani Opera recognita & Illustrata à J. Fello Oxoniensi Epif. Accedunt Annales Cypriani, & Dissertationes Cyprianicæ Henr. Dodwelli. *Amst.* 1700. *Fol.*
- Etmulleri (Mich.) Opera Medica Theoretico-Practica; hoc est Exercitationes & Collegia omnia, ab eodem tam Publice quam Privatim & Privatissime quondam habita. 3. vol. *Amstelod.* 1696. *Fol.*
- Stucki (Joan. Guil.) Operum circa Antiquitates Conviviales, Libri tres. Sive Hebræorum Græcorum, Romanorum, aliarumque Nationum conviviorum genera. *Lugd. Bat.* 1695. *Fol.*
- Vaillant Numismata Imperatorum, Augustorum & Cæsarum in Coloniis, Municipiis & Urbibus jure latio donatis. 1695. *Fol.*
- Vaillant (Joan.) Numismata Imperatorum, &c. à Populis Rom. Ditionis Græcè loquentibus, ex omni Modulo percussa. *Amst.* 1700. *Fol.*
- Vaillant (Joan.) Historia Ptolemæorum Ægypti Regum, ad fidem Numismatum accommodata. *Amst.* 1701. *Fol.*
- Vaillant (Joan.) Nummi Antiqui Familiarum Romanarum perpetuis Interpretationibus illustrati. 2 vol. *Amst.* 1703. *Fol.*
- Vossii (Ger.) Opera in sex Tomos divisa. Tomus I. in quo Etymologicon Linguae Latinæ. Tomus II. de Arte Grammatica. Tomus III. Tractatus Philologici de Rhetorica, de Poetica, de Artium & Scientiarum natura ac constitutione. Tomus IV. Historicus & Epistolicus. Tomus V. de Theologia Gentili, Physiologia Christiana, de Origine ac Progressu Idololatriæ. Tomus VI. Theologicus. 6 vol. *Amst.* 1701. *Fol.*
- Geographia Sacra ex V. & N. Testamento desumpta & in Tabulas quatuor concinnata, Auctore Nic. Sanson, Accesserunt Notæ Joan. Clerici. *Amst.* 1701. *Fol.*
- Caroli A S. Paulo Geographia Sacra, sive Notitia antiqua omnium Patriarchalium, Metropoliticarum & Episcopaliū veteris Ecclesiæ in Tabulas X. concinnata, cum Notis Lucæ Holstenii. *Amst.* 1703. *Fol.*
- Arriani Expeditionis Alexandri Magni, Libri Septem, & Historia Indica. Ex Bonav. Vulcanii interpretatione Latina post variam aliorum industriam ita Lacunis vel cognitis vel ignotis etiamnum & obscuris suppletis, ita Auctoris in Græcæ Linguae nativo usu præstantia & facultate restituta ex plurium MSS. & præ-

CATALOGUS.

- & præsertim unius optimi collatione, ut nunc demum prodire hic Auctor videri debeat, opera Jacobi Gronovii. In Charta minori & Charta majori. *Lugd. Bat.* 1704. *Fol.*
- Grotii de Jure Belli ac Pacis cum Commentariis G. vander Muelen, Auctoris, nec non Joh. Fred. Gronovii. 3 vol. *Ultraj.* 1703. *Fol.*
- Imhof. Hist. Italiæ & Hispaniæ Genealogica. *Norib.* 1701. *Fol.*
- Limborch (Phil.) Theologia Christiana. *Amst.* 1700. *Fol.*
- Joannis Forbesii à Corfè Opera omnia inter quæ plurima Posthuma, reliqua ab ipso Auctore interpolata, emendata atque Aucta. 2 vol. *Amst.* 1703. *Fol.*
- Grotii (Hug.) Epistolæ. *Amst.* 1687.
- Voet (Joh.) Commentarius ad Pandectas in quo præter Romani juris principia ac controversias illustriores. 2 vol. *Hag. Com.* 1704. *Fol.*
- Biblia Sacra ex Seb. Castellionis Interpretatione. *Francof.* 1697. *Fol.*
- Dolæi (Joh.) opera omnia, exhibentia non modo Encyclopædiam Medicam & Chirurgicam rationalem, adjecta nova appendice, de Theriaca cœlesti observationes Auctoris rariores &c. 2 vol. *Francof.* 1703. *Fol.*
- Præstantium ac Eruditorum Virorum Epistolæ Ecclesiasticæ & Theologicæ Jac. Arminii, Uytenbogardi, Vorstii, Vossii, Grotii, Episcopii, & Barlæi, Charta Major. *Amst.* 1704. *Fol.*
- Martini (Mat.) Lexicon Philologicum cum Notis Grævii, & Joannis Clerici dissertatione Etymologica. Editio Nova. 2 vol. *Amst.* 1703. *Fol.*
- Theatrum Hispaniæ, Exhibens Regni Urbes, Villas ac Viridaria magis Illustrata. *Amst.* 1705. *Fol.*
- Parisii Magnæ Græciæ Numismata accurante Joh. Georg. *Volkamero.* 1683. *Fol.*
- Desiderii Erasmi Roterodami Opera Omnia, emendatiora & auctiora, ad optimas editiones præcipuè quas ipse Erasmus postremo curavit summa fide exacta, Doctorumque Virorum notis illustrata. In decem tomos distincta, quorum primo, in hac Editione, præfixa sunt Elogia & Epitaphia Erasmi. à Viris Doctis conscripta, nec conjunctim unquam antea sic edita, cum indicibus totius operis copiosissimis. Quid porro huic editioni præ ceteris accesserit, Præfationes singulorum voluminum docebunt. 10 vol. 1703. *Fol.*
- Gussetii Commentarius Linguae Ebraicæ, in quibus primarius significatus, loca insignia Scripturæ explicantur, parallela Vet. & Nov. Testamenti, cum peculiari discussione, tum mutua collatione firmantur & vindicantur. *Amst.* 1702. *Fol.*
- Bibliotheca Germanica sive Notitia Scriptorum Rerum Germanicarum IV. Prælibus Absoluta, Erturt. *Fol.*
- Riverii (Láz.) Opera Medica Universa. *Lugd.* 1698.
- Mischna, sive totius Hebræorum Juris, Rituum, Antiquitatum, ac legum oraliū Systema cum Clarissimorum Rabbīnorum Maimonidis & Bartenoræ Commentariis integris, Latinitate donavit ac Notis illustravit Guil. Surenhusius. 6 vol. *Amst.* 1703. *Fol.*

V I T A
JACOBI USSERII

*Archiepiscopi Armachani, & totius
Hiberniæ Primatis :*

Scriptore

THOMAS SMITHO.

*Sacræ Theologiæ Doctore & Ecclesiæ
Anglicanæ Presbytero.*

VITA JACOBI USSERII

ARCHIEPISCOPI

ARMACHANI,

& totius Hiberniæ Primatis.



IACOBI USSERII, viri omnium seculorum memoria dignissimi, vitam literis mandare aggredior, tum summâ erga illum, quem in rostris perorantem olim adolescente ætate sæpè audiui, reverentiâ, tum honesto de Republica literaria, & de Ecclesiis *Anglicana & Hibernica*, quarum omnium ingens erat lumen & ornamentum, aliquantillum, saltem pro virili, benè merendi studio & desiderio incensus. Animum diu reluctantem planè absterrebat difficultas operis propositi, in quo de rebus maximi momenti, tam ad civile regimen, quàm ad Religionem spectantibus, subinde pro necessitate temporum intermiscendis, erit agendum. Verebar etiam, ne meritissimas illius laudes, summasque excellæ mentis dotes ineleganti stilo, frigidis narrationibus, & tenuitate ingenii detererem. Sed tandem vicit pietas, vicere importunæ & crebrò repetitæ Amicorum preces, qui memoriis elogiisque, de *Usserio* Anglicè pridem editis, parum acquiescentes, ut quicquid alii scripserint, quicquid è schedis manuscriptis, aut aliunde propriâ industriâ collectum apud me habuerim, ea omnia in publicos usus depromere, & feræ posteritati, & Latinè quidem, præcipuè in Exterorum gratiam, commendare vellem, impensè expetierunt. Quod utinam satis pro dignitate argumenti exequi, inque effectum dare possem! Hoc enim in antecessum quasi præfiscini dicendum arbitror, non ad captandam Lectoris benevolentiam, neque nimio affectu abreptus, sed re seriò perpensa, justisque notitiis instructus, *Hiberniam* in quâ *Usserio* nasci contigerat, ex quo prædicationibus, indefessa vigilantia, sanctissimisque & sapientissimis curis & consiliis *S. Patricii*, jure merito *Hibernorum Apostoli* nuncupati,

cupati , quinto æræ Christianæ seculo , fide & doctrina Evangelii imbuta fuerit , licèt innumeros ferè Præsules , aliosque , tum sanctitate vitæ , tum literarum cultu & studiis , ab isthoc tempore , nondum agresti morum feritate introducta , & deinceps , tanquam ex fertili gremio produxerit , inque suo sinu refocillaverit , de nemine aut magis aut meliùs gloriari posse , quàm de hoc novissimo Alumno suo , in postremis hisce ad finem vergentis mundi temporibus , felicissimè in lucem edito , quem , utpote sacrum ac cœleste depositum , in commodum universæ Gentis *Hibernorum* , si icti monitique sapere suisque bonis uti didicissent , terris faventissimo Numine commodatum , summis quibuscunque ex Antecessoribus illa sine invidia , vel præsens objicere potest. In cuius gestis enarrandis , omni adulatione & partium studio sepositis , proculque habitis , solo diæ Veritatis , quam sacram semper habui , & habebo , amore ductus , probi Biographi munere & partibus fungi conabor : nec quicquam sive laudis , sive censuræ , quod ad res , sive in *Anglia* , sive in *Hibernia* , ipsius vitæ intervallo peractas , attinet , intertexam aut admiscebo , nisi quod ipsa fides , aut tabulis publicis , aut unanimi testium , omni exceptione majorum , consensu firmata , exegerit.

Usserii
natales.

JACOBUS USSERIUS primos vitales spiritus hausit in parochia S. Nicolai , Dublinii , Eblanæ veterum , *Hiberniæ* Metropoleos , Januarii quarto die A. MDLXXX. Verbi incarnati , juxta computum Ecclesiæ *Anglicanæ* , parentibus ex antiqua & nobili stirpe prognatis ortus. Quod ut ut fortuitum videatur , inter præclara divinæ Providentiæ beneficia referri meretur. Licèt enim viri magni è casis tuguriisque obscuris & humilibus prodire possint , & frequentes quidem prodierint , quod illorum bonæ indoli , sublimi ingenio , industriæque indefessæ , omnia obstacula , quæ res angustæ solent objicere , viam ad perfectam virtutem contendentibus quasi præclusura , perrumpenti , maximè , secundum Deum , debetur : tamen exploratissimum est apud omnes , benè & auspiciatò natis feliciora ab ingenua & accurata educatione petita adipiscendæ eruditionis subsidia , frequentioraque otii literarii intervalla faciliùs quidem succedere , omni tædio , impedimentis , molestiisque amotis , quibuscum adolescentibus tenuioris ac plebeïæ fortis , ineluctabili quadam necessitate sæpenuerò conflictandum est.

Genus
pater-
num.

Paternalis generis origo deducitur à temporibus R. *Henrici II. debellatoris Hiberniæ* , qui in *Angliam* redux , quò securiùs meliùsque Regulos

ac populum ferocientem, in fide, quam solenni jurejurando unanimes spoponderant, retineret, legibusque æquissimis, cum rigore subinde temperandis, quosdam refractarios, pristinis incultis moribus, agrestique vitæ ferino ritu mordicus adhærescentes, ab omni seditione, tumultu, mutuisque cædibus coerceret, filium suum natu juniorem, *Joannem*, Comitem *Moritonie*, summa omnia disponendi & pro re nata moderandi potestate auctoratum, jure regnandi in illum sub certis conditionibus transcripto, totius Insulæ *Dominum* A. MCLXXXV. constituit. Qua simplici appellatione Reges *Angliæ*, longa serie succedentes, contenti erant usque dum R. *Henricus VIII.* augustiori & sonantiori *Regis* titulo, in Comitibus Parliamentariis *Dublinii*, A. MDXLI. qui erat Regni tricesimus tertius, habitis, commutaverit. *Joannem* ad novam hanc & planè exsortem dignitatem capeffendam, in *Hiberniam* propèrantem, inter alios viros nobiles comitatus est eximius quidam vir, ex illustri gente *Nevillorum*, in ipsius clientelam pridem admissus, & mox in Aula Admissionalis, (*Huissier*, sive pauxilla mutatione, Anglicè *Usher*) ex favore Principis constituendus, cujus muneris nomen, prout usu antiquo venerat, abjecto altero, in cognomen tum familiæ, quam illic relicto natali solo, instauraturus erat, postea transibat. Supervacanei foret laboris, & à re nostra alienum, in istius familiæ per varias *Hiberniæ* Provincias sparsis propaginibus indagandis, eque Heraldorum archivis eruendis, sollicitè immorari, aut genealogicam stirpem, sive rectâ lineâ, sive ex matrimoniis initis descendentem, curiosius scrutari. Ad Parentes igitur *Jacobi* nostri rectâ & properanter venio.

Patrem habuit *Arnoldum Usserium*, virum clarissimum qui opes satis amplas jure hæreditario nactus, in artibus, quibus imbui solent pueri generosioris prosapiæ, in scholis probè educatus, se totum, postquam pubertatem excesserat, Legum municipalium *Anglicanarum*, quæ illic quoque ex Statutorum Parliamentariorum vi ubivis obtinent, studio addicebat, in quarum cognitione tantos fecerat progressus, ut illarum profunda penetranti oculo rimatus, matura ætate, unus è sex Clericis Cancellariæ constitueretur.

Mater ipsi erat *Margarita*, filia *Jacobi Stanihursti*: ille verò insignis Jurisconsultus, in classe Magistrorum Cancellariæ recensitus, & Civitati *Dubliniensi* à memoriis & actis publicis constitutus, tanta sapientiæ fama & existimatione inclaruit, ut in Comitibus Parliamentariis, regnantibus R. R.

Maria & Elisabetha, ab Adfessoribus inferioris *Camerae* communi suffragatione *Orator* ter eligeretur. Mutata, pro varia rerum conditione, Religionis publica professione, *Hiberni*, ne à suis muneribus abdicarentur, minusque dominantium *Anglorum* suspicionibus ac censuris fierent obnoxii, sacris coetibus, sine scrupulo & offensa Conscientiæ, siverituum Ecclesiasticorum varietatem nuper introductam, pro nihilo habentes, sive ex profunda dissimulatione, secularis commodi causâ, interesse soliti, non aliud præ se ferebant, quàm parem cum cæteris concivibus, sincero pioque animo, Reformatæ Religionis dogmata & cultum amplectentibus, communionem, opinandique rationem; licet antiquæ, & quantum per leges fieri potuit, exterminatæ superstitionis amorem intus in pectore retinerent. In quorum numero, *Staniburstum* collocandum esse ex literis *Edmundi Campiani* (a), postea famosi Jesuitæ, tunc ex *Anglia* profugi, quem domi suæ aluit, & dein illum, ne à satellitibus deprehenderetur, ob violatas regni leges, & præposterum præcipitemque incautos subditos à fidelitate Reginæ debita sub specioso Religionis *Catholicæ*, hoc est, *Romane*, prætextu, ab alienandi zelum, in jus vocandus, rure Amico, ubi tutus delitesceret, commendavit, A.Ch.MDLXX. ad eundem scriptis, manifestè liquet. (b) Interim ille pro versipelle, quo pollebat, ingenio muneris demandati partes probè implevisse visus est: neque Pro-regi neque Senatoribus ullatenus suspectus. Quo tempore cum inter tot tumultus ac rebelliones, quas quidem Magnates, numerosis clientelis *Hispanorum*que subsidiariis copiis nimium quantum freti, subinde prout frequens occasio sese obtulerit, ciebant, de bonis literis propagandis consulere neutiquam vacaret; cumque scholæ publicæ hætenus deficerent, in quibus, sive in amœnioribus, sive severioribus disciplinis, juvenes pro dignitate natalium institui possent, in exteras Regiones, & potissimum in *Angliam* ad capiendum ingenii cultum non sine ingenti rei domesticæ jactura & dispendio, itum erat: quò meliùs huic incommodo iretur obviam,

(a) Epist. III. in Opusculis ejus selectis à *Silvestro Petra Sancta* S. J. *Antwerpæ* editis: A. MDCXXXI.

(b) Illius laudes meritò, tum ob egregiam humanitatem & hospitalitatem, tum ob eruditionem & *Hibernicarum* Antiquitatum cognitionem celebrat idem *Campianus* in Præfatione ad historiam *Hiberniæ*, quam ex Bibliotheca D. *Jacobi Usserii* quem ibi reverendissimum nostrum & exquisitissimè eruditum Primate[m] appellat, imprimendam curavit D. *Jacobus Waræus Dublinii* MDCXXXIII. uti & ex eadem Bibliotheca, *Conspectum statûs Hiberniæ* ab *Edmundo Spensero* A. 1596. per modum Dialogi descriptum & etiam viri doctissimi, D. *Meredithi Hanmeri* *Chronicon*: quod Auctor peste correptus imperfectum reliquit. *ibid.*

viam, de restituenda quam olim, h.e. A. Ch. MCCCXX. *Alexander* Academiae *Dublinensis* restauratio. *Bicknorus*, Archiepiscopus *Dublinensis*, fundandam curavit, veteri Academia penitus everfa in Urbe principe, in generalibus Comitibus circa A. Ch. MDLXIX. habitis, initis consiliis, feriaque deliberatione disceptaretur, *Staniburstus* ille, five ad captandam Reginae gratiam, five verò erga Patriam amore exardescens, primus proposuit, ut libellis supplicibus hac de re serenissimae Reginae exhibitis, illius opem & benevolentiam ad sanctum hoc propositum consummandum, commendantibus Concilii sanctioris Adfessoribus, implorare vellent, quo nihil aut Reginae benignissimae, bonarum literarum pariter ac Religionis, à sordibus errorum defæcatæ, faultrici & patronæ, gratius, aut universæ *Hibernorum* Genti utilius contingere potuit. Hujus autem monitis suasibusque, quos omnes boni impendiò & certatim approbarunt, utque in effectum darentur, favente Numine, & auspice Regina, summis ingenii & industriæ, quisque pro facultate sua, nervis contenderunt, ut tanti beneficii & felicitatis, in ultimos Insulæ recessus quaquaversum omnibus futuris seculis diffundendæ, fierent compotes, instaurationem suam debet præsens Academia *Dublinensis*: tandem post aliquot annos, omnibus obstaculis amotis, ex munificentia Reginae, redditibus, (quos postea auxit serenissimus Rex *Jacobus I.* quibus Præpositus, Lectores Theologiæ, & Philosophiæ, Socii, adolescentesque Candidati essent in perpetuum alendi) dotata, privilegiisque sub Regii diplomatis auctoramento A. MDXCI. stabilita. Nobilissimum sanè illud est Ecclesiæ *Hibernicæ* seminarium, è quo tot venerandi Præsules, alique, egregiis animi dotibus cumulati, & omnigenæ eruditionis & sanctitatis vitæ studiis maximè insignes, ab isthoc tempore prodierunt &, uti fas est augurari, in æternum prodibunt.

A Patre neutiquam sejungendus videtur *Richardus Staniburstus*, *Jacobi* nostri Avunculus, vir quidem insigniter doctus, & in patriis Antiquitatibus, quæ tanto eguerunt illustratore, eruendis maximè industrius & felix. Hic verò, ut paucis de illo agam, florente juvenia, in Collegio Universitatis apud *Oxonienfes* studuit: & non multò post, pro genio istius ævi, quod *Aristotelicam* doctrinam, inutilibus perplexisque difficultatibus mirè obsitam, ex ignorance melioris saniorisque Philosophiæ, non ex otiosorum hominum, quidlibet pro lasciviâ ingenii fingentium cerebellis, sed ex natura rerum eruendæ, deperibat, *Commentarios* sive *Cateenam Dialecticam* in *Porphyrianas* Constitutiones *Londini* MDLXX. edidit. Sed maturescente cum annis judicio, ex veterno quasi expergefatus,

ctus, excussis Scholasticorum nugis, poeticisque, quibus se indulserat, præstigiis, relictoque etiam, cui à Patre destinabatur, Legum municipali studio, veterum seculorum historiis, (ut hîc omittam *Descriptionem*, quam adornavit, *Hiberniæ*, inscriptam D. *Henrico Sidneio* Proregi, & in Historicis & Chronicis *Raphaelis Hollinshedi* Collectaneis *Londini* editis A. MDLXXXVI. insertam) majorum gesta stilo inornato & planè barbaro referentibus, legendis, quæ carie, situ & tineis exesæ, in tenebrosis Bibliothecarum recessibus hætenus delituerant, intenta oculorum & mentis acie invigilavit, quatuorque libros, in eodem volumine congestos, *de rebus in Hibernia gestis, cum Hibernicarum rerum appendice*, ex *Silvestro Giraldo Cambrensi* collecta, cum adnotationibus ad finem singulorum capitum additis, Typis *Plantinianis Antuerpiæ* juris publici fecit A. MD. LXXXIV. Nam ante paucos annos, larva, quam induerat, detracta, in *Hiberniam* reversus est; deinde in *Belgium* se subduxerat, & post mortem uxoris sacris ordinibus initiatus, tandem serenissimis Principibus, *Alberto* Archiduci & *Clara Isabella Eugenia*, factus est à sacris, quorum munifica liberalitate nobile otium nactus, vitam jucundè sustentavit; obiitque *Bruxellis* A. MDCXVIII (a). Interim istud sententiarum de dogmatibus religionis divortium non obstabat, quominus cum Avunculo de rebus ad Historias & Antiquitates *Hibernicas* spectantibus literarium exercere commercium sibi licere, pro æquitate & prudentia sua *Usserius* noster judicaverit, uti postea videbimus.

Usserii
mater
delusa re-
ligionem
Roma-
nam am-
plectitur.

Non dissimulandum arbitror, matrem *Jacobi* nostri, dum ille aberat in *Anglia*, quorundam Emissariorum versutiis captiosisque technis, quibus retundendis planè impar erat muliebre ingenium, miserè delusam ac circumventam, cujus conscientiam diris votis, ne melius docta resipisceret, illigaverant, ad Romanæ Ecclesiæ communionem transiisse: quod nati pientissimi animo non mediocrem luctum doloremque incussit; eò quidem acriorem redditum, cùm post reperisset illam, utpote feminam pervicacem & obstinatam, nullis suasionibus, argumentis nullis ad sanam mentem revocari potuisse. Hi quidem zelotæ de victoria, fraudulentis malisque artibus reportata, triumphos egere, & *Usserio* hanc matris obstinationem, quam constantiam inflexilemque mentis firmitatem interpretati sunt, editis libellis exprobrarunt: sed quàm iniquè, quàm absurdè, judi-

(a) De reliquis illius scriptis vide D. *Jacobum Waraum* de Scriptoribus *Hiberniæ* pag. 86. & *Usserii Armachani* ad *Staniburstum* Epistolam primam in *Sylloge Londini* edita M. DC. LXXXVI.

judicent omnes æqui bonique amantes & studiosi. Non parum ipsi doluit, quod sacris Ecclesiæ negotiis in Urbe detentus, matri dilectissimæ in agone mortis *Drogheda* ex improvise fatiscenti non adesset, quo abiturientem animam, prius spiritualibus consiliis adjutam, precibus suis Deo commendaret: hoc tamen commodi ex malo domestico Ecclesiæ accrevit, quod ille novo quasi zelo animatus contra Pontificiorum insidias, ne alii, sive sanguinis, sive amicitiae, sive communi Christianæ charitatis nexu conjuncti, quorum salutem maximè consuluit, ab integra fide abducti, ista labe contabescerent, sollicitiore animo satageret.

Unicum habuit *Jacobus* fratrem, nomine *Ambrosium*, qui aliquanto tempore studiorum causâ apud *Cantabrigienses* commoratus est. Vir *Ambrosius Usserius* fanè Linguæ Hebræicæ & Arabicæ quoque, admodum peritus, quod testatur, qui, ex intima consuetudine optimè & noverat, & judicare potuit, *Gulielmus Eyrius*, Collegii *Emmanuelis* in ista Academia socius, in literis (a) ad *Jacobum* circa annum MDCVIII. scriptis; testatissimum verò faciunt magna V. Instrumenti pars ex Hebræico codice in Linguam Anglicanam versa, *Surata Cavernæ* ex Alcorano Latinè reddita, Collectanea Arabica & Hebræica, & Lexicon Arabicum (ut hîc quosdam tractatus & disputationes de variis capitibus Theologicis omit- tam) quæ in Archivis Bibliothecæ Collegii S. Trinitatis *Dublin.* hodie supersunt: à quo, ex editis hisce reconditæ eruditionis speciminibus, uti ex bonis primitiis lætam amplamque segetem, summa quæque, & excelso, quo præditus erat, ingenio perquam digna, expectarunt amici, nisi illum annis juvenilibus mors peracerba præripuisset.

Quod ad propinquos *Jacobi* nostri ex paterno genere ortos spectat, *Henricus* patrum habuit *Henricum Usserium*, Theologicis disciplinis *Cantabrigiæ* innutritum, & aliquanto tempore studiorum causâ *Parisiis* morantem, *Henricus Usserius* Deo & Ecclesiæ ex ordinatione sacra devotum, qui tandem cùm multos annos Archidiaconatum Ecclesiæ *Dubliniensis* administrasset, ut quod *Arma-* rarum & insolitum erat, Reginæ *Elisabethæ* auspiciis & indulgentia, ob *chanus.* sapientiam, sanctitatem morum, eruditionem, reliquasque dotes, tam excelsæ dignitati pares congruasque, ad primatiam sedem *Arma-* *chanam*, mense Augusto A. C. MDXCV. promovebatur;
 B obiit

(a) Exstant in Sylloge epist. III. Interea vero loci, agnosco me valdè obaratum esse, & tibi, & doctissimo fratri tuo, Ambrosio, qui peritissima manu sua quadam in meum usum ex Alcorano Arabicè exscripsit. pag. 3.

obiit verò Aprilis II. MDCXIII. Crimen piaculare non immeritò videbitur , si hîc penitus tacerem , quantum de universa Gente & Ecclesia *Hibernica* meruerit vir ille reverendissimus.

*Henrici
Usserii
Laudes.*

Non defuere quidem in *Hibernia* , qui in summis dignitatibus constituti , ad fortunas sive augendas , sive reparandas , latifundiis patrimoniisque sacris avidissima mente inhiaverint. De Ecclesia Cathedrali S. *Patricii* penè actum fuerat , cujus redditus , sub plausibili & specioso eodem fisco regio addicendi prætextu sibi in proprios usus *Perottus* *Deputatus* , uti appellatur , convertere studebat ; nisi intercessisset Reginae pietas , & *Henrici Usserii* , tunc temporis Archidiaconi *Dubliniensis* , prudentia & sedulitas , qui missus à Decano aliisque , quorum maxime intererat , in *Angliam* , istius Ecclesiae jura adeò dilucidè & tanta argumentorum vi tutatus est , ut dirum istud omen , malis , in plerasque omnes redundaturis , gravidum , penitus averteretur. Sed non multò post sanctior cura , (si quidem sanctior dari potuit) longè ve majoris momenti , illum occupavit. In condenda enim Academia *Dublinensi* lentè admodum per plures annos processum erat , etiamsi optima Regina id in documentis duobus Proregibus , alteri post alterum , in *Hiberniam* ituris , dedisset ; ex difficultatibus , quæ subindè intervenerunt , haud facilè superandis , longæ necebebantur moræ ; quarum tandem pertæsum est omnes , quibus hoc sanctum propositum , è quo *Hiberniae* felicitas pendebat , curæ & cordi erat , & qui assiduis postulationibus rem istam urfere. Ideo Consiliariis *Hibernis* , quicquid hac de re , crebris seriisque consultationibus habitis , hætenus inter ipsos convenisset , Reginae cum debita commendatione , ut dixi , referre visum est , ut ipsa consentiente ratumque habitura , hisce optimis conatibus , quibus omnes boni benè cupiebant , ingrata cunctatione hucusque productis , felix imponeretur coronis , nec quenquam alium , qui causam istam coram Regina , Consiliariisque *Anglis* ageret , *Henrico Usserio* tunc temporis , cujus fides & sapientia ipsis erant exploratissimæ , aut digniorem , aut magis idoneum reperiri posse , hi Summates censuerunt. Ille verò itinere in *Angliam* maxima animi cum lætitia , A. MD. XC. suscepto , nullis parcens sumptibus , nullosque labores subterfugiens , ita strenuè & præclarè isthoc munere functus est , ut (a) chartam foundationis tricesimo die Martii A. MDXCII. datam , &

Regio

(a) Vide epistolam CXLV *Jacobi Usserii Armachani* ad D. *Gulielmum Lausdum* , tunc temporis Episcopum *Londinensem* , in *Sylloge*.

Regio sigillo munitam , tandem auspiciatissimè impetraverit , cujus certissima spe fretus , in patriam redux , immortalis hoc beneficio jam donandam , summis omnium gratulationibus excipitur. Reliquit *Henricus* filium *Robertum* , paternæ eruditionis & pietatis ex asse hæredem , qui in isthoc Collegio educatus , inque sociorum numerum adscriptus , postea ex commendatione Consobrini sui , *Jacobi* nostri , & insigni elogio illius virtuti debito , & quod ipsa veritas , nullo respectu ad cognationem habito , exegerat , quod dederat (a) in literis ad D. *Laudum* , qui multum in rebus ad Ecclesiam Academiæque disciplinam apud Serenissimum Regem , *Carolus I.* potuit , & unanimi sociorum consensu , præfectura istius , A. MDCXXIX. donatus est. Hic vero , quinquennio elapso , ad Episcopatum *Kildariensem* merito suo evectus , se sacrâ infulâ fidei pastoralis curæ administratione omnino dignum præstitit. Tandem ex crudelissima & quàm maximè execranda *Hibernorum* Pontificiorum rebellione & laniena eluctatus , in *Angliam* , insanis motibus tunc agitari incipientem , aufugit , ubi summis ob patriam , horrendum in modum desolatam , mœroribus confectus , vergente ad finem anno MDCXLII. *Pontabirsleia* in provincia *Salopiensi* diem suum obiit.

Non hic prætereundum est silentio , quod *Jacobus* noster familiarari apud amicos sermone , tanquam singulare & rari exempli , commemorare solebat , nempe sibi duas Materteras , an vitio naturæ , an morbo , incertum , ab ipsis cunabulis omni oculorum lumine , & usu carentes , obtigisse , quarum institutione & cura , dum puer erat , legere edoceretur. Quod quidem intellectu haud facile videtur , nisi dixerimus , illum , nominibus figurisque literarum , non prorsus incognitis , quomodo in syllabas & verba connecti debeant , ab iisdem , aut vocem moderantibus , aut malam lapsantis linguæ pronunciationem corrigentibus , didicisse. Illæ verò , quod aliis quoque cæcis frequenti usu venit , adeò felici tenacique pollebant memoria , ut aliquam multa integra sacrarum Scripturarum capita absque aliquo errore & cæspitatione , rogatæ experiundi causâ , repetere valerent. Hisce præloquiis defunctus , ad pressiore vitæ *Usserii* nostri historiam venio.

Prima fuit cura parentibus , quibus exploratum erat , semina pietatis ac reverentiæ erga sanctissimum Numen exhibendæ , in ipsis primæ pueritiae studiis.

ritiæ temporibus, jacta, in bonam frugem maturioribus annis adolescere, characteresque in animo, vanis falsisque præjudiciis & opinionibus vacuo, tanquam in rasa tabula, impressos signatosque, vix, aut ægrè quidem, obduci & obliterari, aut posse, aut solere, ut illius mens sensu religionis, ab omni superstitionis labe purgatæ, quantum tenella ætas ferret, imbueretur: proxima verò, ut doctrinæ, quæ puerilibus annis convenit, rudimentis erudiretur. Cujus exquisitæ educationis fructus postea per universam vitam maximè erat conspicuus. Nemo enim sacre religionis instituta sanctiori zelo excoluit: nemo bonarum literarum studia impensiori diligentia profecutus est.

Octo annorum puer ad Scholam Grammaticalem, sub cura & institutione Fullertoni & Hamiltoni.

Octennis, quasi jam domesticis institutionibus superior, ad scholam Grammaticalem, quæ tum in Urbe natali, sub cura & disciplina duorum nobilium *Scotorum*, *Jacobi Fullertoni* & *Jacobi Hamiltoni*, inclarescere cœperat, missus est, linguâ Latinâ erudiendus.

Commodum enim accidebat, ut quo tempore Urbs ista ingenti Ludimagistrorum inopia laboraret, hi Advenæ humaniori literaturâ perpolitati, quo rem illam maximi momenti, cujus causa ex patria huc migrassent, meliùs celarent, laboriosum istud docendi pueros & adolescentes munus in se susceperunt; hoc modo, tum industria sua laudabili, tum suavissimis moribus, blandisque artibus, in gratiam *Anglorum* & *Hibernorum*, cujuscunque sortis & conditionis, sese insinuaturi. Vera enim itineris suscepti ratio hæc fuit. Serenissimus *Scotorum* Rex, *Jacobus*, istius nominis sextus, de successionem ad *Angliæ* & *Hiberniæ* regna ineunda, quæ post obitum *R. Elisabethæ*, omni jure, tam divino, quam humano, illi competebat, impendiò sollicitus, veritusque, ne aut malefantis technis aut aperta vi & armis Pontificiorum, aliorumve, qui novis rebus studerent, moræ & difficultates, haud facilè superandæ interponerentur, secundum gratiam benevolumque affectum Reginæ, à nominando successore, ut illum magis redderet obnoxium, præfractè quidem abhorrentis, (neque enim, ut sæpe solebat, suo more, h. e. perquam elegantidicere, *sepulchrale lintheamen sibi coram oculis perpetuò objici* sustinuerit) non solum *Anglorum*, præsertim Aulicorum, animos quoquo modo conciliare, sed *Hibernos* tum veteris tum novæ prosapiæ, à quibus non leve ob diversos mores & similitudines inter *Scotas* & *Hibernos* olim à longo tempore ortas, & usque productas, & ob durissimam in patriis ritibus retinendis obstinationem, impendebat periculum, in suas partes trahere omni nisu contendebat. Sub hac larva, *Fullertonus* & *Hamiltonus* in *Dubli-*

nium tanquam tutelares genii, qui liberis probè & feliciter educandis præ-
essent, recepti, clam Regis sui causam egère & tutati sunt, initâ cum
nobilissimis viris, sive Romanæ, sive Reformatæ Communions, qui
aut propè & in vicinis Regionibus ampla possederant latifundia, aut ne-
gōtiorum forensium causâ, illuc subinde convenerant, amicitia. Non
parum sapientissimis R. *Jacobi* consiliis in ista Insula promovendis condu-
cebat, illorum explorata fides, solers prudentia, & sagax ingenium: quod
benè noverat, & expertus est Rex ipse, illos, prout meruere, longè
splendidioribus dignitatibus, quibus sustinendis erant pares, admoturus.

D. *Fullertonus* mox à Rege *Jacobo*, jam primo *Magnæ Britanniae* Monar- *Fullerto-*
châ, dignitate Equestri ornatus: deinde primus è cubiculariis secundi Or- *nus &*
dinis serenissimi *Caroli*, tum Principis *Walliae*, tum Regis constitutus: in- *Hamilto-*
ter *Aulicæ* vitæ pompas & delicias consummatæ virtutis exemplum ubivis *nus à Re-*
dedit, famæ satur, licèt non annorum, (non enim senilem ætatem attin- *ge Jaco-*
gebat) magnum sui desiderium reliquit, in sacello *Paulino* in Abbatiali quo be-
Ecclesia *Westmonasteriensis* honorificè sepultus, cujus pene invidendas lau- *ne me-*
des in eleganti Marmore ad borealem murum affixo incidi curarunt super- *ruerant,*
stitites Amici. Alter verò D. *Hamiltonus*, primò ad parem Equestrem *ad digni-*
dignitatem, deinde verò ad titulum, gradum, & honorem Vice-Comi- *tates*
tis de *Clandebois* in *Hibernia* evehebatur. *promoti.*

Sub hisce Magistris Discipulus, tam bonæ indolis tantæque indus- *Usserii*
triæ, in bonis literis non potuit non proficere quotidie: nec opus erat *in bonis*
stimulis, quibus ad pensum illud diurnum, quod imperatum fuerit, ab- *literis fe-*
solvendum incitaretur. Illorum præceptionibus avida aure & mente ali- *lix pro-*
quatenus capaci imbibitis, post comprehensas digestasque Artis Gramma- *gressus.*
ticæ & Rhetoricæ regulas, expeditumque Linguae Latinæ usum, classi-
cis Auctoribus, Poetis, Oratoribus, & Historicis assuefieri jam inci-
piens, hisce fundamentis jactis, planam facilemque fore ad eruditionem
viam sentiebat: semperque hanc felicitatem sibi gratulatus, illud inter
benignioris Providentiæ munera recensere solitus erat, quod in tales Præ-
ceptores felicissimo auspicio incidisset, quos, dum vixerint, omni cum
debito honore prosecutus est, quorumque memoriam charam habuit,
meritissimisque elogiis ex grati animi tenerrimique affectus sensu exornavit.

Cùm verò integrum quinquennium, in scholâ, sub sapientissimorum
Præceptorum disciplina, acquisita præcoci ingenii laude, explevisset
Usserius, inde ad novum, illudque nobilius, altioris doctrinæ semina-
rium ex consilio eorundem transplantatur.

Collegii
Dublini-
ensis Sta-
tus.

Anno MDXCIII. Fabrica Collegii *Dubliniensis*, de quo supra egi, sanctissimæ & individux Trinitatis honori & gloriæ dicati, absoluta, cujus præfectura pro tempore primo fungi dignatus est reverendissimus Vir, *Adamus Loftus*, Archiepiscopus *Dubliniensis*. Primus autem Cancellarius *Gulielmus Cecilus*, Baro *Burghleins*, *Angliæ* Thesaurarius, ob summam in rebus maximi momenti administrandis prudentiam, optimè de Regina *Elisabetha* & patriâ meritis, æternis elogiis memorandus. De sociis alumnisque, qui in justam societatem, juxta chartam foundationis, coalescerent, eligendis admittendisque erat deliberatum. Non amplum studiosorum numerum primò illic recipi passus est novellus iste & incompositus Collegii status, qui subinde auctis redditibus, erat augendus. Non plures enim focii, quàm quatuor in ipsis initiis admittebantur, qui Philosophiam, aliasque liberales Scientias docerent; viz clarissimi & doctissimi viri, *Lucas Challonerus*, *Gulielmus Daniel*, *Jacobus Fullertonus*, & *Jacobus Hamiltonus*, quorum duo posteriores nuper, ut paulò ante memini, scholæ fuerant meritissimi Rectores. Cùm verò ad Alumnos substituendos deventum fuerit, Commissarii, penes quos erat harum rerum cura & arbitrium, *Usserium* nostrum admittendum esse, illiusque nomen in matricula, certa & fidei rerum gestarum custode ad seram posteritatem continuanda (a) inter primos inscribendum maxima cum animorum conspiratione statuere: quod quidem ab iisdem consultò factum fuit, tum ut se erga Avi materni, qui hoc Collegium exstrui oportere olim in Comitibus Parlamentariis proposuit, memoriam, tum erga Patrum, ex cujus indefessa diligentia ad auspicatissimam hujus sancti propositi consummationem non leve accesserat momentum, gratos præstarent, tum ut nascenti Academiæ novus exurgeret splendor ex tali Alumno, ingenii dotibus longè supra ætatem cumulatissimo, de quo lætam, eamque firmam spem optimæ frugis inde proventuræ ex ejusmodi primitiis primordiisque concepissent, quod Deo Opt. Max. vitam prorogante, non solius *Hiberniæ*, sed totius etiam *Europæ*, lumen & ornamentum esset evasurus.

Inter
primos
alumnos
admissus
Usserius.

Usserius jam ex angustis ludi literarii parietibus ad liberaiora Collegii spatia subductus, dum Logices & Philosophiæ *Aristotelicæ* institutionibus, prout ratio disciplinæ exigebat, sub regimine D. *Hamiltoni*, cujus fidei &

(a) V. Epistolam D. *Usserii* ad *J. Hevelium Londini* Kalend. Novembr. 1650. datam: Epist. CCXL. Hoc autem ordine tres alumni primum soli admissi erant, ut D. *Warrens* in Annalibus suis refert, viz. *Abel Walsh*, *Jacobus Usher*, & *Jacobus Lee*.

& curæ à Parentibus peculiarem in modum erat concreditus, sedulam navaverit operam, lectioni historiarum, ad quam potenti naturæ genio, mirè propendebat, horas subcesivas impendit. Interim celari neutiquam In pri-
debet, huic pertinaci studio tum poeseos, tum chartarum lusoriarum mislite-
amorem, sive ex æmulatione sive ex sodalium lenociniis sensim irrepentem, frigidam suffudisse: sed mox recollectis animi viribus, præstitioni
giatricem istam artem, omnemque lusum, quibus utrisque ab utilissim-
is maximique momenti rebus serio prosequendis mens planè averti-
tur, adjutrice divina gratia, penitus excussit, nunquam ad ejusmodi rum ad-
studiorum oblectamenta, vel potius impedimenta, postea reversurus. dictus.
Dum verò præclarissimam istam *Ciceronis* sententiam, *Nescire*,
quid antequam natus sis, acciderit, id est semper esse puerum, animo sæ-
pè sæpius volvisset, illiusque veritate percepta, aureum illum *Sleidani*,
de quatuor summis imperiis, libellum ingenti cum delectatione legisset,
ab isthoc tempore, vitæ secuturæ, si Deus dederit, cursu, reliquis
studiis non insuper habitis, omnium seculorum historias, tandem ali-
quando complecti apud se constituit. Prodigio simile videbitur, ado-
lescentem præter propter quatuordecim annorum res maximè memo-
rabiles juxta seriem temporum ex libris historici argumenti, quos
nancisci licuit, in facilem synopsin contrahere potuisse; quæ, licèt
vix quicquam accurati & pensî continere rigidis censoribus habeatur,
& cujus fortassè ipsum postea puduit, ipsius tamen solers &
acre ingenium, industriam igneumque mentis vigorem, luculento ist-
hoc documento, quod in ista ætate neutiquam erat expectandum,
ostendit.

Crescentibus annis, vitæ piè juxta S. Scripturarum, quas summa Summa
reverentia erga istum *Librum Librorum*, uti appellare solebat, impul- reveren-
sus, assidua manu versavit, normam agendæ, studium quoque pari- tia erga
ter crevit: quod expiorum librorum, & præsertim *Meditationum* S. Au- S. Scrip-
gustini, frequenti lectione aluit; inde occasione de rebus divinis sacrif- turas ac-
que Religionis Christianæ officiis, quod præcipuum erat, recolendi cap- census.
tata, ut dum cæteri, aut lusibus, aut deambulando simul se se re-
creaverint, ille solus, sive in avia, sive juxta ripam fluminis non rarò
secessit, cœlestium rerum contemplationi intentus, præcipuè verò,
pro more solenni, nec intermittendo, pridie, antequam ad sacram
synaxin accedens, sacrosancta Eucharistiæ symbola esset perceptu-
rus.

Artium
Bacca-
laureus
XVII.
ætatis
anno in
contro-
versias de
dogmati-
bus The-
ologicis
agitas
inquirere
cœperat.

Anno ætatis decimo septimo gradum Baccalaureatûs in Artibus juxta formam statutorum capeſſivit : circa quod tempus & deinceps, haud modica linguarum Græcæ & Hebræicæ cognitione, prius acquisita, de ſententiarum & opinionum, quibus variæ Chriſtianorum ſectæ, in ſacris inter ſe commiſſæ erant, divortiis & diſſidiis mœſtus & ſolicitus, quo melius quale quale judicium, quatenus Veritatis amantem & ſtudioſum in iſta juvenili ætate decuit, libratis rerum momentum, informaret, controverſiarum, quæ tum acerrima cum mentis contentione alterutrinque agitentur, præcipuæ notæ libros ſtudioſè pervolutavit. Vix quippiam laudis in ſe continere videbatur, communionis Reformatæ, quam amplexus eſt, profeſſionem ſolis natalibus, caſui, primæ educationi, aut præceptis & exemplo aliorum, ſine aliqua exploratione, deberi. Veritas quippe, quo ſeverius examen ſubit, eo magis diligitur, mordicusque retinebitur, cùm nihil tam certum ſit, quod omnes experiundo fatentur, quam quod ex dubio certum & teſtatiffimum eſt. Quod quidem *Uſſerio* opportunè & feliciter admodum ceſſit. Ne verò partium ſtudio admiſſique præjudiciis ſibi illuſiſſe, aut nimium facilè credere, quicquid animo allubuerit, videretur, Romanarum partium maximi nominis Theologos, & præcipuè *Stapletonum* noſtratem, (cujus librum Anglicè editum, inſcriptumque, *Fortalitium fidei inter Anglos primum plantatæ*, plusquam ſemel legebat) conſulere non recuſavit, imò potius prompto animo geſtiebat. Non diu animi dubius hærebat, ſed indies confirmator factus, veritatis Evangelicæ dogmata contra eorundem ſtrophas certa ſcientia doctoque zelo ex ſacris ſcripturis ſeriatim meditatione inſtructus, pro re nata tueri non ſegniter detrectavit. Cum verò *Stapletonus* iſte veteris Eccleſiæ Chriſtianæ cum hodiernæ Eccleſiæ Romanæ placitis concordiam & conſenſum in Patrum ſcriptis ubivis comparere venditaſſet, intentato noſtris graviffimo novaturiendi in rebus fidei & doctrinæ reatu, ille ex cauta & ſapienti ſuſpicionem veritus, ne jaſtabundus iſte Patrum, quos ubivis crepat, teſtimonia, aut falſa pro veris ſupponendo, malè citaret, aut in alienum ſenſum detorquendo pejus interpretaretur, omnium Patrum, quotquot exſtabant, ſcripta, tandem aliquando accuratè perlegere obfirmato animo ſtatuebat, tam in Doctrinæ Chriſtianæ puritate per continuam ab Apoſtolorum temporibus ſucceſſionem ad Concilium *Tridentinum*, cùm nondum typhus ſecularis & ſuperſtitio in Eccleſiam Occiden-

dentalem fraudibus & tyrannide *Romanorum* Pontificum irrepsissent, exploranda, quàm in Historiis sacris & profanis, Antiquitatibusque *Britannicis* investigandis, futuræ vitæ labores & studia per Dei gratiam impensurus: quod illum optimè fecisse, ex libris in lucem editis, universo orbe Christiano consentiente, abundè liquet. Sed nolo argumentum hoc intempestivè præoccupare, quod commodiori loco tractabitur.

A. MDXCVII. illustrissimus vir, *Robertus*, Comes *Essæxiæ*, à Regina *Elisabetha* ad regendam *Hiberniam* summa cum potestate missus, *Dublinium* appulit. Non multò post, à primoribus novellæ Academiæ, cujus erat Cancellarius, solennibus Comitibus, honoris causâ, indictis, invitatus, facilis annuebat, orationibus utpote gratulatoriis, disputationibus, reliquisque exercitiis Scholasticis, prout par erat, excipendus. Inter cæteros *Usserio* provincia quasdam theses ex interiori Philosophia petitas defendendi erat demandata, quam multa cum Proregis & illustrium Auditorum coronæ laudè & applausu sustinuit & ornavit, inde ob volubilitatem linguæ, ob disputandi subtilitatem, & denique ob ingenii in profunda sensuum penetrantis acumen, in majore existimatione habitus.

In hoc laudatissimo stadio haud intermissis gressibus procurrentem stetit ex improvise casus, qui illum à composito mentis statu penè dejecit, pectusque gravissima ægritudine opplevit. Cùm enim ille clam & secretò, non voto quidem solenni, sed firma destinatione, quantum ipsi, nondum à Parentis tutela & potestate emancipato licuit, se Deo & Ecclesiæ addixisset, Pater ingenii & industriæ illius fama excitus, deque futuris bonis fortune augendis non parum sollicitus, de illo in *Angliam* mittendo cogitat, ut ibi legum municipalium, quarum accuratior severiorque cultura opes, honores, & adpromittere & largiri solet, studiis, praxique Curiarum incumbens, earumque profunda mysteria subtilissimosque apices septennali mora edoctus, in Patriam redux, Patroni & Advocati in Causis forensibus agendis partes majori tum commodo tum fama sustineret. In hoc conflictu, quid agier oportuerit, non adeo proclive erat statuere. Propositum fanè istud reluctante animo & averissima aure primò excepit *Usserius*: sed pietas jussit, ut paternis consiliis monitisque, quibus neutiquam erat obsistendum, obsequeretur. Ideo se itinèri *Anglicano*, prout commodum videbitur, accinctum promptumque fore spondet, divina bonitate confisus, aut Patrem

Sed Patre
mortuo,
aliud vi-
tæ insti-
tutum
eligit.
In so-
cium
Collegii
electus
& ad-
missus.

trem mutaturum esse istud consilium , aut res novas , quæ destinatum *istud iter* præcludere possent, inde emeruras. Interim Pater hoc anno viz. MDXCVIII. ultimum diem suum obiit, non sine magno piissimi filii luctu , qui jam invitus licèt , ex hoc peracerbo fato , sui juris factus , post funus elatum , de instituto & professione vitæ non longa aut perplexa deliberatione opus habuit. Jam enim omnibus remotis obstaculis , in numerum sociorum Collegii adscitus est : qua quidem in eruditam istam societatem admissione , in perpetuum , sub æquis conditionibus , duratura , nihil sibi gratius accidere potuit ; eò quod jam inde Theologiæ operam navandi , & sacerdotale ministerium præfinito tempore suscipiendum obeundi , quod diu animo infixum habuerat , desiderabilis quædam necessitas illi , ni jure suo cessurus esset , fuerit imposita. Obtigerat paulò antè ipsi jure primogenituræ lauta hæreditas : in qua herciscenda & administranda , cùm sensisset gravissimam istam negotiorum civilium , quibus erat penè obruendus , molem , cum vitæ contemplativæ otio & tranquillitate consistere neutiquam potuisse , litesque de quapiam parte peculii intricatas , & in foro decidendas , à quibus , si quis unquam , maximè abhorrebat , subinde nascituras reperiò perpensa & cum Amicis communicata , jus suum transcribit in Patrum reliquosque fideicommissarios , ut juxta ultimas Testatoris tabellas matri , fratri , septemque sororibus meliùs commodiùsque provideretur. Ne verò quippiam hac ex parte temerè , imprudenter , & inconsultò fecisse , rigidis censoribus , quasi omnem sui ipsius curam abjecisset , videretur , certam annui redditus in proprios usus , tum ad emendos libros , tum ad alia vitæ commoda , proportionem reservavit.

Haëtenus magnam de se inter amicos & familiares excitavit expectationem *Usserius* : quæ mox apud omnes cives *Dublinienses* magis magisque crevit , & latè propagata est , ex superveniente hoc , qui sequitur, casu.

A. MDIC, *Henricus Fitz-Simon*, Jesuita *Hibernus* ob spretas violentasque regni leges in pervertendis subditorum mentibus à religione publica auctoritate stabilita , occupatissimus , in arce regia tunc temporis detinebatur. Ille verò utpote vir profusæ loquentiæ & projectæ audaciæ , atroci & immani Ecclesiæ Romanæ placita propugnandi zelo agitat , inconditis clamoribus & perfrecta jactantia quoscunque Reformatæ Communionis Mystas ad disputandum provocavit : se ipse *Urso* assimilans , qui *palo depactus* , à canibus exagitari gestiebat. Istorum

tem-

Disputa-
tionem
cum
quodam
Jesuita
init.

temporum historiam retexere aut narrationem istam de hisce velitationibus, in Epistola dedicatoria ad *Claudium Aquavivam*, aut in præfatione ante Librum, qui, *Britannomachia Ministrorum in plerisque & fidei fundamentis & fidei articulis dissidentium*, post quatuordecim annos * editus * *Duaci* in 4. 1614. inscribitur, ab ipso conscriptam, ineptulis cavillationibus, calidis mendaciis, putidisque convitiis in viros clarissimos, quos Antagonistas habuit, effusis, in examen revocare, utpote omninò præter hujusce commentationis, quam aggressus sum, institutum, neque libet, neque convenit. Ea sola, quæ de *Usserio* nostro, nomine licet celato, promit, hîc integra, appositis quidem breviculis stricturis censurisque exhibebo.

Prodiit quidem semel in summa vocis vultusque trepidatione, octodenarius precocis sapientiæ (non tamen male, ut videbatur, indolis) juvenis, nescio, an auræ popularis cupidior, saltem de abstrusissimis rebus Theologicis, cum adhuc Philosophica studia non esset emensus, nec ephæbis egressus, disputandi avidus. Hunc autem jussi suorum calculos adferre, quibus pugil seu agonista idoneus renunciaretur, & vel cum ipso disputationem me initurum. Sed sicut ipsi cum minimè tanto honore dignati sunt, ita me vicissim sua deinceps præsentia dignatus ipse non fuit. Ita ille, qui in multis corrigendus est. Sic enim res ista se habet.

Cum duo tresve è nostris Theologi, & ætate & dignitatibus Ecclesiasticis venerabiles, quos ille pro modestia sua *Pseudo decanos* nuncupat, experti primo congressu, ex istiusmodi tumultuariis altercationibus cum loquacissimo Sophista habitis aut habendis, non quasi illi certamen hoc inire, quod ille perabsurdè fingit, præ metu detrectassent, vix quicquam commodi fructusve percipi potuisse, illius insaniam castigare, calumniasque refellere apologiis publici juris factis, maluissent, in arenam descendit *Usserius*, juvenis novemdecim annorum, non sibi fidens placensve, non δέκναι σοφίας aut vanæ apud Populares suos captandæ gloriæ cupidus, sed solo Veritatis amore, quo totus ardebat, exstimulatus, cum isthoc *Thrasone* manum conferturus. Quo conspecto, fastu excandescens, præ indignatione infrenduit *Simonides*, exprobrataque illi recenti juvenia, contemptim *Puerum* appellavit: licet illo non pluribus quam undecim aut duodecim annis natu prior fuerit. Sic eadem impotenti ira contumeliosisque dictæriis pusillum *Davidem*, fortassis non majoris ætatis, laceffivit *Philistæorum*, qui, *Israelis* agminibus exprobravit, pugil. Sed hunc *Puerum* in hac pugna non terga vertentem,

non segnem , aut meticulosum invenit Adversarius , sed acrem ; ictibusque repetitis insistentem , sed intrepidum bellatorem , causam religionis , pari tamen modestia & vocis moderatione ac lenitate , propugnantem , quam ille *summam vocis vultusque trepidationem , inverecundè & perversissimè* interpretatus est. Illius autem arbitrio reliquit , de quibuscunque controversis Theologiæ articulis , prout à *Bellarmino* erant dispositi , vel qualicunque methodo , ad omnem confusionem , quæ aliter esset oritura , amoliendam , disputationes futuras instituire , ut de veritate illorum , in quam partem se inclinaverit , Auditoribus , qui intererant , aut interesse discuperent , meliùs & dilucidius constaret. Inter utrosque primò concordatum fuerat , ut concertationes istæ à dogmate de *Antichristo* inchoarentur , semel singulis septimanis ex pacto repetendæ. Sed finita primâ , Jesuita , qui exindè triumphos sibi ab Agonothetis decerni animo priùs concepisset , metuens , uti conjecturam facere videtur , de illo potius triumphandum esse , longas moras neçtit. Ideo *Usserius* literis , (utpote quarum apographum apud se reservaverat) quæ miram prorsusque ingenuam pietatem totæ spirant , ad illum scriptis , improperium de ipsius *pueritia* impactum diluit , se nullam justam inde occasionem , cur hac de causa tantopere fastidiretur , dedisse , exemplo *Davidis* cum *Goliatho* pugnaturi , non suis viribus fretum , *venisse in nomine Domini , qui ex ore infantium & lactentium propter inimicos ipsius perficere laudem interdum solet* : cùm nullas ab illo , prout discedenti spoponderat , literas hætenus accepisset , jam cupere certiores fieri , an collationem promissam susceptamque renovare vellet : sin minus , quicquid hucusque alterutrinque gestum fuerit , publici juris fieri oportere. *Simonides* verò jam conscius , quod audacissimis , iisque crebrò repetitis , provocationibus , sibi nodos haud facilè explicabiles innexuisset , à respondendo prorsus abstinuit , & quasi saucius à vulnere , nuper inflicto , ab omni futuro certamine se subducens , non amplius in scenam prodire voluit : ne verò à causa cadere , aut propriæ existimationi apud suos defuisse videretur , se , proposita , quam supra retuli , conditione , & cum illo , h. e. puero , *disputationem initurum* , & quidem falsò , obtendit. Quod planè merum erat ἡρσφύγετον , non enim opus erat alienis calculis , quod subdolè postulavit , ut cum minori infamia ex nassa , in quam temerariis suis ausibus , incidisset , elaberetur , quibus *Agonista idoneus renunciaretur*. Ipse enim vires illius expertus fuerat , & si huic congressui omninò impar esset faciliorem de

Puero

Puero reportasset victoriam. Sententiam de *Usserio* hætenus in pectore suppressam dissimulatamque, sequentibus annis, vi Veritatis victus, clare protulit, & *A catholicorum doctissimum* fassus est. Hinc de istius elogi ipsi à *Philippo Alegambe*, nimis hac ex parte credulo, in *Bibliotheca Scriptorum Societatis Jesu* adscripti falsitate cuivis candido Lectore judicare licebit, quod ad certamen provocatus à quopiam inter ipsos doctissimo, cum condixisset diem, obtinere non potuit, ut tandem prodiret, ad pugnam gloriosus provocator.

A. MDC. Lauream Magistri in Artibus adipiscitur, & post aliquot annos, benè aucto studiosorum, ex omnibus regni provinciis *Dublinium* ad capiendos ingenii fructus confluentium, numero, fit, juxta disciplinam regimenque in *Anglia* institutum, primus Academiæ Procurator. Cujus muneris administrati, (a) ipse ad supremum dignitatis Ecclesiasticæ in *Hibernia* culmen evectus, non sine ingenti lætitiæ & voluptatis sensu meminisse visus est.

Laurea magistrali insignitus. Primus istius, Academiæ Procurator.

Ineunte novo seculo, priusquam vicesimum ætatis annum excessisset, à Primoribus Collegii, è quorum arbitrio totius disciplinæ & regiminis dispositio & ratio pendebat, *Usserio* catechisandi sive juniores Academicos in doctrina & fide Christiana instituendi munus, quod aliter præ humili de se opinione recusavisset, erat impositum: quo, ut majori cum Auditorum utilitate defungi posset, præcipuos sacre Theologiæ articulos, juxta communes locos, pro more istorum temporum, singulis septimanis in facello explicavit. Ita olim (b) *Origenes* ob exquisitam in sacris scripturis peritiam mirabilemque judicii in ipsa viridi juvenia sagacitatem, utpotè planè octodenarius in schola *Alexandrina*, eidem sacro Catechumenos instruendi officio ex mandato *Demetrii*, istius sedis Episcopi, admovebatur. Ex hisce Theologicis prælectionibus, uti ex privatis colloquiis, liquidò constabat, *Usserio*, præter solidam rerum sacrarum divinarumque intelligentiam & sensum, tantam copiam ordinatamque verborum structuram, & facilem expeditumque dicendi usum superpetiisse, ut aliqui ex amicis judicaverint, illum valdè idoneum esse, qui consensis rostris, in sacris cœtibus verba haberet: quorum tamen suavis neutiquam cedens, in publicum pertrahi volebat. Sed novis argumentis, quibus erat expugnandus, propositis, superiorum voluntati & jussibus

Anno MDCL. catechisandi munus in Collegio obit sustinetque.

(a) Vide Epistolam ad Archiep. *Laudum* in *Sylloge*. pag. 459.

(b) Εὐτος δ' ἦγεν ὀκτοκἀδεκάτον παρ' ὃ τῆς κατήχησεως πρόεξη διδασκαλίαν, *Euseb. Hist. Ecclesi.* lib vi. cap. 3.

Ille duo-
que alii,
ut publi-
co mu-
nere
concio-
natorio
funge-
rentur
selecti.
Hi au-
tem
erant
Walshius
& *Richardso-
nus*.

bus non amplius obsistere ausus est. Illis enim quantum utilitatis in uni-
versam Ecclesiam *Hibernicam*, imò in rem Christianam, in omne ævum,
ex novæ Academiæ fundatione redundaturum esset, hoc tempestivo,
ne dicam, præmaturo specimine, quasi in antecessum demonstrare, è re
sua fore visum est. Tres igitur Juvenes, magistrali laurea insigniti, ii-
que pietatis, ingenii, & doctrinæ fama insignes, selecti erant, qui coram
Prorege, aut, illo absente coram Justitiariis Consiliariisque Regiis,
(quos Anglicè vocant *the state*) subinde concionarentur, viz. *Usserius* nos-
ter, *Abel Walshius*, (*Valesius*) & *Joannes Richardsonus*: quorum singulis
distinctæ partes fuerant demandatæ. *Richardsoni* erat die Mercurii,
quasdam pericopas Prophetiæ *Isaia*, juxta seriem capitum, quoad lite-
ralem spiritualemque sensum, interpretari, & corollaria inde deducta ad
vitæ praxin applicare: de quo pauca hæc referre oportet; quod inter in-
signissimos sacrae Theologiæ Academiæ *Dubliniensis* Doctores non medio-
crem obtinuerit locum, & tandem sanctitatis, eruditionis, & sapientiæ
meritò ad Episcopatum *Ardachensem* fuerit promotus. Flagrante im-
pia & cruenta *Hibernorum* rebellione, perfugium in *Anglia* quæsit,
& invenit, ibique A. MDCLIV. senio confectus, naturæ concessit.
Vir sanè longè doctissimus, & in abditis scripturarum sensibus eru-
dis, inque sacra (a) Chronologia versatissimus: quod præclarissimæ il-
lius selectæ observationes & explanationes in V. Testamentum, & præser-
tim in librum *Geneseos* Annotationes, paulò post ipsius mortem, *Londini*,
MDCLV. *Folio*, inscriptæ D. *Usserio*: cujus literas ad edendum istud
opus hortatorias, quasi in auctoramentum præmiserat vir modestissimus,
faciunt testatissimum. *Valesius*, qui postea doctoratu in facultate Theo-
logica auctus erat, summa quæque Theologiæ capita, è scripturis sacris
& ex divinæ illius scientiæ fontibus diebus Dominicis tempore anteme-
ridiano exposuit & explicavit. *Usserius* verò, post confirmatam dog-
matum religionis in articulis doctrinæ & fidei Ecclesiæ *Anglicanæ*, legi-
bus stabilitæ, veritatem, & errores superstitionesque *Romanensium*, se-
quioribus sæculis introductas, redarguebat, salutaribus verèque Christia-
nis monitis, quibus omnes, quotquot interessent, non solum in sancta
fide

(a) D. *Usserius* in altera *Annalium* parte, editionis *Parisiensis* 1673. pag. 620.
*Publici Christi ministerii Acta per quatuor Paschata distincta ex quatuor Evangelio-
rum harmonia hic exhibemus, à Viro eruditissimo & in Sacrarum literarum studiis
longè exercitatissimo, Joanne Richardsono, S. Theologiæ Doctore, & Ardachadensis
in provincia nostra Armachana, Ecclesiæ Episcopo dignissimo concinnata.*

fide magis magisque instructi, sed meliores, & vita & moribus sanctiores redderentur, in coronide additis. Sed non multò post, mentem valdè dubiam perplexamque habuit, an ipse hanc necessariam sacri Ministerii partem diutiùs obire salva conscientia potuerit nec ne: ut pote cùm nondum ob defectum legitimæ ætatis ex rigore canonum fuisset sacris ordinibus initiatus. Parum conducebat dixisse illud per modum *probationis & exercitationis*, sive experiendi tum mentis tum corporis vires causa, factu licitum reddi. Ut ergo scrupulus iste, quo distinebatur, animo penitus eximeretur, dispensatione, quam iidem canones casibus extraordinariis, quando nimirum defectus iste reliquis omnibus dotibus requisitis abundè suppletur, indulgere solent, facilè in ipsius gratiam impetrata, à Patruo, reverendissimo *Henrico* Archiepiscopo *Armachano*, eodem tempore & ad Diaconatum & Presbyteratum, Dominica ante festam Natalis *Christi**, tunc solenni juxta institutum Ecclesiæ ordinatione facta promovetur,

Usserius
Diaconus &
Presbyter ordinatus.

Hoc Apostolico auctoramento munitus, & quasi cœlesti vigore animatus, ad sacrum istud opus, paulò intermissum, se alacriùs fortiùsque accingit, lucrandis *Christo* animabus, & Veritati Evangelicæ inter gentiles suos, avitæ superstitionis præjudiciis miserè delusos & occæcatos, propagandæ, si quis unquam, impendiò intentus. Ab hoc tempore, & deinceps, per universum vitæ curriculum, ut illud, licèt loco & tempore non suo, assumpta prolepsi, referam, quamlibet concionandi occasionem, sæpe non rogatus, captavit: quo frequenti & assiduo usu post hac ingentem argumentorum vim, quæ, tum ad suadendum morigeris, tum ad revincendos refractarios ab Oratoribus adhiberi solent, prout instituendorum intellectus lumine, ut vitæ Christianæ officia clarè percipiat, aut conscientia stimulis, ut ea præstet, indigere videatur, venustatemque & facilitatem pronuntiandi, vehementi ardore commixtam, sibi comparavit. Hac autem facultate prædicandi, sive *Charismate*, ut quibusdam placet, si tamen hoc ævo ita appellandum sit, quod, divina gratia adjuvante, industria, studio, solertia mentis, arte, methodo, tenacique memoria acquiritur, utendi, illudque in commune bonum impendendi mox justissima dabatur opportunitas.

* Anno
MDCI.
Ab isthoc tem-
pore fre-
quens &
diligen-
tissimus
Conciorator.

Vergente ad finem hoc anno, exardescibat in *Hibernia* fœda rebellio, quam quidam Dynastæ Romanæ Religionis, clientelis & opibus præpotentes, arctissimo fœdere coeuntes; numeroso milite conscripto, conciperant, qui, militaribus copiis ex *Hispania* submissis, *Kinsaliam*, aliaque

Quorundam Procerum
Hibernorum, opitulantibus
Hispanis rebellio.
fini-

finitima munimenta, ope & prodicione civium, occupantibus elati, *Hiberniam* ex *Anglorum* imperio eripiendi altas spes in pectoribus aluere, & de universa suorum defectione, rebus tunc in præcipiti stantibus, mox secutura, mirificè sibi complacere, & blanditi sunt. Sed aliquanto post tempore, prudentia & fortitudine D. *Caroli Blunti*, Baronis de *Montjoy*, Proregis, rebellium vires erant prostratæ, ac *Hispani* profligati, qui ad deditionem adacti, non minori militum cæde ac ignominia, pactis conditionibus, *Anglicis* navibus revectorum ex insula discesserunt. Fortasse memoratu non indignum videbitur, eo ipso die, viz. XXIV. Decembris, quo prælium istud commissum erat, *Usserium*, quintiduo, postquam ritè ordinatus fuisset Presbyter, coram illustrissimis Consiliariis tunc ad supplicandum Deo pro felici istius expeditionis exitu solennem in modum congregatis, in prima verba Epistolæ ad Angelum Ecclesiæ *Sardensis Apocal. III. I.* directæ: *Scio opera tua, quia nomen habes, quod vivas, & mortuus es*, perorasse.

Ex hac insigni victoriâ opportunè reportata, post pauculas concussiones, quæ citò evanuerunt, tranquillitas *Hiberniæ*, utpote Ductoribus & Antesignanis rebellium, aut solum vertentibus, aut se ad sylvas, paludes, aliaque latibula præcipiti fuga recipientibus, aut depositis armis, agnito scelere, misericordiam implorantibus, tota pendere videbatur: sed ne exitiale hoc malum ex insano Romanæ superstitionis, quam gens obstinatissima, & hac de causa, ad seditiones & tumultus nimium proclivis, suis licèt juribus & possessionibus sub æquissimarum legum moderatione & patrocínio securè gaudens, & ab omni injuria & exactione, pariter ac *Angli*, sive indigenæ, sive advenæ libera & communis, mordicus amplexa est, retinuitque, ortum, denuo recandesceret, maximè erat providendum. Cui penitus excindendo non aliam aut aptiorem aut commodiorem methodum, excogitari potuisse, seriò rem perpendenti facilè liquebat, quam ut *Hiberni*, sacrarum Scripturarum penitus rudes, in doctrinæ Christianæ capitibus articulisque, quatenus in Ecclesia Reformata *Anglicana & Hibernica*, à qua ex sola ignoratione tantoperè aufugissent, exhibetur asseriturque, accuratiùs quidem erudirentur. Proinde statutum, quo singuli suas parochiales Ecclesias adire, & publicis precibus & concionibus, diebus Dominicis festisque interesse, sub pœna pecuniaria, quotiescunque abfuerint, exigenda, tenentur, quod in desuetudinem abiisset, in usum revocatur: Deputantur Ecclesiis, per varias Urbis regiones sparsis, idonei viri, quisque in propria

Consiliarii Regii de erudiendis *Hibernis* in articulis religionis solliciti, jubent, ut precibus publicis & concionibus interfint.

pria statione defixus, qui hisce sacris muniis obeundis incumberent; remque istam peculiarem in modum urgerent. Ecclesia S. *Catharine* dicata *Usserio* quasi fortitò obtigebat, qui methodum prius inchoatam, quam supra memoravi, repetiit, quam cæteri symmystæ pro virili prosequi deberent. Præcipua uniuscujusque concionis capita & argumenta mox brevi verborum summa, ut memoriæ tenaciùs infigerentur, in quæstiones & responsiones digessit, in quorum exploranda fide & veritate quosdam adultioris ætatis se fisti sequente Dominica examinandos, non sine maximo adstantium fructu, neutiquam pudebat.

Methodus qua in hoc sacro concionandi ad populum munere

Ab hisce autem rudimentis origo proluxi, inque magnam molem excrescentis, Catechismi usibus familiæ suæ primò destinati, qui postea alienis, ne dicam heterodoxis, additamentis suffertus, sub illius

obeundo usus est *Usserius*.

nomine, ipso prorsus invito & reclamante, comparuit, arcessenda videtur; de quo deinceps erit opportunior dicendi locus. *Hiberni* plerique omnes, sive sincera, sive subdola mente conciones istas frequentabant, quorum aliqui, argumentis convicti, relicta *Romana*, in communionem Ecclesiæ *Anglicanæ* tandem transibant, & ab hisce operariis larga bonæ frugis messis foret expectanda, nisi zizania inimicus homo clam superfeminasset. Nulla certè gens in Christiano Orbe magis, quàm *Hiberna*, pendet ab ore & arbitrio Sacerdotum, qui in illorum conscientias planè despoticum exercent dominium. Horum enim technis & Optimatum, qui politicis rationibus inducti, in legibus exequendis, segnes & remissi erant, lenitati meritò adscribendum est, quod post hanc illuminationem, mentibus illorum ex assiduis prædicationibus documentisque inditam, in pristinam pertinaciam & superstitionem prolapsi sint: unde audaciores facti, cum id sibi impunè licere viderint, A. MDCII. conniventibus magistratibus, & multæ subeundæ metu, ex potestate *Curie excelsæ Commissionis*, si non sopita, saltem pro tempore suspenso, à sacris cœtibus publicis prorsus abstinuerunt. Hoc maximè doluit displicuitque viris Ecclesiastici ordinis, & præsertim *Usserio*, qui in illustrissimo regni Auditorio de hac indulgentia coram publicè queri ausus est: si quippiam ex juvenili impetu, ut ut sanctissimo prolatum proposito, ipsi temerè excidisset, non illud haberem excusatum. Sanè non isti ætati conveniebat, (quod postea infulâ sacrâ ornatus auctoratusque, simili in casu, suo aliorumque Præ-

Hiberni ad pristinam suam superstitionem re-labuntur technis Sacerdotum retracti; & ex nimia magistratuum indulgentia.

In quam acerrimè invehitur *Usserius*.

tuerat , coram iis , penes quos erat summa rerum administratio , & de quorum fide & diligentia Religionem ab omni sive labe sive periculo integram conservandi vel leviusculè suspicari nefas foret , exagitare , aut verba , quæ in visione *Ezechielis* de *Hierosolymorum* Gentisque *Judeorum* excidio occurrunt , viz. cap. iv. 6. *Et cum compleveris hæc , dormies super latus tuum dextrum secundo , & assumes iniquitatem domus Juda quadraginta diebus. Diem pro anno , diem , inquam , pro anno dedi tibi , ad istorum temporum statum referre : addito hoc epiphonemate : Ab hoc anno peccatum Hiberniæ numerando deducam : ita ut ii , quos jam amplectimini , in vos perniciem illaturi sint ; Vos hanc iniquitatem portabitis :* quasi , quod quibusdam credulæ parumque attentæ mentis olim visum fuit , horrendam istam stragem , quæ universam *Hiberniam* inundaverat , post quadraginta annorum ab ista epocha numerandorum terminum expletum , obventuram esse , spiritu Prophetico impulsus , prædixisset. Ita aliqui , quorum temerariam ineptamque credulitatem hîc jam non exagitabo , sensisse videntur. Non hîc sensum verborum divini Vatis , aut literalem aut mysticum , rimari , multò minus temporum minutias excutere inque examen revocare libet. Judicent alii prout libet. Ipse autem *Usserium* ex hisce calculis , sive rectè , sive perperam collectis , *Prophetam* non censebo : nec credo unquam illi in mentem venisse , se , quasi divino spiritu afflatus hæc Dei nomine prænuntiasset , hoc sacro titulo futuris temporibus dignandum esse. Non possum , quin hîc addam , sapientes , regnante R. *Carolo I.* ex irrequietis populorum tum *Angliæ* tum *Scotiæ* mentibus , quas fraudum Architecti subdolis malignisque artibus agitarunt , sparsis ubique in optimum Principem piissimosque Episcopos , tanquam legum religionisque eversores , calumniis , de *Scotiana* & *Anglicana* rebellionibus , longè antequam erupissent , quæ cladem istam *Hibernicam* paulò antè præcesserant , penè certò ominari potuisse : neque tamen quispiam prudens ejusmodi ominationes & conjecturas in censum *Prophetiarum* referri debere audacter præstabit. Nescio , annon paucis annis elapsis , vafri & seditiosi homines , qui rebus novis tunc maximè studerent , credulæ plebi fucum faciendi ansam hinc arripuerint , supposito altero *Usserii* , cum ex hac vita esset emigraturus , de nostrorum temporum calamitatibus vaticinio : quod per universam *Angliam* , scheda typis expressa , spargi iidem curabant , ut mentes hominum , impendentium malorum metu distractas ,

sibi

sibi fortiùs addicere possent : sed ulcus hoc tangere jam non licet.

Hibernia pacata à funesti belli , quo diu exercita fuisset , cladibus feliciter admodum emerfis , & novo cum seculo novus ordo naturæ renasci , novaque rerum facies splendescere cœperat. Jus enim per provincias erat æquissimè administratum ; Vice-comites publicæ paci conservandæ ubilibet admoti ; latrocinia repressa , concordia inter *Anglos* , novos veteresque , & *Hibernos* mitioris ingenii (sylvestres enim in saltibus paludibusque , tanquam in latibulis vix investigabilibus abditi , ferino ritu victitantes , ab omni humanitatis cultu adhucdum abhorruerunt) instaurata , & , si per ingratiſſimorum hominum perfidiam liquisset , æternum duratura ; ingens rerum venalium ad necessarios vitæ usus & delectationem copia aliunde advecta ; artes mechanicæ in usu & pretio habitæ ; agricoltationesque in locis neglectis , aliterque incolarum ignavia ad perpetuam sterilitatem damnatis , novis , iisque industriis colonis introductis , adauctæ. Rebus ità auspiciatò gestis stabilitisque , Ductores exercitus *Anglicani* , quorum fide & vigilantia atrox istud bellum sopitum fuerit , prædiis pensionibusque , gregarios etiam milites stipendiis solutis ac donativis sapientissima Regina , & optima meritorum remuneratrix , cumulavit. Illi verò , tum ut se divinæ benignitatis , sub cujus tutela , per tot incertos periculososque bellorum casus , tandem victores evaserint , memores ostenderent , tum ut perennem amoris sui erga bonas literas , foedæ superstitionis , quæ ex ignorantia & barbarie oriri solet , expugnatrices , apud omnem posteritatem memoriam relinquerent , incertum , quorum consilio inducti , ex pecuniis sibi debitæ partem quisque nimirum pro rata proportionem deducendam esse unanimi consensu certatim voluere , summamque , ad mille octingentas libras sterlingicas excreſcentem , Academiae *Dublinensi* dono dederunt , ut in augenda Bibliotheca publica , vix satis tunc temporis isthoc nomine digna , inque libris omne genus in perpetuum Studioſorum usum coemendis impenderentur. Ad hæc verò pretiosas merces comparandas , V. Cl. *Lucas Challonerus* S. T. D. & *Usserius* A. M. DCIII. in *Angliam* literarum studiis , & magnorum Theologorum copia tunc maximè florentem , mittuntur. Hic verò negotium istud , à Superioribus injunctum commissumque , tanquam sacrum , læto & prompto animo suscepit : quod justis de causis credidit , tam sibi ex familiarium cum viris doctis conversatione , inspectisque MSS. codicibus ,

Pacificus
Hibernia
status in-
eunte
superiori
seculo.

Prima
Biblio-
thecæ in
Acade-
mia *Du-*
bliniensi
occafio.
Usserii
primum
in *An-*
gliam
iter.

tum in Bibliothecis publicis, tum apud quosdam Nobiles ejusmodi cimeliorum possessores, quàm patriæ, in vectis melioris notæ & perpetui usus omnium facultatum omniumque linguarum libris, fore utilissimum.

Bodleius
Biblio-
thecæ
publicæ
Oxonien-
sis funda-
tor.

Quo tempore *Londinum* appulere, D. *Thomas Bodleius*, Eques Aurtus, in coemendis quoque libris, quotquot ab ipsis typographiæ incubulis aut domi, aut in exteris Regionibus ab instaurata, post depulsam Scholasticorum barbariem, humaniori literatura, typis exscriberentur, erat occupatissimus. Ille enim Vir optimus & omni, qualicunque aut quantocunque elogio superior majorque, magna animo molitus, & quæ vires hominis privatæ fortis ac conditionis longè supergredi viderentur, Bibliothecam publicam *Oxoniensem* miserè collapsam reficere, vel potius denuò condere dudum apud se constituerat longa maximèque seria deliberatione edoctus, opes, quibus clementissimus Deus illum cumulasset, sive jure hæreditario à majoribus derivatas, sive ex muneribus publicis legationibusque acquisitas, in commune totius Gentis commodum, non melius, quàm in bonis literis in omne ævum propagandis impendi potuisse. Hoc verò erat multorum annorum opus & indefessam exigebat industriam, pariter ac munificentiam, quæ pari passu simul incedentes, nunquam se destituere. Nullis enim laboribus, sumptibus nullis parcens, supellectilem librariam undique per omnes cultioris *Europa* plagas sapienti delectu conquirit, ut in suo gazophylacio reponeretur, fundis quoque relictis, quibus, præter pensiones annuas, Custodi illiusque Assistentibus assignatas, novorum librorum accessione augeretur in perpetuum. Huic Heroi (sic enim jure merito appellandus est *Bodleius*.) innotuisse non parùm cedebat *Vsserio*, tum viginti trium annorum juveni, cujus monitis consiliisque res ista, ut credi par est, pro qua consummanda huc venisset, ad feliciorē, maturioremque promoveretur exitum.

Rediit in *Hiberniam Vsserius*, multiplici, eaque accurata, librorum cognitione instructus, quibus legendis perpendendisque ita invigilavit, ut ne horas quidem subsecivas inertī otio evanescere & elabi passus fuerit. Deinde, quod prius, ut supra dixi, proposuerat, ad lectionem sanctorum Patrum juxta seculorum, quibus florere, seriem, h. e. ab primis nascentis Ecclesiæ initiis ad usque mediæ ætatis, imò & sequioris, si quicquam bonæ frugis in se haberent, Scriptores, putà *Petrum Lombardum*, *Thomam Aquinatem*, aliosque istius rixosæ Theologiæ Antesignanos, qui in *Sententias Summasque* Commentarios & disputationes

tionem edidit, pia seriatimque mente se accinxit: interpositis tamen, quasi laxamenti remissionisque animi vice, Historiæ & Antiquitatis omnigenæ studiis: quod pensum, laboriosum quidem & planè *Herculeum*, tandem octodecim annorum curriculo absolvit.

Triennio propemodum elapso, (ut conjectura vero perquam simili *Usserii* inducor, ut credam) *Angliam* repetiit *Usserius*, studiorum causa, & alterum ardentissimo *Britannicæ* Historiæ, tam civilis quàm Ecclesiasticæ, è *in Angliam* manu exaratis codicibus membranisque, illic solummodò reperiendis, iter: ubi eruendæ amore incitatus. Hic verò cum celeberrimis Antiquariis, D. *arctam* *Roberto Cottono*, *Gulielmo Camdeno*, & *Thoma Alleno Oxoniensi*, *cum Cottono*, quam sola mors dissolvere poterat, inibat amicitiam, cui thesauros suos *Camdeno* literarios apertos voluere, Bibliothecarum item *Oxonienfis* & *Camdeno* *Cantabrigienfis* forulos tanta sedulitate, quantam breviculæ moræ inter- *& Alleno* *init ami-* *citiam.* valla fore paterentur, excussit, ut nihil penè illius industriæ ac sagacitati impervium, illiusve oculis penetrantibus & curiosis quasi in exploratum haberetur. Discessurus autem in patriam apud istos tres viros præstantissimos, aliosque acerrimos Judices magnum sui desiderium bonamque existimationem reliquit: utpote de quo certissimam maximorum in *Britannicis* Antiquitatibus indagandis progressuum spem conceperint. *Camdenus* sanè illo tempore de nova *Britanniæ* suæ editione adornanda admodum sollicitus, illum de *Ninio*, veteri Scriptore *Britannico*, edendo, de *S. Patricio*, & *Congallo*, aliisque rebus ad veterem *Hiberniæ* statum & civitatem *Dubliniensem* spectantibus consuluit, cui literas eruditissimas non minori judicio, quàm accuratione, compositas, quas ipse (a) olim in *Epistolarum Camdeniarum Sylloge* publici juris feci, Octobris die tricesimo recipiit. Hæ verò isti summo viro ita mirè placuerunt, ut earundem non modicam partem (b) in suum immortale opus, in descriptione *Dublinii* transferri curaverit: præclaro hoc magnificoque elogio insuper adjecto: *Hæc de Dublinio, quorum plurima diligentia & doctrina Jacobi Usseri, Cancellarii Ecclesiæ S. Patricii, qui annos varia doctrina & judicio longè superat, me debere agnosco.*

Cùm gradus Academici, qui studiosorum mentibus honestam æmulationem solent infundere, in stimulos industriæ præmiumque doctrinæ à sapientissimis Fundatoribus instituantur, ne statutis Collegii, ne sibi, *Usserius* *S. Theologiae* *Baccalaureus* famæque suæ, deesse videretur *Usserius* A. C. MDCVII. primam in Theologia

(a) *Londini*, A. 1691. *Epist.* LXI. pag. 76.

(b) *Camdeni Britannia*, *Londini* 1607. folio. pag. 752.

Et
Ecclesiæ
S. Patri-
cii Can-
cellarius.

logia lauream ambibat, quam, præstitis pro more suo perquam laudabili exercitiis, facile adeptus est. *Usserius* forte sua privata abundè contentus, otioque non ignobili, quo fruebatur in Collegio felix, ab omni ambitione opumque cupiditate vacuus, in Museo totus quasi defigebatur; non opima sacerdotia prensavit, neque Magnatum atria frequenti imitatione trivit, illorum gratiam & favorem aucupaturus, ut in alta sede collocaretur. Hoc solum egit, hoc illi maximè curæ fuit, ut, si quando aliqua dignitate Ecclesiastica dignandus esset, se isti sustinendæ & ornandæ non imparem, aut inidoneum reipsa ostenderet redderetque. Sed insignem istam eruditionem, tanta cum pietate & modestia conditam, non diutiùs inhonoratam fore, aut à publico conspectu celatum iri sinens reverendissimus Vir, *D. Adamus Loftusius*, Archiepiscopus *Dubliniensis*, sub cuius auspiciis oculisque *Usserii* fama magis magisque jam ferè per quatuordecim annos surrexerat, illum Cathedralis Ecclesiæ *S. Patricii* in sua civitate metropolitana Cancellariatu hoc anno donavit. Hæc verò dignitas, cui opulenti redditus annectuntur, ita *Usserio* complacuit, ut, quasi summis votis respondisset, nihil haberet ultrà aut optandum aut expetendum: cujusque erat per plures annos, usquedum ad Episcopatum *Midensem* promoveretur, retinentissimus, non alio excelsiori, sive Archidiaconi, sive Decani titulo affectato aut captato. Veruntamen cum maxima pars istorum reddituum ex prædiis decimisque *Finglassiæ*, quod oppidum est à *Dublinio* unico milliari distitum, accreverit, se vicaria opera, legibus indulta, quam postea annua pensione in omne ævum continuanda honestavit auxitque, utentem, vix à debito munere coram Deo facile absolvi posse, ex scrupulosæ conscientiæ dictaminibus credens, singulis diebus Dominicis, sæpiusve, quoties per valetudinem majorisque momenti Ecclesiæ negotia liceret, se illuc contulit, ut omnia sacerdotalis functionis officia coram ipse exequeretur. Interim amicos lautè & splendidè, egenos verò congrua & decora hospitalitate solebat excipere; parum sollicitus, an quippiam pecuniæ è redditibus provenientis, dempta aliqua parte libris emendis destinata, in oculis relinqueretur necne.

Profes-
sor Theo-
logiæ in
Collegio
constitu-
tus.

Hoc anno Professorium Theologiæ munus in Collegio illi demandatum erat: quo per tredecim quatuordecimve annos summa diligentia functus est. Habita enim matura deliberatione, operam non posse meliùs aut fructuosius, quàm in dogmatibus Theologicis inter Reformatos & Pontificios controversis discutiendis impendi, primò bis, deinde, ut du-

rus iste labor, cui ferendo vix suffecerint vires, aliquatenus minueretur, semel singulis per totum annum septimanis, solennes contra *Bellarminum* aliosque insignes Romanæ Ecclesiæ scriptores, prælectiones habuit, duobus voluminibus propria manu descriptis comprehensas: quæ in Academiæ *Dubliniensis* archivis exstant, & quæ fortassè in publicam lucem produci merentur.

Denique hoc quoque anno Canonas, prout in prima veteri Col-
lectione olim exstabant, ordine debito disponere & ad Canonas pri-
mi generalis Concilii *Nicani*, & quinque Provincialium *Ancyrae*, *Neo-*
casareae, *Gangrae*, *Antiochia*, & *Laodiceae* habitorum, è quibus illi de-
sumpti erant, reducere usque ad primum *Constantinopolitanum*, (prout
ex *Dionysii Exigui* epistola, ante suam Græcorum istorum Canonum Lati-
nam versionem, ad *Stephanum* Episcopum *Salonitanum* præmissa, const-
tat) hujus cæterorumque generalium, quæ secuta sunt, Conciliorum,
canonibus postea additis, instituit. Collectio hæc *Codex Canonum Eccle-*
siae universæ meritò nuncupatur. Sed D. *Leschasserii* industria laudabile
hoc propositum, illo neutiquam conscio, edito mox opusculo, priùs oc-
cupaverat. *Usserius* verò, licet eandem eosdem digerendi cui alter instabat,
ex proprio ingenio secutus fuerit, longè fortiori fundamento innixus, cal-
culum & ordinem stabiliivit. Sed observationes suas, sive argumentum
istud in Bibliotheca Theologica fusè tractaturus, sive nescio qua alia ra-
tione inductus, in publicam lucem producere prorsus tunc temporis desi-
stebat, eas doctissimo viro, *Samueli Wardo Cantabrigiensi*, in eadem sta-
dio decurrenti, in epistola eruditissima, in qua de variis Canonum collec-
tionibus, earumque Auctoribus, uti & de codice Romano, præclare
admodum differit, communicare contentus. *Usserii* Epistola & *Wardi*
responsorialia exstant in *Sylloge* Epist. X. & XI. utraque sane, quæ ab om-
nibus Ecclesiasticarum Antiquitatum studiosis legantur, perquam dignæ.
Sed hoc ulterius prosequi, à nostro instituto, qui non longas commen-
tationes, sed compendiarium vitæ & studiorum *Usserii* historiam scri-
bimus, omninò alienum est.

A. MDCIX. lites forenses agitari cœperant de quibusdam prædiis
olim vel ad Chorepiscopos, vel ad Ecclesias illarumque Rectores, per-
tinentibus, vulgò vocatis *Termon-lands*: sive quia, ut aliqui volunt,
essent *terra Monachorum* (*terre-moine*) sive potius à *Termino* Latinè, qua-
si *terra limitibus distincta & separata à terris Laicorum*: quas tamen tem-
poris decursu, homines merè Laici, *Corba* sive *Corbani* & *Heremachi*

Disserta-
tio de
Corbis,
Heremachi,
Termon-
lands ab
Usserio
compo-
nita

nuncupati, ex indulgentia Episcoporum possidebant, concessa, ipsis illas quasi hæreditarias, filiis & nepotibus (uxorati enim erant) transmittendi potestate: quorum illi videntur primò fuisse *Chorepiscopi*, ex quo nomen istud contrahitur, aut Ecclesiarum Rectores, aut earundem Patroni & Defensores, & ex iisdem prognati, qui postea longa Usucapione in eas sibi familiisque suis vendicarunt. Hi verò ministri Laici seu Oeconomi Episcoporum, censusque illis debiti Collectores, quorum munus quoque erat, ut agri à colonis benè colerentur, prospicere; deinde ex conventionem sacrilega cum Episcopis iecta, earundem possessio & jus simul transibant, inque eos transferebantur. Terræ hæ ab omni taxatione fisci & jurisdictione seculari erant liberæ: interim tamen servitiis & pensionibus, quas sibi & successoribus solvendas reservaverint Episcopi, obnoxie; quibus non præstitis, instar temporalium feudatiorum, ab isto jure, sive acquisito, sive usurpato, cessere. Istorum autem servitiorum ingens ubique varietas continuam litigandi materiam suppeditavit. Hinc *Usserius* iusta occasione arrepta ostendendi, quàm feliciter admodum & accuratè vetustas chartas in Ecclesiarum Cathedralium archivis latentes, & situ & marcore perituras, explorasset: de hisce obscurissimis rebus & nomenclationibus eruditissimum conscripsit tractatulum, à reverendissimo viro D. *Richardo Bancrofto*. Archiepiscopo *Cantuariensi*, tanto in honore & pretio habitum, ut planè honorarium munus, quod serenissimo Regi *Jacobo I.* exhiberetur, omninò dignum, pro sapientia sua judicaverit. Cujus præcipua capita nobilissimus Antiquarius, D. *Henricus Spelmannus*, Eques Auratus, in *Glossario* suo legenda selegit, honorifica D. *Usserii* facta mentione ad calcem dissertatiunculæ *de Corbis* &c. *Hæc fusius, ut obscuritati lucem adferam, quod accendit mihi literarum insignis Pharus, D. Jacobus Mediensis Episcopus.* Tantum addo, quæ vir præclarissimus D. *Jacobus Waræus*, Eques quoque Auratus, de eodem argumento differens, habet in *Antiquitatum Hibernicarum* libro cap. XVII. (a) *De hisce plurimum cupidus consulat V. C. Henricum Spelmannum Equitem Auratum in Archæologo suo, ubi multa scitu digna, beneficio insignis hujus seculi ornamentum, D. Jacobi Usserii Armachani, communicantur.*

Tertium
in An-
gliam
iter.

Hoc anno *Usserius* tertium accessit in *Angliam*: non voluptatis, non otii, non animi relaxandi, sed studiorum gratia: non ut tempus ineptis

(a) *Londini. 1655 in 8°. pag. 80. & in annotationibus ad Egberti dialogum de Ecclesiastica Institutione p. 134. Dublinii. 1664.*

tis blandisque, nihilque ad veros vitæ usus pertinentibus colloquiis, aut otio indulgeret, aut deliciis, ut ut honestis licitisque, mentem pasceret. Longè diversa erat & sanctior itineris sæpè repetiti, & post exactum triennium quadrienniumve repetendi, ratio. Non aliter illa Scientiarum divinarum & humanarum, quæ exardescibat, fitis & cupido erat sedanda, nisi ad ipsos accedendo fontes: Bibliothecas nimirum nostras libris omne genus Historicis, & potissimum codicibus Mss. de re Antiquaria, maximè abundantes. Hisce subsidiis literariis, quæ universæ studiorum, quam proposuit, rationi & methodo satis feliciter responderent, ad votum usque, gaudentem, nulla incessit exterarum regiones invivendi cupido: omni cogitatione extrà peregrinandi amota; nec opus habuit, cum Antiquitates *Britannicæ* non nisi intra fines *Britanniæ* essent investigandæ. Interim licet in Bibliothecis totus abditus videretur, ab Amicis rogatus subinde concionandi munus non detrectavit, semelque in sacello Regio coram *Familia*, sive domesticis Audientis summo mane, quo tempore sacris interesse illis solum vacat, iisdem gratum facturum, perorare voluit: neque enim coram Regia Majestate, consensu sacris rostris, comparuit: sive defuit opportunitas, sive potius à propria modestia inhibitus retractusque. Quicquid verò habuit subcessivi temporis, totum illud virorum, eruditione & literis maximè insignium, commercio dedit impenditque: quorum amicitiam, ut studiosè quæsit, ita meruit, & amantissimè amplexus est semperque percoluit. Inter hosce novos Amicos recenseo *Henricum Bourchierum*, postea Comitem *Bathoniæ*, *D. Henricum Savilium*, τὸν πᾶν, *Henricum Briggium*, tunc temporis Geometriæ in Collegio *Greshamensi*, postea in *Academia Oxoniensi* Prælectorem *Savilianum*, *Joannem Seldenum* ex interiori Templo J. C. tunc quoque ob rei Antiquariæ peritiam, inclarescere incipientem; insignes Theologos, *Joannem Davenantium*, postea Episcopum *Sarisberiensem*, & *Samuelem Wardum*, postea Collegii *Sidneiani* apud *Cantabrigienses*, Præfectum, & denique *Thomam Lydiatum*, scriptis variis, & præsertim Chronologicis, contra *Josephum Scaligerum* editis, clarum, sinistrâ, nedicam, iniquissimâ forte colluctantem oppressumque, quem secum duxit in *Hiberniam* *Usserius*, ut lautis, saltem honestis, conditionibus, quæ illius meritis aliquatenus convenirent, procuratis, illic, donec auspiciatior in *Anglia* affulserit hora, commodè moraretur.

Novas
amicitias
contra-
hit.

Oblatam
Collegii
præfec-
turam

A. MDCX. incunte, aut paulò ante: vacante Collegii præfectura, respuit.

E

cùm

cùm fociis, maturis inter se habitis consultationibus, de eligendo *Usserio* convenisset, ille oblatam dignitatem obfirmato animo planè averſatus eſt, utpote nullis ſuaſibus precibusque, ut ut blandiſſimis, argumentis nullis, licèt fortiſſimis, inducendus, ut in unanimem omnium conſenſum & ſuffragationem concederet. Facile enim guarus prævidensque, occupationes iſtas, quas hæc nova dignitas poſt ſe tractura eſſet, fore moleſtiſſimas, inque graviſſimum ſtudiorum, quibus totus incubuit, damnum ceſſuras; ſe proſequendis litibus, quæ tunc imminerent, de prædiis juribusque Collegio integris ſervandis; ſi non minus habilem, ſaltem minimè pronum; illic perpetuò pro ratione muneris adminiſtrandi manendum eſſe, nec in *Angliam* excuſiones ſubinde facere, ibique per ſex meſes aut plures, prout codicum manuſcriptorum in Bibliothecis ubi ubi exſtantium inquiſitiones exegerint, morari licere; denique univerſas vitæ ſecuturæ rationes, quas ſibi propoſuit, inde maximè turbari, hiſce importunis poſtulationibus ſurdas aures præbere pergebat. Ut verò quiſpiam idoneus, qui omnes boni vigilantiffimique *Præpoſiti* partes impleret, ſubſtitueretur, nemo ardentiori affectu, quàm ille, optabat, nemo fideliorem operam impendebat: cujus commendationi conſiliisque maximè acceptum referri debet, quod V.C.L. *Gulielmus Tempel*, in Collegio Regali *Cantabrigiæ* olim educatus, ſapientiæ & doctrinæ laude inſignis, poſteaſque Equeſtri dignitate ornatus, Collegio, quod per ſeptemdecim annos provida induſtriaque cura rexit, præficeretur.

Prælectiones
pro doctoratu in
Theologia
quem adeptus
eſt habitæ.

Edit liberum de
Chriſtianarum
Eccleſiarum in
Occidente continen-
tia ſucceſſione.

Anno MDCXII. *Uſſerius* ſupremum in Theologia gradum conſecuturus, duas pro more ſolennes Prælectiones, quarum ſchedæ levi celerique manu primò delineatæ, adhuc ſuperſunt; unam de *Septuaginta hebdomadibus Danielis*; de *Millennio Apocalyptico* alteram habuit: quarum illam in magno opere Hiſtorico & Chronologico, hanc verò in libro, quem anno ſequenti edidit, & de quo mox dicam, abſorberi puto veriſimillimum. Inſignia Doctoratûs doctiſſimo huic Candidato reverendiſſimus vir, D. *Hamptonus*, Archiepiſcopus *Armachanus*, tunc temporis *Academiæ Dublinienſis* Vice-Cancellarius, conferre dignatus eſt.

Nondum quicquam ſcripti præ modeſtia in lucem emiſerat *Uſſerius*, utpote munus, quod ſuſcepiffet, profeſſorium perquam diligenter & induſtriè impleviſſe ſibi animo placens. At jam tandem, ſive propria ſponte, ardentique contra Evangelicæ Veritatis hoſtes zelo, ſive Amicorum hortatibus conſiliisque exſtimulatus, ne ſibi, ne famæ ſuæ, aut aliorum exſpectationi, aut Religionis cauſæ, quod maximè in votis erat,

erat , vindicandæ deesse videretur , in publicum prodire apud se constituens ut quantum ex pertinaci , omne genus librorum lectione profecisset , luculento documento demonstraret , ineunte anno MDCXIII. in *Angliam* navigavit : *Hibernia* tunc temporis idoneis typis ad absolvendum justum largumque , quod molitus est , opus , quo decuit nitore, destituta , ibique Regio Typographo in consilium operamque adscito, librum magni nixus fœtum , partibus suis decorè & affabrè compositum & elaboratum , evulgavit sub hoc titulo :

Quantum
in An-
gliam
iter.

Gravissimæ Quæstionis de Christianarum Ecclesiarum , in Occidentis præsertim partibus , ab Apostolicis temporibus ad nostram usque ætatem , continua successione & statu , Historica Explicatio :

Auctore Jacobo Usserio , S. Theologiæ in Dubliniensi Academia , apud Hibernos , Professore.

Liber iste serenissimo Regi *Jacobo I.* Regum doctissimo , cui inscribitur , longè erat acceptissimus , tum ob argumenti , in quo illum non parum sollicitè versatum fuisse ex scriptis editis , sublimi Regiæ Majestatis fastigio perquam dignis , cuivis intelligenti satis liquet , gravitatem : tum ob methodum differendi ex fide rerum sententiarumque authenticis Historicorum testimoniis comprobata. Hic enim luculenter & eruditè agit *de Millennio Apocalypico , & de ligatione Sathanae* , à quo tempore inceperit , & quando celebris ista Epocha esset defutura ; & de iis rerum momentis & mutationibus , quæ in isthoc intervallo occurrerent , aut inde consequerentur : ostenditque post sex seculorum decursum in hisce Occiduis Mundi plagis Religionem Christianam à sua primæva puritate & integritate , illic , ex *Romanorum* Pontificum ambitione , typho , & insatiabili secularis pompæ amore , sensim declinasse : corruptelas superstitiososque ritus fraudibus Sacerdotum credulæ & ignaræ plebi strophis plausibilique ornandæ Religionis prætextu illudentium introductos , passim invaluisse , & malè sana dogmata , quæ neque cum sacris scripturis , neque cum veterum Christianorum fide ullatenus convenirent , pro articulis fidei , ad salutem creditu necessariis , pro arbitrio obtrusa fuisse ; donec sub temporibus *Sylvestri II. Benedicti*

nedicti IX. & Gregorii VII. sive famosissimi Hildebrandi, mysterium illud iniquitatis, in immensum accrescens, ad *ἀρχὴν* pervenerit, & *Romana* sedes, conculcatis sacris Canonibus, juribusque Episcoporum abolitis, tyrannidem & imperium verè *Antichristianum* in omnes totius Orbis Ecclesias usurpasset, & actu in Occidente exercuisset. Hanc rem esse facti, testibus, omni exceptione majoribus, productis demonstrat: quovis tamen seculo bonos viros, veritatis Evangelicæ amantes ac zelo armatos surrexisse, qui contra hosce intolerandos abusus invecti, novorum dogmatum portenta, quibus nova Religionis forma pristinae superinduceretur, acerrimè rejecerint, cultuque idololatrico animas pollui noluerint: in hisce verò *Waldenses, Albigeneses*, pluresque alios, qui in mediis flammis & lanienis imperterriti, hisce innovationibus strenuè sese opposuerint, recensens, istorum temporum, in quibus major rerum obscuritas & perplexitas, ex defectu aut mala fide Auctorum inerat, Historiam: item quorundam Paparum ambitum, fastum, secularis pompæ affectationem, simoniam, luxum, scelera, prodigiosamque impietatem graphicè depingit; eo fine, ut Adversantium, præsertim ex nostratibus, obturarentur ora, qui effronti audacia calumniati fuerint, Reformatores, quos infandi schismatis & pessimæ hæreseos pro modestia sua postulant, novam planèque seculis antiquioribus inauditam introduxisse doctrinam: illorum verò dogmata à Concilio *Tridentino* sub diro anathematis fulmine sancita, à prima & remotissima antiquitate derivari, eademque & invariata per omne ævum mansisse, sibi que omnes per universum Orbem, ubi viguit nomen Christianum, ecclesias in omnibus consensisse, nihilque in rebus & articulis fidei unquam fuisse immutatum. Non sibi proposuit, neque suarum esse partium duxit *Usserius*, de veteris Ecclesiæ, in sex prioribus annorum centuriis, ista labe vacuæ, aut Christianorum in Ecclesiis *Græca, Hierosolymitana, Antiochena, Alexandrina, Habessinica, Carthaginensi*, aut alibi locorum, ad extremos *Indos* usque, continua successione & statu differere: sed, si non unicum, saltem præcipuum suæ disquisitionis scopum intra Occidentis limites constrictum fore volebat: quod quidem animosiùs præstitit, ut veteratores isti, qui nobis falsò exprobrant novitatem, meliùs saniùsque sapere, seseque modestiùs gerere edocerentur.

Horum verò temporum seriem laboriosè & accuratè quidem per-
texuit

texuit *Usserius* usque ad initium Pontificatûs *Gregorii XI.* h. e. ad annum *MCCCLXX.* indè eandem ad *Leonem X.* quando Evangelicæ veritatis lux , è spissis horrendæ superstitionis tenebris eluctata, emicare inceperat , deinceps deducturus. Sed an tertiam hanc partem , quam proposuit edendam , & cujus præcipuorum capitum summa in elencho habetur, sive ex inamœni operis tædio , sive nobilioris argumenti studiis impeditus , unquam absolvisset , non possum quicquam certi statuere ; saltem , si (a) quando ab ipso conscripta exstitisset, omninò periisse videtur. Quod hîc adnotandum censeo ad detegendam Bibliopolæ fraudem , qui in nupera editione *Londinensi* A. *MDCLXXVII.* quo fucum emptoribus faceret , in fronte librum specioso operis integri ab *Auctore aucti & recogniti* titulo adornat. Fortasse hîc Lectores morosi me parum è dignitate illius fecisse censebunt , si meminero , viros clarissimos & doctissimos , D. D. *Isaacum Casaubonum* , & *Abrahamum Scultetum* , quibuscum tunc *Londini* agentibus familiarem inibat amicitiam , quanti Auctorem ejusque elaboratum opus æstimaverint , versibus encomiasticis præfixis , testari voluisse. Ille verò tertius Laudator , *Antonius Martinus* , tunc temporis Collegii sanctæ & individuæ Trinitatis apud *Dublinenses* socius , postea D. *Usserio* in sede *Midenfi* datus erat in successorem.

Hac clarigatione bellum ἀσπονδον indixit *Usserius* Pontificiis , ex quibus tamen nemo ad pugnam descendit , cum hoc Pugile æquis legibus & conditionibus decertaturus. Neque enim dicteria apud sapientes arbitros pro argumentis habentur : neque leviculæ cavillationes justæ responsionis vicem supplere aut possunt , aut debent. Prodiit equidem *Duaci* A. *MDCXV.* *Richardi Stanihursti* , illius Avunculi , libellus , sive Epistola ipsi *Usserio* inscripta , duabus tribusve schedis comprehensa , sub hoc titulo :

Contra
Usserium
insurgit
R. Stanihurstus ,
illius
avunculus.

Richardi Stanihursti , Hiberni *Dubliniensis* , *brevis Præmonitio pro futura concertatione cum Jacobo Usserio* , *Hiberno Dubliniensi* :

Qui in sua Historica explicatione conatur probare Pontificem Romanum (legitimum in terris Christi Vicarium) verum & germanum esse Antichristum.

E 3

Ve-

(a) Vi de *Usser.* Epist. *Sylogên* , Ep. XXXVIII. pag. 69.

Veruntamen *Staniburstus* in hoc epistolari scripto , quo *Usserium* nepotem (uti parum Latinè appellat , pro more tamen vulgatissimo) frigida laudatione fatetur esse *Historiarum belluonem*, & plurimorum *Scriptorum atates & tempora hand quaquam sanè indiligenter fuisse persecutum*, non Historicum, non Dialecticum, non probum Advocatum in testimoniis adversæ partis explorandis, inque justum examen revocandis, occupatum, sed Declamatorem, sed Vitilitigatorem, sed Sophistam agit. Cùm enim quosdam Romanos Pontifices longa serie sequioribus seculis invicem succedentes sceleratissimis moribus fuisse conspurcatos, ex certissima *Historiarum* fide constaret, nec id quidem à quoquam absque aut stuporis aut læsæ modestiæ nota negari potuerit, ulcus hoc vel levi manu tangere penè metuit, criminando, Scriptores, ut maledicos, ut mendaces, ut Principibus, odium capitale aut sanguinolentas cum *Romana* fede lites exercentibus obsequiosos, horumque gratiam turpi assentatione captantes, impacta crimina indebitis exaggerationibus in immensum auxisse: quasi illis corruptelas doctrinæ pariter ac morum non exprobrasset *Usserius*. Sed ad stigma Antichristi hisce præclarissimis Christi Vicariis inustum, quasi spectro territus, maximè excanduit tetricus senex, nec *S. Petri* successores in ista sancta sede, licèt depravata veterum Christianorum fide, novam doctrinam horrendasque superstitiones, carceribus, exilio, ferro, igni, immanibus laniensis & cædibus, & crudelissima Inquisitione tueri & propagare perrexerint, hoc infami titulo dehonestari æquo animo patitur. Sed istiusmodi reliquis rhetoricationibus & cavillis, nihil solidi tinnientibus, nec cuiquam vel mentis paulò attentioris persuasuris sibi respondendum non esse duxit *Usserius*, multò minus atrocissimæ isti calumniæ, qua illum in altera libelli parte infectatus est *Staniburstus*, ac si in Epistola dedicatoria ferenissimum Regem *Jacobum* in subditos *Hibernos*, in Religionis rebus dissidentes, sævire, Religionemque Pontificiorum aperta vi ac severissimis edictis legibusque exterminare incitasset. Sed quàm prorsus leve, prorsus debile, imò prorsus nullum, cui hæc dica superstruitur, fundamentum! Solùm in fine Epistolæ dixerat *Usserius*: *Unum adhuc superest, quod votis omnibus à Majestate tua repetunt omnes boni, ut populo nostro pereunti, properè succurrere, & peste Pontificia miserè laboranti facere velis medicinam.*

Quis

Quis verò aut mentis candidæ, aut paulò attentæ, non hîc potius perinsigne optimi verèque Christiani erga patriam gentilesque suos affectus indicium & demonstrationem eluxisse penè præceps crederet? Horum enim infelicissimam sortem miseratus, flagrantissimis votis hoc unum, idque maximum, à clementissimo Rege petebat *Usserius*, ut de methodis congruis suavibusque modis, quibus gens ista, si qua unquam, obstinatissima, teterrima ignorantiae & superstitionis caligine oppressa & occæcata, infusa nova luce, ad sobriam mentem agnitionemque veritatis revocaretur, præ sapientia sua vellet statuere. Sed fortasse quibusdam me huic controversiæ nimium & omninò præter rem immiscuisse videbor: ideo ad historicam de *Usserio* narrationem redeo.

Dum verò *Londini* manserit *Usserius*, curis typographicis intentus, frequens adibat ædes *Lambethanas*, cum reverendissimo viro, *D. Georgio Abbotto*, Archiepiscopo *Cantuariensi*, & *Academiae Dubliniensis* Cancellario, de statutis aut novis condendis, aut veteribus pridem conditis corrigendis, inque meliùs reformandis, consultationem, quantum licuit, initurus. Ab ipsis enim primæ foundationis initiis, Præpositus Sociique Collegii, cui multa adhuc deerant ad perfectam instaurationem, pro sapientia sua quempiam summæ dignitatis, sive in Ecclesia, sive in Aula, virum, & apud Regem gratia pollentem, hoc magnifico titulo dignandum continua successione elegerunt, quò ipsis & consilio & munificentia & favore patrocineretur. Hisce verò rebus in *Anglia* feliciter peractis, *Usserius* *Hiberniam* patriosque lares revisit, ibique non multò post fit maritus, ducta in uxorem lectissima Virgine, cui dos opima obtigerat, utpote unica filia & hærede reverendi viri, *D. D. Challoneri*, supra laudati, de novella Academia optimè meriti, qui (a) ultimis tabellis præcaverat, illam non alii, præterquam *Usserio*, quem ille illius bonæ indolis, candoris, doctrinæ, & pietatis amore & admiratione raptus, à multis annis paterno & summo prosecutus fuerat affectu, nubere oportere, modò se matrimonii nexu illigare voluerit. Quo admissio, *Usserius* non quicquam otio & desidii indulgens, nactusque curarum domesticarum sociam & participem, ad pristina studia alacriori industria quoque reversus est.

Or-

(a) Obiit *Dublinii* 27. Aprilis. Anno 1612.

Convo-
catio
Cleri Hi-
berni A.
1615.
Dublinii
habita.

Ordinibus regni *Hiberniae* in Parlamento *Dublinii* A. MDCXV. habito coactis, pro more indicta erat nationalis Archiepiscoporum, Episcoporum, reliquique Cleri *Hiberniae* Synodus, ut de rebus ad Religionem spectantibus junctis operis consiliisque deliberatio fieret solennior. Liquet autem, Ecclesiam *Hibernicam* à primis Reformationis sub Rege *Edwardo* VI. temporibus, & potissimum regnante Regina *Elisabetha*, ab Ecclesia *Anglicana*, si non totam, saltem aliqua ex parte pependisse, & eidem in omnibus consensisse. Episcopi plerique omnes aut puri puti *Angli*, & ex *Anglia* missi, aut *Anglis* parentibus ibi nati: eadem Liturgia, eadem Ordinationum formulæ, iidemque sacrorum ritus. Universus Clerus articulis & constitutionibus Ecclesiæ *Anglicanæ* se conformem ex vi legum ex integro reddidit, à quibus, quantum diversæ utriusque regni consuetudines paterentur: neutiquam variare licuit. At jam hanc sive dependentiam sive reverentiam excussuri, altiores spiritus alere, articulosque religionis suo nomine & auctoritate, quibus tanquam proprio ac peculiari charactere ab illa distinguerentur, condendi jus & facultatem secundum vindicias libertatis sibi successoriisque suis asserere cœperant. Cujus incepti hæc videtur fuisse vera origo & causa. Cum aliqui zelotæ hîc apud nos, ad finem vergente seculo decimo sexto, immodico zelo abrepti, articulos Religionis, synodali auctoritate *Londini* A. MDLXII. stabilitos, in quibus constituendis moderatam *P. Melancthonis* aliorumque Reformationum sententiam secuti sunt Adseffores, relicta in quamplurimis abstrusioris Theologiæ capitibus opinandi libertate, aut malè interpretando perverterint, aut dogmata nova, è *Calvini* scriptis hausta, iisdem addenda, aut sub explicationis specie & prætextu, aut supplementi vice, tanquam veram Ecclesiæ *Anglicanæ* doctrinam obtrudere attentaverint, in varias partes & factiones itum est, propugnantibus his, oppugnantibus aliis. Diffidium verò istud apud *Cantabrigienses* inter *D. Whitakerum*, Regium Theologiæ Professore & *D. Petrum Baronem*, Dominae *Margaritæ* alterum Professore, maximè incaluit: nec lites istæ erant de facili sopiendæ. Ideo *Whitakerus Londinum* properat, non ratione sed auctoritate Adversarium debellaturus, septem theses, crudas quidem, & ad proprias opiniones maximè accommodatas, quibus controversias istas, quarum acerrimus erat fautor, præciè determinari & decidi voluit, reverendissimo viro, *D. Joanni Whigisto*, Archiepiscopo *Cantuariensi*, exhibuit. Hic verò ab illo persuasus, ad hoc incendium, quo flagra-

Articuli
Lambe-
thani.

vit

vit ista Academia, extinguendum, & ne pax Ecclesiæ in summum adduceretur discrimen, ad se quosdam Præsules & Theologos, de istis Thesisibus cum iisdem consultaturus.

Post crebras disceptationes, emollitis quibusdam in Thesisibus *Whitakerianis* duriusculis phrasibus, à plerisque (aliqui enim pacatioris ingenii saniorisque judicii viri sese ab isto confessu subduxerant) in novem Articulos consensum est, inde nuncupatos *Lambethanos*, utpote in Palatio Archiepiscopali Novembri MDXCV. formatos digestosque, ut controversiis istis inauspicatis felicius faciliusque, uti putabant, obviam iretur. Cum verò Regina rei nuperrimè gestæ historiam ex ore sapientissimi & fidelissimi Consilarii, *Gulielmi Cecilii*, Baronis *Burghleii*, Academiae *Cantabrigiensis* Cancellarii, didicisset, satis gnara, quantum vulnus Ecclesiæ, tranquillitati publicæ, & Regiæ potestati, ex istis decisionibus inflingeretur, graviter commota, cum Archiepiscopo, in Aulam comparere jussu de hoc ausu temerario, illa planè inscia & inconsulta, expostulavit, in memoriam illius revocans, illum, cui ex hac parte nulla legitima potestas competeat, contra leges deliquisse, & poenis ex severissima lege, quæ à nostratibus *Premunire* appellatur, infligendis esse obnoxium. Qua objurgatione quasi è veterno expergefactus Archiepiscopus, vir in reliquis omnibus muneris sui partibus inculpati & laudatissimi exempli, veniam humillimè deprecatus, factum, ex pia tumultus Academicorum, quorum mentes diversarum sententiarum æstu agitantur, componendi & compescendi intentione ortum, excusavit, interposita cautione, se de iis articulis, ne in lucem exirent, suppressendis diligenter curaturum. Sed res ista, schedâ, in *Whitakeri*, paulò post è vivis excedentis, museo, istos articulos complectente, reperta, diu celari non potuit: indeque *Calviniani* Magistri sui *κρυφαῖς δόξαις* effatisque quoddam præsidium & firmamentum quæsiwere, eòque audaciæ processere, ut in collatione coram serenissimo Rege, *Jacobo* primo, in *Hamptoniensi* Curia inter selectos quosdam venerabiles Episcopos & *Puritane* factionis Antesignanos, A. MDCIII. inita, illorum nomine postulaverit D. *Foannes Rainoldus*, ut hi novi Articuli, corpori Articulorum Ecclesiæ Anglicanæ inserti, pro orthodoxis haberentur: cui Rex, aliter ingenio miti, nec ad iram proclivi, animo & lingua indignante, illius propositione tanquam injusta & absurda, nec illius loci aut temporis, penitus rejecta, respondit (a) in *Academiis*, subtilitates
F
ejus-

(a) Vide summam istius Collationis à D. *Barlowio* editam p. 41.

ejusmodi scholasticas alterutrinque agitari posse, quibus religionis articuli nentiquam suffarciri debent. Quis autem crederet dogmata illa de absoluto prædestinationis & reprobationis decreto, & de gratia sufficienti ad salutem universis hominibus non concessa, cum appendicibus heterodoxis de inamissibilitate gratiæ, & de certitudine salutis, quæ tum divinis perfectionibus, tum naturæ humanæ repugnant, in istis articulis comprehensa, tot fautores reperire potuisse, aut tantoperè valuisse *Calvini* auctoritatem, ut quicquid ille dictaverit, pro infallibili haberetur, veritatisque Theologicæ norma ex illius *Institutionibus* esset petenda? Sed meliùs rectiùsque sapere doctissimi viri, DD. *Overallus*, *Andreas*, aliique magni Theologi, qui licèt numero pauciores, præsertim post istiusmodi concertationes in *Belgio* acerrimè agitatae, diligenter excussas, & mente æquâ & à præjudiciis liberâ, tanquam bilance justâ, perpensas, sese strenuè tum concionibus, tum scriptis, opposuerit. Identidem in *Hibernia* Præsules reliquusque Clerus, *Calvini* effatis addictiores, quàm extra se eorundem tuendorum zelo quasi abriperentur, tunc inaudito & in omne ævum obstupefciendo, in hac Synodo, cujus non minima pars erat *Usserius*, congregati, palam ostenderunt. Jubetur inter alios *Usserius*, articulorum, de quibus in Synodo ista deliberandum erat, seriem contexere: in quibus novem famosi Articuli *Lambethani*, omnes penè ad verbum inseruntur. Quod hîc brevi & in genere referre omninò necessarium duxi, ut inde qua de causa *Usserius*, qui in istius Ecclesiæ articulis condendis & stabiliendis præcipuum impenderat studium ac laborem, apud famæ illius æmulos, adversarumque partium sequaces, *Calvinianus* & *Puritanus* audiret, aliquo modo constaret.

Usserius
Purita-
nismi
suspe-
ctus.

Hinc gravissimæ censuræ impactæ, malæque de *Usserio* inde conceptæ suspiciones magis magisque gliscebant, quasi ex isthoc immodico horumce Theologorum dogmatum studio & amore in aliis longè majoris momenti rebus Puritanorum partibus favisset. Nec defuere, qui privatis delationibus id parum candidè, imò prorsus iniquè serenissimo Regi, qui tetricum istud irrequietumque genus hominum, à quo multa passus est, utpote Regiæ Potestati pariter ac Ordini Episcoporum ritibusque Ecclesiasticis adversum, maximè averfatus est, persuasum vellent. Sed opprobria hæc, magno, ut videtur, animo tulit despexitque. Veruntamen cum A. MDCXIX. versus finem, in *Angliam* transiturus esset, ad amoliendam istius calumniæ invidiam, ne præjudiciis gravatus succumberet, literas à Regiis Consiliariis, qui in isthoc regno præfue-

Ab hac
labe pur-
gatur,

runt,

runt, ad *Anglos* Consiliarios in illius favorem & vindicias perscribi procurarunt Amici, in quibus, perinsigni illius innocentiae attestazione adhibita, illum, utpote virum omninò dignum, qui Regio favore cuiquam in Ecclesia dignitati præficiatur, magnificis elogiis exornant. Deinde *Westmonasterii* mox ad colloquium cum Rege admissus, seipsum à fictis criminationibus purgavit, & ut omnem ex Regis animo scrupulum penitus auferret, sententiam suam de doctrina & disciplina Ecclesiae *Anglicanae* declaravit, quibus & Regi & aliis abundè satisfactum est.

Exeunte A. MDCXX. serenissimus Rex, sive quantum Consiliario-
rium *Dublinensium* commendationi detulerit, ostensurus, sive ex proprio
motu & certa scientia sapientiae, pietatis, & exquisitæ eruditionis *Usseri*,
ad sedem *Midensem*, tunc vacantem, frustra interponentibus qui-
busdam malevolis, evexit, quem *suum Episcopum* appellare postea soli-
tus erat.

Ad Episcopalem
sedem
Midensem desti-
natur.

Hoc anno, indicto *Westmonasterii* Parlamento, cum rumores à Puri-
tanis ad perterrefaciendum populum (ab illo enim tempore factio ista
caput exeruit, subdolisque Demagogorum artibus, sequentibus annis
acquisitam, in Comitibus vim planè indomitam, juribus Majestatis Re-
giae prorsus inimicam circumtulit) spargerentur, quosdam in Adfesso-
res inferioris Camerae, qui Religionis Romanae professionem clam &
intus in pectore retinuisent, adscitos fuisse, communi consultatione &
decreto ordinatum erat, ut, quò melius quisque ab hisce suspicionibus
se purgaret, omnes simul constituto die in templo S. *Margaritæ* propè
senaculum sacrae synaxi interesse tenerentur: hoc enim criterio censuere,
neminem Romanis superstitionibus addictum hæc tremenda mysteria
impia mente sacrilegaque manu attingere ausurum. Interim *Usserius*,
nominatione illius facta ex suffragatione prævia, rogatur ut in isthoc
sacro solennique Conventu concionari vellet. Quod non honoris inde
reportandi causa, sed exacerbatas multorum mentes honestis piisque sua-
sibus & documentis leniendi ansam captaturus, tandem non sine invidia
aliorum, nescio an non planè invitatus, admisit. Præbendarii enim Ec-
clesiae Abbatialis S. *Petri*, ex qua Parochialis ista vicina, utpote ab
omni jurisdictione Episcopali libera, tota pendet, muneris istius sacer-
dotalis ibi administrandi facultatem, tanquam sibi propriam & peculia-
rem, vendicabant. Nolebant Senatores à proposito absistere, aliter in
Ecclesia *Templi* (ita pro more nostro appellatur celeberrimum Jurisperi-
torum Collegium, olim Templariorum sedes) conventuri. Rex, cui

Coram
Senato-
ribus
Parla-
menti
ante Sa-
cræ Sy-
naxim
celebran-
dam con-
cionatur.

hac de re, licèt penè frivola & nullius momenti, supplicatum erat, electionem *Usserii* iteratò factam confirmavit. At ille hujuscemodi ordinationis novitate commotus & offensus, veritusque, ne quid mali in se suosque inde derivaretur, quasi ille, tunc temporis de nuptiis unici filii, *Caroli* Principis, cum *Hispanâ* contrahendis non parum sollicitus, Pontificiorum partibus favisset, (ut cæteras criminationes, à quibus erat alienissimus, malo animo impactas, omittam) *Usserium* XIII. Februarii accersendum, ut videtur, curavit: cui inter alia dixit, illum nimirum proximè sequente Dominica, *gregis immorigeri*, & vix facilè in ordinem cogendi, *curam acturum*: se bene intelligere non posse, quomodo tot centeni ex subita ista denuntiatione, cui omninò parendum erat, ante paucos dies lata, cum debita mentis præparatione sacris illis mysteriis participandis aliquo modo digni reddi potuerint, præcipuè post istas gravissimas lites nuper agitas: se quidem ab omnibus domesticis suis, ut sacrosanctis hisce Christiani cultûs ritibus frequentes interessent, non tamen simul, nisi solenni Paschatis festo, exigere: hoc Concionatori ex officio incumbere, ut Auditores ad pacem & concordiam inter sese ineundam & redintegrandam, ad Dei, deinde Regis & Patriæ, amorem hortaretur, coramque oculis deplorandum rerum publicarum domi & orbis Christiani foris statum proponeret. Hisce regiis consiliis monitisque præmunitis *Usserius*, prima Quadragesimæ Dominica, XVIII. Februarii, in hæc verba S. *Pauli* in prima Epistola ad *Corinthios* cap. X. v. 17. *Quoniam unus panis, & unum corpus, multi sumus: nam omnes de isto uno pane participamus*, perorans, sacrum istud argumentum, pari pietate & eruditione, utraque verò summa, in isto magnifico nobilium virorum confessu explicavit. Dum verò in primo articulo de communione sanctorum, & de mystico Ecclesiæ corpore, *Christo* capiti unito, agit, ad pacem, tum civilem, tum Ecclesiasticam, tam domi servandam & redintegrandam, quàm ad concordiam inter nosmet exterosque, eodem fidei & communionis nexu copulatos, fovendam nervosè suadet, & præsertim, ut alienæ calamitatis sensu affecti, illis opes suppetiasque ferrent, hortatur: dum verò in altero articulo de communicatione corporis & sanguinis *Christi* copiosius differit, Ecclesiæ *Anglicanæ* doctrinam de vera & reali præsentia *Christi* in Sacramento Eucharistiæ solidè explanat, *Romanensium* tum dogmate de substantiali elementorum mutatione, tum idololatræ cultu everfis & damnatis. In utrisque sanè omnes piissimi & sapientissimi Concionatoris partes implevisse mihi videtur.

tur. Sacra hæc oratio auditoribus, judicio pollentibus, mirè placuit, illorumque gratulationes, & aliorum, postquam illis jubentibus in lucem edita fuerat, maximo jure merita est, & sanè in perpetuum merebitur.

A. MDCXXI. in *Hiberniam* redux D. *Usserius* Ecclesiæ & diœceseos *Conse-*
Midensis, cui regendæ illum Rex *Jacobus* anno superiori, ut dixi, def- cratur
 tinasset, Episcopus, *Pontana*, quæ vulgo *Drogheda* appellatur, solenni *Droghe-*
 consecratione à reverendissimo viro, D. *Hamptono Armachano*, duobus *da.*
 ejusdem Provinciæ juxta antiquorum Canonum normam assistentibus, ordinatur. Verùm in illa sublimi Ecclesiasticæ dignitatis fastigio pos-
 tus, tantum aberat ab otio & remissiore vitæ genere, ut potiùs diligen-
 tiæ in gregem ipsi commissum impensæ ardentius, sacras Scripturas pu-
 blicè interpretandi & Evangelium *Jesu-Christi* prædicandi novas quidem
 & majores curas superaddere sui officii esse duxerit: cujus ut memo-
 riam semper in mente & oculis haberet, tremendam istam S. *Pauli* sen-
 tentiam, *væ mihi, si non evangelizavero*, in Episcopali sigillo, quam
 retinuit, ad summos in Ecclesia *Hibernica* honores evectus, incidi voluit.
 Adeò autem erat in concionibus frequens, ne dicam singulis diebus
 Dominicis, solennioribusque anni festis, assiduas, quando nimirum aut
 valetudo, aut opportunitas vel quæsitæ, vel majora Ecclesiæ negotia
 permiserint; ut inter celeberrimos maximique nominis *concionantes* *Epis-*
copos jure numerari mereatur. Dum verò tristis viderat, plerosque om-
 nes ex *Hibernis Romanæ* communionis in diœcesi sua, uti & in reliquis
 Provinciis per universam insulam, horrendæ superstitionis tenebris op-
 pressos, vitis sanctorum, absurdissimis fabulis portentosisque insomniis
 scatentibus, legendis addictos, interim tamen omni verâ sacrarum Scrip-
 turarum intelligentiâ vacuos, fatale illud, quo laborant, præjudicium,
 contra omnem vim argumentorum objicere consuevisse, se nimirum Pa-
 trum suorum Religionem & instituta sequi, & ab iisdem ista de causa
 neutiquam discessuros; ut errorem hunc ex illorum animis evelleret,
 liberum de veterum *Hibernorum & Britannorum* religione Linguâ Anglicanâ *Liber de*
 scripsit A. MDCXXII. in quo corruptelas in sacro cultu & nova dogmata, *veterum*
 jam pro articulis fidei agnita, ex fraude & superstitione sequioribus secu- *Hiberno-*
 lis sensim irrepsisse, (puta officium *Romanæ* Liturgiæ paulò ante quin- *rum &*
 gentos annos à *Gilleberto, Malachia, & Christiano*, *Romanæ* sedis apud *Britanno-*
Hibernos Legatis, in usum inductum; uti & baptizandi juxta morem illo edi- *rum reli-*
Romanæ Ecclesiæ post tempora *Augustini* Monachi; sacramentumque *gione ab*
 tus.

Eucharistiæ olim sub utraque specie administratum fuisse : longè aliter veteres de Chrismate sacramentali, de confessione, de nuptiis Sacerdotum , de tempore celebrandi Paschatis sensisse ; Regesque habere jus nominandi Episcopos , nec Papam spirituales jurisdictionem ibi antiquitus , multò minùs temporale dominium exercuisse , (ut alia levioris momenti omittam) ac proinde Nepotes à pristina majorum fide mirum quantum hac ex parte descivisse , prolatis ex antiquorum Gentis suæ Scriptorum auctoritate & testimonio, luculentis documentis ostendit. Liber sanè eruditissimus , in quo Patriæ suæ antiquitates è codicibus MSS. summa cum industria & fide illustrat , erroribus *Campiani* Jesuitæ & O. *Sullivan* subinde castigatis , clarissimo viro , D. *Christophoro Sibthorpo* Equiti , & uni ex Justitiariis communium placitorum in *Hibernia* , amico singulari , inscriptus , & ad calcem libri à D. *Sibthorpo* de eodem argumento conscripti *Dublinii* MDCXXII. in 4^o. editus & postea A. MDCXXXI. denuò *Londini* impressus.

Fit Re-
gius
Consilia-
rius.

Mox inter Regios Consiliarios adscitus *Usserius* , quanta sapientia & quàm solido judicio polleret , in re magni momenti , præclaro exemplo demonstravit. Cùm quidam *Hiberni* , *Romanæ* communionis muneribus publicis admoti , *Suprematûs* , uti appellatur , *juramentum* , in quo , agnita Regis summa in quosvis subditos , & in omnibus causis , tam Ecclesiasticis quàm Civilibus , auctoritate, dilucidè & circa omnem verborum aut sensus amphiboliam , *nullum exterum , sive Principem , sive Prælatum , aut quemcunque alium , habere , aut jure sibi posse vendicare qualemcunque spirituales & Ecclesiasticam in regnis & ditionibus Regiæ Majestatis jurisdictionem* asseritur ; suscipere recusassent , tum ut legum sacrosancta auctoritas constaret integra , tum ut publicæ tranquillitati prospectum foret , illustrissimus vir D. Vice-comes *Falcolandiae* , à Rege ipsius *Deputatus* tunc temporis constitutus , aliique è sanctiori Concilio Magnates in hosce pertinaces Magistratus animadverti oportere , maturis deliberationibus habitis , statuerunt. Quibus in arce Regia , indicto die , viz. XXII. Novembris MDCXXII. comparere jussis , postquam Judices istius juramenti naturam , rationem , & æquitatem , itemque poenas renuentibus ex vi legum irrogandas , exposuissent, D. *Usserius* oratione gravi , tam ad errores ex intellectu malè instructo & informato , quàm ad scrupulos è mentibus infirmis eximendos , composita , de Rege , utpote unico & supremo in regnis suis gubernatore, de potestate clavium , & potestate gladii , quæ neutiquam cum priori pugnat,

Judices ,
uti etiam
Usserius,
de juramento
suprematûs in
Concilio
sanctiori
differunt.

pugnat, & ex ordinatione Dei ad res sacras, spirituales & Ecclesiasticas moderandas pertinet, denique de jurisdictione *Romani* Pontificis, falsò & injustè in universam Ecclesiam arrogata, fundamento, cui innititur, penitus everso, summatim egit. Aliqui ex reis præsentibus, vi argumentorum persuasi convictique, se se lubenti animo submiserunt. Reliquis verò Auditoribus nervosa ista oratio maximè placuit, & præsertim postea Serenissimo Regi, ad quem brevi, ut videtur, exemplar transmissum erat, qui literis undecimo die sequentis Januarii in Palatio *Westmonasteriensi* exaratis, gratias D. *Usserio*, tanto cum judicio & doctrina pariter ac zelo, legitimum jus Regium strenuè vindicanti, agere dignatus est. Hæc verò literas, tum honoris tum præsidii causa, ad calcem Orationis in publicam lucem prodeuntis apponere *Usserio* visum est.

Serenissimus Rex *Jacobus* tum ex auditu & ex consentiente omnium A Rege fama, tum ex speciminibus à se visis, D. *Usserium* in eruendis Eccle- jubetur,
 siarum *Britannicarum* Antiquitatibus gravam operam impendisse conscius, ut in eru-
 ut in iis prosequendis continenter, quantum illius munus Episcopale, endis An-
 studiaque Theologiæ, quibus ex peculiari vitæ instituto solennique vo- tiquitati-
 to addiceretur, essent permissura, pergeret, impensè voluit jussitque. bus Bri-
 Cùm verò desideratissimum istud opus, inconsultis inexploratisque tannicis,
 Manuscriptis, qui in Bibliothecis *Angliæ* sparsim latuere, codicibus, pergere
 perfici nequiverit, optimo Regi literas ad Consiliarios *Hibernos* transmit- velit.
 tere placuit, ut D. *Usserio* hac de causa abfuturo in *Angliam* diverten- causa
 di ibique aliquanto tempore moram faciendi, commeatus sub formula *Angliam*
 juris concederetur. Ille rebus omnibus in Diœcesi, ne quid mali de- repetit.
 trimentive ex illius absentia inde oriretur, providè ordinatis, exeunte
 anno MDCXXIII. *Angliam* remeavit, *Londinum* appellens, ad Aulam
 properavit, humillima & maximè debita augustissimo Patrono, opti-
 mè merito, obsequia delaturus. Cùm verò Rex more solito, tum ad
 Urbis molestias immodicosque calores vitandos, tum ad serenioris cœli
 amœnitatibus & deliciis fruendum, *Wanstediam* (toppidum illud, in Agro
Essexiensi situm, *Londino* sex circiter miliaribus distitum est) cervo-
 rum venationi intentus substitit, D. *Usserius*, illò accersitus, coram
 illo Aulicisque, qui Regem pro ratione officii in istis æstivis rusticatio- Coram
 nibus comitari soliti erant, concionem in hæc verba S. *Pauli* ad *Ephes.* Rege
 IV. 13. *Donec occurramus omnes in unitatem fidei & agnitionis filii concio-*
Dei, in virum perfectum, in mensuram ætatis plenitudinis Christi: 24^o. nem ha-
 bet.

Junii

Junii habuit , in qua solidè , eruditè , & sapienter quidem de *universalitate Ecclesiæ Christianæ & unitate fidei Catholicæ* , ab omnibus veris Christianis solenni professione agnita , prout magnum decebat Theologum , differuit. Regis jussu edita erat , ut quam ille optimo cum fructu & voluptate animi , audiverit , in publicam omnium utilitatem per universas *Britannias* typis exscripta spargeretur.

Respon-
sio ad
provoca-
tionem
cujus-
dam Je-
suitæ.

Hoc anno D. *Usserius Londini* edidit librum hoc titulo insigni-
tum , viz.

Responsio ad provocationem , à quodam Jesuita in Hibernia intentatam , in qua antiquæ Ecclesiæ judicium in dogmatibus controversis verè traditum habetur , & præsentis Romanæ doctrinæ innovationes clarè & manifestè deteguntur.

Hujus elaborati Operis , non alium Patronum quærere & adsciscere aut potuit aut debuit , quam serenissimum Regem , *Jacobum* , cui hanc *pro fide Sanctis semel tradita* , cujus erat & re & titulo strenuus defensor , concertationem longè acceptissimam fore habuerat comper-
tum. Origo autem hujus controversiæ paulò altiùs arcessenda est. Ante sex annos cùm *Gülielmus Malonius* , *Hibernus* Jesuita , schedam , in qua , propositis quæstionibus de invariata Religionis Christianæ à primis seculis ad hodiernos *Romanenses* derivatæ ratione , & de quibusdam fidei & doctrinæ articulis , à Reformatis , ut blaterat , penitus rejectis oppugnatisque , pertinacissimè urget , ut iis satisfaceret , ubique sparsisset , ad deprimendum hujusce Provocatoris fastum & gloriationem , in arenam descendens *Usserius* , mox breve & generale responsum , doctum herculè , & refellendis criminationibus impactis , si quod unquam , maximè proprium , quod in primo capite hujus novæ editionis continetur , in lucem extrusit : neque enim illius erat de istiusmodi articulis in charta provocatoria , quasi per saturam , nudè absque aliqua probatione , sive ex S. Scripturis , aut antiquorum Patrum (quorum unanimem cum ipsis consensum crepuit) scriptis allata , recensitis in specie & particulatim agere : cum solius Respondentis partes suscepisset , cum Adversario , quandocunque ad novam pugnam proritaretur , pressiori pede congressurus. Obmutuit verò Provocator , nec quicquam ultra hac ex

parte

parte per aliquot annos actum fuerat : & fortasse hujus litis memoria penitus intercidisset , nisi quidam Magnates utriusque regni preces & postulationes suas apud *Usserium* interposuissent , ut Ecclesiæ primitivæ de hisce articulis illic memoratis judicium , testimoniis prolatis , inque longum productis , exhibere vellet , ut inde cuivis Lectori cordato , an *universi Doctores , Pastores , & Patres Ecclesiæ primitivæ* , quod suave erat arrogantissimi Jesuitæ insomnium , hodiernis *Romanensium* placitis consensissent , certius meliusque constaret.

Hunc Commentarium quispiam cum Auctore jure appellaverit Dogmaticam Historiam , sive Dissertationem , de hisce sequentibus articulis : viz. *de traditionibus , de reali præsentia , de confessione , de Sacerdotali potestate remittendi peccata , de purgatorio , de orationibus pro mortuis , de limbo Patrum , & de descensu Christi ad inferos , de orationibus ad Sanctos , de imaginibus , de libero arbitrio , & de meritis*. In hisce explicandis D. *Usserius* se , licet aliorum opiniones & sententias pro re nata recitaverit , solam doctrinam in Ecclesia *Anglicana* publicè agnitam & stabilitam , inque libro Articulorum , de quibus in Synodo *Londini* MDCXII. habita convenerat , comprehensam , tueri profitetur. Quod verò aliqui è nostratibus , æstu disputationum nimium quàm abrepti , illum in paucis à vero Ecclesiæ sensu aliquatenus aberrasse contenderint , cùm res istiusmodi mihi quidem parvi admodum momenti esse videantur , ab iis recensendis penitus abstinebo. Interim verò omnes uno ore consentiunt , D. *Usserium* in lectione Patrum , tam *Græcorum* quam *Latinorum* , & Historiæ Ecclesiasticæ , item & Scholasticorum post *Lombardum* , & Theologorum adversæ partis , qui controversias tractarunt , optimè versatum esse , neque cuiquam in hac peculiari Scientia (non enim ex subtilibus ratiociniis Dialecticisque strophis , sed consentientibus Antiquorum testimoniis agendum erat) aut ingenii aut judicii solertia cessisse. Ad calcem libri Auctorum à se supra citatorum Catalogum juxta seriem temporum , quibus singuli vixerint , addendum curavit , quorum tamen omnium ætates accuratiori examine explorare , ac quid de illorum libris , eorundemque argumentis , deque scribendi ratione , censendum sit , & quomodo genuini à dubiis & supposititiis distinguere debeant , & denique quicquid ad illorum historiam illustrandam quoquo modo necessarium videretur , omni , qua potuit , diligentia excutere , in grandi opere , quod sub *Bibliotheca Theologia* titulo in usum illorum , qui præclaro hoc doctrinam & ritus veteris Ecclesiæ cognoscendi studio tenerentur , dudum molitus est , si Deus

Bibliotheca
Theologica.

vitam otiumque dederit, edendo, apud se constituit. Sed quominus id operis, quod impensissimè voluit, omnibus partibus numerisque integrum absolvere potuerit, tum studiis diverſi generis, tum turbatissimis temporibus, & miseranda rerum in *Hibernia* & *Anglia* catastrophe, impeditus, vastam Collectaneorum molem viro doctissimo, & Amico fidelissimo, D. *Gerardo Langbaino*, Ecclesiæ *Reginensis Oxon.* Præposito, paulò antè mortem commendavit, ut ea omnia limato illius iudicio perpolita, inque debitum ordinem digesta, tandem aliquando in publicam lucem ederentur.

Dum verò ille schedarum *Usserianarum*, quas mures arroserant, lacunis supplendis, operique utilissimo, singulis partibus ad examen revocatis, additamentisque ad sua loca adductis, laboriosissimam impenderet operam, morbo correptus, quem ex intenso frigore contraxerat, curandæ valetudinis, quam hiemalis rigor permiserit, negligentior, in eunte Februario A. MDCLVII. juxta Ecclesiæ *Anglicanæ* computum, piàm efflavit animam. Autographum postea ab hæredibus *Usserii* magno pretio redemit vir eruditissimus D. *Edwardus Stillingfleetus*, Decanus Ecclesiæ Cathedralis S. *Pauli Londini*, Exemplar duobus crafſis voluminibus, *in folio*, ut loquuntur, constans: quod quidem D. *Langbainus*, à me non sine debito honore & observantia commemorandus, utpote benignus studiorum meorum, quando ad Academiam primùm accessi, fautor, eleganti & accurata manu describendum curavit, in Bibliothecæ *Bodleianæ* Archivis reponitur (a). Utinam verò quispiam inter *Oxonienſes*, huic negotio idoneus, desideratissimam illius editionem denuò aggrederetur! Sed fortasse aliqui, post reverendi & eruditissimi Viri, D. *Gulielmi Cavei*, Regiæ Capellæ *Windsoriensis* Canonici, *Scriptorum Ecclesiasticorum Historiam Literariam*, hanc minus necessariam fore censebunt.

Replica-
tio Malo-
nii ad Uss-
erii Res-
ponſio-
nem.

A. MDCXXVIII. librum adversus D. *Usserium* Anglicano idioma-
te *Duaci* edidit *Malonius* Jesuita, hoc titulo prænotatum, viz. *Replica*
contra Responſionem Usserii pro antiquitate dogmatum fidei Romanæ.
Sed cum famosus iste liber non minus vernilibus dicacibusque dictæriis
&

(a) *Jacobi Usserii Collectanea & judicium de SS. Patrum scriptis genuinis & suppositis.* 2. vol. Vide Catalogum Codicum MSS. *Angliæ & Hiberniæ Oxon.* MDCXCVII. pag. 176. Horum *Collectaneorum* præclarum specimen, viz. de antiquis S. *Chrysostomi* Interpretibus, de editionibus variis operum S. *Chrysostomi*, & de Scriptoribus vitæ ejusdem, uti & eruditissimam præstantissimi viri, D. *Henrici Savilii* de Scriptoribus rerum *Chrysostomi* Admonitionem V. Cl. D. *Caveus* in *Historia Literaria* edidit.

& spurcis mendacibusque calumniis , quæ & Christianum & Religio-
sum planè dedecebant , quam sophisticis cavillationibus maleque con-
sulis detortisque Patrum sententiis ubivis scateret , *Usserius* Amico-
rum , hunc *Thersitem* , qui cum *Achille* congrediretur , prorsus in-
dignum esse judicantium , monitis & consiliis obsecutus , nolebat
bonas horas in hoc impudentissimo *Rabula* refellendo disperdere :
& eò quidem minus ægrè , cùm tres Theologi *Dublinienses* , *Hoy-*
laus , *Singus* , & *Puttæus* , illi in rebus longè majoris momenti oc-
cupatissimo vicarias operas addixerint ; quod postea singuli seorsim
cumulatim præstitère.

Dum in *Anglia* substiterit *Usserius* , reverendissimus D. *Christopho-*
rus Hamptonus , Archiepiscopus *Armachanus* , & totius *Hibernie* Pri-
mas ultimum diem suum obiit , nempe Januarii tertio , stylo An-
glicano , MDCXXIV. De substituendo Successore in aula Regia
multùm serioque deliberatum erat. Rex verò serenissimus , post re-
moras amotas , D. *Midensem* , cùm vix quenquam è Naucleris , qui
istius Ecclesiæ clavum aut fortiori manu aut intensiori oculo rege-
ret , reperiri posse sensisset , ad istam eminentissimam dignitatem paulò
antè mortem ipsius promovit , XXI. Martii , eodem stylo ejusdem
anni. Centesimus autem erat *Usserius* à S. *Patricio* , si calculus ritè
ineatur , istius supremæ sedis Antistes. Nuncium hoc , quod ve-
lox fama citò in *Hiberniam* pertulit , ibi summa cum lætitia acci-
piebatur ; inde crebræ gratulatoriæ epistolæ , summâ reverentiâ &
cordatissimo affectu refertæ , ad D. *Usserium* missæ , quem Eccle-
siæ istius bono natum fuisse gratulantur , ipsius celerem in patriam
reditum ardentissimis precibus exoptantes. Sed illis tam citò esse
felicibus non licebat ; quippe mox febris quartana per novem men-
ses in *Anglia* moram facere invito planè animo *Usserius* cogebatur.

Anno hoc ad finem vergente D. *Usserius* solennem cum quodam
Jesuita disputationem , cui , licèt se non ingesserit , illam tamen lu-
benti suscepit animo de quibusdam controversis Religionis capitibus ha-
buit , cujus occasio hæc fuit.

Cùm vir nobilissimus , *Joannes Baro Mordantius* Communionis Ro-
mane , postea tertio R. *Caroli* primi anno , ad titulum , honorem , &
dignitatem Comitum *Petroburgensis* evectus , lectissimam feminam , *Elisa-*
betham Howardam , uxorem suam , natalibus quoque nobilissimam , ut-
pote *Gulielmi Howardi* , Baronis de *Effinghamia* , filiam & hæredem , &

Usserius
consti-
tuitur
Archie-
piscopus
*Arma-
chanus.*

Disputa-
tio *Uss-*
erii cum
quodam
Jesuita
in *Anglia.*

ex illustrissima *Howardorum*, Ducum *Norfolciae*, gente oriundam, ad eandem amplectendam diu multumque allicere pertentasset, illa quò ab istiusmodi crebris molestisque interpellationibus decentiùs liberaretur, professa, se de multis Romanæ fidei articulis dubitare, nec Ecclesiam *Anglicanam*, in qua nata & educata fuerat, relinquere aut posse aut velle, nisi convictam, in illa sibi non manendum esse, nisi cum periculo salutis, petiit, ut amicæ inter eruditos utriusque partis viros collationes in illius præsentia haberentur, quò victrix Veritas inclinaret, quanta potuit animi solertia, dijudicatura. Cujus æquissimis postulationibus cum facilè fuisset assensum, Baronissa, consentiente marito, re D. *Usserio* communicata, literis blandis illum, ut in Veritatis, pariter ac sui subsidium venire dignaretur, invitavit. D. *Usserius* verò opem ejus aut frustra implorari, aut diu desiderari, neutiquam passus, mense Novembre, valetudine vix redintegrata, ad *Draytonam* in agro *Northamptoniensi* properavit, ibi omni reverentia ac cultu, quem ejus summa dignitas merita est, ab utrisque nobilissimis hospitibus exceptus. Illic reperit quendam Societatis Jesuiticæ, *Bellomontium* nuncupatum, potius *Rookwoodum* nuncupandum (nomen istud in Historia Proditionis Pulverariæ fatis notum est) Baroni à confessionibus, cum quo certamen hoc religiosum, procul omni fastu, & quasi deposita dignitate, inibat. Triduo disputationes istæ de *transsubstantiatione*, de *invocatione Sanctorum*, de *imaginibus*, & de *visibili Ecclesia*, & in genere, an religio, ex auctoritate publica tum civili tum Ecclesiastica in Ecclesia Anglicana stabilita, eadem esset cum *Primitiva*, an verò *Romana*, nec ne: in quibus articulis excutiendis D. *Usserius* partes Opponentis sustinuit, libris antiquorum Patrum ex instructissima Baronis Bibliotheca prius in medium productis, si qua foret illorum sententias & testimonia explorandi occasio. Quarto die cum vice versa articulos Religionis Anglicanæ impugnare Jesuitæ ex condito incubuisset, ille nolebat amplius in arenam prodire, hac excusatione submissa, *argumenta*, quibus inter opponendum usus erat, justò Dei judicio è memoria penitus excidisse, eò quod cum viro tam profunde & consummata eruditionis, licet in tuenda Catholicæ Veritatis causa, in jussu Superiorum, congregari ausus fuisset. Quod quidem turpe effugium illi apud suos Symmistas, & potissimum seculares, uti vocant, Sacerdotes, maximè in opprobrium & infamiam cedebat. Sed en hujusce disputationis, cujus fama ubilibet percrebuerat, fructum eventumque! D. *Mordantia* in Ecclesiæ Anglicanæ communione magis magisque fir-

ma-

matur: Maritus verò vacillare primò cœperat, disjectisque sensim, quibus intellectus offuscaretur, præjudiciis, admissoque S. Scripturarum lumine, & liberiori Rationis hætenus oppressæ usu, relicta Ecclesia Romana, in *Anglicanam*, ubi purior viget Christianismus, illuminata mente transibat. Illustrissima Heroïna immortalem hujus beneficii memoriam apud se grato animo retinuit istud quantum quantum omni tempore, si daretur occasio, reipsa repensura. Cujus bonæ voluntatis in effectum dandæ non deerat opportunitas: cùm in calamitosissimis temporibus, flagrante tum in *Anglia* tum in *Hibernia*, impiissima rebellionem, D. *Usserium*, omnibus fortunis suis penè exutum, per novem decemve annos ad mortem usque illa in suis ædibus, tum *Londinensibus*, tum *Sur-regiensibus*, summo cum honore & benignitate exceperit.

Tandem negotiis in *Anglia* confectis, integraque valetudine gavisus *Usserius*, ex porta *Leverpoliensi* apud *Lancastrienses* Augusto mense *Usserius* redit in *Hiberniam*. MDCXXVI. solvens in *Hiberniam* prosperè navigavit: cujus longam absentiam quò ægriori animo tulerint, præsens jam & redditus patriæ effusiori gaudio lætioribusque auguriis à Magnatibus, Episcopis, & universo Clero, sub illius sapientissimo regimine certius Ecclesiæ præsidium majusque apud indigenas *Hibernos*, quantum illorum obstinatio pateretur, religionis incrementum, sibi spondentibus, excipiebatur.

Benignè in *Usserii* gratiam providebat ante mortem serenissimus Rex *Jacobus I.* literis in *Hiberniam* missis, ne quicquam de temporalibus sive redditibus istius Sedis, prout usu, contra omne jus fasque venire solet, ab iis, qui eorundem *custodiam*, ut verbo municipali utar, & administrationem procurant, in privatum commodum nimium quam intenti, licèt abfuerit, minuendum: rationem accepti & dati ipsi ex debito reddendam, pecuniasque omnes, prout ille ordinaverit, solvendas & disponendas esse, ac si ibi præsens constitisset. Rex verò *Carolus I.* quo nemo Regum Ecclesiæ *Anglicane* unquam amantior, meliorve Patronus, pro cujus fide juribusque tuendis martyrium fortissimè subibat, paterni & verè augusti exempli æmulus, memorque, quanti illè D. *Usserium* ob reconditissimam eruditionem & fidem in rebus magni momenti præstitam æstimaverit, benignitatem munificentia auxit, & in verè regii affectûs & bonæ voluntatis arrham, quadringentas libras sterlingicas illi statim post reditum ex fisco istius regni numerari jussit.

In hac sublimi specula positus D. *Usserius*, dum oculos circum circa per totam Insulam flectit, ante omnia & primum sibi ex officio incumbere cura.

bere duxit, ut propriam Dieceſin, utpote peculiari ſubditam juridi-
 cationi, luſtraret, ſi qui defectus & errores, & quicquid perperam factum
 fuerit, id omne emendaturus, ut illa nimirum eſſet reliquarum, ſaltem
 in iſta Provincia, concurrentibus ad idem ſanctum opus promovendum
 Suffraganeis, regula & meſura. Indicta igitur ſolenni *Viſitatione*, con-
 vocatiſque per partes ad ordinatas ſtationes Presbyteris, in illorum mores
 & doctrinam ſedulus inquiri, inſtanter monet, obteſtatur, jubetque,
 ut quiſque omnibus inſtituti ſacerdotalis partibus prudenter & ſtrenuè fun-
 gatur, & potiffimùm, ut in Scripturis ſacris & Liturgia juxta cano-
 nas publicè legendis, ſint aſſidui, & ut vita profeſſioni reſpondeat: deni-
 que cùm pleroſque ex infima plebe ſive in cultioribus oppidis confertos,
 ſive agricolationi, & pecudibus alendis addictos, ſeorſim per campeſtria,
 aut propè lacus & ſylvas ſparſos, ſpiſſa rerum ſacrarum divinarumque ig-
 noratione laborare, olim & adhuc-dum triſtis comperiſſet, urget quàm
 acerrimè, ut diligenti S. Scripturarum lectioni, frequentique prædica-
 tioni, Auditorum tenuioris tum fortunæ tum intellectus captui accom-
 modandæ, & mentem & operam intendant. Iſtis enim fundamentis jactis,
 de illorum proſectu in vitæ & civilis & Chriſtianæ officiis meliùs eſſet
 ſperandum neque aptior efficaciorque methodus iniri potuerit, qua men-
 tes plebis intactæ & ab omni vel Pontificiæ ſuperſtitionis vel læſæ pieta-
 tis labe immunes fervarentur.

Abuſus
 in Curiis
 Eccleſia-
 ſticis
 graſſan-
 tes re-
 forma-
 re &
 tollere
 nititur.

Cùm verò nimium clarè conſtaret, graves corruptelas in Curiis Ec-
 cleſiaſticis, quas vetuſtas malæque conſuetudines ſenſim introductæ firma-
 verant, irrepiſſe, ſententiasque Adſeſſorum interdum ex poteſtate, per-
 peram arrogata, præter jus & æquum, licèt ſub ſpecie & umbra juris,
 latas, vi penè deſpotica executioni mandatas fuiſſe, illos omnes, qui
 qualicunque nomine & gradu inde pependere, utpote illius Adminiſ-
 tros, ac ſola poteſtate delegata, non arbitrario jure præditos, coram ſe
 citari & advocari juſſit, regulas, quibus exterius illud regimen, probè
 & honeſtè, & abſque querela & gravamine adminiſtrari poſſet, præſcrip-
 turus. Multa quidem reformavit, inque meliorem redegit ordinem:
 Sed cùm ex longo annorum decurſu, & praxi roboratæ altas radices egif-
 ſent, vix quidem evellendas, lucroſæ quædam juridiſctiones, quas poſ-
 ſidentes nolebant relinquere, & objectæ difficultates, ac ſi longus com-
 munis uſus feciſſet jus, planè inſuperabiles viderentur in præſens,
 licèt omninò invitatus, ceſſit, malis iſtis remedium opportuniore tempore
 adhibiturus.

Dum

Dum verò in rebus tum Dioeceseos, tum provinciæ ritè ordinandis, Discep-
 inque veteri disciplina revocanda, lento pede processerit D. *Usserius*, ne-
 gotia difficillima, & maximi quidem momenti, quæ illius & reliquorum ^{in Hiber-}
Hiberniæ Episcoporum cogitationes mentesque occupaverint, in quibus ^{nia de co-}
 causa religionis, quæ in magnum adduci discrimen inde visa est, age- ^{piis mi-}
 batur, ex inopinato intercessere. *Anglia* hoc anno, bello cum *Hispanis*
*Gallis*que, ad quos malè affecti erga Patriam, tanquam Patronos & Pro-
 tectores, transfugere pridem consueverant, simul ac eodem tempore im-
 plicita, copias militares, quæ in arcibus & propugnaculis juxta oras ma-
 ritimas *Hiberniæ*, aut alibi locorum sitis, dispositæ erant augere :
 tum ad arcendos hostium insultus impetusque, tum ad reprimendas do-
 mesticas tumultuantium & seditiosorum machinationes, serenissimo
 Regi *Carolo* primo & utriusque regni Consiliariis opportunum, imò &
 necessarium, videbatur : tantilli autem numeri (non enim peditatus ultra
 quinquies mille præsidarios assurgebat, equitatus verò sub decupla pro-
 portione minor) stipendiis exsolvendis, demptis nimirum oneribus pen-
 sionibusque, quas civile regimen exegerat, annui istius Insulæ redditus,
 sive ob vectigalium defectum, sive ob incolarum, ferax ac pingue solum
 nequicquam aut saltem non debita industria aut labore colentium, aut
 ignaviam aut paucitatem neutiquam suffecere. Summa ratio & æquitas
 postulaverunt, ut singuli pro facultate sua, publicæ pacis, in qua om-
 nium felicitas continetur, securitati firmandæ conducere. Sed suspi-
 ciones malæ de aucto exercitu, & de novo censu, quo alendus erat, ne
 perpetuus foret, *Hibernos*, præsertim *Romanæ* communionis, qui maxi-
 mam Gentis partem constituebant, à dandis subsidiis averfos ac alienos
 reddidere. Ad quorum obstinationem expugnandam D. *Deputatus* &
 Consiliarii, ut omnis justa querelæ occasio adimeretur, quasdam poena- ^{*Usserius*}
 les leges quibus obnoxii erant, pro tempore relaxandas proposuere : ma- ^{reliqui-}
 jora, si meruerint, indulturi. Illi verò superstitionis suæ *tolerationem* ^{que E-}
 pecuniis mercari, spe & animo elati, voluere. Quod D. *Armachano* ^{piscopi}
 aliisque Episcopis maximè displicuit, qui, quàm pessimi exempli esset ^{se tolera-}
 infame istud pactum, & quantum malorum inde traheretur, satis provi- ^{favore}
 di, frequentibus hæc de re, in qua Ecclesiæ salus vertebatur, consulta- ^{Pontifi-}
 tionibus apud (a) *Pontanam* in ædibus D. *Usserii*, qui illos illuc invita- ^{ciorum}
 verat, initis, huic indulgentiæ, si qua proponeretur, publicè reclamare ^{conce-}
 una- ^{strenuè}
 oppo-

(a) Vide Epistolam CXVI D. *Usserii* ad D. *Georgium Abbottum* Archiepisc. nunt.
Cantuar. in *Sylloge*. p. 376.

unanimò consensu apud se constituerunt, formulamque *Protestationis*, opportuno tempore proferendam, XXVI. die Novembris nominibus subscriptis signarunt: Solenni Comitum, Baronum, aliorumque nobilium utriusque communionis conventu, ut de hoc negotio disceptaretur in magna aula arcis *Dublinensis* XXIII. Aprilis A. MDCXXXVII. indicto, coram D. *Deputato*, aliisque primariis viris, in Ecclesia *Christi* pro more congregatis. D. *Georgius Downam*, Episcopus *Derensis*, concionem habuit, in qua occasione captata de malè subjicienda artibus politicis secularibusque commodis Religione & conscientia, & de gravi scandalo ex hac animarum, ob pecuniæ inde colligendæ aucupium, licitatione, orituro differendi, dicens hanc non solam sui ipsius sententiam & judicium, sed omnium Archiepiscoporum & Episcoporum istius regni esse, chartam supra memoratam protulit, & clara voce publicavit; quæ sic se habuit:

*Judicium quorundam Archiepiscoporum & Episcoporum
Hiberniæ de toleratione religionis.*

Religio Papistarum est superstitiosa & idololatræ: illorum fides & doctrina erronea & heretica: illorum Ecclesia respectu utriusque Apostatica. Ideo ejusmodi tolerationem indulgere & consentiri, ut facultas istam Religionem exercendi, fidemque istam profitendi, illis daretur, grave peccatum esse hoc duplici nomine liquet:

I. *Hoc modo nos ipsos accessarios præstamus (h. e. facinorosè si non consilio, saltem silentio subvenire videbimur) non solum illorum superstitionibus, idololatriis, & hæresibus, & in summa, omnibus Papismi abominationibus, sed etiam, quod inde sequitur, animarum seductarum, quæ in Catholice apostasiæ alluvione peribunt, perditioni.*

II. *Hanc tolerationem concedere ob pecunias dandas, contributionesque ab illis colligendas, idem est, ac religionem, & unà cum illa, animas populi, quas Christus Salvator noster pretiosissimo suo sanguine redemit, venum exponere. Ut verò hoc ingens flagitium est, ita multa mala inde consecutura esse non minus periculum. Hac sapientibus & judicio pollentibus perpendenda commendamus: obsecrantes Deum Veritatis, ut omnes, qui publicis muneribus admoventur, sanctissimi Numinis gloriæ & augmenti veræ Religionis studiosissimos reddat: item pariter zelantes, firmos, & fortes adversus omnem Papismum, superstitionem, & idololatriam: Amen.*

Cessante Auditorum Amen concinentium acclamatione, extemplo subdidit Concionator, *hoc ab ipsis non malo animo aut in Reipublicæ detrimentum & incommodum dictum aut factum fuisse, sed ex amore Patriæ & Religionis, quarum utramque in omne ævum salvam fore impendiò cupe-
rent, se quidem velle, ut numerosior exercitus stabiliretur: interim tamen multiplicis istius GRATIÆ, Pontificiis nuper ea de causa oblata, cujus plu-
rimam partem non sine divini nominis, etiam & regii, contumelia & Eccle-
siæ Hibernicæ incommodo indulgeri posse pro certo credebant, distributionem
soli Regi, reservandam esse, atque hoc publicæ necessitatis tempore unum-
quemque, si boni civis & Christiani famam integram servare velit, laboranti
patriæ succurrere oportere.*

Sequente Dominica coram iisdem Magnatibus idem argumentum pari zelo pertractavit D. Usserius, in illos, si qui fuerint, *qui ex secularis
commodi intuitu, instar proditoris Judæ Christum pro triginta denariis argen-
teis vendere in animo habuerint, potissimum invecus. Verum tam fla-
granti zelo efferbuere Præsules, ut nobiles Reformatæ communionis
in eandem sententiam facilè pertractis, conditionibus in gratiam Pontifi-
ciorum propositis nullatenus assensum fuerit: hi verò, nisi iisdem con-
cessis sancitisque, onus istud subsidiorum sibi impositum iri obstinatò
recusarunt.*

Dum autem hasce lites acerrimâ animorum & vocis contentione alter-
utrinque agitata, pro sapientia sua D. Deputatus & Consiliarii suavi-
bus modis, h. e. suavis & argumentorum è rationibus politicis petito-
rum vi componere studerent, D. Usserius ab utrisque partibus conten-
dentibus magno honore habitus, illorum jussu in Camera arcis Regiæ,
uti appellatur, tricesimo die Aprilis A. MDCXXVII. gravem habuit
orationem, in qua debilem regni statum, quam repellendis hostibus
publicæque paci conservandæ omninò impares essent, stragesque belli,
omnes absque aliquo discrimine inexplicabilibus malis obruturi, quod
exercitus sub severis disciplinæ militaris regulis aut prævertere aut sopire
solus potuit, sub oculos ponens, ostendit necessitatem quasi inevitabi-
lem urgere, si suæ, si suorum salutem consulere vellent, ut citra omnem
moram, subsidia in commune bonum patriæ expetita promptissimè abs-
que omni prævia stipulatione darentur: nubes atras ingruere & cogi in-
cipientes, ni dissiparentur, in fulmina & tonitrua erupturas esse: de
exterorum hostium insultibus, uti etiam de domestica rebellionem metuen-
dum esse: intertextis tamen Pontificiorum fidei qui ex stirpe *Anglica*

Usserius
de pecu-
niis pro
defensio-
ne regni
suppedi-
tandis in
camera
arcis Re-
giæ per-
orat.

prognati, aut prædia à Rege, supremo Domino, sub certis annexis servitiis sibi & hæredibus derivata possident, laudibus : (cujus insigne specimen in nupera rebellione Comitum *Tiroenæ*, regnante Regina *Elisabethâ*, dederant, utpote nullis Regis *Hispaniæ* blanditiis & promissionibus allekti, nullis Papalibus Brevibus & Bullis, nullisque Academiarum *Salmanticensis* & *Vallisolitanae* declarationibus territi aut convicti) simul de communi salute providendum esse : exceptiones ex mutuo sibi contradicendi studio arreptas, neutiquam valere : nullamque justam metuendi causam, quasi illorum aut posterorum libertas inde læderetur, aut voluntarium istud subsidium in jus coronæ deinceps transfret : tandem obnixissimè monet, ex principiis religionis & conscientiæ, quibus omnes boni subditi tenentur, ut præstare, quod fas & æquum exegerint hoc in articulo præstandum ; nullaque conditionum mentione facta, totum illud, de quo controversum fuerat, serenissimi Regis sapientiæ & prudentiæ relinquere vellent. Sed mentes altercantium, qui suis freti opinionibus, ad varios fines collimarunt, nulla eloquentia, rationibus nullis, sive ex Theologiæ, sive ex sanioris Politicæ adytis ab *Usserio* depromptis conciliari potuere.

Serenissimus Rex orationem hanc, in qua pii admodum Episcopi & fidelissimi Consiliarii officio & munere pari laude, & præclarissimè quidem, functus est D. *Usserius*, sibi in *Angliam* à Consiliariis *Hibernis* transmissam gratioso affectu excepit & approbavit.

Libros
MSS. ex
Oriente
magno
impendio
procurat
advehi.

Inter istas multiplices curas, quibus distinebatur *Usserius*, ex quo facrum Episcopale munus isti concreditum fuerit, studium literarum, quo ab ipsa juventute incaluerat, novo fomite superaddito redaccensum, latius se diffudit. Non enim libros omne genus, ubi ubi typis exscriptos, in Bibliothecam congestisse contentus, abditos *Syriæ*, *Palaestinae*, & *Mesopotamiæ* recessus, nullis parcens sumptibus, investigari curavit, ut codices manuscripti melioris notæ, & quantivis pretii, inde eruerentur, in Christianum orbem invehendi : ubi linguarum Orientalium cultura florere, inque non mediocri honore haberi, nuper incepisset. Hac de causa ope & diligentia reverendi viri, *Thomæ Davisii*, qui tum Mercatoribus *Anglis*, *Halebi* degentibus, erat à sacris, per quadriennium usus est, & quidem felicissimi. Non hîc omnium librorum mênû exaratorum, procurante industrio isto proxenetâ, indicem, si daretur, proferre libet ; cum ii, quoad maximam partem in Bibliothecis *Oxonienfi* & *Dublinienfi* dudum repositi, ex magno opere Catalogorum *Oxonii*

A. MDCXCVII. publicato peti possint. Horum de præcipuis paucissimos, qui vetustissimas S. Scripturarum versiones complectuntur, pauculis adnotationibus insertis, memorabo.

Pentateuchus Samaritanus.

Imprimis vero recensendus venit Pentateuchus Samaritanus, quem licet Hebraicæ veritati millies postponendum censuerit, tamen tum ob singularem raritatem, cum (a) vix aliud exemplar, si fortè illud, quod *Petrus à Valle*, *Patricius Romanus*, ex Oriente tulerat, excipiamus, in *Europa* antea comparuisset, tum ob uberrimum fructum sacrosque usus, in explicando Hebraico textu & Græca versione, inde depromendos, ingentis thesauri loco habuit. Ille verò primus omnium, Hebraico & Samaritano textibus simul accuratè collatis, variantes lectiones collegit, quas Reip. literariæ communicasset, si quispiam ex nostratibus Typographis, certiori lucro inhiantibus, id operis, cujus beneficium & momentum pauci aut intellexerint, aut ritè & satis pro dignitate æstima-
verint, edendum suscepisset. Qua opportunitate neglecta, V. Cl. *Joannes Morinus*, è Congregatione Oratorii Presbyter, post paucos annos, primæ editionis gloriam sibi soli asseruit. Sed vir amplissimus & doctissimus, *Joannes Seldenus* noster, de apparatu Chronologico ad Epochas veterum Græcorum, in vetustissimo marmore, nuper maximis illustrissimi Viri, *Thomæ Comitis Arundellie*, sumptibus, unà cum multis aliis ex *Græcia* in *Angliam* inducto, in quo, ut hoc obiter addam, Historiæ mille trecentorum annorum per intervalla, h. e. à *Cecrope*, primo *Atheniensium* Rege, ad tempora paulò ante *Alexandrum* magnum, compendium continetur, repræsentatas; item de Chronologia sacra, & præsertim de ista, quæ in *Samaritanorum* Pentateucho hodiè exstat, maximè sollicitus, D. *Usserium* literis rogavit, ut integrum quintum caput *Geneseos*, & partem undecimi, quanta nimirum ad Patriarcharum Post-diluvianorum annos refertur, exscribi curaret; quod ille integerrimi Amici precibus faciliè obsecutus, typis summa cum accuratione descriptis delineatisque abundè præstitit: mantissæ loco (b) Epistola addita, in qua *Samaritanorum* computum, à *Josepho Scaligero* publici juris factum, & quicquid de eodem apud *Julium Africanum*, *Eusebium Casariensem*, & *Georgium Syncellum* occurrit, ad examen revocat, summoque cum judicio expendit, Periochas istas de Patriarcharum annis ex hoc codice,

A. MDCXXVII.

H 2

bene-

(a) V. Epistolam D. Usserii ad *Ludovicum Capellum* in calce ad *Syntagma de Græca LXX. Interpretum versione*. Londini 1655. 4^o. pag. 215. & in *Sylloge epist.* CCLXVII. pag. 576.

(b) Edita est in *Sylloge Epist.* CXXII. pag. 383.

beneficio reverendissimi nostri Antistitis transumptas fuisse *Seldenus* in Prolegomenis ad Marmorum Arundellianorum Inscriptiones *Londini* MDCXXVIII. editas gratus, adjectisque magnificis elogiis, agnovit. Hoc ipsum verò Exemplar nobilissimi viri, & arcta amicitia conjunctissimi, D. *Roberti Cottoni*, Bibliothecæ, inscriptione propria manu exarata, dedicavit, quam hîc paulò correctiorem Lector curiosus, cui istius incomparabilis Bibliothecæ catalogus, à me *Oxonii* antè octennium editus, ad manum non est, iterum, & fortasse cum nova voluptate perlegere non dedignabitur.

Pentateuchum Samaritanum à decem tribuum reliquiis, post regni Israelitici excidium, primo acceptum, à Dositheo, Samaritarum Pseudo-propheta, temporibus Apostolorum, postea interpolatum, ab Ecclesiasticis Scriptoribus (Eusebio, Diodoro, Hieronymo, Cyrillo, Procopio, Anespero, Georgio Chronographo) identidem citatum, atque à Cuthæis hodiernis demum redemptum, Bibliothecæ Cottonianæ (quæ amicissimi Domini summa humanitate semper mihi patuit.)

L. M. D.

JACOBUS USSERIUS
Armachanus, Hiberniæ Primas.

Infra : (a) *Ex Librarii notatione ad calcem Geneseos colligimus, exemplar hoc sexcentis siclis argenteis (h. e. libris Anglicanis 75.) emptum fuisse mense Rabie anni 792. regni Ismaelis, circa Martium viz. mensem anni æræ Christianæ 1390.*

JACOBUS ARMACHANUS.

Hoc

(a) *Franciscus Taylerus* in Epist. ad D. *Usserium*. In Sylloge CLXXXIII. p. 475. Peculiarem insuper Dominationi vestræ gratiam debet hoc opus; cujus sumptibus & cura Exemplar Samaritanum nobis in *Anglia* primò communicatum fuit, & in Bibliotheca *Cottoniana*, in doctorum seculis etiam venturis commodum reconditum.

Hoc monumento sacro non parum, ut videtur, delectatus *Usserius* plura alia exemplaria sibi è *Sichemo* comparavit, quorum alterum Vi-
ro maxima (a) D. *Gulielmo Laudo*, Archiepiscopo *Cantuariensi*, in ar-
chivis, illius nomini sacratis, in Bibliotheca *Bodleiana* repositum, al-
terum verò viro clarissimo (b) *Ludovico de Dieu*, dono dedit. Hic
verò amplissimum istud munus, quo beatus erat, verba ipsius sunt,
longè acceptissimum fuisse, in epistola dedicatoria ad D. *Usserium* a-
nimadversionibus in *Acta Apostolorum*, *Lugduni Batavorum*
MDCXXXIV. editis, præmissa, submississimo affectu & obsequio
testatur.

Accedit (ut à memorandis S. *Ephreми* Opusculis, (c) & quibusdā *Pentateuchus*
fragmentis Samaritanis prorsus supersedeam) *Pentateuchus Syriacus* ex *Syriacus*,
H. 3 Ebrai- & alii co-
dices.

(a) *Pentateuchum* hoc Samaritanum, in principio & fine mutilatum, antiquissi-
mis Phœnicum literis descriptum, ab Ecclesiasticis Scriptoribus, Eusebio, Diodoro
Tarsensi, Hieronymo, Cyrillo, Procopio, Gazæo, Georgio Syncello, & aliis
sepius est citatum, à Cuthæis verò hodiernis, una cum aliis aliquot eorum monumen-
tis, redemit.

JACOBUS USSERIUS *Armachanus*,
Hibernia Primas.

Paulò infra propria manu subscripsit D. *Laudus*;

Qui librum hunc mihi dono dedit,

W. C A N T.

In fine additur: Folia postrema hæc sex, jussu reverendissimi Præfulis, *Guliel-
mi Laud*, Archiepiscopi *Cantuariensis*, descripta sunt ex vetusto, eoque integro,
Bibliothecæ *Cottonianæ* exemplari: quod anno *Ismaelitarum*, sive *Hegiræ Mahom-
medanæ* DCLXIV. id est, salutis reparatæ. A. MCCCLXII. junctis operis in O-
riente exararunt *Ithamar ben Aharon* atque *Abraham ben Abi Nitzaion*, nomine
seu auspiciis *Semoki Tobi Isaak*, *ben Semoki Selomoh*, *ben Jacob*, ex familia *Isburia-
na*, summo in agro *Damasceno* principatu insigni: Sic *Abraham* ille ad *Numero-
rum* calcem in memorato exemplari subnotavit. Hæc, & alia non pauca, juxta
indiculi, quem subinde & pro re nata *Oxonium* transmiseram, directionem &
normam, elogia & testimonia, ex libris impressis, olim à me in Bibliotheca
Bodleiana consultis inspectisque, frustra autem in hac Urbe quæsitis, non minus
promptè, quam benevolè, accurata & eleganti manu, nec rogatu exscripsit vir
pereruditus, *Thomas Hearnus*, Artium Magister, ex Aula S. *Edmundi*: cujus
egregiæ humanitati me multum debere agnosco.

(b) V. Epistol. CXLVI. D. *Usserii* ad *Ludovicum de Dieu*: in *Sylloge* pag. 413.

(c) De hisce aliisque libris ex Oriente, ipsius cura & sumptibus procuratis,
vide D. *Usserii* Epistolam ad *Ludovicum de Dieu* A. 1632. scriptam in *Sylloge*
Epist. CLXXIV. pag. 462. & Epist. CLXXV. pag. 464.

Ebraico textu versus, liber venerandæ antiquitatis, majoris æstiman-
 dus, eò quod vix in Christiano orbe antea aut visus aut cognitus
 fuerit, qui olim reverendissimi viri, *Jesu Fabi*, Patriarchæ *Jacobita-
 rum*, tunc temporis *Amide*, urbis, magnæ in *Mesopotamia* celebra-
 tis: ad *Tigrim* sitæ, residentis, erat peculium. Ecclesia enim Chris-
 tiana *Syrorum* duplici SS. Scripturarum versione olim usa est, hac
simplici, ut appellant, *Thaddæi* Apostoli, ut volunt, vel, ut alii fin-
 gunt & mentiuntur apud (a) *Gregorium Abulpharagium*, *Solomonis* &
Hirami temporibus factam; & altera juxta Græcam τῶν LXX. ver-
 sionem, cujus exemplar habuit, uti & Arabicum: Codex item N.
 Instrumenti, qui alia, quæ in editionibus viri præstantissimi, *Alber-
 ti Widmanstadii*, Cancellarii *Austriæ* & *Guidonis Fabricii Boderiani*
 deerant, viz. secundam epistolam *S. Petri*, & secundam & tertiam E-
 pistolas *S. Joannis*, Epistolam *S. Jude*, & *Apocalypsin*, hanc pridem
 à *Ludovico de Dieu* è MS. exemplari *Josephi Scaligeri*, *Lugduni Ba-
 tavorum* A. MDCXXVII. illas verò à Cl. V. *Edwardo Pocockio*, è
 codice Bibliothecæ *Bodleianæ* MDCXXX. ibidem editas, uti etiam
 historiam mulieris in adulterio deprehensæ: quæ sanè in antiquissi-
 mis codicibus desideratæ, aliùs, & quidem longè recentioris Inter-
 pretis fuisse videntur, continebat: item Psalterium *Syriacum*, à *Ga-
 briele Sionita*, doctissimo *Maronita*, *Romæ* prius quoque editum, uti &
Arabicum. (b) Vetus Testamentum *Syriacum* ipse edere decreverat:
 qua de causa quendam in *Hollandiam* ad coemendos typos dedita
 opera misit; sed nescio, an difficultate, an magnis sumptibus, in
 magno isto opere impendendis, à proposito penitus cessavit. Hos ve-
 rò omnes sacros libros, quàm primùm sanctum istud edendi Biblia
 Polyglottà propositum ipsi innotuisset, celeberrimo viro, *D. Briano
 Waltono*, utendos dedit *D. Usserius* (c) è quibus non parùm utilita-
 tis & momenti incomparabili isti in difficillimis temporibus sub ty-
 rannide *Cromwelliana* procuratæ, editioni accrevisse, omnes in hisce
 libris tractandis paulò versati norunt, & qui optimè novit, doctissi-
 mus

(a) In *Historia Dynastiarum*. pag. 100.

(b) V. illius Epistolam ad *Ludovicum de Dieu* in *Sylloge* pag. 488.

(c) Ex his sex post mortem utriusque hæredibus restitutos pecuniis numeratis
 redemerunt Bibliothecæ *Bodleianæ* Curatores. Vide Catalogum codicum MSS.
Angliæ & Hiberniæ. A. MDCXCVII. pag. 156. b.

mus (a) Editor, tum in præfatione, tum in Prolegomenis, & in Apparatu, summa cum *Usseriani* nominis reverentia & debitissimo grati animi sensu profitetur. Nemo sanè thesaurum cujusvis generis literarium aut ardentiori studio & cupiditate investigavit & acquisivit; nemo liberaliori manu & benigniori animo viris doctis, tam in *Anglia*, quàm extra *Angliam*, in commune Religionis & bonarum literarum bonum, communicavit.

Circa A. MDCXXVIII. D. *Usserius* literarium commercium cum *Usserius* reverendissimo viro D. *Gulielmo Laudo*, tunc temporis, Episcopo *arctam* *Londinensi*, summa gratia apud Serenissimum Regem *Carolus I.* qui cum D. *Laudo* illius consiliis prudentissimis in rebus ad Ecclesias *Britannicas* quoque amici- modo spectantibus moderandis usus est, pollente, instituere cœperat, quod tiam duravit per duodecennium usque ad *Rebellionem Scoticanam*, quo tempo- re in *Angliam* Ecclesiæ & studiorum causâ remeavit. Nec illum desti- hit in- tuit D. *Laudi* industria, maximèque benevolus erga tum Acade- magnum Ecclesiæ miam *Dublinensem* in statutis ad meliorem disciplinæ administratio- *Hibernicæ* nem, fructuosiusque Collegii, de cujus perpetua felicitate & com- commo- modo omni tempore fuit maximè sollicitus *Usserius*, incrementum, dum. tum Ecclesiam *Hibernicam* affectus, si quid enim incommodi, sub quo ingemuit Clerus, præsertim, ut cum honore dicam, *Rusticanus*, esset amovendum, si qui abusus in externo Regimine Ecclesiæ per Commissarios, Registrarios, aliosque Spiritualium Curiarum Officia- les admissi irrepsissent; si quæ sacrilegæ prædiorum Ecclesiasticorum invasiones (hoc enim infami titulo *impropriationes* istæ, uti appel- lantur, notari debent) sub Magnatum nobiliumque, ea, aut vi aut fraude simoniaca malisve artibus occupantium, præsidio invaluisse; si glebæ & decimæ, sustentandis Parochis Presbyteris à piis Bene- fac-

(d) In *Prolegomenis* XI. p. 81. de *Samaritanis* & eorum *Pentateucho* ejusque versio- nibus.

Secunda versio est Arabica, literis Samaritanis exarata, quam simul cum textu Ebraico Samaritano, inter alia MSS. exemplaria, nobis communicavit reverendissi- mus Armachanus.

Prolegom. XIII. De lingua Syriaca & Scripturæ versionibus Syriacis. pag. 29.

Exemplaria MSS. quibus usi sumus, duo nobis suppeditavit reverendissimus Usserius, quorum unum solum Pentateuchum complectitur. Liber veneranda antiquita- tis, & accuratè scriptus. Aliud totum continebat V. T. exceptis Psalmis: (quos antea evulgaverat Sionita) quod magnis sumptibus ex codice Patriarchæ Alexan- drini transcribi curavit.

D. Went-
worthus
de Eccle-
sia Hiber-
nica opti-
mè me-
nitus.

factoribus destinatae, in Laicorum transiissent possessionem; de hisce & hujusmodi rebus maximi momenti consultus D. *Laudus*, auspiciis Regis, remedia malis istis, aut inveteratis, aut ingruentibus, curandis idonea adhibere annisus est. Et adhibuit quidem quantum in se erat. Nec enim duorum triumve annorum opus erat, utpote longè majoris molis, ut expilationibus istis, quæ longissimo temporis tractu corroboratae, istam Ecclesiam penè pessumdedissent, sublati, pristinus rerum status, quantum intricatissimæ vices sine-
rent, in integrum restitueretur. Hanc insignem gloriam, hoc maximum decus post paucos annos sibi meritissimo jure vindicavit illustrissimus Heros, *Thomas Wentworthus*, Comes *Straffordiae*, qui à Rege *Carolo* supremus istius Insulae Gubernator & Prorex constitu-
tus, de Corona sive Monarchiâ *Angliae*, cui hætenus fuerat damno-
sa *Hibernia*, jam non mediocre ex auctis vectigalibus, proventibus-
que annuis, è mercatura & industria Advenarum incrementum per-
cepturæ, & de universa Ecclesia *Hibernica* præclarissimè meruit. Il-
le enim Vir excellentissimus, sacro ingentique zelo percitus, primo in *Hiberniam* accessu hoc aggressus est, quem D. *Usserius* in episto-
la (a) A. MDCXXXV. ad D. *Laudum*, tum factum Archiepisco-
pum *Cantuariensem* scripta, appellat novum Zerobabelem à Deo ad rui-
nas istius collapsæ Ecclesiae reparandas suscitatum, forti animo publicè
professus, se iis vel maximi nominis, qui sancta devorantes, dissipatum
Ecclesiae patrimonium in hereditates filiis & filiabus transmittendas, conver-
terunt, adversari. Inter *Laudum* & *Straffordium*, arctissima interces-
sit necessitudo & amicitia: ambo autem, ut hoc, licèt extra locum,
interferam, jurium, tum Regiæ Majestatis, tum Ecclesiae *Anglicanae*
contra Schismaticos ministellos, factiososque Proceres, & cives, quo-
rum illi famosis libellis, concionibus, calumniisque quaquaversum
sparsis, hi verò subdolis artibus & machinationibus, falsissimoque pu-
blicæ pacis & tranquillitatis tuendæ prætextu, quasi Religio reformata
& libertates populi steterant in præcipiti, plebem, miserrimum in mo-
dum delusam, primò ad obmurmurationes & querelas, deinde ad se-
ditiosos tumultus, tandem ad arma incitarunt, studiosissimi: ambo
cruenta morte, contra omne jus divinum & humanum, à rebeli Se-
nato Parlamentario, hic duodecimo Maii A. MDCXLI. ille verò de-
ci-

(a) In Epist. CLXXIII. pag. 460. in *Sylloge*.

cimo die Januarii A. MDCXLIV. stylo *Anglicano*, in colle juxta Turrim *Londinensem* perempti.

Mortuo D. *Georgio Abbotto*, Archiepiscopo *Cantuariensi*, mense D. *Lau-*
 Augusto A. MDCXXXIII. ad primatiales istam dignitatem illicò *dus Aca-*
 promovetur D. *Laudus*, quem mox ex commendatione & hortatu D. *demix*
Usserii in Cancellarium Universitatis *Dublinensis* elegerunt Præpositus, & *Dublini-*
 Socii Collegii S. Trinitatis, penes quos jus & arbitrium eligendi erat; *ensis Can-*
 de quorum, uti & Successorum, in seculis venturis, felicissimo & *cellarius.*
 prosperissimo statu, ut nemo antea sollicitior, ita ut Religio ab omni
 tum superstitionis Papisticæ, tum Puritanismi labe & fermento intacta,
 solidæ doctrinæ & disciplinæ severiores studia ibi perennarent, introduc-
 tis, cum illorum consensione statutis, sapientissimisque consiliis pro
 occasione subinde repetitis, indefesso labore omni Cancellariatus sui
 tempore animum advertit: nec minorem sedulitatem apud Regem &
 Proregem adhibuit, ut viri pietate, eruditione, & prudentia insignes,
 sive illic, sive in *Anglia* educati, quantum humana sagacitas in pro-
 funda & secreta hominum penetrare posset, ad Episcopales reliquasque
 præcipuas Ecclesiasticas dignitates promoverentur. Hisce verò in rebus
 D. *Laudus* semper habuit D. *Usserium* fidelem Amicum & Consultorem.
 Sedè diverticulo ad viam redeo.

A. MDCXXIX. Vir nobilissimus, D. *Henricus Cary*, Vice-comes D. Vice-
Falcolandia, qui *Hiberniam* summa cum fide & prudentia per septem *comes*
 annos rexerat, à quibusdam Adversariis Pontificiæ Religionis, quasi in *Falcolan-*
 multis contra pacem publicam & Regis honorem & commodum iniquè *dia, in*
 & perperam egisset, postulatus, abrogata potestate, jubetur in *Angliam* *reversus,*
 reverti. Criminationes verò istæ hinc originem habuere, quod sacrifi- *vindica-*
 culis nimum quantum insolescentibus, concessæque indulgentiæ limites
 audaci protervia supergressis, tum hi, tum *Hiberni* populares, ex sua
 levitate ad seditionem proclives, sed longè illorum impulsu procliviores
 facti, severis edictis, juxta tamen legum normam, editis, in ordinem
 cogerentur. D. Deputatum ad littus marinum honoris testandi causâ
 comitari Consiliariis placuit: quos dum egregia comitate, jam jam na-
 vem conscensurus, promiscuè complexus fuerit, oratione ad D. *Usse-*
rium conversa, illius benedictionem flexis genibus rogavit, & quidem
 tenerrimo cum affectu, utpote illi longâ amicitia, mutuis benevoli af-
 fectus officiis alterutrinque cultâ, conjunctissimus. Pauca cum venia
 Lectoris ad viri nobilissimi famam & honorem tutandum mihi addere

liceat. Hac lite coram Rege in sanctiori Concilio agitatâ sui ipsius innocentiam à fictis calumniis & criminationibus illâsam præstat, productisque literis ex *Hibernia* transmissis, solidis documentis demonstrat, vix quenquam ex Antecessoribus aut benigniori animo aut clementiori æquitate, salvis Regia auctoritate & legum reverentia, cum *Hibernis* egisse: neminem pro arbitrio oppressum, aut bonis aut libertate mulctatum: justitiam omnibus pari jure, prout quisque vendicaverit, administratam: nihilque ex auctoritate sua, quod minus æquum videretur, nisi quod publica regni salus exegerit, ordinatum fuisse: tandemque universis calculis absolvitur.

R. Caroli de abusi-
bus in
Ecclesiæ
Hibernica
regimine
tollendis
cura. Serenissimus Rex *Carolus* à Dominis Commissariis sanctioris Concilii, quibus cura rerum *Hibernicarum* in *Anglia* concredita erat, graves & mali exempli abusus in istam Ecclesiam, non solum apud inferiorem Clerum, in muniis sacris obeundis non satis diligentem, sed etiam apud quosvis Præfules, utpote sibi inque privatos suos usus dignitates Ecclesiasticas & sacerdotia, quorum collationis arbitrium, quando vacaverint, jure sedium ipsis competeat, minus rectè & præter decorum arripientes, irrepsisse, satis edoctus, literas ad D. *Usserium*, uti & ad cæteros Archiepiscopos, sub eodem verborum tenore & formula conscriptas XII. die Aprilis MDCXXX. sexto regni anno transmitti curavit, in quibus, quò majus auctoritati legibus stabilitæ momentum & pondus indè accederet, jussit, ut, sublatis istis corruptelis, singuli, quod sui muneris esset, illis urgentibus insipientibusque, gnaviter præstarent. Quod sanè consilium à piissimo Rege duplici nomine institutum erat, tum ut *Romana* superstitionis, quam sacerdotes, insano zelo acti, indulgentia concessa, majori protervia an insipientia, incertum, abutentes, ubique inter *Hibernos* disseminarunt, incremento iretur obviam, tum ut in mediis Puritanorum in *Anglia* semina seditionis clam in plebis animis jacentium factionibus, hic & in *Hibernia* publicæ tranquillitati securiùs provideretur. Auctoramento hoc Regio munitus, acerrimisque monitis incitatus D. *Usserius*, (quod de reliquis pariter dicendum est) novis viribus conscientiae & pastoralis curæ obligationi inde superadditis, ad sanctum opus sese alacriùs accingens, quod in Provincia & Diœcesi sua, perperam & præter canonicos Ecclesiasticos actum fuerit, iterum reformare, inque integrum restituere sollicitè studuit: deinde viros nobiles aliosque, *Romana* communionis, quibuscum amicè & familiaritè conversatus est, lenissimis colloquiis & argumentis

è scripturis sacris , Patribus , principiisque revelatæ Religionis & sanæ Rationis petitis , à foeda ista superstitione & erroribus , quibus ab incunabulis fuissent innutriti , in viam Evangelicæ Veritatis reducere aggressus est. Nec huic methodo (quam Suffraganeis reliquoque Clero sequendam proposuit) utpotè in Christianæ charitatis & sapientiæ regulis fundatæ , felix defuit successus. Denique cum numerosis è *Scotia* in *Ultoniam* coloniis introductis , quamplurimi disciplinæ Presbyteranæ essent addictissimi , quibus non pauci ex advenis *Anglis* , eodem schismate infames , relictisque Ecclesiis in conventiculis coeuntes , mordicùs adhæfere , hos immorigeros & pertinaces Sectariorum , ut oves in deviis errantes ad caulam communem bonus benignusque Pastor , redigere , tum crebris collationibus cum illorum Ministris habitis , illorum scrupulis & objectiunculis respondendo , tum blandissimis sermonibus & paterno amore illos omnes ad unitatem Ecclesiæ fervendam invitando , omni occasione captata , maxima cum industria continenter laboravit. Sed pervicacissimi isti homines , paucissimis exceptis , omnibus argumentis suasisque impervii , licèt obmutescerent & planè animo convicti , in sinum Ecclesiæ atque ad publicos sacros cœtus nolebant reverti.

Eodem anno cùm Serenissimus Princeps *Walliæ* , magna *Britanniarum* Princeps spes in palatio S. *Jacobi* XXIX. die Maii nasceretur , Rex optimus & sapientissimus ex sensu divinæ bonitatis erga se subditosque suos , hoc clarissimo indicio palam omnibus ostensæ , ut Deo solennes gratiæ ob hoc auspiciatissimum futuræ felicitatis in Regia sobole stabiliendæ omen statodie , ex præscriptis precum formulis , ubique per universam *Angliam* agerentur , jussit. Nec famæ veloci , ultra mare citò transituræ , nudisque literis fidendum erat , nisi majoris tum benevolentiae tum honoris causâ , ministri , ejusmodi muneribus obeundis deputati , hoc ipso nomine , huc illuc , prout expedire visum erat , ex auctoritate publica legantur. Quidam igitur è Fecialium Collegio , *Prestonus* nomine , titulo verò *Portcullis* , h. e. à *Cataracta* sive à porta dimissoria , nuncupatus (singuli enim titulis distinctis gaudent) literis Regiis munitus , mittitur *Dublinium* , Justitios & Consiliarios Regios hoc lætissimo nuncio de Principe recens nato impertiturus. Hi maximo gaudio perfusi , literis Regiis mox è prelo publici juris factis , rem universæ Genti communicant , speciatim verò D. *Usserio* , qui rure aberat , nondum integro robori à periculosa , qua decubuerat , ægritudine restitutus ; si-

Eâ de mul petentes, ut indicto die festo, quem ubique per universam Insulam magna cum solennitate celebrandum jusserant, *Dublinii* non solum dicto die adesse, sed & concionari vellet, si per valetudinem liceret. Ita suæ, festo *Usserii* bonæ existimationi consultum ivere Magnates isti. Ille lennem verò onus istud perquam honorificum, cui sustinendo imminutæ concionem ha- quassatæque vires vix pares viderentur, maxima cum animi lubentia & alacritate in se suscepit & in ista augusta panegyri compa-rens, in illa verba Psalmographi Regii *Psalm. XLV. 16. Pro patribus tuis nati sunt tibi filii : constitues eos Principes super omnem terram*, in Ecclesia Christi *Dublinii* præclarissimè peroravit.

Gotteschalci & *Usserii* *Historia ab edita.* Cum vexatissimæ istæ de prædestinatione, præscientia, gratia, libero arbitrio, reliquisque connexis articulis, quibus Ecclesia Catholica olim gravissimè affligebatur, quæstiones diu sopitæ, à quibusdam rixosis Theologis, qui dogmatibus, subtilitatibusque scholasticis, longè extra essentiam fidei positæ, ex intemperanti zelo, mordaci protervia, & nimio disputandi pruritu, indulgere, quàm ad sobrietatem sapere maluissent, ante seculum, potissimum in *Batavia*, resuscitatæ & acerrima animorum contentione ab utrisque partibus, quasi pro summa Christianæ Theologiæ pugnantibus agitatæ fuerint, *Usserius*, in hisce mediis digladiationibus non otiosus spectator stabat, sed harum eventum communi Religionis causæ funestum fore, tristi animo præfagiens, de iis placidè componendis non parum erat sollicitus. Ideo severa in harum controversiarum originem & progressum inquisitione facta, (a) post editos *Joannis Latii de Pelagianis & Semi-Pelagianis* commentarios, ab anno DCXL. *Joanne IV. Pontificatum Romanum* ineunte, quo ille desiit, eandem telam pertexere aggressus, ingentem observationum molem in Adversariis suis coacervavit, ut, singulis methodo perspicua dispositis, juxtaque temporum seriem accuratè digestis, quid Majores his in rebus senserint statuerintque, ad oculum quasi pateret, & repræsentaretur. Sed mox viri doctissimi, *Joannis Gerardi Vossii*, in lucem prodeunte (b) *Historia Pelagiana*, licèt multa ab isto diligentissimo Auctore occupata fuisset reperisset, non tamen sibi à proposito supersedendum esse duxit; cùm non modica aut contemnenda controversiæ Prædestinarianæ pars, aut omnino intacta, aut non satis diligenter discussa, relinqueretur, in qua

(a) *Hardewici. A. 1617.*

(b) *Lugduni Batav. 1618. 4o.*

qua illustranda penè infinitæ lectionis, indefessæ industriæ, solidique judicii vires explicaret. Qua de causa librum (& primum quidem, ut ille alibi retulit, preli *Hibernici* partum Latinum) *Gotteschalci & Prædestinatianæ controversiæ Historiam* continentem, eidem *Vossio* inscriptum, *Dublinii* A. MDCXXXI. edidit: in quo, omnes, licet in hisce controversis articulis maximè diversi, consentiunt, multa lectu dignissima è codicibus MSS. & aliundè eruta, & quæ vel oculatissimos hæcenus latuissent, reperiri, novamque inferri lucem disputationibus, ubique per *Galliam & Germaniam*, pro vario partium studio, à viris summæ dignitatis, & maximæ ob reconditissimam, ut illa ferebant tempora, eruditionem famæ: (quales certè fuere, *Hincmarus Remensis*, *Remigius Lugdunensis*, *Rabanus Maurus Moguntinus* Archiepiscopi; *Prudentius Tricensis* Episcopus, *Joannes Erigena Scotus*, *Ratramnus*, Monachus *Corbeyensis*, *Florus*, *Lugdunensis* Diaconus;) & in multis synodis, putà *Moguntina*, *Carisiaca*, *Valentina*, *Lingonensi*, aliisque, tempestatis istius sedandæ causâ habitis, flagrantissimo zelo agitatis, quibus originem dederat *Gotteschalculus* iste, *Orbacensis* Monasterii Monachus, circa A. DCCCXL. utpote qui sibi totam vel intricatissimam de hisce dogmatibus (a) S. *Augustini* doctrinam imbibisse visus est. In calce ejusdem *Gotteschalci* duas *Confessiones*, nunquam antea in lucem editas, adjici curavit D. *Usserius*, ipsi ab eruditissimo viro, *Jacobo Sirmondo*, S. J. communicatas: breviorē quidem ex MS. codice Abbatiae *Corbeyensis*, nunc in Bibliotheca Monasterii S. *Germani* apud *Parisiōs* reperiendam, alteram verò prolixiorē, ex quodam pervetusto codice exscriptam, quod in grati animi erga D. *Sirmondum* testimonium, publicè quoque, (sicut in privatis literis ad Amicos beneficium illud D. *Sirmondi* benevolentiae deberi agnovit) agnovisset Editor, nisi à modestissimo viro, ne in illius damnum & præjudicium apud zelotas *Romanenses* cederet, ut verisimillimum est, omnino fuisset inhibitus. Unde cuivis candido Lectori perpendendum relinquo, an censura ista à D. *Gilberto Mauguino* in * *Vindiciis suis Prædestinationis & Gratiae*, rectè & probè D. *Usserio*

* Pag.
90.

A. MDCXXXII. Antiquitatum Patriarum, & præsertim Ecclesiasticarum, amore & studio incensus D. *Usserius*, *veterum Epistolarum* editæ.

Veteres
Epistolæ
Hibernicæ
ab Usserio
editæ.

I 3

(a) V. Epistolam CXC. *Usserii* ad G. *J. Vossium*, in *Sylloge* p. 483.

rum Hibernicarum Syllogen, quæ partim ab Hibernis, partim ad Hibernos, partim de Hibernis vel rebus Hibernicis sunt conscriptæ, nimirum à tempore Gregorii I. Pontificis Romani, ad finem duodecimi seculi, Dublinii edidit: quarum quidem aliæ in libris variis sparsæ, ad fidem codicum MSS. recognitæ, & inde emendatiores redditæ, occurrunt: aliæ verò hætenus ineditæ, quæ rerum curiosarum veteris ævi notitiam complectuntur, è Bibliotheca Cottoniana, & aliundè, erutæ; in quibus multa de controversia Paschali, quæ Britonibus & Hibernis, hac de causa communionis Ecclesiasticæ violatæ & Quartadecimanorum hæreseos postulatis, de tempore, quo solenne istud Paschale festum esset celebrandum, cum Romana Ecclesia intercesserat, habentur: ad cujus consuetudines ritusque observandos non nisi post laboriosissimas disceptationes longum protractas, ægrè tandem persuadebantur. Quibus autem sopiendis non modicum pondus & momentum attulisse videtur erudita illa Cummiæ Hiberni ad Segienum, Huensæ Abbatem, (a) Epistola circa A.C. DCL. scripta, è membranæ Cottonianæ exscripta, & quæ hodiè ibi sub hoc titulo, Epistola Cummiæ directæ Segieno Abbati de disputatione Lunæ, unà cum aliis venerandæ antiquitatis libellis, in eodem volumine comprehensis, sub Vitellio A. XII. exstat Epistolæ sanè hæ, quæ, ab omnibus veterem statum, regimen, jurisdictionemque istius Ecclesiæ penitiùs nosse cupientibus, legantur perquam dignæ sunt: in quarum recensione doctissimus Editor iudicium acre & solidum cum varia & multiplici lectione conjungit.

Lites inter Archiepiscopos Armachanum, & Dubliniensem de præcedentia ortæ.

A. MDCXXXIV. non ita pridem renovabatur per duas tresve annorum centurias propemodum extincta, contestatio de *precedentia inter Archiepiscopos Armachanum & Dubliniensem*. Dum enim hic honorem primæ sedis Metropoli regni deberi contendebat, *Usserius*, non nisi averfissima mente in arenam, & quidem jussu Proregis, protractus erat, ne Primitialis dignitatis jura quæ tempore Antecessoris, amore Veritatis & justitiæ incensus, olim vindicaverit, jam deferere, & sibi successoribusque deesse videretur. Quò Antagonistæ ambitiosam vendicationem meliùs iret eversum, re ista ab antiquitate remotissima & ab ipsis Ecclesiæ *Hibernicæ* sub S. Patricio, istius Gentis Apostolo, stabilitæ initiis, ex archivis Ecclesiæ *Armachanæ* & regni Tabulariis, Historicè deductâ, quicquid documentorum controversiæ elucidandæ haberetur necessarium, in compendium redegit; quod licèt in publicam lucem exire præ modestia

(a) Epist. xi. pag. 24.

destia noluerit, in Magnatum Præsulumque manibus versabatur, ut, quod judices integerrimi & solent & debent, ex allegatis & probatis sententiam juxta æqui & justī regulas pronuntiarent. Sed ne quicquam incommodi in Parlamento & Convocatione mox indicendis ex hac inficeta lite, licet omni cum decore alterutrinque agitata, Ecclesia caperet, Serenissimus Rex, illius indulgentissimus Patronus Nutritiusque, intercedens, firmato sedis *Armachanae*, quod per tot secula obtinuisset, jure, controversiæ, nullo prætextu seculis venturis rursus fuscitandæ, literis in *Hiberniam* missis, finem imposuit, ac novo & majori honoris gradu superaddito, ex Regio jussu, ut Cancellarium Regni publicis congressionibus, in futurum antecederet Antistes *Armachanus*, ut hac ex parte Archiepiscopo *Cantuariensi*, isthoc jure in *Angliæ* fruente, par quoque redderetur.

Hoc anno ad finem vergente, illustrissimo viro, *Thoma* Vice-comi- Altera
te *Wentworthio*, summis fidei, sapientiæ, & fortitudinis elogiis *Hiber-* Episco-
niam gubernante, indicto Parlamento, simul pro more indicebatur ge- porum &
neralis Episcoporum & Cleri Synodus, in Ecclesia Cathedrali S. Pa- Cleri *Hi-*
tricii Dublinii celebrata, in qua Articuli Ecclesiæ *Anglicanae* A. MDLXII. Convo-
Londini conditi, facili, placida & penè unanimi (paucissimi enim in catio *Du-*
alterutra domo dissidebant) suffragatione recepti erant: non quidem di- blinii in-
dicta.
sertim conceptaque verborum formula, abrogatis aut sepositis rejectis-
que, de quibus in anno MDCXV. convenerat, articulis, sed tamen
ex consequenti, cum deinceps nullius essent auctoritatis & usus. Hoc
autem ab Adsefforibus eo nomine factum erat, ut suam concordiam &
probatam cum Ecclesia *Anglicana*, quam si non, uti matrem & Magis-
tram, saltem ut sororem natu seniore & nutricem, revereri oportuit,
omnibus facerent manifestum. Ita se habet primus Canon, (quem
D. *Usserius* totidem verbis composuit.)

I.

*De concordia Ecclesiæ Anglicanæ & Hibernicæ in pro-
fessione ejusdem Christianæ religionis.*

Ob manifestationem nostræ concordie cum Ecclesia Anglicana in con-
fessione ejusdem Christianæ fidei, & in doctrina Sacramentorum, nos re-
cipimus & approbamus librum *Articulorum Religionis*, de quibus convenit
inter

inter Archiepiscopos & Episcopos & Clerum universum in Synodo Londini A. MDLXII. ad tollendam opinionum dissensionem & consensum in vera Religione firmandum. Si quis igitur posthac affirmaverit, ullum ex istis articulis in aliqua parte esse superstitiosum aut erroneum, aut ejusmodi, ut illi bona cum conscientia subscribere non possit, excommunicetur ille, neque absolvatur, antequam suum errorem publicè revocaverit.

Ab isthoc tempore Articuli Anglicani pristinum suum robur, quod olim in Ecclesia Hibernica obtinuerant, repetière. Neque enim dubitandum videtur, quin omnes, quotquot sacris ordinationibus initiandi, & ad qualescunque dignitates Ecclesiasticas, aut curam animarum essent promovendi, iisdem, post quartum Reginae Elisabethae annum, cum Hibernia, tam in sacris, quàm in civilibus, sub moderamine Regiae majestatis, ab Anglia tota dependeret, quasi ex debito officio subscripserint. D. Usserium subscripsisse, ipse dilucidè testatur in * concione habita coram Senatoribus Parlamentariis supra memorata, in qua omnes ad unitatem & pacem Ecclesiasticam acerrimè urget; ex hac justa hypothesi, istos nimirum articulos communionis nostrae mensuram, regulam, & basin haberi debere & esse. Quibus articulis jam subinductis, & cum alteris Hibernicis simul receptis, horum, si qui sint contrarii, discordes, planè novi, duriores, & neutiquam cum illorum sensu conciliandi, vim cadere, alii dixerint. Non enim hanc controversiam meam facio. Satis tamen constat, reverendos viros, dum res hæc ageretur, qui articulos istos in antecedente Convocatione stabilire ex nimio quorundam Calvinianorum dogmatum amore & studio curarunt, hac ex parte parum sibi cavisse, five id ex subreptione, & minimè perpensa consequentiarum vi, five ex Theologorum diversæ partis sagaci industria & ingenio, qui unicum fidei Confessionem in utrisque Ecclesiis sub eodem Monarcha florentibus, admitti debere, longè consultissimum esse duxerunt, accidisset.

Quo famæ & existimationi apud suos læsæ aliquo modo consultum esset, D. Usserius, alique ejusdem sententiæ fautores, à sacri Ministerii Candidatis, ut utriusque Ecclesiæ articulis subscriberent, primò exegerunt: sed mox cessatum est: cum id perridiculum, ne dicam, scandalosum, videretur, duas Confessiones, in variis dogmatibus Theologicis discordantes, in eadem Ecclesia haberi, aut fidem

fidem & doctrinam Ecclesiæ *Anglicanæ* magna cum solennitate nuperri-
mè receptam & probatam, istis prioribus dogmatibus admissis, denuò
rejiciendam & improbandam esse. Cùm ergo vix quicquam præsidii in
hoc effugio reperiendum esset, D. Proregem supplici oratione rogarunt,
ut illius auspiciis, ope, & cura, articuli *Hibernici*, ante novendecim an-
nos conditi, lege & sanctione Parliamentaria rati haberentur: ille autem
huic propositioni inconcinnæ aurem aut facilem, aut patientem, præbe-
re nolebat, imò, cùm illam paci publicæ maximè nocituram esse pro-
sagacitate sua præsensisset, summa cum indignatione averfatus est, &
denique si fides *Scotis* Commissariis in acerbissimæ criminationis, Parla-
mento *Anglicano* A. MDCXLI. adversus D. *Straffordium* exhibitæ, ar-
ticulis, sit adhibenda (a), D. *Usserio* aliisque, se, ni ab isthoc propo-
sito absterent, ut articuli isti infami publici Carnificis manu flammis tra-
derentur mandaturum, comminatus est.

Certissimè constat, quod ab illius Ecclesiæ Episcopis & Presbyteris
sæpè sæpiùs accepi, à tempore restauratæ Monarchiæ & Ecclesiæ sub
R. *Carolo* II. A. MDCLX. solos Ecclesiæ *Anglicanæ* articulos jam
apud ipsos agnitos & in usu esse: *Hibernicos* verò dudum obsolevisse,
& ab omnium memoria penè excidisse, & incognitos latere, ac si nun-
quam exstitissent.

In eadem Synodo, sive suggerente sive proponente Viro doctissimo
& præstantissimo, D. *Joanne Bramhallo*, nuper D. Proregi à sacris do-
mesticis, Episcopo *Derenfi* & postea Archiepiscopo *Armachano*, & de
Ecclesia *Hibernica*, si quis unquam, uti etiam de *Anglicana*, optimè
merito, de integro Canonum & Constitutionum in Synodo, *Londini* A.
MDCIII. & primo R. *Jacobi* I. anno celebrata, conclusarum corpore
in usum istius Ecclesiæ admittendo, disceptatum erat: sed strenuè ad-
modùm intercessere D. *Usserius* aliique: tandem verò, litibus istis ces-
santibus, pacis causâ, omnes in unam hanc sententiam accessere, multos
ex prælaudato libro *Canones* seligi oportere; reliquis qui politeiæ Eccle-
siæ *Hibernicæ*, & Gentis istius genio, indoli, moribusque magis conve-
nirent, communi consultatione adjectis; è quibus simul commissis, no-
vus ille *Constitutionum & Canonum Ecclesiasticorum* conflatus liber *Dubli-*
nii prodibat A. MDCXXXV. à Regia Majestate approbatus, & ejus-
dem

K

(a) apud *Rushworthum* in historia judicii & sententiæ feralis in D. *Straffordium*
latæ, pag. 775.

dem auctoritate sub magno *Hibernia* sigillo munitus & promulgatus, uti ex præfixo Instrumento liquet.

Non negandum est, D. *Laudum*, Archiepiscopum *Cantuariensem*, virum sanè pacis & unitatis Ecclesiasticæ, inter universos Regiæ Majestatis subditos ineundæ, amantissimum & studiosissimum, in ista Synodo causam Religionis, consiliis, studiis, literisque maximè juvisse, qui omnia à D. *Usserio* edoctus, in literis responsoriis decimo die Maji A. MDCXXXV. (a) scriptis, ipsi & Ecclesiæ, tum de meliori Cleri provisione auctoque reditu, tum de rerum in Synodo canonica & pacifica determinatione, sincerissimo cum affectu gratulatur: bona spe inde concepta, *Ecclesiam* Hibernicam, *novis hisce subsidiis & intus & extra roboratam tandem iterum florere incepturam*. Nolebat interim opinionem suam in pectore celare, sibi longè melius & consultius fuisse videri, si integros canones, paucis emendationibus additis, cooptassent. Sed cum illis aliter visum fuisset, in illorum placitis acquiescens, sanctissimum Numen exorat, ut cœlestem suam benedictionem iis impertiri dignaretur.

Opusculum *Usserii* de *Mysterio incarnationis Filii Dei*. A. MDCXXXVIII. D. *Usserius* libellum ex concionibus, prius de eodem argumento habitis, digestum, mole quidem exiguum, sed usu magnum, de *Mysterio incarnationis Filii Dei*, sermone vernaculo *Dublinii* edidit. In quo sacro-sanctum illud Mysterium, neglectis Scholasticorum argutiis, & absque omni abstrusæ subtilitatis affectatione, ex puris putis divinarum scripturarum fontibus haustum dilucidè explicatur, ut pii Lectores, vel mediocris captus, in doctrina & vita Christiana, facili sapientique documentorum, quæ passim suggerit, applicatione, ad praxin uberius erudiantur.

Egregius liber de ex defectu typothetarum ortas, desideratum opus, cui per multos annos, pertinacem operam impenderat D. *Usserius*, felicissimè *Dublinii* in lucem prodiit: viz. de *Britannicarum Ecclesiarum primordiis*. In originibus Christianarum Ecclesiarum, in hisce occiduis mundi à *Palæstina* & *Syria* tanta intercapedine diffitis regionibus, ab ultima antiquitate repetendis difficilis admodum ponitur labor, tum ob veterum historiarum defectum (extincto, enim illo lumine, omnia spissis tenebris sepulta jacent) tum ob subleſtam traditionis fidem, quæ fabulosa veris miscet, (ne quicquam de mentiendi & ab omni vero alienissima fingendi libidine, à scriptoribus Monachisque sequioris ævi arrepta, dicam)

(a) V. in *Sylloge* Epist. CLXXXIV. pag. 476.

cam) ut nihil certi, quod mentem priscorum seculorum gesta cognoscendi desiderio anxiam sublevare possit, relinquatur. Quicquid verò Antiqui Scriptores, quicquid Recentiores de fide Christiana in hasce *Britannicas* insulas primò introducta enarraverint, superstitiosis putidisque fabulis rejectis, utpote otiosorum hominum commentis, quod speciosiore similitudinem veri præ se ferat, Lectori dijudicandum relinquit. Sed postquam difficultates hasce eluctatus, perruptisque dumetis in liberiores patentioresque campum transiisset, ubi undique prospicereliceret, h. e. ubi fides rerum ex historiis constare poterit, reliquias Antiquitatum ex omni librorum, sive typis exscriptorum, sive in membranis latentium, genere, ubicunque & qualitercunque sparsas indefessa industria & defæcato judicio in unum corpus collegit; adeo ut opus istud universæ Ecclesiasticæ Antiquitatis *Britannicæ* gazophylacium meritissimo jure appellari mereatur. Ne illud aliqua defloratione deturpare videar, meminisse tantum oportebit, integram *Pelagii Britanni* hæreseos, ab ipso introductæ, sequaciumque suorum, Historiam illic optima fide insertam fuisse: item de *Pictorum* ex *Scythia* & *Scotorum* ex *Hibernia* in *Britanniam* deductis *Coloniis*, de illorum ad fidem Christianam conversione, deque illorum Doctoribus: tum denique de *S. Patricio*, aliisque *Hiberniæ* sanctis, quamplurima, hætenus aut parum, aut perperam cognita occurrere, quæ ex tenebris eruta nova luce illustravit. Quò verò hæc Collectanea, in *Saxonicis*, *Anglicis*, & *Scoticis* ad A. DCCCCXXXVII. in *Hibernicis* ad A. DCLXXVIII. passim producta, Legentibus utiliora fierent, ad calcem Indicem Chronologicum apposuit diligentissimus Auctor, cujus beneficio, quid quovis seculo gestum fuerit, vel leviusculè insipienti patet. Dum verò ea sequentibus annis sub incudem revocaverit, quod in recensione miscellaneorum frequenti usu venit, multa emendavit, multa quoque ex noviter repertis propria manu addidit, quæ in editione *Londinensi* A. MDCLXXVII. reperiuntur. Hoc immortale opus Serenissimo Regi *Carolo I.* illius augustissimi Parentis *Jacobi I.* jussu & auspiciis susceptum, inscribit D. *Usserius*, quod in omnem seculorum memoriam illius celeberrimum erga Patriam amoris & observantiæ monumentum perdurabit.

A. MDCXL. (a) D. *Usserius* cum familia venit in *Angliam*, sed cum animo revertendi, utpote *Hibernia*, uti ille putavit, *pacatissimo statu*, iter.

K 2

(a) V. Epist. ad L. de Dieu CCIII. pag. 499.

Impia &
cruenta
Hiberno-
rum re-
bellio.

In Scotia
& Anglia
seditio-
nes.

Purita-
norum
de refor-
manda
Ecclesiæ
consilia.

Usserii
de Litu-
rgia & re-
gimine
Episco-
pali sen-
tentia.

tu, relicta : quem non multò post facilitatis suæ seriò , & quidem do-
lentissimè , pœnituit , ibi nimirum erumpente fœdissima rebellionem
XXIII. die Octobris A. MDCXLI. qua centena millia hominum re-
formatæ Religionis , planè inermium & promiscuè cum vicinis Pontifi-
ciis securè & tranquille degentium , crudelissimè & immanissimè inte-
riere. Sed in *Anglia* , quo appulerat , partim *Londini* , partim *Oxonii* ,
partim *Cantabrigia* , studiorum causa , commoratus , Puritani seditiosi
res novas moliendi opportunitatem diu expetitam tandem læti arripuerunt ,
confœderatis *Scotis* , quibuscum clam inierunt consilia , *Angliam* nume-
roso exercitu invasuris. Hisce difficultatibus pressus Serenissimus Rex
ordines regni iterum hoc anno *Westmonasterii* Novembris tertio conveni-
re jussit , concepta spe , illorum ope & subsidio *Scoticanam* rebellionem
extingui , tumultusque domesticos & exacerbationes populi , à Minis-
tellis Presbyteranis , horrendum in modum delusi , sedari potuisse ; sed
per horum & per Demagogorum in Senatu nefandas artes , pacificis op-
timi Principis consiliis in ludibrium versis , omnia in pejus abiere , &
ingruentia mala remediis nullis , aut fisti aut sanari poterant.

Puritana factione in inferiori Camera Parlamenti , dominante , de re-
formanda Ecclesia sæpè deliberatum erat. Aliqui integrum Episcopa-
lem ordinem , tanquam disciplinæ veteri Apostolicæ adversum , imò
Papisticum & Antichristianum , penitus eradicandum & evertendum es-
se , fanatica rabie perciti contendebant : alii verò , de Puritanis loquor ,
(nam multi aderant , licèt numero inferiores , qui fidem erga Regem
& Ecclesiam intemeratam servavere) sed longè moderatioris mitiorisque
ingenii , jurisdictionem & potestatem Episcoporum , quam gravamen
onusque intolerabile caussati sunt , minuendam , & intra arctiores ter-
minos cogendam esse voluerunt. Et fortasse hac ex parte boni quidem
viri & strenui Ordinis Episcopalis assertores , ad malum istud fatale ,
quod neutiquam aliter evitari poterat , averruncandum , quippiam
concedi posse censuere : in quorum numero *Usserius* recensendus
est.

Cùm verò hac de re , sive à Serenissimo Rege , aut à Senatoribus
consultus rogatusque , sive propria sponte sententiam dixisset , male fe-
riati quidam homines , Presbyteranæ *isotipias* & paritatis introducendæ
studiosi , non modicum robur & auctoritatem in se suamque causam de-
rivaturi , libellum ex apographo surreptitio fœdè exscriptum & interpo-
latum sub illius nomine publicarunt : viz. *Archiepiscopi Armachani Consilia*

lia (*Directions*) Parlamento exhibita de Liturgia & regimine Episcopali. Archiepiscopus verò de hac violatione juris & læsa fama apud Adfessores inferioris Camerae acerrimè questus est , qui de exemplaribus jam exstantibus , aut exstituris , ne divulgarentur , supprimendis brevi consulto providerunt , illos , qui secus fecerint , censuræ ejusdem Camerae obnoxios fore statuentes. Sed hac ex parte D. Usserium , ex vehementi ineundæ pacis & concordia studio , schismaticis nimium indulgisse , ex genuino exemplari , quod in gratiam Presbyteranorum ex autographo A. MDCLVIII. edidit D. Bernardus hoc titulo : *Reductio Episcopatus ad Synodici regiminis in veteri Ecclesia recepti formam A. MDCXLI. à reverendissimo & doctissimo hujus Ecclesiæ Patre , D. Jacobo Usserio , Archiepiscopo Armachano , & totius Hiberniæ Primate* , fatis liquet : in quo , quatuor propositiones regimini & disciplinae Presbyterali , à Knoxio reliquisque furiosis istius Ecclesiæ Reformatoribus introductæ , maximè conformes , nisi quod suffraganeos sive Chorepiscopos , Decanatibus ruralibus numero pares , juxta statutum XXVI. anno R. Henrici VIII. sancitum , & postea primo R. Elisabethæ renovatum , restituendos vellet conciliator , utrumque regimen Ecclesiasticum in unum conjuncturus , continentur. Sed annon , potestate , sive ordinis , sive jurisdictionis , ipsis peculiari , exuti Episcopi , merum & inane nomen & umbra fiunt ? utpote solo sive Episcoporum sive *superintendentium* (sic enim illos promiscuè nuncupare ad libitum licebat) sive *Præsidentum* sive in Synodis Ecclesiasticis *Moderatorum* titulo relicto. Ita indebita hac συγκατάβασις Usserius se in istis turbulentissimis temporibus Episcopalis Ordinis , quæ imminebat , & mox secuta est , subversioni obviam iturum sperabat , quem , hoc pio proposito candidè admissò , omnes æqui rerum æstimatorum excusabunt. Hæc verò tum serenissimi Regis tum illius pacifica consilia , tunc temporis , uti & postea in Collatione in *Vesti* Insula , cui Regio jussu , ille cum aliis reverendissimis Episcopis & Theologis itidem illuc accersitis , interfuerat , A. MDCXLVIII. ad finem vergente inter Regem & Commissarios Parlamentarios habita , sprevit rebellium schismaticorum furor , qui eversa , quantum in illis erat , Ecclesia Anglicana , triumphatisque Episcopis , soli regnare , imò nefariam tyrannidem exercere cupiebant : quod , Deo permittente , tristissimus rerum , eventus mox demonstrabat. Hæc autem , quibus Episcoporum dignitas imminuebatur , concessionem ex necessitate temporum or-

tæ, *Usserio* rigidè imputari non debent. Quàm enim erecto animo, quanta eruditione, & quàm sincerissima mente hoc ipso tempore Apostolicam Episcoporum originem & institutionem ille propugnauerit, ex libris editis, mox videbimus.

Usserius
coram
Dominis
superio-
ris Ca-
meræ
Parla-
menti
concio-
natur.

Indictio solenni jejunio, die Decembris vicesimo secundo A. MDCXLI. coram Dominis superioris Cameræ Parlamenti concionem habuit *Usserius*, in qua, quin ille officio suo probè functus fuerit, vix dubitandum videtur: quam cùm Bibliopola quidam *Londinensis*, notis compendariis ab ipsius ore exceptam lucri causa publicaverit hoc titulo: *Vox Hiberniæ*: sed crassè, imperfectè, & sine debita aut verborum aut sensus connexionione; ille de turpi hac injuria, ipsius famæ inflicta, querelas, libellis supplicibus comprehensas, apud Magnates, qui interfuerant, interponere, sua interesse duxit; qui brevi scito edito, Præfectis societatis Bibliopolarum *Londinensium* injunxere, ut supposititius iste libellus supprimeretur. Hæc duo scita in sui vindicias *Usserius* ad calcem *Disquisitionis de Lydiana Asia* A. MDCXLIII. Oxonii impressæ publici juris fieri curavit.

Quomo-
do se gef-
ferit *Uss-*
erius in
causâ
Straffor-
diana of-
tenditur.

In causa verò *Straffordiana* D. *Usserium* humanis affectibus nimium quantum, contra quam virum bonum decuerat, indulgisse, dum unus & alter scriptis editis mala fide contenderent, paulò enucleatius, & paucis quidem (neque enim rerum gestarum in *Anglia* commentarios scribo) unde hæc calumnia originem duxerit, in gratiam exteri Lectoris hîc referam.

Cùm fatale internecinumque odium sibi apud Puritanos factiososque *Anglos*, & *Scotos*, illustrissimus D. Comes *Straffordiae Hiberniæ* Prorex, Vir excelsi animi, & constantissimæ & inconcussæ erga Regem & Ecclesiam fidei, forti, ne dicam, rigida rerum *Hibernicarum* administratione, conscivisset, partium adversarum, in Camera inferiori *Coryphæi* Monarchiæ jura minui, aut Ecclesiæ sacros ritus, cultum, & disciplinam pessundari non facilè posse, nisi post extinctos perditosque D. *Straffordium* & D. *Laudum*, Archiepiscopum *Cantuariensem*, pro comperto habentes, ambos horrendis criminationibus oneratos oppressosque, quasi inductis arbitraria potestate & *Romana* superstitione, fundamentales regni constitutiones & jura essent everfuri, in Comitibus Parlamentariis tertio Novembris A. MDCXL. indictis, læsæ majestatis reos peregère. Comes verò numerosis articulis coram *Paribus* suis, ad quorum tribunal in foro *Westmonasteriensi*, maximo cum apparatu, Rege

Rege & Regina præsentibus, permultos dies sistebatur, promptis animo & lingua, prudentissimè respondens, sese criminibus, ab inferioris Camera Commissariis objectis intentatisque, purgat, & si quid peccatum fuisset, quod vix humana sapientia præcaveri poterat, dum *Hiberniam* summa potestate regeret, totum illud in censum læsæ majestatis venire neutiquam per leges aut posse aut debere ostendit. Rejecta igitur hac methodo, aliam, si non omninò novam, saltem per centum annos defuetam & perniciosiorem, Actores isti iniere, viz. per *billam attincturæ*, ut phrasi nostra municipali utar, ex vi legislationis: quam tandem, post acerrimas concertationes, malis artibus, majori suffragiorum numero obtinuerunt. Hâc quoque ad alteram Dominorum Camera delata plures ibi, aut odio & invidia perciti, aut blanditiis irretiti, aut minis consternati, cessere. Sed utriusque Camera scita absque Regio assensu, in quo summa, propria, imò & unica potestatis legislativæ ratio consistit, nihil valent: cui procurando intercessere difficultates non adeò facilè superandæ. Rex enim fidelissimum ipsius Administrum, istius criminis, quod nos vernacula lingua nuncupamus *High-Treason*, non ritè, imò & perperam insimulatum fuisse, animo & conscientia convictus, *Billæ* calculum suum adjicere nolebat. Quomodo verò ad id, à quo tantoperè abhorruit, adigi potuerit, explorare Demagogorum erat labor & opus. Primò igitur cives, aliique ex infima fæce populi incitati, inconditis clamoribus *Straffordium* ad cædem adpostularunt, quasi esset hominum scelestissimus, & universæ Gentis *Britannicæ* piaculum, libellis editis, illo superstitè, publicam pacem periclitari, omnia ad interitum ruere, & de Republica protenus actum iri, congestisque in piissimum & clementissimum Regem spurcis convitiis, vociferantes, de ipsius, deque Regiæ familiæ salute non aliter esse prospiciendum. Quid autem in hac difficillima rerum perplexitate agendum erat? Non enim illius conscientia verbis minacibus, atroci violentia, insanientisque plebis ad portas Aulæ & ubique in plateis comminationibus, sed gravissimis rectæ Rationis & Theologiæ sanæ, & ab omni seculari politica integræ, principiis sedari potuit. A *Paribus* igitur ad Regem mittuntur quatuor Episcopi, *Usserius* Armachanus, *Mortonus* Dunelmensis, *Guilielmides* Lincolnensis, & *Potterus* Carleolensis, qui ex ipsius animo scrupulos eximerent; abludit enim ab omni verisimilitudine, Regem unum & alterum ex his, præsertim *Guilielmidem*, quem maximè infesto erga *Straffordium* animo esse, auraque populari post nup-

pe-

peram ex diuturno carcere liberationem tum temporis afflatum noverat, inter Consultores nominari voluisse. Nono die Maji, qui Dominicus erat, tres Episcopi convenerant, quibus Rex *Juxonum Londinensem* adjungi jussit, absente *Usserio*, quem quidam ex domesticis Regiis ad accersendum missus, in Ecclesia *S. Pauli Convent-Garden* in media concione perorantem (ibi enim diebus Dominicis sacro isto munere fungi consuevit) reperit: sed redit incomitatus: *Usserio* respondente, se jam *Dei negotiis occupatum; iis confectis, ad Aulam properaturum*. Potuit sanè *Usserius*, ut ego facilè inducor, ut credam, sine offensa Dei & bonorum hominum scandalo, imò debuit, relictis rostris, stitisse cursum orationis, in re maximi momenti, qualis erat anxietatis mentis pientissimi Principis tranquillitas, procuranda. Cùm in argumentis propositis, tanquam inanibus *Ἀρησφυγέτοις*, Rex minimè sibi acquiescendum esse pro pietate sua duxerit, res ista ad disceptationem alteram vespere habendam prorogatur. *Usserius* tunc aderat, una cum reliquis, qui, inter se consultationibus priùs habitis, Regi porismata hæc, de quibus convenisset, *D. Juxono* suam sententiam non interponente, ut *rem facti & legis esse distinguendam & discernendam: quod ad rem facti spectat, de illo Regem posse judicare, si ipsi constet; istorum criminum Comitum non esse reum, sententia ferali nullo modo consentiri jure posse: quod verò ad rem legis spectat, h. e. de natura & ratione criminis læsæ majestatis, an hoc aut illud factum in isto reatu involveretur, illum in sententiis Judicum, quorum est interpretari legem, & qui jurejurando adstringuntur, ut justos & æquos arbitros erga omnes, nullo discrimine habito, sese gerant, acquiescere oportere*. Hinc postea in infamiam *Usseriani* nominis spargebatur calumnia isthæc, quasi ille ex similitudine in mente olim contra *Straffordium* ob rejectos ex consequenti per articulorum Ecclesiæ Anglicanæ admissionem articulos *Hibernicos*, olim concepta, Regi ad consentiendum cædi *Straffordianæ* persuasisset. Quod ille præfractissimè negavit omni tempore, & præsertim instante periculo mortis, dum in *Wallia* circa A. MDCXLV. moratus sit, à *D. Parro*, ipsi à sacris domesticis, an res ita se haberet, interrogatus, appellavitque ad Regem, qui illum, ut dixit, ab hoc crimine impacto vindicare potuerit, si vellet. Et sanè voluit Rex, quod *Usserius* exspectavit. Cùm enim de morte *Armachani* rumor *Oxonii* brevi percrebuisse, dixit Rex, hoc nuncio audito, non sine debitis pietatis & meritorum illius elogiis admittis, se dolere: cui cùm quidam ex præsentibus Aulicis respondisset, se quoque doliturum, si Majestatem

tem vestram ad *signandam* contra D. *Straffordium* *billam* suasionibus suis non induxisset, Rex non parùm commotus, *id esse falsum* replicavit; addens, Archiepiscopum, illum mox adeuntem, lachrymis obortis interrogasse: *Ah Domine, quid fecisti! vereor, ne scitum hoc ingentem conscientiae vestrae molestiam deinceps sit illaturum: Deumque veneror, ne ex hoc consensu* (extorto planè) *quippiam mali, inde orituri, Majestati vestrae contingat.*

Non conveniebat ingenuis, placidis, sanctisque D. *Usserii*, quo nemo erat ab omni dissimulatione alienior, moribus inimicitiam in imis praeordiis reposuisse, & per tot annos tempus vindictæ opportunum præstolari: in quo convitio planè ficto & perperam supposito, post invictum istud D. Regis testimonium, quod nemo sanus in quæstionem vocare poterit, refellendo, non est, quod multis laborem. Ab isthoc tempore, dum ambo in *Hibernia* manserint, sincera inter Proregem & Archiepiscopum intercessit amicitia, sine vel minima læsæ bonæ voluntatis suspicione alterutrinque orta. Postea autem, cum in ipsis motuum civilium, in cruentam rebellionem citò erumpentium, initiis illustrissimus Comes sub prætextu auctoritatis Parlamentariæ, & libertatis populi vindicandæ in Turrim *Londinensem* conjiceretur, illum ibi sæpe tum ad testandum affectum, tum honoris & veteris amicitiae causa, piis salutaribusque consiliis illum ad cruentam mortem Christianè & fortiter oppetendam adjuvans, & in animæ solatium cœlesti vaticinio & sacerdotali absolutione muniens, invisere solebat, & cum fatalis hora instaret, ad ferale istud pegma, illum comitatus est, illius mentem adversus mortis metum, in isto extremo agone, si opus fuisset, sed non opus erat: (nemo enim è veteribus *Romanis* heroibus, nemo è Christianis, aut majori constantia & fortitudine, aut meliori pietatis sensu tristissimæ isti ac immeritæ neci succubuit) Christianis documentis firmaturus.

A. MDCXLI. Cum famosi libelli, insulsi, indocti, & spurcissimis mendacissimisque convitiis sufferti, contra sacrum Episcopalem ordinem, quem Schismatici Ministelli radicitus evellendum esse, tanquam Antichristianum, fanatica rabie efferati, cupiebant, per universam *Angliam* volitarent, venerandi Præsules, omnesque benè morati Ecclesiæ *Anglicanæ* filii, libris editis, concionibus, colloquiis, suavisque cum omni mansuetudine adhibitis, populum, ad insaniam usque miserè delusum, ad pacem & unitatem Ecclesiasticam servandam

Hac ex parte vindicatur *Usserius*.

Libri in defensionem ordinis Episcopalis à multis editi.

allicere pro virili studuerunt. Sed frustra : pestis enim immanissimè sæviens nullis remediis erat expugnanda. Inter quam plures alios didacticos , suasorios, & apologeticos libros pro Episcopatu editos , quorundam Opusculorum à viris , tam pietatis & orthodoxæ fidei , quam eruditionis fama insignissimis , putà *Richardo Hookero* , *Lancelotto Andrea* , Episcopo *Wintoniensi* , & *Edwardo Breerwoodo* , conscriptorum Sylloge prodiit *Oxonii* ; in qua etiam comparent duo D. *Usserii* tractatus, quorum unus inscribitur : *De Episcoporum & Metropolitanorum origine*, præmissis quibusdam breviculis ex *Martino Bucero* & *Joanne Rainoldo* de eodem argumento excerptis. Ille enim à reverendissimo viro D. *Josepho Hall* , tunc *Oxonienſi* , mox *Norwicensi* Episcopo , qui non minus nervosè & strenuè , quàm argutè & scitè sacram Episcoporum causam contra tumultuantes schismaticos tutatus fuerat , rogatus , in priori seriem & successionem Episcoporum à temporibus Apostolorum deducendam esse , ex veterum Patrum , secundi nimirum & tertii sæculi , scriptis clarè ostendit : item Angelos septem Ecclesiarum *Asiæ* fuisse viros singulares , qui istis Ecclesiis præsidebant , & Episcopos propriè & distinctim à Presbyteris secundi ordinis dictos : hæce denique septem urbes , ubi primævi isti Episcopi suas sedes habuere , fuisse metropoles , quibus vicinæ urbeculæ & oppida subjacebant , aliasque sedes metropoliticas per *Romanum* Imperium sparsas , juxta formam & distributionem civilis juris legibus imperatoriis stabiliti , olim obtinuisse memorat , ut nulla juxta de hac supereminenti Archiepiscoporum dignitate & potestate , ad canonicas Ecclesiasticas exigenda , in animo oriri possit dubitatio. Alter verò , huic connexus , hoc titulo insignitur , *Geographica & Historica Disquisitio de Lydiana sive Proconsulari Asia*, & de septem Metropoliticiſ Urbibus in illa comprehensis : & postea novis curis recognitus & amplior redditus , *Oxonii* MDCXLIII. cujus compendium olim à me Anglicè scriptum , & in vita ipsius grandi Epistolarum collectioni præfixa *ὑπολέξι* insertum , hîc Latinè interpretabor.

Postquam reverendissimus Auctor , admirandam planè in Geographia veteri & Legibus imperialibus peritiam , ut meliùs istorum temporum historiæ Ecclesiasticæ & civiles intelligerentur , utpote ex quibus varias minoris *Asiæ* provincias , puta *Mysiam* , *Cariam* , & *Lydiam* , (sub quarum postrema vicinæ *Ionie* & *Æolidis* regiones erant comprehensæ) definivit & determinavit , in initio hujus Opusculi ostendisset , ille statim demonstrat :

I. *Asiam*

1. *Asiam* in Novo Instrumento memoratam intra limites *Lydiae* contineri, unamquamque ex his septem Urbibus fuisse Metropolim; & ideo juxta hanc civilis regiminis partitionem, in sedes eminentissimarum *Asiae* Ecclesiarum fuisse adaptatas.

2. *Romanas* provincias non semper fuisse easdem, sed prout ratio politices exigebat, & ut facilius & securius administrarentur, saepe variasse, & varias subinde mutationes admisisse: certum est enim partitionem imperii sub *Augusto* longè aliam esse ab illa, quæ sub *Constantino* obtingebat: quo tempore *Asia* Proconsularis soli *Lydianæ Asiae* astringebatur: grandi ista jurisdictione, quam olim obtinuerat, jam valdè contracta, & discrimine inter Proconsularem *Asiam* jurisdictioni Proconsulis subditam, & *Asiae* Diœcesin, à Vicario seu Comite *Asiae*, sive *Asianæ* Diœceseos administratam, invec̃to: in temporibus etiam sequentium Imperatorum novas quoque mutationes contigisse, in illa verò dispositione sub *Constantino* ordinatum fuisse, non nisi unam metropolim in singulis distinctis provinciis admitti debere: cum earundem numerus antea fuisset multiplex. Dicendum est tamen, legem hanc sub illius successoribus non semper invariata mansisse: hi enim interdum, ne quorundam Episcoporum, acriter de titulo isthoc ob opulentiam & amplitudinem civitatum, quibus præsidebant, contendendum, ambitioni satisfaceret, duos Metropolitanos in una provincia nuncupari & esse permisere.

3. Respectu ad hanc *Constantini* constitutionem, *Ephesum* (ubi Deputati istarum provinciarum, *Asia τὸ κοινὸν* sive *Commune Concilium* constituentes, solennes conventus habuere, & quæ olim præcipua Urbs habitata fuisset) hujus novæ Proconsularis *Asiae* factam fuisse solam metropolim: cujus Proconsul ab auctoritate & jurisdictione Præfecti Prætorio erat immunis. Ac proinde in Ecclesiastica rerum administratione, ad conciliandum majorem huic inclytæ sedi splendorem, Episcopum *Ephesi* non solius Proconsularis *Asiae*, sed etiam omnium Provinciarum in totius *Asianæ* Diœceseos (de qua amplum in modum differit) ambitu comprehensarum Primatem sive Exarchum habitum fuisse, illumque quandam jurisdictionem Patriarchalem, ipsi ex consequenti collatam, interdum exercuisse.

Denique non modicam inter civilem & Ecclesiasticam jurisdictionem harmoniam fuisse, & proinde ex justa illatione cujusque Provinciæ Episcopos Metropolitano, i. e. Archiepiscopo, subditos & sub-

ordinatos fuisse, sicut reliquarum inferiorum civitatum Magistratus Præfidi, sive summo istius Provinciæ Rectori, subjacebant.

MDCXLI.
Rebellio
Hiberno-
rum.

Quomo-
do Usserio
ad inci-
tas re-
dacto
succurri-
tur.

Exeunte hoc anno, frequentes ex *Hibernia* advolarunt nuncii de fœdissima illa *Hibernorum* Pontificiorum rebellionem nuperrimè exorta, de lanienis & cædibus Protestantium, de rapinis, de incendiis, deque horrendis stragibus ubique perpetratis, adeò ut de ista Insula, excussio *Anglorum* imperio, omninò actum videretur. In istis Patriæ ruinis gravissima mala perpeffus est D. *Usserius*. In *Ultonia*, ubi teterrima ista pestis maximè grassata est, prædia ædesque illius ferro & igni vastatæ, frumentum præteritæ messis in horreis repositum, boumque & ovium ingens copia perduellibus in prædam cessere: reditus, quos ad sumptus in *Anglia* faciendos à Colonis Tenentibusque ipsius solvendos expectaverat, intermissi, imò, & perdit, nec deinceps percipiendi; nihilque jam in *Hibernia*, quod sui juris esset, relictum, præter Bibliothecam, de qua postea dicendum erit, non nisi singulari divinæ bonitatis indicio, integram servatam: nec in *Anglia* quicquam ad alendam familiam in peculio habuit, præter supellectilem argenteam gemmasve, quas aut vendere, aut saltem oppignerare cogebatur. Omnia hæc incommoda forti & verè Christiano animo sustinuit *Usserius*. Sed cum D. *Potterius* Januario sequente è vivis excessisset, serenissimus Rex, ad damnum illud aliquo modo sublevandum, Episcopatum *Carleolensem* jam vacantem à D. *Usserio* in *Commenda*, uti Jurisperiti loquuntur, *tenendum* concessit. Sed *Scotis* militibus, post nuperam in *Angliam* irruptionem, provincias istas septentrionales insidentibus, quorum continuis deprædationibus erant obnoxia, nec longè aberat exercitus Regius, vix quicquam certi aut magni emolumenti percipere potuit. Post, ordine Episcopali penitus everso Patrimonioque sacro à sacrilegis schismaticis occupato, & suis sequacibus vilissimis conditionibus & longè infra valorem, distracto & vendito, D. *Usserio*, quem ob suam pietatem, eruditionem & moderationem, revereri præ se tulerint, quadringentas libras sterlingicas ex fisco in annuam pensionem assignari curarunt: Sed non diu duravit hæc quasi extorta liberalitas.

Scribit *Bernardus*, circa hoc tempus D. *Usserium*, in tanta rerum perplexitate positum, à Cardinale *Richelieu*, qui res istius regni summa, ne dicam, arbitraria, potestate, & penè solus moderaretur, in *Galliam* invitatum fuisse, ut *Anglia* jam motibus intestinis agitata, illic ab omni periculo & molestia liber, nulla vi conscientia in sacris illata, Regia munificentia.

nificentia suffultus, animum studiis intenderet. Sed nescio qua fide hoc ille asseruerit. Non vanus autem suspicor, errorem inde profluxisse, quod idem amplissimus Cardinalis post acceptum D. *Usserii* de *Ecclesiarum Britannicarum primordiis* librum, ante duos annos editum, honoris & observantiæ causa, illum numismate aureo, cui incisum erat ipsius caput, donaverit. *Usserius* verò gratum hoc & insigne munus canibus Leporariis, quales *Hibernia* parit, utpote ubivis gentium famigeratos, rependendum, fortasse id rogatus, curavit. Constat sanè (a) serenissimam Reginam *Annam Austriacam*, illum ad regnum istud florentissimum post decennium vocasse: sed quibus conditionibus, id mihi planè inexploratum est. Penes eundem Auctorem fides esto, an eodem quoque tempore Curatores Academiae *Lugduno-Batavae* *Usserio* Professoris honorarii munus obtulerint, nec ne: quod licèt summi viri, *Josephus Scaliger* & *Claudius Salmasius* suscipere & amplecti non dedignati fuerint, ille supereminentem istam, quam nactus est in Ecclesia, dignitatem inani isthoc titulo dedecorare nolebat. Quævis gens de tanto hospite excipiendo meritò contenderet: in istis tamen turbulentissimis temporibus apud interioris admissionis amicos domi latere & consenescere, quam prodire foras, & quasi in Theatro comparens, exterorum plausibus excipi, longè potius & expetibilius duxit.

MDCXLII. Rege ab Urbe, in qua per seditiosos ferocientesque civi- *Usserius*
ves, citra periculum diutiùs morari non licebat, discedente, nulla- *flagrante*
spe diffidia, inter Regem & Senatum *Westmonasteriensem* orta, aut pa- *bello*
candi aut tollendi jam relicta, *Usserius*, impetrata venia, *Oxonium* pro- *Oxonii*
peravit, ut ibi mentem publicis malis sauciam repetitis literarum studiis *moratur;*
leniret & solaretur.

Vergente versus finem anno, post prælium in campis *Keintonianis* prope *Edgehill* in provincia *Warwicensi* inter Regios & Parlamentarios commissum, Rex, comitante exercitu, rectà *Oxonium* petiit, ibi castra stativa habiturus. Sequentè Dominica coram Regia Majestate concionatus est D. *Usserius*, qui argumentum sacræ orationis ad res in turbatissimis istis temporibus subinde enatas attemperare norat: nec semel tantum, sed frequenter, Rege jubente, isto sacro munere isthic defungi consuevit.

L 3.

Iisdem

(a) V. D. *Usserii* Epistol. CCCVI. ad *Arnoldum Bootium*, Londini 29. Novembris 1651. scriptam, in *Sylloge* pag. 622.

R. Carolus pro-
pensio-
nis ad
Papif-
mum in-
trodu-
cendum
falsissi-
mè pos-
tulatus.

MDCXLIII. Iisdem artibus ac strophis, quibus pōpulum, contra ejus-
modi insidias præstigiasque non satis cautum, ad arma contra Regem sumen-
da primò induxerunt rebellionis Architecti, usque & usque uti perrexere :
Regem nimirum de religione, legibus, & juribus Parlamentorum totiusque
populi *Anglicani* evertendis arcana consilia in pectore suo olim habuisse,
adhucque alere : quo convitio, ut ut mendacissimo, & ab omni spe-
cie veri alienissimo, nulla potentior machina ad quassandam subditorum
fidem excogitari potuit. Licèt autem innocentiam suam publicis edictis
sæpè sæpius, invocato Dei nomine, testatus fuerit optimus Rex, ean-
dem tamen dicam toties confossam falsique convictam, majori impuden-
tia, ad denigrandam illius famam impegere impii, perjuri, & sacrilegi
calumniatores. Cui ut magis magisque obviam iretur, novam innocen-
tiæ suæ asserendæ methodum inire pientissimo Principi placuit.

R. Caroli
protesta-
tio.

Rex sacrosancta corporis & sanguinis Christi in sacello ædis Christi
Oxon. flexis genibus percepturus, dum D. *Usserius*, ea exhibiturus, ac-
cesserit, indicto facto, ut brevem moram faceret, surrexit ex pulvinari,
& erecto corpore stans, illum clara voce ita affatus est.

M Y L O R D,

*I espy here many resolved Protestants, who may declare to the world, the
resolution I do now make. I have to the ut most of my power prepared my soul
to become a worthy Receiver : and may I so receive comfort by the blessed
Sacrament ; as I do intend the establishment of the true Protestant religion ,
as it stood in its beauty in the happy dages of Queen Elisabeth, without
any connivence of Popery. I bless God, that in the midst of the publick
distræctions. I have still liberty to communicate ; and may this Sacrament
be my damnation , if my heart donot joyne with my lips in this Protes-
tation :*

hoc est,

M Y L O R D,

*Video hîc multos benè firmatos Protestantes, qui propositum illud, quod
jam profero universis declarare possint. Ipse, pro viribus meis, quantum pos-
sem, animam meam præparavi, ut dignè communicem : & ex hoc benedicto
Sacramento solamen eatenus percipiam, prout apud me statuo veram Protes-
tanticam religionem sicuti in felicibus Regina Elisabethæ temporibus in pulchri-
tudine*

tudine sua floruit, stabilire, sine aliqua Papismi conniventia. Benedico Deo, quod in mediis hisce publicis rerum confusionibus, adhuc fruor libertate communicandi: & in damnationem meam cedat hoc Sacramentum, si cor meum labiis meis in hac professione non conveniat.

Protestatio hæc solennis D. *Armachano* coram aliquammultis Proceribus, aliisque celebrioris notæ viris tunc præsentibus, facta, mox typis exscripta erat: quam in hoc Commentariolo inferendam duxi, ne memoria ejus unquam intercitat: & eò quidem lubentiùs, quod ne millesimus quidem illorum, qui hodiè vivunt, de illa vel fando audiverit. Et facilè quidem & justis de causis crediderim, neminem præter rebelles schismaticos, & impios flagitiosissimorum Regicidarum nepotes, R. *Carolo I.* quo nemo fuit sanctissimi Numinis reverentior, ita sub diris obtestanti diffidere, reclamare, & refragari posse.

Hoc anno suppressa publico edicto, sive *ordinatione*, ut appellant, Synodus
Westmo-
nasterien-
sis. contra omne jus fasque, Liturgia, abolitisque sacris ritibus in Ecclesia *Anglicana*, ab ipsis Reformationis initiis sapientissimè institutis, ne omnem religionis curam abjecisse viderentur Parlamentarii *Westmonasterienses*, Conventum Anglicè, an *Assembly*, Theologorum ibi celebrandum indixerunt, quorum arbitrio, ipsis tamen approbaturis, commissum erat, ut novam fidei & doctrinæ confessionem, novamque sacri cultûs formulam. Quales verò fuerint istius novæ & hætenus in *Anglia* inauditæ Synodi, ex Clericis Laicisque conflata, Adfessores, non parùm interesse puto, ut posteriores norint. Plerique classicum ad bellum contra Regem gerendum ejurata fide, in pulpitis cecinerant, & in Hierarchiam, ab omni tempore in Ecclesia Catholica stabilitam, impudentissimis spurcissimisque libellis, apud vulgus quaquaversùm sparsis, & procacissimis conciunculis furore fanatico perciti, fuerant debacchati. Præclari quidem Mystæ istis egregiis muniis obeundis maximè idonei! Non negandum est, versutos homines ad quandam sive gratiam sive auctoritatem sibi conciliandam, quosdam ex Episcopis, Presbyterisque, qui nondum ab illorum bona existimatione excidissent, intermisceri voluisse. In quibus, ut alios taceam, D. *Usserius* venit nominandus. At ille, quod de cæteris venerandis Præsulibus dicendum est, satis gnarus, intolerandum schisma inde enasciturum, multasque prodigiosas in detrimentum, imò & perniciem, veræ Religionis & Ecclesiæ mutationes ex necessitate suborituras esse, illos ne præsentia sua vel semel dignari voluit, & ab isto *malignantium*

nantium coetu prorsus abstinuit. Detracta enim sanctimoniam, qua scelerata consilia prius obtexerant larva, *Usserius Oxonii* sub castrorum Regionum praesidio tutus, rebellionem jam aperta facie ubique grassantem ex animo execratus est multosque concionibus assiduus, colloquiis, hortatibus, solutionibus dubiorum & casuum conscientiae, scriptisque ad absentes transmissis, nutantes in fide erga Regem praestanda confirmavit, lapsosque restituit. Nec id diu factiosos rebellesque *Westmonasterienses* latere potuit, qui ex communi suffragatione lata illius nomen ex albo Adfessorum expungendum iussere: quod honori & beneficii loco *Usserius* duxit. Sed non hic substitit Presbyteranorum furor & indignatio; mox enim luebat poenas, licet maximè immeritas, constantiae ac probitatis suae. Commissarii *Delinquentium* (ita enim quotquot ex sensu religionis & conscientiae Regias partes in istis fatalibus diffidiis secuti fuerint, pro modestia sua nuncuparunt) praediis bonisque mobilibus, ubicunque tyrannis ista sub dominante exercitu, illorum jussu conscripto, extendi potuerit; diripiendis, inque suum usum convertendis, deputati, ingentem, & quidem selectam, librorum copiam, aut secum ex *Hibernia*, cum reliqua sepellectile ad domesticos usus necessaria, comportatam, aut pecuniis, rebus adhuc prosperis, nuper redemptam, in Collegio *Chelseiano*, prope Urbem sito, tanquam in Sanctuario ab omni militum violentia immuni, uti sacrum depositum, relictam, armata vi occuparunt: quam publica auctione essent venundaturi, nisi D. *Featleyus*, vir perdoctus, orthodoxusque Theologus, nondum ex ista Synodo, ob fidem, quam erga Regem & Ecclesiam clam retinuit, exauctoratus, & D. *Seldenus*, tunc temporis magni nominis Adfessor, sive precibus, sive pecuniis numeratis, intercessissent: quorum utriusque junctis operis & cura, thesaurus ille literarius, licet non integer, (exspoliatus enim erat & codicibus quibusdam impressis & schedis manuscriptis mutilatus) conservabatur, D. *Usserio* aliquanto post tempore restituendus.

Epistolæ
S. Ignatii
Antioche-
ni ab *Uss-*
erio editæ.

Ante multos annos *Usserius* Epistolas S. Ignatii, Episcopi *Antiocheni*, edere apud se constituit, quas miserè corruptas, mirisque interpolationibus, quæ sanctissimi Martyris genio, pietati, moribusque itidem & veterum Christianorum fidei & doctrinae, & temporum rationi & calculo repugnant, & novitatem planè sapiunt foedatas vidit, tristisque agnovit, in quibus defendendis, Scriptorum primæ classis *Romanae* communionis, qui eas, prout in vulgatis codicibus exstant, pro integris & ab omni alienæ manus admixtione & adulteratione liberis haberent, judicium

cium desideramus. De hisce autem genuinis Epistolis, quas à S. *Polycarpo* collectas, & ab *Irenæo*, & *Origene*, & deinde ab *Athanasio*, *Theodoreto*, aliisque veteris Ecclesiæ Patribus frequenter citatas, *Eusebius Casariensis* in specie & nominatim memoravit, pristinæ simplicitati reddendis, licet operæ esset difficillimæ, & vix à quoquam, solis nudis inanibusque conjecturis freto, cum aliqua justa boni successus spe tentandum videretur, (neque enim illo tempore Exemplar Græcum ab istiusmodi assumentis integrum & purgatum comparuit) non desperavit *Usserius*, qui sublimi ingenio & admiranda sagacitate illud primus aggressus est. Cùm ergo harum Epistolarum veterem Latinamque versionem, à tribus *Anglis* Theologis olim citatam, in Archivis Bibliothecæ *Caio-Gonvillani* Collegii apud *Cantabrigienses* latere è catalogo codicum MSS. in utraque Academia repositorum *Jamesiano* A. MDC. typis *Londini* edito, didicisset, maximè sollicitus erat, ut in illius usum integra omni cum accuratione exscriberetur: illique etiam geminam in Bibliotheca reverendissimi & doctissimi viri, *D. Richardi Montacuti*, Episcopi *Norwicensis*, repertam postea felicissimè nactus est. Qua perlectâ & diligentissimè collatâ, quantum inter hanc & vulgatos Græcos codices inesset discriminis, plenè edoctus, sententias istas, contra quarum veritatem & *authenticam*, exceptiones legitimæ, & quidem insuperabiles, à Reformatæ Communionis Theologis fuissent factæ, penitus abesse, & loca à Patribus inde excerpta, & præsertim testimonium illud à *Theodoreto* ex epistola ad *Smyrnaeos*, quod in omnibus codicibus vulgatis desideratur, reperiri, lætis oculis vidit animadvertitque. Ut ergo antiquissimum istud Christianæ pietatis & doctrinæ monimentum à laciniis corruptorum fraude & mala mente infertis, quantum fieri potuit, emendatum & integrum in lucem produceretur, summis ingenii & industriæ viribus collectis contendit: quod illo quidem tempore fecit eò libentiùs, quo Presbyterani sub rebellis Parlamenti auspiciis elati, contra sacrum Episcoporum ordinem, in illis Epistolis, quatenus à Presbyteratu distinguitur, assertum, luculentissimisque argumentis demonstratum, non solum calamo & petulanti lingua, sed & gladio tormentisque bellicis pugnarunt. Tandem post longas moras desideratissimum & auro contra non charum opus prodiit *Oxonii* A. MDCXLIV. cum hoc titulo:

Polycarpi & Ignatii Epistolæ: unà cum vetere interpretatione Latina, ex trium manuscriptorum codicum collatione integritati suæ restituta: Accedit & Ignatianarum Epistolarum versio antiqua alia, ex duobus manuscriptis in Anglia repertis nunc primum in lucem edita.

Quibus præfixa est, non de Ignatii solum & Polycarpi scriptis sed etiam de Apostolicis Constitutionibus & Canonibus Clementi Romano tributis, Jacobi Usserii Archiepiscopi Armachani Dissertatio.

Post hanc verò Dissertationem Usserius adjicit Veterum testimonia de S. Ignatio & ejus Epistolis, & etiam de Polycarpo. Ad calcem apponuntur ejusdem Usserii in Polycarpianarum Epistolarum Ignatianarum Syllogen, diffusissimæ eruditionis, Annotationes: in quibus Græcorum Ignatii exemplarium, & inter se, & cum utraque veteri Latina interpretatione, comparatio continetur.

Hanc Polycarpianarum Epistolarum Syllogen sequuntur Epistolæ, in generali titulo quidem omissæ, B. Ignatio adscriptæ, à mediæ ætatis Græcis sex (in quibus illa ad S. Polycarpum, Smyrnæ Episcopum, perperam recensetur) simul cum veteri vulgata Latina Versione: item à recentioribus Latinis additæ aliæ tres, quibus præmissa est Mariæ Cassobolitæ, posterioribus subjuncta S. Mariæ Deiparæ nomine ad Ignatium edita Epistola; unà cum Ignatii elogio, ipsius in sede Antiochena successoris, Heronis titulum præferente.

In qua editione lacinia ab Interpolatore Græco textui insertæ, quas vetus hic Interpres non agnovit, utpote longè meliori & sinceriori usus exemplari, distinctionis causa minio signantur.

Quàm præclarissimè autem de S. Ignatio, de Rep. literaria, de Ecclesia Anglicana, imò & de universa Christiana, hinc meritus fuerit D. Usserius, eruditissimi illius ævi scriptores cumulatissimis elogiis certatim testati sunt, & grata posteritas cum immortalis Usseriani nominis celebratione mirabitur.

Penè nefas hîc reticere puto, eodem anno, quod non sine singulari Dei providentia factum videtur, S. Ignatii Martyris Epistolas genuinas Græcè, ex codice Bibliothecæ Medicæ Laurentianæ, unà cum Episto-

la *S. Barnabæ*, curâ summi viri, *D. Isaaci Vossii, Amstelodami* prodiisse, qui veterem versionem Latinam *Usserianam*, Græco textui consonam respondentemque, ex adverso curavit apponendam.

De Appendice verò *Ignatiana*, ab *Usserio Londini* A. MDCXLVII. edita, in qua, inter cætera Antiquitatis maximi pretii monimenta, genuinæ istæ *Epistolæ Græcæ* quoque continentur, postea suo loco dicendum erit.

Syriacum *Epistolarum Ignatianarum* Exemplar quantovis pretio redemptum voluit *Usserius*, qua de causâ literas ad *Christianum Ravium* (a) tunc *Constantinopoli* agentem, cui annuam viginti quatuor librarum Anglicarum pensionem, dum in Oriente moram fecerit perquam benevolè assignavit, Septembre mense A. MDCXXXIX. datis, ex *Hibernia* transmisit, ut inter alios rarissimæ notæ codices ibi notatos, exemplar istud, si reperiri posset, à *Maronitis* compararet. Sed conatus iste perquam laudabilis planè in irritum cecidit; nec minus infelicitè post quadraginta annos succubuit V. Cl. D. *Roberti Huntingtoni* industria, qui easdem *Epistolas Syriacæ* versas à Patriarcha *Antiocheno*, aliisque, tum per *Syriam*, tum per *Palistinam*, *Mesopotamiam*, & *Aegyptum* sparsis, diligentissimè quæsit, & investigavit. Sed omninò frustra; ut in illius vita fusè ostendi. Nec tamen hîc substitit in iis perquirendis anxia *Usserii* cura; quin volupe fuisset, easdem quovis idiomate, sive *Arabico*, sive *Persico*, sive *Armeno*, conscriptas, acquisivisse: ex quibus non parum emolumenti ad perficiendam, quam adornaturus esset, Græcam editionem se consecuturum sperabat. Ita intimis medullis fixus inhæserat *Ignati* sui amor.

Dum hoc opus sub prelo adhuc sudaret, mox tamen in dias luminis auras ex istis tenebris angustiisque exiturum, de quo præclarissimè & optimè sentiebant Primores *Academiæ Oxoniensis*, utpote quibus *Usserii* pietas, summa eruditio & candidissimi mores, à multis annis, & jam longo apud illos incolatu, familiari conversatione, & convictu coram erant perspectissimi, in solenni Doctorum & Magistrorum convocatione, decimo Martii A. MDCXLIV. juxta computum *Anglicanum* celebrata, decretum erat, ut publico *Academiæ Oxoniensis* sumptu & nomine, *Usserii effigies* *Ignatianis Epistolis*, ab illo illustratis, præfigenda, una cum elogio, illius, quàm fieri potest, Elogium
Academiæ
Oxonien-
sis de
Usserio
publicè
exhibi-
tum.

(a) V. Epist. CCCV. in *Sylloge*, pag. 623.

meritis pari, nec non hac Academia digno incideretur. Sed ii quorum intererat, ut liber ille, ab operis Typographicis consummatus, citra omnem diuturniorem moram, quàm citissimè publicaretur, de ista effigie parùm solliciti erant, perito chalcographo destituti: quam postea seorsim excudendam curarunt. Elogium verò illud, quo inter quosdam insignes viros, huic rei procurandæ deputatos, convenerat, ita se habet:

Jacobus Usserius, Archiepiscopus Armachanus, totius Hiberniæ Primas, Antiquitatis primævæ peritissimus, orthodoxæ Religionis vindex ἀναντιρρήτος, errorum malleus, in concionando frequens, facundus, præpotens, vitæ inculpatæ exemplar spectabile.

R O B. P I N K, Vice-Cancell.

Ita nimirum illustre hoc reverentiæ, honoris, & observantiæ suæ erga *Usserium* monumentum ad posteros transmittere, inque omne ævum propagare Academici *Oxonenses* voluere.

S. Barnabæ Epistola.

Hoc anno etiam primùm prodiisset S. *Barnabæ* Epistola, quam prelo paratam S. *Ignatii* Epistolis annexuisse destinaverat *Usserius*, nisi casus maximè deplorandus intervenisset. Exemplari enim manuscripto, cum reliquo apparatu, apud Typographum deposito, ferali incendio in civitate *Oxonienfi* de subito & rapidissimè erumpente, ipsius ædes & officina, cum omni supellectile libraria, flammis absumptæ erant: nec quicquam ereptum servatumque relinquebatur, præter pauculas schedas, typis nuperrimè exclusas, in quarum prima *Usserii* *Præmonitio* de istius Epistolæ ratione, argumento, contextura, antiquitate, auctoritate, & vero Auctore continetur. Hanc in præfatione editionis ejusdem Epistolæ *Oxonii* è *Theatro Sheldoni* MDCLXXXV. vir præstantissimus, D. *Joannes Fellus*, Episcopus *Oxonienfis*, de Rep. literaria, & de illa Academia optimè meritis, inferendam curavit: sed in fine mutilatam. Quem defectum cum ex iisdem schedis in oculum manumque fortè incurrentibus supplevissem, desideratam istam clausulam illi mox communicavi, ut in nova editione *Præmonitio* ista integra legeretur. Cùm verò supplementum

tum illud è paucis lineis constet , ne penitus intercidat , cum venia eruditi & curiosi Lectoris , hîc apponendum duxi.

Post Δέκα Βασιλεῖς ἀναθήσονται καὶ ὀπίσω , adde αὐτῶν ἀναθήσεται ἕτερος , ὃς ὑπερείσει κακοῖς πάντας τὰς ἔμπροσθεν , καὶ τρεῖς Βασιλεῖς ταπεινώσει. *Quod & ipsum non leve est antiquitatis argumentum.*

Quare quod de duobus locis , altero (a) ex Evangelio juxta Hebraeos de Servatore à Joanne baptizando , de nequitia Apostolorum altero (b) ex ipso Barnaba (licet Ignatii, ut dictum est, substituto nomine) à se producto usurpavit olim Hieronymus , quibus testimoniis , si non uteris ad auctoritatem , utere saltem ad antiquitatem , id in universam hanc epistolam accommodandum censemus : ejus antiquitatem ita suspicientes , ut auctoritatem tamen (c) sententiae illi Apostolicae subjiciendam esse non abnuamus : omnia probate , quod bonum est , retinete.

A. MDCXLV. Appetente vere, cùm Serenissimus Rex , ipsius Relicto rebus jam inclinatis , inque pejus quotidie labentibus , Principem *Oxonio Walliae*, primogenitum suum , sapientissimis Consiliariis & numero *Usserius Walliam* equitatu stipatum , versus occidentales *Angliae* plagas , tum illius saluti , ne in manus Rebellium , qui de obsidendo *Oxonio* consilia iniere , incideret , consultaturus , tum nobiles viros in istis Provinciis fide integros , praesentia illius copiisque subsidiariis roboraturus , dimittere statuisset , *Usserius*, quem in castris *Oxonienfibus* commorantem , perpetuis ferocientium Militum clamoribus interesse magis magisque tædebat, felici hac opportunitate arrepta , relicto *Oxonio* , eheu ! musis depulsis , in sedem *Bellonae* converso , serenissimum Principem *Bristoliam* usque comitatus est. Inde in *Walliam* postea se recepit , asylum apud Amicos , ubi Deo & sibi vacaret , in mediis montibus quaesiturus.

Superato freto *Sabriniano* , appulit *Cardiffam* , oppidum in comitatu *Glamorganiensi* , in Australi *Wallia* prope mare , tum situ , tum propugnaculis , contra quosvis subitaneos hostium impetus , munitum satis : quò confugerant etiam multi Nobiles ex propinquis vicis , qui Regiis partibus adhæserant , Parlamentariorum deprædationibus insultibusque expositi & obnoxii : cujus erat Praefectus , vir antiquæ fidei & excelsi animi , D. *Timotheus Tyrrellus* Eques auratus , qui illius unicam filiam , virginem lectissimam , D. *Elisabetham Usseriam* , in uxorem duxerat :

M 3;

Hæc

(a) V. Cl. *Salmasium* de fœnore trapezitico p. 327.

(b) *Hieron.* l. 3. adv. *Pelag.* cap. 1.

(c) *1 Theff.* V. 21.

Hæc incredibili cum lætitia à dignissimo genero & filia exceptus , ad defueta studia (cistulas enim librorum , pro more , quocunque iverit , attulerat) lætus rediit , condendis *Annalibus* maximè intentus. Dum in hoc secessu per dimidium anni securus delituerit , Serenissimus Rex , post prælium *Nasebeienſe* inauspicatissimè initum , ex ista clade tandem ad arcem *Raglandianam* , antiquam illustrissimi viri , Marchionis *Wigornia* , sedem salvus evasit : deinde rebus suis , quoquo modo compositis , *Cardiffam* venit , ædibus Gubernatoris excipiendus. *Ufferius* verò eodem , quo antea , benignissimo vultu & sermone à Rege excipitur , ad frequens colloquium , jam sub eodem tecto hospes , admissus : & concionem coram illo , istorum temporum circumstantiis , ut credi oportet , maximè accommodatam , die Dominico habuit. Post paucos dies discedens Rex , annona , armis , pulvere pyrio , reliquisque bellicis provisionibus exinde sublati , milites præfidiarios secum duxit , ut oppidum illud , jam planè incustoditum , non amplius defendi potuisset. Postquam autem Regi valedixisset *Ufferius* , redux tristissimum Ecclesiæ *Anglicanæ* fatum , & periculosissimam , ad quam pientissimus Princeps impia rebellium subditorum rabie , hætenus fuisset redactus , & deinceps videretur redigendus , conditionem non sine horrore & summa animi tristitia deploravit.

Dubius animi , quò se verteret , planè nescivit. Omnis enim spes redeundi *Oxonium* , adhuc , invicta præfidiariorum virtute servatum , quò Rex per ambages tandem incolumis pervenisset , præcludebatur. Facilis equidem erat ex isthoc portu in *Galliam* aut *Hollandiam* navigatio : sed credo multa intervenisse , quæ cogitationem istam , si in animo suborta fuisset , omninò averterent. In hac verò rerum , qua distinebatur , perplexitate , sensu reverentiæ erga D. *Ufferium* tacta , illustris femina , Domina *Stradlinga* , dotaria , illum cum filiâ , paucisque famulis , ad ædes suas , *Castrum S. Donati* nuncupatas , humanissimis literis invitavit. Sed ad proficiscendum promptis paratisque nova remora injecta est. Certissima enim fama percrebuit , rusticos ad multa millia , correptis , uti præ se ferebant , pro Rege armis , ubique per globos coeuntes , viis publicis insedisse , ita ut iter istud ingredi temerarium videretur. Utcunque ductores , qui per vias invias à nemine calcatas , aut saltem minus frequentatas , in lateribus montium illos absque periculo pertransire posse , fide data , sponondissent , ab instituto itinere , Amicorum consiliis ad id persuasi , absistere noluerunt : quos citò temeritatis suæ

suæ poenituit. Nam quidam palabundi illac fortè transeuntes, illos, immanium latronum ritu, equis, pecuniis, & pretiosa supellectile abreptis, spoliare nequaquam contenti, cistis effractis, libros omne genus, mox per multorum manus distractos, prout quisque in prædam incidisset, abstulere. Opportunè quidem intervenerunt duo tresve, qui militibus hisce, potius confusè, licèt ingenti numero congregatis, quàm in justum exercitum, sub disciplinæ militaris regulis aptè conscriptis, præfuere, quorum jussu & auctoritate, equis & supellectile restitutis, ab omni alia barbarie cessatum est. In ædibus cujusdam viri nobilis, non procul diffitis, quò se receperat *Usserius* pernoctaturus, dirissimo mœrore penè confectus, de miseranda ista sorte, permittente Deo, cujus divinæ voluntati se morem gerere æquo animo debere agnovit, maximè dolebat, eo quod ingens ista Collectaneorum, viginti annorum labore & industria congestorum, moles, quæ tandem aliquando in publicum Ecclesiæ & literarum commodum esset producturus, jam coram oculis pauculis momentis periisset. Nec videtur bonorum jactura, quam à rebellibus *Hibernis* ante paucos annos passus fuerit, ipsius animum acriùs pupugisse. Sequenti die, vicini Nobiles & Parochi illum adeuntes, se de hoc damno, quantum in illis erat, reparando, sollicitè curaturos, interposita fide polliciti sunt, quod & abundè præstiterunt, publicis enim denuntiationibus, tum in vicis oppidisque, tum in ecclesiis passim factis, ita cum colonis, sibi jure clientelari, aut qualitercùmque obnoxiiis egère, ut spoliū illud literarium non integrum quidem (solebat enim dolens inter deperditos, duos codices manuscriptos de *Waldensibus*, catalogum Regum *Persiæ*, *Perficè*, ipsi ab *Elichmanno* communicatum, & denique (a) volumen de variis novi Testamenti lectionibus, recensere) post (duos tresve menses restituendum curarent.

Mox ventum est ad *castrum S. Donati*, in quo, tanquam in centro quietis, ob omni militum injuria immunis & illæsus, suavissimisque vitæ delinimentis benignissimæ Hospitæ munificentia perfusus, hanc novam & insperatam felicitatem sibi gratulatus est, quod ingentis copię librorum optimæ notæ usus jam suppeteret. Olim enim Viri splendore natalium & titulis illustres, D. *Edwardus Stradlingus*, regnante *Elisabetha*, Eques auratus, & filius D. *Joannes*, postea sub Rege *Jacobo I.* ex ordine Baronetorum, sed omnigenæ antiquitatis, præsertim

Bri-

(a) Epist. CCXLVI. D. *Usserii* ad D. *Hammondum* in *Sylloge* p. 543.

Britannica, studio longè illustriores, quorum utriusque V. Cl. *Gulielmus Camdenus* in *Britannia* sua, in descriptione *Glamorganiae*, non sine debitis meminit elogiis, Bibliothecam instructissimam ad feros nepotes transmittendam magnis sumptibus illic condidere. In istud sacrum illicò admissus *Usserius*, membranas chartasque antiquas, Historias, Annales, & quicquid veteris ævi monumentorum ibi exstabat, frequenti & diligenti manu versavit; ex quibus non mediocriter accessit auctarium, illustrandis Ecclesiarum *Britannicarum* Antiquitatibus non ita pridem editis destinatum. Sed post mensem, sive id ex immo-
 morbo, cis laboribus, sive ex inveteratis supervenientis senectæ malis, evenisset, acutissimis tum stranguriæ, tum ischuriæ doloribus correptus
 beratur. jacuit, quos postea sanguinis ex naribus fluxus, nequitiam per multas horas sistendus, excepit, ut jam de illo, viribus exhaustis, in extremis mortis agonibus laborante, ipsis medicis quoque despondentibus, penè conclamatum fuerit. Undique percrebescebat rumor, illum morti succubuisse, quem Regis adhuc *Oxonii* moram facientis aures attigisse supra retuli: & quasi extra omne dubium positum fuisset, Vir doctissimus & *Usserio* perquam charus, *Joannes Gravius*, Astronomiæ apud *Oxonenses* Professor *Saviliannus*, ad testandum tum luctum, tum reverentiam & amorem suum erga reverendissimum Antistitem, Inscriptionem sepulchrali marmori incidendam, quam inter illius schedas manu exaratas, reperi, paravit. Sed Deo Opt. Max. misericorditer ordinante, post diuturnos languores, & lentè admodum, non sine gaudio omnium bonorum, tandem convaluit, quod reliquum erat vitæ, Deo, Ecclesiæ, Patriæ, & Reip. literariæ consecraturus.

Londinum Sesquianno propemodum in *Wallia* expleto, incertus adhuc, ubi
 repetit, pedem & lares figeret, an in *Anglia*, an aut alibi terrarum, tandem
 à Comi- viatico, pecuniisque, quas vicini Nobiles benevolè suppeditarunt, in-
 tiffa *Petrobur-*structus, & salvo conductu à Parlamentariis, qui devicto Regio exer-
 censi in- citu, rerum potiti sunt, ægrè impetrato, *Londinum* contendit, in am-
 vitatus. plissimis ædibus illustrissimæ Dominæ, Comitissæ *Petroburgensis*, de qua olim optimè meruerat, recipiendus. Illa enim spondebat & fidejube-
 bat, ex gratia cum quibusdam Magnatibus adversarum partium jam dominantibus, quos cognatione attigit, inita, ut nihil mali ille, futurus domesticus, ex Presbyteranorum aliorumque Sectariorum malevolentia, odio, & invidia pateretur.

Utcunque, consultum, imo necessarium videbatur, id Commissa-
 riis,

riis, ad explorandum omnes, qui Regias partes secuti, urbem accesserint, Deputatis protenus repræsentare. Coram hisce Inquisitoribus comparere jussus *Usserius*, tortuosis quæstionibus pro sapientia sua ingenuè respondit, fide adhibita, se, præsentibus tunc *Oxonii* Agentibus, à Confœderatis Rebellibus de toleratione Pontificiæ religionis in ista Insula post inducias procuranda missis, Regiam Majestatem humillimè interpellasse, ut nihil in rebus ad Religionem spectantibus, illo inscio, ageretur: quod & Rex benignissimè pollicitus est: nec apud Regem aliud consilium se interposuisse, neque eidem tolerationi propositæ Regem ipsum vel minimum favisse; sed è contrario, eandem, cùm res ista in Concilio sanctiori disceptaretur, strenuè impugnasse. Postquam verò Præsidem *juramentum*, uti appellabant, *negativum* obtrudentem, ut de re tanti momenti apud se paucis diebus interpositis, deliberaret, rogasset, abiit impunis, nec, utpote *D. Seldeno* aliisque ex inferioris Camerae Adfessoribus, quos habuit amicos, sese in illius gratiam interponentibus, iterùm comparebat, ab ejusmodi impiis pollutionibus, quas execratus est, omninò liberatus.

Ab isthoc tempore, rarissimè, nisi justis de causis, ab illustrissima femina reliquo vitæ tempore avellebatur, ad mortem usque; ædibus illius, sive in urbe, sive rure, in Provincia *Surreiensi* affixus, & incredibili istius comitate, quasi vi placidissima detentus, tanquam in propriis & sui juris ædibus, ibi mansit.

Ineunte A. MDCXLVII. venia à Parlamentariis ægrè admodum impetrata, in sacello Jurisperitorum Collegii, quod *Hospitium Lincolnienſe* nuncupatur, in suburbiis *Westmonasteriensibus*, juxta illorum desiderium munere concionatorio fungi cœperat, quasi id, si non unicum, saltem præcipuum vitæ Ecclesiasticæ habendum esset propositum & finis: in quo quidem longo usu exercitatissimus, ingenio & memoria expeditè per omnes positivæ ac practicæ Theologiæ articulos communesque locos percurrentibus, quicquid in mente absque aliquo laborioso cerebri nixu concepisset, id facili oratione, nec tamen incompta, parturivit: nec pensum istud hebdomadarium, durantibus terminis h. e. quando nimirum lites causæque forenses aguntur, ferè per octo annos continuatum, obstabat, quominus libris, quos dudum composuit aut compositurus erat, edendis strenuam navaret operam. Quò autem commodiùs apud ipsos, quotiescunque adlubitum fuerit, diversaretur *Usserius*, hujus societatis Pri-

In Sacello
Hospitii
Lincolniensis
ordinarius
Concionator.

mores, (inter quos vir insignissimus & jurisconsultissimus , D. *Matthæus Halesius*, post instauratam Monarchiam , primarius *Angliæ* Justitiarius à R. *Carolo II.* constitutus, maximè memorari debet) amplas cameras, omni cum decora & utili supellectile instructas, illi assignarunt , eò sanè expetibiliore, quod jam commodissimum penu, quo reponerentur libri , non nisi propitio Numine servati, quibus uti frui pridem negatum fuit, ibi esset reperturus.

Biblio-
theca ip-
si resti-
tuta.

Bibliothecam enim selectissimam & omne genus libris refertissimam in ædibus suis *Droghedæ* reliquit, ex *Hibernia* egressus. Hanc verò Urbeculam Rebelles arctissima cinxerunt obsidione, tumida spe elati, imò securi, opimam istam prædam ab illorum manibus eripi non potuisse. Sacrificuli de Bibliotheca ista ditissima inter se propria & peculiari sorte partienda, vel saltem igni devovenda, frequentes sermones conseruere. Sed impia illorum consilia cruentasque machinationes evertit justissimus scelerum vindex, Deus. Immissi enim milites, civesque, quò majoribus cladibus pressi, eò obstinatiores redditi, licèt fame penè enecti, nullis blanditiis pellicendi, nullis minis vel crudelissimæ mortis ad deditionem perterrefaciendi, hostes cum ingenti strage & dedecore sese turpi fuga subducere coegerunt.

Mox *Nicolaus Bernardus*, S. Theologiæ Doctor, & Ecclesiæ *Ar-dachensis* Decanus, Bibliothecam istam, cui concredita fuerat, primò *Cestriam* in *Angliæ* avehendam, & inde, desæviente bello, viisque publicis à militum rapinis & concussionibus, liberatis, tandem *Londinum* vero possessori, qui de hoc pretioso peculio triumphos egit, reddendam curavit.

In hoc sacro munere obeundo alacri, prompto, inconcussoque animo perrexit, usque dum affecta ætas permiserit. Caligantibus enim oculis & voce præ defectu dentium ita deficiente, ut illa vix in tanto Auditorum confessu percipi potuerit, non longè ante mortem, admodum tristis & invitus cedere coge-batur.

Appendix Ignatiana ab Usserio edita. A. MDCXLVII. *Londini* edita est ab Usserio Appendix Ignatiana, in qua continentur.

I. Ignatii Epistola genuina, à posterioris Interpolatoris assumptis libera, ex Græco Mediceo exemplari expressa, & nova versione Latina explicata.

II. Ignatii Martyrium, à Philone, Agathopode, & aliis, qui passioni illius

illius interfuerant, descriptum, ex duabus antiquis Latinis ejusdem versionibus, nunc primum in lucem editum.

III. Tiberiani, Plinii Secundi & Trajani Imperatoris, de constantia Martyrum illius temporis Epistola.

IV. Smyrnenfis Ecclesie de Polycarpi Martyrio Epistola, cum antiqua Latina ejusdem Metaphrasi, integrè nunc primum edita.

V. In Ignatii & Polycarpi Acta, atque in Epistolas, etiam Ignatio perperam adscripta, Annotationes.

Acta Martyriorum S. Ignatii & S. Polycarpi, præclara Antiquitatis maximi pretii monumenta, (unà cum Actis Barnabæ, consobrino ipsius, Joanni Marco ineptè affixis) ante tres annos in publicam lucem Oxonii protulisse destinârat Usserius, ut ex synopsi totius operis, superstitibus Epistolæ S. Barnabæ schedis præmissâ, liquet, nisi grave illud incendium supra memoratum fataliter obstitisset. Licet verò aut illius in Wallia absentia, aut publica mala longiorem moram, quam speraverit, indulgissent, tamen bonas inceptum illud absolvendi in animo spes alebat, quod jam tandem factum fuisse orbis literatus gratulatur. Interea temporis, omni mala Vossiana industriæ & fidei suspicione posthabita, ex summa serenissimi Principis Ferdinandi, Magni Ducis Hetruriæ, benevolentia & gratia, V. Cl. D. Americo Salveto, ipsius apud Regem Carolum I. Ablegato, operam & commendationem interponente, exemplar istud Medicæum, quod ad Epistolas genuinas spectat, exscribi, & denuò hic etiam imprimi curavit: criticis tum ipsius, tum D. D. Patricii Junii & Isaaci Vossii conjecturis & emendationibus margini apposis, doctissimaque præfatione, in qua Claudii Salmasii & Davidis Blondelli exceptiones de verbo ex sige producto sumptæ, quasi post Valentini hæretici tempora à quodam Impostore sub S. Ignatii nomine excogitatæ fuissent, contra illarum authenticam intentatæ, refelluntur, præfixa.

Prodiit etiam hoc anno Usserii de Romanæ Ecclesiæ Symbolo Apostolico vetere, aliisque fidei formulis, tum ab Occidentalibus, tum ab Orientalibus, in prima catechesi, & baptismo proponi solitis, Diatriba.

De Symbolo Apostolico, aliisque fidei formulis Diatriba.

Accesserunt.

I. Athanasii Symbolum, à Græcis interpolatum.

N 2

II.

II. *Symbolum aliud, eidem etiam à quibusdam tributum.*

III. *Hymnus Matutinus & Vespertinus veteris Ecclesiae.*

IV. *Hildeberti Cenomanensis de confessione Trinitatis Hymnus, & Oratio ad Dominum.*

Hoc opusculum inscribit *Usserius* clarissimo & doctissimo viro, *Gerardo Joanni Vossio*, qui, uti olim in *Historiæ Pelagianæ* elucidatione, ita nuper, *Dissertatione de tribus Symbolis* edita, in hoc argumento illustrando, absque communicatis sibi invicem consiliis, illum antevertisset. Multa verò hîc occurrunt à *Vossio* aliisque synchronis Scriptoribus, intacta, aut saltem leviter tacta, & multa nova ex obscurissimis Bibliothecarum adytis in lucem eruta, doctisque scholiis & observationibus illustrata. Novum verò illud, amplas nimirum de Spiritu Sancto explicationes, cum sequentibus articulis, quas communis opinio à Patribus Concilii *Constantinopolitani* contra *Eunomii* & *Macedonii* τῶν πνευματομάχων hæresin additas asserit, à primariis quibusdam Synodi *Nicænæ* Adfessoribus, post solutum Concilium eidem Symbolo adjunctas fuisse, vix admittendum aut probandum videtur. Rationes autem, quibus hanc sententiam suam tuetur, hîc in examen non revocabo: dispiciant alii.

Cum omnis historia planè manca sit, & confusa obscuritate laboraret, absque explicita & accurata temporum designatione, *Usserius* ideò quò faciliori opera res omnium seculorum aptiori ordine connecterentur, ab intima antiquitate replicandæ, *Chronologiæ* studium sibi gn timeret esse excolendum pro prudentia sua duxit: quali autem successu, breviculum quidem, sed tamen perinsigne specimen (inter alia posthac memoranda) anno *MDCXLVIII. Londini* editum, in omne ævum testabitur, sub hoc titulo: *Jacobi Usserii Armachani de Macedonum & Asianorum anno Solari Dissertatio: cum Græcorum Astronomorum Parapegmate, ad Macedonici & Juliani, anni rationes accommodato.*

In hoc libello eruditissimus Auctor de mensibus solaribus à *Macedonibus* in communem *Græcorum*, qui lunaribus hætenus assueverint, usum, utrorumque collatione cum *Julianis*, uti & aliarum Gentium mensibus, facta, & de tempore, quo Martyrium subiit *S. Polycarpus*, differit: & deinde postquam de integra *Macedonici* & *Asiani* anni dispositione & methodo egisset, canones certos fixosque ad inveniendum *Cyclos Solis & Lunæ*, tempusque celebrandi *Paschalis* modo didactico sub-

substituit ; curiosis quibusdam adnotationibus de cœlestibus motibus juxta veterum *Græcorum* Astronomorum , putà, *Metonis*, *Calippi*, *Endoxi* , & aliorum observata, subindè intermissis. Ad calcem apponitur pulcherrima & utilissima *Ephemeris* totius anni , in qua, utpote ex diversis eorundem Astronomorum Parapegmatibus summo cum labore collecta , stellarum ortus & occasus, & tempestatum præfagia, quæ in istis climatibus accidere solebant, κατὰ πλάτος indicantur. In ista perplexa parumque tunc temporis explorata Chronologiæ parte, ut *Usserii* conjecturæ scopum semper attingerent, id quidem humani ingenii vires supergredi videtur. Atque hanc laudem apud omnes ingenuos saltem meretur, quod viris doctissimis & præstantissimis, in eodem stadio postea secundiori pede decurrentibus, tanquam dux & monstrator viæ, vel invidia teste, præivit.

In solenni ista collatione inter Regem captivum & Parlamentarios Deputatos de revocanda pace, sopiendisque illis cruentis, sub quibus *Anglia* magis magisque fatiscebat, propemodum expiratura, diffidiis in Insula *Vecti* mense Septembre hujus anni haberi cœpta, inter alias iniquissimas conditiones, postularunt Presbyterani, ut Episcopatus ex Ecclesia *Anglicana*, ipso consentiente, & scitum illud, prius ab illis latum, ratum habituro, exterminaretur in perpetuum. Hoc pientissimi Regis animum acerrimè urebat, qui ordinem illum sacrum, ab ipsis Apostolis in primis nascentis Ecclesiæ Christianæ initiis fundatum, armis licèt infelicibus, adhuc tamen invicto calamo & lingua, propugnavit. Si in moderando Episcoporum, salvo ordine, potestate, adhibitis in gravissimis causis Ecclesiasticis Presbyterorum consiliis & suffragiis, Schismaticorum furor sese stitisset, haud invitus consensisset. Sed omnes indebitas *concessionēs* omniaque pacifica consilia cum ritu & contumelia rejecerunt hi Demagogi & Ministelli, qui in Ecclesia dominari cupiebant, nullius jurisdictioni & jussibus obnoxii. Inter Theologos magni nominis, quos bonis, dignitatibus, redditibusque exutos, Regiis partibus fidelissimè adhærentes, Rex accersiverat, ibi præsentēs, aderat quoque *Usserius*, qui ad Presbyteranorum contumaciam expugnandam, sciagraphiam novi regiminis Ecclesiastici, maximè in juris Episcopalis diminutionem cessuri, exhibuisse fertur, ejusdem planè cum illa supra memorata, ad disciplinam Ecclesiæ *Scoticanae*, primò à *Knoxio* & *Melvino* introductam & ante paucos annos sub *Carolo I.* rebellibus Confœderatorum armis stabilitam, nimium quam adaptata, formæ : hoc

solo nomine excusandus, ut hoc iterum repetam, quod illorum exacerbatas mentes non aliud malorum impendentium remedium admissuras esse credidisset. Sed omnis spes ineundæ concordiae citò evanuit, cessantibus post duos menses fraudibus & perfidia *Cromwelli*, *Iretoni*, aliorumque è factione & secta Independentium, qui in Senatu pariter, ac in exercitu, superiores partes tulerint, colloquiis. Inde, expulsis Presbyteranis, tragica optimi Principis cædes mox secuta est, quod norunt omnes : neque istorum temporum Annales replico.

Summus
Usserii
dolor ob
imma-
nissi-
mum. R.
Caroli
parri-
cidium
à Per-
duelli-
bus per-
petra-
tum.

Cùm inauspicatissimus iste dies, tricesimus Januarii, instaret, quando innocentissimæ vitæ & afflictissimæ virtutis Princeps, *Carolus* primus, quo nemo aut sancti Numinis reverentior, aut legum observantior, aut populi illius curæ commissi amantior fuerat, nefando & post homines natos inaudito impiissimorum Perduellium scelere morti adjudicatus, cruentum pro Ecclesia & pro legibus martyrium subibat, ædium Comitissæ *Petroburgensis*, in quibus hospitabatur *Usserius*, tectum, unde facilis versus fatale pegma in spatiosa area juxta Palatium Regale, quod *Whitehall* nuncupatur, erectum, pateret prospectus, invitus & reluctante animo, aliorumque repetitis postulationibus potius, quam sibi indulgens, tandem ascendit, ut longum vale clementissimo Domino suo diceret, illo ipso tempore, quo Rex ad circumstantes orationem habuit : interim precibus intus conceptis, quas lachrymæ ab oculis ubertim manentes, suspiria & gemitus excepere, apud Deum fufis, ut illius animum Spiritus S. gratia in istis ultimis agonibus firmaret, & solaretur. At cùm finita oratione vidisset Regem sibi exuisse diploidem, ut securi cervicem commodiùs submitteret, totus contremuit, ingentique oppletus horrore, deliquium pati cœperat : inde citra vel minimam moram à famulo in cubiculum ductus, lecto decubuit, ibi aut extremum exspiraturus, aut saltem applicitis corroborantibus remediis refocillandus. Nemo sanè immanissimum illud & maxime execrandum flagitium aut acriori doloris sensu luxit, aut parricidas majori odio infectatus est, aut pientissimi Martyris memoriam grandioribus elogiis celebravit, cujus natali die, quo victima cecidit, recurrente, per reliquos vitæ annos, se precibus, sacris meditationibus, jejuniis, & mœrori totum devovere, iramque provocati Numinis, ne in universam Gentem communi clade inardesceret, importunis intercessionibus deprecari solitus est.

Annales
mundi
ab *Usserio*
editi.

Cum *Usserius* diligentissimam Historiæ universali omnium seculorum
ab

ab orbe condito ad ultimum *Hierosolymorum* excidium, quantum ex sacris Scripturis, librisque Ebræis, Græcis, & Latinis, quotquot hodie exstant, aut in bibliothecis manu exarati reperiuntur, exhauriri potuit, sive longè antè, sive post religionem Christianam in universum orbem terrarum prædicatione Evangelii introductam, juxta veros calculos justa & concinna serie conscribendæ operam diu adhibuisset, de edendis istis Annalibus, incredibili industria, sudore, vigiliisque elaboratis, præcipua illi jam septuagenario cura fuit: & meritò quidem: quicquid ille fenserit, non tam ipsius, quàm posterorum plurimùm interesse, ut hi accuratissimi omnigenæ Antiquitatis Commentarii, manu propria elimati, & absque alienis admixtionibus integri, ipso adhuc vivente, legerentur. Felicissimè ergo *Londini* A. MDCL. prodit *Annalium pars prior, à temporis Historici principio, usque ad Maccabaicorum initia producta: unà cum rerum Asiaticarum & Ægyptiarum Chronico*: quam postea A. MDCLIV. secuta est *Pars posterior, in qua, præter Maccabaicam & Novi Testamenti historiam, Imperii Romanorum Caesarum sub C. Julio & Octaviano ortus, rerumque in Asia & Ægypto gestarum continetur Chronicon, ab Antiochi Epiphanis regni exordio, usque ad Imperii Vespasiani initia atque extremum Templi & Reip. Judaica excidium deductum*. Hisce vero Annalibus posterioribus addendum primo instituit, *Ecclesiastici Chronici Breviarium, usque ad quarti post Christum natum seculi exordium*. Quod utinam absolvisset! Postea Annales hi veteris & novi Testamenti simul editi erant *Parisiis* A. MDCLXXIII.

Quantis plaufibus exceptum fuerit hoc desideratissimum opus & maximi in omni historia usus, cum id omnibus in harumce literarum studiis paulò versantibus sit compertissimum, non opus est, ut hîc multis ostendam. Quidni tamen dixero, chronologiam, tam sacram, quàm civilem, quæ hætenus spissa obscuritate & incertitudine laboraverit, jam ad certam facilemque methodum redactam; Epochas celebriores tum *Judaorum*, puta orbis conditi, diluvii, exitus *Israelitarum*, ex *Ægypto*, eorundemque ex captivitate *Babylonica* reditus, tum aliarum Gentium, uti Olympiadum, *Nabonassari*, *Romæ* conditæ, quarum anni jam ordine imperturbato decurrunt: (ex harum enim originibus evolutis monstratisque pendet luculenta rerum ubique gestarum cognitio, ut nullo negotio in communi periodi *Julianæ* mensura simul conjungi, comparari, & conciliari possint, fixas & determinatas, denique tem-

temporum rationes, successionesque Regum *Judaorum*, *Aegyptiorum*, *Assyriorum*, & *Persicorum* ritè compositas; item *Romanorum* peragrationes, itinera, victorias, triumphos, reliquaque in *Asia*, *Syria*, *Palestina*, *Aegypto*, & alibi, sive foris, sive domi præclarè acta, cum N. Testamenti historia suis locis & tempore inserta esse? Inter præcipua & celebratissima stupendæ eruditionis monimenta, quæ superior ætas produxerit, *Annales* hosce jure meritissimo recenseri oportere, non vanus auguror, omnes proba mente & judicio præditi promptè fatebuntur.

Usserii ad
Cappel-
lum Epif-
tola de
variis E-
braici
textus
lectioni-
bus.

Cùm acerrimæ lites, verbosa protervitate gravidæ, inter *Ludovicum Cappellum*, doctissimum *Critica sacra* Auctorem, & *Arnoldum Bootium*, Ebraicè peritissimum, de variantibus Ebraici textus lectionibus, an nimirum ex Græca τῶν LXX. versione, aut aliunde, colligi aut possint, aut debeant, agitentur, ambo suarum opinionum invicem repugnantium vi nimium confisi, Epistolis ad *Usserium*, tanquam ad æquum idoneumque Arbitrum scriptis editisque publicè appellarunt. Ille verò silentio sibi indicto, ejusmodi concertationibus, à quibus mentem habuit averfissimam, intermisceri diu nolens, tandem *Capelli* repetitis, iisdemque importunis, epistolis provocatus, sententiam, non præcipitem quidem & temerariam, aut ex studio partium dictatam, sed gravem, modestam, & ex sano judicio, libratæ rerum momentis, prout sibi videbatur, derivatam, epistola ad eundem A. MDCLII. edita, dixit. Veruntamen an ille omnibus *Cappelli* argumentis probè & ad plenum satisfecerit, & an conjecturæ illius scopum semper attigerint, ego non inquirō: alii judicent: qui facilè interim dabunt, multa tum ad Græcam versionem, tum ad *Samaritanum* Pentateuchum, quem à *Dositheo*, ortu & genere *Samaritano*, & supparis cum *Simone* Mago ætatis, interpolatum, correptum, & depravatum fuisse ex decreto Synodico *Enlogii Alexandrini* apud *Photium* statuit, pertinentia, curiosa indagine eruta, & lectu dignissima, illic reperiri.

Usserium
ad se vo-
cat
Cromwel-
lus, cum
illo con-
filiis va-
frè initu-
rus.

Usserii fama per universam *Angliam*, & potissimùm in Urbe, tum ob concionum in sacello *Lincolniensis Hospitii* habitarum frequentiam, tum ob libros recens editos, magis magisque inclarescente, scelestissimus *Lalstro*, *Oliverus Cromwellus*, qui infamibus rebellis Parlamenti reliquiis (quæ vulgatissimo scommate *Uropygium*, Anglicè *The Rump-Parliament*, erant nuncupata) mense Aprili expulsis, summam rerum potestatem, imperio planè despotico sibi arripuisset, ut majorem populi pri-

plausum captaret, *Usserium* accersitum obvia comitate excepit, & inter alia colloquii argumenta, sub falsa fictaque pietatis specie *de augendo & stabiliendo tum in Anglia, tum alibi terrarum, communi Protestantium commodo*, (sic ad fallendam incautam plebem sceleribus suis melius securiùsque obtegendis religionis *Protestanticae* causam prætexere solent Invasores) differuit: sed quicquid sani consilii dictaverit prudentissimus & piissimus Archi-Præsul, enthusiasticus iste, quo exagitatus erat, furor, id planè irritum reddebat. Utcunque benignè dimissus erat *Usserius*, quem, licèt fanatico œstro percitus, Ordinem Episcopalem, Liturgiam, sacrosque Ecclesiæ *Anglicanae* ritus, Clerumque Orthodoxum, fortunis & dignitatibus suis ob fidem in Regem Martyrio coronatum, Filiumque exulantem præstitam, exutum capitaliter odisset, nondum resecta hypocriseos larva, revereri & diligere præ se tulit: & ut id luculentiori documento constaret, suggerente, quod vero non ab simile videtur, *Bernardo*, olim *Usserio* à sacris, jam verò *Cromwello* ab eleemosynis libras ex pecuniis à Deo dandis, h.e. ex animalibus aliisve rebus divenditis, quæ aliquo modo ad mortem cujuspiam inferendam conduxerint, crescentibus, utpotè ex veteri lege Regio Eleemosynario cessuris, piosque in usus erogandis, illi numerandas permisit. Nemo fanè *Usserio* pusillanimitatem exprobrare debet, quod pensionem istam non optanti, nec teruncium quidem exspectanti oblatam, ne dicam, obtrusam invito animo acceperit: cùm præcipitis consilii damnosæquæ imprudentiæ fuisset redarguendus, si secus fecisset. Hac autem prudentia faciliorem sibi parabat viam intercedendi apud Tyrannum alias infestum, pro fratribus oppressis afflictisque, si quando nova persecutio oriretur, quæ mox secuta est, ut statim videbimus.

D. *Joanne Seldeno*, viro summo, cujus fama, ob excelsissimas animi dotes consummatamque eruditionem, nunquam interibit, neque ex hominum memoria delebitur, quamdiu literis constabit honos, tricesimo Novembris A. MDCLIV. è vivis excedente, clarissimi viri, D. D. *Matthæus Halesius* & *Joannes Vaughanus*, hic postea regnante *Carolo II.* summus Communium placitorum, ille summus totius *Angliae* Justitiarius, alique, ultimarum tabellarum Executores, impensè rogarunt *Usserium*, ut amico jam fatis functo concione funebri parentaretur; utpote fatis gnari, neminem, qui laudaret, quàm *Usserium*, digniorem habitum iri. Ut suum erga Vi-

Usserius
solen-
nem in
funere
Seldeni
concio-
nem ha-
bet.

rum arctissima per quadraginta annos & ultra necessitudine ipsi conjunctissimum testatum faceret affectum & amorem, facile adensus est, & die decimo quarto Decembris, quo corpus in Societatis, cujus *Seldenus* erat ingens lumen & decus, Jurisperitorum Templariorum ædes occupantium, Ecclesia terræ mandabatur, conscensis sacris rostris, perorans, non sibi, non amplissimo illustrium virorum, qui splendidissimis maximèque solennibus interfuere exequiis, cœtui, non *Seldeno* defuit. Inter elogia, quibus dilectissimum suum *Seldenum* cummulavit, hoc maximum meritò videbitur, quod *se vix dignum, qui*, phrasi apud nos usitatissima, *illius libros portaret*. h. e. nullo in pretio, si cum illo conferatur, habendum esse putaverit. Ita præ modestia propriæ dignitatis oblivisci visus est *Usserius*, dum summam *Seldeni* doctrinam, quasi in altissimo humanæ industriæ fastigio collocatam, præconiis penè fidem exsuperantibus, extollere studuerit.

*Usserii de
Græca
LXX In-
terpre-
tum ver-
sione
Syntag-
ma.*

Quò, senecta jam indies ingravescente, & propemodùm confecta, se propiùs ad ultimam vitæ metam accedere sensit *Usserius*, eò impensiori studio, quod prelo habuit paratum, in publicam lucem protrudere cupiebat. Sui ipsius ergo jussu & cura prodiit *Londini MDCLV. De Græca Septuaginta Interpretum versione Syntagma: cum libri Estheræ editione Origenica, & vetere Græca altera, ex Arundelliana Bibliotheca, nunc primum in lucem producta*. Fatendum est, *Usserium* quasdam *κρυπταὶ δόξαι* & sibi peculiares, de quibus meritò dubitari potest, in hoc Syntagmate protulisse, quas tamen mira ingenii subtilitate adstruere conatus est. Prætermisso enim, quod solos quinque libros *Mosis* ab illis Interpretibus Græcè, & quidem accuratissimè, conversos fuisse dixerit, quæ erat *Aristeæ, Josephi, Hieronymi*, totiusque Scholæ *Judeorum* sententiâ, statuit, veterem istam interpretationem, in Bibliotheca *Ptolemæi Alexandriæ* repositam, incendio periisse: illam verò, quæ non multò post loco illius substituta, omnium tum Græcissantium *Judeorum*, deinde ab hisce Hellenistis ad Apostolos & primitivæ Ecclesiæ Doctores derivata, quam Christianorum in manus & sub oculis veniebat, reliquos veteris Testamenti libros complectentem, ab aliquo *Judeo* post quartum *Ptolemæi Philometoris* annum factam fuisse: hunc obscurum homuncionem textum sacrum, aut addendo, aut detrahendo, aut mutando, aut pro lascivia ingenii & dedita opera perperam interpretando, adulterasse, illiusque fraudibus & perfidiæ miram istam, quæ inter Ebraicos & Græcos codices intercedit, discrepan-

tiam

tiam adscribendum esse. *Judeos* Sacerdotes & Levitas, tunc in *Ægypto* commorantes, qui, desertis *Hierosolymis*, in novo *Oniæ* templo, in agro *Heliopolitano* condito, sacris operari consueverint, ex oscitantia, turpique ignavia hanc novam versionem corruptam fœdatamque, temerario ausu, absque aliqua exploratione admissam, in publicos usus adhibuisse, aliaque gratis dicta, à quibus recensendis abstineo: quæ ad rigidum examen vir doctissimus, *Henricus Valesius*, in Epistola *Lutetiæ Parisiorum* idibus Novembris anno MDCLXV. scripta, & in calce illius adnotationum in *Eusebium* edita revocavit. Longè tamen plura, miræ curiositatis, quæ sacrum textum, istius Græcæ versionis varias editiones, illorumque temporum historiam illustravit, illic reperiri, omnes, qui de hisce literis rectè judicare norunt, facilè concedunt, & inter illos ipse animadversor *Valesius*; qui in limine Epistolæ memoratæ ita *Usserium* alloquitur. *Volo hîc Tibi laudes tuas ingerere. Neque enim id modestia tua, nec amicitia nostra patitur: Dicam tamen ingenuè, quod censeo, in plerisque quidem, quæ illic à te scripta sunt, assentior tibi: tuamque eximiam eruditionem & acumen ingenii magnoperè demiror. Sunt tamen nonnulla, in quibus abs te dissentire cogor invitus.*

Huic Syntagmati accesserunt ob argumenti cognationem, de Cainaane, De Cain in vulgata LXX. editione superaddito, ex illius *Chronologia sacra* nondum edita, *Dissertatio: una cum ejusdem edita ad Ludovicum Cappellum de variantibus textus Hebraici lectionibus*, anno 1652. & altera à Gulielmo Eyrio ad ipsum A. 1607. data Epistola.

Sed de hac *Chronologia sacra*, aliisque libris, quos *Usserius* reliquit ineditos, quorum tamen aliqui post mortem prodire, uti & de ingenti schediorum illius & Collectaneorum mole, postea opportunius dicam.

Cromwellus mala & tetrica conscientia, quæ illum suspiciosum & inquietum reddiderat, exagitatus, & de summa potestate, quam cædibus pessimisque artibus usurpaverat, retinenda valdè anxius, jam resecta simulatæ misericordiæ larva, in nobiles aliosque, qui Regias partes flagrantè rebellione & funestissimo bello secuti sunt, præsertim verò in Ecclesiæ Anglicanæ Presbyteros (nam Præsules despectui habuisse videtur propter paucitatem) qui omnium bonorum jacturam jurisjurandi reverentiæ & conscientiæ tranquillitati firmissima mente postposuerint, ferocire, imò & sævire cœperat. Horum plerique omnes ex utriusque

Cromwellus in Presbyteros Episcopales furiosè grassatur. quem, pro illis intercessurus adit *Usserius*.

Academiae Collegiis, & Ecclesiis Parochialibus, quas sacrilegè invaserant Ministrelli Presbyterani & Independentes, crudeliter ejecti, aut in ædibus conductis, aut in Nobilium familiis, aut in privatis sacellis sacrum juxta Ecclesiae Anglicanae constitutionem Ministerium obibant, aut pueros & adolescentes in rudimentis doctrinae, & erga legitimum Principem fidei, inque sanæ Theologiae articulis instituendi munus suscipiebant: alii aliter, prout quisque animo propendebat, in mediis hisce angustiis amicorum benevolentia & liberalitate adjuti, vitam tolerarunt. *Londinum* autem erat reliquorum Confessorum asylum, ubi in tanta civium multitudine tutiùs securiùsque delituerunt, & majori libertate gavisi sunt. Hoc limis, imò indignabundis furentibusque, oculis videns *Cromwellus*, & animo ferens iniquissimo, *Declarationem*, uti appellant, (nam conculcatis legibus, omnia pro arbitrio administrari voluit) primo die Januarii A. MDCLV. juxta stylum & computationem nostram, publicavit, in qua sub severis poenis jubetur, ne quisquam ex illis in privatis scholis pueros doceret, aut in ædibus Nobilium exceptus, aut in Oratoriis, in quibus sacri conventus haberi solebant, aliquam sacrae functionis partem administraret, rapiendis in carcerem, qui contra fecerint. Ut ab hisce molestiis periculisque meliùs & honestiùs sese eriperent Episcopales Theologi, multi ex his celebrioris notæ *Londini* commorantes, dira hætenus passi, diriora jam passuri, ut par est credere, (licèt sibi soli gratiam hanc deberi asseruerit *Bernardus*, quem justa laude hac ex parte, si rem ita se habuisse certò mihi constaret, neutiquam fraudandum censerem) ab *Usserio*, tunc rure agente, literis petiere, ut *Cromwello* pro gratia & bona existimatione, qua apud illum valere ferebatur, interpositâ suâ operâ, iret supplicatum, ut libertas conscientiae, omnibus sectis tum effusè concessa, ipsis quoque concederetur: & cum in publicis Ecclesiis, è quibus detrusi fuissent, sacri cultus causâ convenire non liceret, id saltem illis impunè conveniendi in Oratoriis privatisque ædibus daretur facultas. Ut afflictissimis viris, ejusdem sacrae communionis Mystis, in summo periculo constitutis, quoquomodo, quantum in illo erat, opitularetur *Usserius*, relicta *Rigata* in provincia *Surreiensi*, ab urbe quindecim circiter milliaribus distita, animo penè despondente, de itineris successu malè ominatus, *Londinum* repetit, bonaque causâ fretus, sacraque hac quasi fungens legatione, ad *Cromwelli* praesentiam admissus, rem propositam piè & tenerrimo cum affectu urisit, tamque justis ac solidis rationibus & argumentis corroboravit, ut victor evase-

evaferit, *Cromwelli* pertinacia, licèt ægrè quidem expugnata, qui pollicitus est, nullam iis molestiam faceffendam esse, *modò rebus civilibus & ad præsentem πολιτείαν spectantibus sese non ingesserint*. Sed nudis verbis absque aliquo fortiori auctoramento licèt mille testes adfuissent, neutiquam fidendum erat. Ideo *Usserius* altera vice illum adibat, petiturus, ut priori *Declaratione*, si non penitùs revocata, saltem pro tempore suppressa, promissum istud scripto publico firmaretur. Facilè in cubiculum introductus, & sedem capeffere jussus, ibi Chirurgum ulceroso tuberculo in *Cromwelli* pectore excrescenti emplastrum apponentem reperit. Aliquantillo post tempore, ad novum colloquium ventum est. *Cromwellus* autem auditis, quæ proponerentur, replicavit, *se de re ista meliùs & exploratiùs cum Consiliariis suis deliberasse, qui illius quàm maxime interesse judicarunt, neutiquam ejusmodi hominibus, novis motibus quotidie intentis, qui erant ipsius, præsentisque rerum administrationis infestissimi hostes, libertatem petitam concedi oportere*. Quo brevi colloquio finito, urbanè quidem dimissus est *Usserius*. Tristis admodum rediit domum, & clam apud suos de *Cromwelli*, qui promissis non steterit, perfidia gravissimè questus, ultra addidit inter alia, quod *Cromwelli* potentiam vix stabilem fore, aut permanfuram, aut saltem illius vitam ad multos annos prolongari non posse, illud nimirum ex turbatissimo rerum statu, hoc verò ex ægritudinibus perpetuaque illius mentis agitatione, quæ est miserrima fors Tyrannorum, ut puto, pro sagacitate sua præsensisset, *extorrem Regem tandem in Angliam, reversurum esse*.

Circa medium Februarii, Urbe relicta, rus repetens, licèt acerri-
mus dolor menti, ob persecutionem, quam intercessione sua apud
flagitiosissimum Tyrannum avertere non poterat, jam adversus Episco-
palem Clerum passim grassantem, altum infederit, quantillum erat
vitæ, quod supererat, pro more quasi in naturam verso, dum solus es-
set, nullisque innexus negotiis inter studia doctrinæ ac pietatis officia
partitus est. Relectis inque novum adductis examen schedis, quas
de *Chronologia sacra* prius apparaverat, quicquid ad opus istud absol-
vendum defuisse videretur, addidit & supplevit: quod non modicum
erat mentis solamen. Præfagire enim visus, sive ex viribus in istâ con-
fectâ ætate penè absumptis, sive aliundè, ultimum vitæ suæ terminum
non procul distare, nec longè prorogandum: ad diem natalem in Ephe-
meride istius anni adnotans, quotum ætatis suæ annum tunc attigisset,
subjunxit, *dies meos completos esse*, & deinde literis majusculis scripsit,

RESIGNATIO. Properabat quidem ultima hora, illo quidem expectante, Amicis non item. Vicesimo enim die Martii, ad vesperam, fataliter ægrotare cœperat, ischiade primò laborans, quam proximo mane secuta est pleuritis. Inde dolor magis magisque augebatur, remediis nullis à Medico, qui, sive ex ignorantia, sive errore, non benè, ut ex dissecto corpore liquebat, partes suas impleverit, præscriptis expugnandus. Interim per quatuordecim plus minus horas, ingenti, licèt non æquali, intentione & violentia, cruciatu distineretur, cui ferendo, vires imminutas vix aliquandiu suppetere posse, facilè sentiens, Deo se totum effusis precibus commendavit, assistente Comitissæ Sacellano. Circa lectam adstantibus pia suggessit consilia de præparatione ad benè sanctèque moriendum, etiam dum robur, dum valetudo adesset: illustrissimæ verò Comitissæ, ob insignem illius benignitatem, quam per multos annos summa cum animi lætitia & voluptate expertus est, solennes egit gratias. Tunc paulò ante mortem petens, ut jam sibi privatissime suis orationibus & meditationibus vacaret, in hoc unicè intentus, Deum, ut propter *Jesu-Christi* passionem & mortem illius misereri pro infinita sua misericordia dignaretur: *Con dona mihi*, inquiebat, *ô Domine, peccata mea omissionis.* Hæc erant illius ultima verba, nec quicquam aliud postea ab illo prolatum fuisse, qui aderant, audivere. * Mox enim piam efflavit animam *Usserius*, Vir summus, & propter pietatem, eruditionem, & dignitatem eminentissimus: postquam septuaginta quinque annos, tresque, dempta una septimana, menses vixisset.

XXI.

Martii

MDCLV.

Sepultus
in Eccle-
sia Abba-
tiali *West-*
monaste-
riensi.

Convenerat inter V. C. D. *Timotheum Tyrillum*, *Usserii* generum, & illustrissimam Comitissam *Petroburgensem*, de illo sepeliendo, cum omni debito decore, sed sine sumptuosa pompa & strepitu, in Ecclesiæ Parochialis crypta, ad familiam istius propaginis *Howardorum*, è qua erat oriunda, pertinente. Sed quod verissimillimum est, procurante *Bernardo*, qui se se in gratiam & favorem *Cromwelli*, utpote cui vitam debuit in ista horrenda strage, post expugnatam ferro ignique *Droghedam*, in qua, paucis admodum, ne mulieribus quidem exceptis, parcitum fuerit, insinuaverat, *Cromwellus* artis dissimulandi peritissimus, literis transmissis intercessit, non ex amore pietatis aut reverentiâ canitici sacrarumque insularum venerandi Archipræfulis, sed variis artibus politicisque rationibus inductus, voluit, ut sacræ istæ exuviæ in Abbatiali Ecclesia *Westmonasteriensi* publicè illius sumptibus conderentur. Ille enim satis gnarus, quantum decoris, quamque insignem

nem

nem gloriam, non tantum domi, sed per universum orbem Christianum, & potissimum apud Ecclesias Reformatas in *Gallia*, *Belgio*, *Germania*, & alibi gentium, sibi peperisset *Usserius*, id pro versipelli suo ingenio dedita opera & sedulò egit, non modicam laudis partem in se ex hoc magnifico funere derivaturus. Cui igitur apparando ducentas libras Anglicanas è fortuitis *Deo dandorum* pecuniis eximendas solvi jussit. Non enim majori pretio egregiam istam, quam ab Exteris captaturus esset, laudem, censuit redimendam Parricida sceleratissimus, & in omne ævum execrandus. Exequiis ex improvviso dilatis, corpus condiri oportuit: quod tandem indicto die, viz. XVII. Aprilis A. MDCLVI. currui, pullatis pannis lugubrem in modum, cum reliquis appendicibus, ornato, impositum, magno Nobilium numero comitante, prout in Magnatum funeribus fieri solet, *Londinum* deferretur. Cùm ventum esset ad ædes *Sommerfettanas*, serenissimæ Reginæ *Henricæ Mariæ*, augustissimi Regis *Caroli I.* viduæ, palatium, *sequestrati* (ut verbo forensi utar) Presbyteri Ecclesiæ *Anglicanæ*, qui testandæ reverentiæ & obsequii erga *Usserium* causâ, illic ex pacto convenerant, sese immiscentibus, ni malè, post quadraginta octo annos, memini, paucis ex Ministris Presbyteranis *Londinensibus*, inde egressi, bini longo rectoque ordine *Westmonasterium* processerunt, ut de confertissima aliorum, qui aderant, multitudine sileam. Deposita aliquanto tempore in Ecclesiæ choro sandapila, *Bernardus* consensu rostris concionem, cui interfui, habuit in hæc verba 1. Sam. XXV. 1. *Mortuus est autem Samuel, & congregatus est universus Israel, & planxerunt eum nimis, & sepelierunt eum in domo sua in Ramatha*; qua ad finem perducta, proceditur ad sepulchrum, in *S. Erasmi* sacello à latere magnificæ Capellæ *R. Henrici VII.* effossum, in quo, *Bernardo* officium istud in Liturgia præscripturo, juxta ritus Ecclesiæ *Anglicanæ* isthic peragente, recondebatur, usquedum resurrectionis aurora illuxerit, custodiendum.

Hac compendiaria vitæ *Usserii* historia defunctus, ea, prout in contemendis describendisque magnorum virorum vitis usu venit, quæ ad formam habitumque corporis, *ἡθροειδέειαν*, mores, ingentesque animi doctes, aliaque mixti generis propius spectant, paucis ex industria (neque enim Panegyristen in celebrandis illius laudibus fusiori stylo superflue excurrentem ago) referre, & quasi coarctata tabella repræsentare, & demùm scripta, quæ reliquit, sive perfecta, post mortem in lucem edita, sive affecta tantum, à quibus absolvendis, aliis studiis impeditus, manum absti-

abstinuit, recensere jam, ut Lectorum curiositati pariter ac profectui & commodo hac ex parte simul prospiciam, aggredior.

Forma
habituf-
que cor-
poris.

Statura erat aliquantulum procera, & corpore benè composito, cæfarie, præsertim in juvenilibus annis, subnigra, temperie paulò ad sanguinem inclinante, vultu gravi & serio, bonæ indolis sedatæque mentis indice, incessu, etiam in senecta, erectus, robusta valetudine, licèt semel febre quartana, iterumque stranguria immodicoque sanguinis effluxu quassata: rarò admodum capitis dolori obnoxius, nunquam verò aut calculo, aut podagra vexatus: parcus vini, in cibo absque condimentis reliquisque gulæ irritamentis cocto paratoque moderatus: ita ut, sive id ipsius temperantiæ sive facili bonæque concoc-tioni adscribendum sit, nihil inde mali sentiente aut stomacho aut cerebro, è mensa repente, quamprimùm per hospites licuit, in museum studiorum gratia valuerit reverti.

Mores
dotes-
que ani-
mi.

Dein genio sublimi, omniumque scientiarum, tam divinarum, quàm humanarum capaci, & de indefessa, quæ illum, exporrecto totius vitæ spatio, nunquam destituit, industria, non est, quod hîc quicquam denuò repetam, quod apud omnes notissimum est, quibus *Usserii* nomen non ignotum, & quod etiam libri, in omne ævum victuri, luculentissimis documentis testabuntur.

Pietas sincera & absque omni fuce & ostentatione, quam ab ineunte adolescentia à corde, amore Dei cœlitus accenso, fluentem, à turpitudine & opprobrio per gratiam *Christi* integram servavit, in omnibus vitæ actionibus officiisque religionis, sive clam, sive publicè peractis, illuxit. Non pecuniarum avidus, non opum corrafor, effusæ in pauperes, præsertim in juvenes Academicos angustioris fortunæ, assignatis annuis pensionibus, ut studiis animum alacriùs intenderent, liberalitatis: orphanorum aliorumque, quos impensis suis in scholis educandos curavit, fautor & patronus. Sed inter Christianas, quas exercuit, virtutes, mira humilitas potissimùm eminebat, quæ illum supra omnes titulos reddidit maximè venerabilem: non sui amans, non aliorum contemptor. In tam alto dignitatis & famæ fastigio positus, cunctos, etiam mediocris fortunæ & ingenii, obvia comitate excepit, amicos verò perquam benignè & familiariter, semper tamen sub justo veræ prudentiæ moderamine: sibi minimè placens, relicta cuiquam opinandi libertate; non rigidus alieni operis censor: in Adversarios, licèt laces-situs, non contumeliosus: in congressu facilis, & ab omni morositate

vacuus, à quo neminem aut elato supercilio aut fastuoso sermone repellebat, ne Presbyteranos quidem Ministros, qui, licet implacabili in sacrum Episcoporum ordinem, illorum technis furoribusque hinc eversum, odio adhuc ferrentur, illum tamen revereri, & non mediocri observantia & obsequio prosequi præ se tulerunt.

Sed celari non oportet, illum inde sibi apud suos non parum invidiæ conflavisse, quasi illorum schismati pariter ac sententiis in quibusdam dogmatibus Theologicis controversis nimium quantum indulgisset, ne dicam, in præjudicium Episcopalis Ecclesiæ, oppressæ licet & oppugnatae, nondum tamen per horum fidem, constantiam in durissimis rebus patientiam & zelum ab hostibus triumphatae, favisset. Multi enim *Usserium* lenitatis & benignitatis erga istiusmodi homunciones qui indicto contra Regem & Ecclesiam Anglicanam bello, res sacras civilesque perjuriis, rebellione & cædibus sub larva reformationis commiscuissent, ostensæ, excessu peccasse censuerunt.

Quisquis in memoriam revocat, ut Catechismum, conciones (quodque enim cum de *Arminianorum* dogmatibus coram Rege aut ad populum peroravit, non abstinuit ab acribus censuris) Epistolas editas, & *Gotteschalci* Historiam omittam, quam magnam in condendis Ecclesiæ *Hibernicæ* articulis partem olim sustinuerit *Usserius*; illum quibusdam *Calvini* placitis addictissimum fuisse facile sibi persuadebit; de quo, cum disputationes ejusmodi iterum paulò post mortem ipsius incalescerent, Presbyterani, quibus nimirum disciplina *Genevensis*, pariter ac doctrina, cordi erat & in deliciis, spondentes, non parum præsidii ex tanti nominis auctoramento in causam *Calvinianam* derivandum esse, tanquam de magno earundem opinionum Patrono & Fautore, seriò gloriati sunt. Estò. Quid ergo? Num cuiquam vitio verti debet, si in istis perplexis dogmatibus Theologicis, neutiquam ad doctrinam fidei spectantibus, quæ meræ sunt argutiæ, & de quibus, pro varia lascivientium ingeniorum inclinatione & indole, rixæ litesque nunquam cessaturæ movebuntur, aut amplectendis aut rejiciendis, judicium suum, unitate Ecclesiæ salva & integra manente, secutus fuerit? Absit: Nemo enim aut pius, aut prudens, aut modestus id dixerit. De qua re utique prorsus siluisssem, si in eadem sententia, quam pridem amplexus fuerat *Usserius*, tuenda perseverasset. Illum verò ante mortem, quod ad hosce articulos de *Electiōe & Reprobatione*, de *gratia*, de *libero arbitrio*, de *redemptione*

Censurâ à quibusdam ob nimiam Presbyteranis præstitam gratiam notatus.

Strenuus olim Calvinianorum dogmatum assertor.

Sed mutavit sententiam ante mortem.

ne humani generis per mortem Christi Salvatoris, reliquosque omnes spectat, aliam à priori, mutata mente, suscepisse, & in gratiam cum Episcopo Overallo, consummatissimo Theologo, rediisse, ex trium magnorum Virorum, omnique fide dignissimorum, D. D. D. *Briani Waltoni, Petri Gunningi, & Herberti Thorndikii* testimoniis, propria singulorum manu signatis, adversus quorum veritatem nulla legitima exceptio admitti potest, luculentissimè, quicquid contra dixerit *Bernardus*, liquet. Hæc verò, quod ex intuitu nostratium, qui hæc schedas legerint, addo, in præclara de hoc argumento appendice, ad librum, cui titulus, *Εαυτοντιμωρέμενος*, ab eruditissimo Viro, & invicto Ecclesiæ Anglicanæ contra istius temporis schismaticos vindice, D. *Thoma Piercio*, postea dignissimo & integerrimo Collegii B. *Mariæ Magdalena Oxonii* Præside, & Ecclesiæ Cathedralis *Sarisburyensis* Decano, contra quendam famosum Presbyteranum Ministrum *Londini* A. MDCLVIII. Anglicè editum, existant.

In *Usser-*
rum in-
furgit
Heylinus.

Hæc multis fortasse levia quidem videntur, ac ne hili æstimanda. Sed longè severiori dica intentata, *Usserium* aculeato scripto præstringit D. *Petrus Heylinus*, jurium, doctrinæ, disciplinæ, rituumque sacrorum in pessimis & difficillimis temporibus, Ecclesiæ Anglicanæ, ringentibus indignantibusque Puritanis, strenuus admodum Adversor, quasi ille in multis religionis capitibus explicandis à vero Articulorum, quibus omnes sacris ordinibus initiandi subscribere tenentur, sensu, & ab Ecclesiæ mente abiisset, imò & contraria dogmata invexisset. Adversus has exceptiones breves Avi sui, longo post tempore Actoris convitiis, ut putabat, irritatus V. Cl. D. *Jacobus Tyrrellus*, ex filia nepos, vindicias edidit. Sed nolo hisce controversiis dudum sopitis me ingerere, nec singillatim iis recensendis immorari: (utpote quod scopo & instituto Historicæ narrationis, quam suscepi illustrandam, neutiquam convenit) unum aut alterum ex articulis objectis, qui præ cæteris censuræ obnoxii sunt, quasi in transitu memorare contentus.

A nepote
defendi-
tur.

Usserius
Episco-
pos &
Presby-
teros so-
lo gradu,
non ordi-
ne differ-
re vult.

Ab ingenti isto, ne dicam, immodico, quo ferebatur erga Ecclesias Reformatas, sive in *Gallia, Belgio*, aut alibi gentium in transmari- nis Regionibus, quæ Episcopis carent, affectu, ne ordinationes, à quibus Sacramentorum totiusque muneris Ecclesiastici administratio uni- cè pendet, apud illos factæ, irritæ & nullæ haberentur, *Usserius* jux-

ta quorundam Scholasticorum , qui otio & ingenio ad deprimendam legitimam Episcoporum auctoritatem , hac in re à primis æræ Christianæ seculis derivatam , & optimo jure vindicatam , abusi sunt , effatum , heterodoxæ novitatis arguendum , rotundo ore & expressissimè quidem verbis asseruit, *Episcopum & Presbyterum gradu tantum, non ordine differre* : in qua sententia (uti in multis aliis dogmatibus Theologicis controversis) habuit sibi consentientem & ὁμολῶν (a) D. *Davenantium* Episcopum *Sarisburiensem* , cujus de Prædestinatione & reprobatione Prælectiones Academicas edendas procuravit. Hac decretoria sententia , nequaquam admittenda , acerbissimas Pontificiorum censuras & opprobria , quasi nulli essent Sacrorum Ministris in illis Ecclesiis ritè constituti , retundi & elidi posse putabant. Alii autem viri doctissimi , ex Præsulibus & Sacerdotibus , essentiali inter Episcopos , quibus solis ordinandi jus ab ipsis Apostolis , quorum sunt successores , per omne ævum ad illos transmissum & demandatum competit , & Presbyteros , quoad distinctos ordines , discrimine studiose retento , de isthoc gravi defectu , quo laborant Ecclesiæ Protestanticæ extra *Angliam* , mitius & benignius sentientes illas , præsertim *Galliam* , ubi *Romana* Religio sub civilis potestatis præsidio dominata est , adhucque dominatur , (nam diversa *Belgicæ* , introductâ post abdicatum R. *Philippum* II. libera Republica , videtur esse ratio , quæ inde , *Usserio* censente , minus excusabilis , quàm altera redditur) ex necessitate sola , quam induxit temporum , quibus illorum Majores ab Ecclesia *Romana* secessionem fecerint , iniquitas , si non defendi , saltem excusari , & inter membra mystici corporis *Christi* , recenseri posse longè melius statuunt. Qua egregia animi moderatione jura Catholicæ Ecclesiæ integra & intemerata , & Christianam charitatem & benevolentiam illæsam , simul servant : licet cum illis in sanctiori Eucharistiæ mysterio participando vix communicaverint : quod tamen *Usserium* , si in *Gallia* , ac etiam in *Belgio* sedem fixam habere contigerit , se facturum , omni dissimulatione & metu sepositis , professus est. Ne verò de hoc *Usserii* indulgentia & candore triumphos agant Presbyterani , sive *Angli* , sive *Scoti* , meminisse oportet , *Usserium* illorum aut ordinationes calculo suo nunquam approbasse , aut sacris interfuisse , utpote qui perjurii & rebellionis adversus Episcopos , quibus fidem canonicamque obedi-

(a) Determinat. Q. 42.

tiam solenni juramento addixerant , fuscitatæ manifesti , nulla necessitate , sive reali & insuperabili , sive ficta prætensaque , adacti , flagitioso schismate conspurcati , quod alieni esset juris , longèque superioris auctoritatis , sacrilegè invaserunt. Ne verò quispiam suspiciones aleret , quasi *Usserius* , sententia de *Episcoporum & Metropolitanorum origine* , quam olim scriptis eruditissimis tutatus est , mutata , jura sui ordinis violare aut imminuere in posterioribus vitæ annis hac συγκατάβασις proposuisset , sciendum est , illum simul eodemque tempore asseruisse , *eminentem istum spiritualis potestatis , qua Episcopi antistant Presbyteris* , gradum , neutiquam , ex Principum & Synodorum arbitrio pendere , aut à consuetudine Ecclesiastica ex communi consensu introducta derivari , sed ab ipsis Apostolis , à primis nascentis Christianismi initiis fuisse institutam & stabilitam , *Presbyteros subesse Episcopis* , & Presbyteranorum , qui ab Episcopis *Anglicana* Ecclesiæ se separantes , in illud novum regimen , novamque disciplinam impia vi rebellibusque armis introduxisset , ordinationes à *schismatis reatu excusari non posse* : ita moliter loqui amavit vir placidissimi ingenii : quas tamen prorsus irritas , inanes , invalidas , & nullas esse ex ipsius principiis , dicendum foret : nec quidem ipso invito & repugnante : cum in istiusmodi sacrilegis ordinationibus , formula , in Ordinali *Anglicano* penitus omissa , nulla potestas munus istud sacrum administrandi ordinatis in ipso impositionis manuum actu conceditur : quod ille idem esse *ac si quispiam chartæ nude & rasæ sigillum apposuerit* , dicere consuevit. Ille autem à prælaudato Ordinali , quod tanquam omnibus numeris absolutum maximi æstimavit , se nunquam abduci passus est.

Quid de
Liturgia
Ecclesiæ
Anglicanæ
sensit
Usserius
ostenditur.

Cùm sparsi rumores per ora multorum volitarent , quasi ille , declinata ætate , si non malè , saltem minus honorificè de Liturgia sensisset , atrocem istam criminationem indignabunda mente & ore repulit. *Usserius* , & epistola ad quendam nobilissimum virum transmissa , & isthoc convictio sese purgavit ; nec id fecisse contentus , ad famam apud posteros hac ex parte vindicandam , duobus circiter ante obitum mensibus , in pugillaribus , in quibus memorabilia , præsertim ad se spectantia , adnotare solitus erat , signatis J. A. literis scriptum reliquit , *se Liturgiam magno in pretio & honore semper habuisse* , inque convitium istud , ac si illam *Idolum* aliquando appellasset , tanquam impudentissimum ac mendacissimum , ab insita lenitate penè abreptus , severè animadvertit : quod praxi sua , postquam illius publicus usus in Ecclesiis Parlamento de-

decreto interdictus fuisset, abundè refutavit, utpotè in ædibus Dominae Petroburgensis, uti & alibi, sacris religionis officiis à Capellano quotidie perlectis, semper præsens.

Sed hisce omissis, proximo in loco de posthumis Usserii libris brevissimè edisserendum est, quos sequens indiculus exhibebit.

Chronologia sacra, seu annorum & παροικίας Patriarcharum παροικίας Israelitarum in Aegypto, annorum etiam Judicum, Regum Juda & Israelis ἀπὸ δαΐδ, Chronologica Oxonii 1660. Edidit V. CL. D. Thomas Barlovius, Collegii Reginensis in illa Academia Præpositus, & postea Episcopus

Usserii opera posthuma. Chronologia sacra.

Lincolniensis. Liber sanè quantivis pretii, & maximi ad intelligendam penitusque perscrutandam V. I. historiam usus, quem tanquam basin & firmamentum Annalium suorum, tum ut certior firmatiorque sacrae Historiæ in rebus gestis enarrandis, illic continua annorum serie dispositis collectisque, constet fides, tum ut quando inceperint celebriores sacrae Epochæ, è quibus subsequentiū temporum cognitio pendet, ritè, substratis demonstrationibus, singularumque ratione reddita, calculis accuratè subductis, statuatur, se editurum, si vitam Deus & vires dedisset, in præfatione ad secundam Annalium partem, pollicitus fuerat. Huic sacro operi maximè intentum ex inopinato mors occupavit, quod maximè dolendum est, antequam ad finem perduxisset: sed illius tamen maximam partem (ab initio enim liber ille mutilus est) in qua perplexas difficultates, dubiaque Problemata, quæ vel in hisce studiis versatissimorum ingenia hætenus torserint, admiranda sagacitate solvit & explicavit, tanquam pretiosissimas reliquias ex incendio aut naufragio ereptas, superesse & servari literatus orbis sibi gratulatur. Huic operi annectendum proposuit tractatum *de anno primitivo & veterum Hebraeorum Kalendario*, ni mors intercessisset. *Historia Dogmatica Controversiæ inter Orthodoxos & Pontificios, de Scripturis & sacris vernaculis. Accessere Eiusdem Dissertationes duæ, de Pseudo-Dionysii scriptis, & de Epistola ad Laodiceños.* Londini MDCXC.

Historia dogmatica de Scripturis & sacris vernaculis.

In ista Historia doctissimus Auctor, tam veterum *Ebraeorum* ante Christum incarnatum, quàm Patrum *Græcorum & Latinorum*, aliorumque Scriptorum cujusque seculi, usque ad A. MDXX. quo tempore lumen veritatis Evangelicæ spissis ignorantia superstitionisque tenebris in Ecclesiis Occidentalibus per multa secula obvolutæ, emergens, orbi Christiano illucescere & emicare inceperit, uti & Conciliorum testi-

monia,

monia, sententiis prolatis, aliasque probationes ex jure civili & Canonico ductas, item Imperatorum, Regum, *Romanorumque* Pontificum decreta fusè recenset: deinde de Scripturis in varias linguas in usum populi Christiani, tum ad ingenerandam fovendamque pietatem, tum ad illorum mentes clariori rerum divinarum, prout summè misericors Numen per Prophetas, Evangelistas, & Apostolos Spiritu sancto afflatus eas revelaverit, intelligentia illuminandum, conversis, multis variæ eruditionis argumentis subministratis, agit: insertis subinde persecutionibus, præsertim in *Anglia*, in quibus sequioribus seculis, istiusmodi versionibus, ne in vulgus spargerentur, obviam ire, illasque penitus suppressere, omnibus viribus, imò ingenti cum furore & sævitia, pessimis rationibus inducti, malefani homines annisi sunt: item, de origine erroris Pontificii, ampla narratione, ut de aliis cognati argumenti capitibus in præsens fileam.

Quod verò doctissimæ tres istæ Dissertationes luce publica donarentur, id pietati & curæ viri reverendissimi D. *Gulielmi Sandcrofti*, Archiepiscopi *Cantuariensis*, maximè debetur. Ille enim Autographum, inter innumeras ferè illustrium & eruditorum virorum schedas, quas maxima industria collectas, in Bibliotheca sua instructissima reponendas curavit, ab *Usserii* hæredibus, procurante reverendo viro D. *Parro*, nactus, sapienti ac pio benè de Ecclesia *Anglicana*, cui summa cum laude præfuit, & de religione Christiana merendi zelo incensus, & maximè sollicitus, ut istud in communem utilitatem ederetur, pensum verè sacrum & honorificum eruditissimo Viro D. *Henrico Whartono*, Sacellano suo, quo harum rerum nemo erat intelligentior, ut varia illius scripta testantur, sed non nisi summa cum lenitate, blandissimisque verbis imposuit. *Whartonus*, sive jussibus, sive precibus benignissimi Patroni promptissimo animo obsecutus, laboriosum istud Opus maxima cum laude tandem absolvit, schedas *Usserianas*, propria manu exscriptas, scrupuloso examine expendit, defectus & lacunas supplevit, loca luxata, nondumque probè digesta, restituit & redintegravit, & si quid minus elaboratum & accuratum inibi reperiendum esset (neque enim librum hunc posthumum repetitis curis eliminasset *Usserius*, in Annalibus digerendis, inque Chronologia sacra, cui immortalis est, elucidanda, per multos annos totus occupatus) ad incudem revocavit, & præclarissimo locupletavit Auctario. Suis partibus optimè defunctus,

eus, alium non potuit nec debuit quærere aut adsciscere Patronum, cujus nomini lucubrationes istæ, tot egregiis accessionibus adornatæ, inscriberentur, quàm τὸν πᾶν & μακαρίτην *Sandcroftum*.

A. MDCLVIII. *Bernardus* librū edidit sub hoc titulo : *Judicium Archiepiscopi Armachani, nuper defuncti : in quo continentur sequentes tractatuli :* Opuscula quædam

I. *De vera intentione seu proposito, & de extensione mortis Christi & satisfactionis in cruce factæ.* Theologica Anglicè edita.

Scripsit autem hunc, rogatu cujusdam Amici, ut ipse notavit, mense Martio A. MDCXVII. h. e. paulò ante Synodum *Dordrecht* habitam.

II. *Responsio ad quasdam exceptiones contra hunc tractatulum factas.* Quidam enim ex istiusmodi Adfessoribus, ex *Anglia* missis, exemplar, quod secum, illo planè incio, tulerat, aliis ibi communicavit, quorum aliqui, quibus moderata *Usserii*, mediâ viâ, ne alterutrinque devius, in præceptis feratur, incedentis, sententia, ac si Pontificiorum, Remonstrantium, & cujusdam Heterodoxi *Culverwelli*, errores stabilitum ivisset, non parum displicuit, in illam acriter animadverterunt. Hinc, justa sententiam propositam latius & clariùs explicandi occasione sumpta, illorum criminationes refellere innocentiamque suam tueri necesse habuit.

III. *Epistola ad D. Gulielmum Twissum de Sabbato, & diei Dominici observatione sive cultu : scripta circa A. MDCXL.*

IV. *Fragmentum Epistolæ ad D. Legum de Sabbato.*

V. *Fragmentum aliud Epistolæ ad quendam nobilem Virum, non longè post Historiam Sabbati a D. Heylino editam, scriptæ, in qua etiam ejusdem errores de Articulis Ecclesiæ Hibernicæ A. MDCXV. stabilitis admissos acerrimè vellicat impugnatque Usserius.* Sed cùm in hisce Epistolis multa exstent, quæ Puritanis Sabbatizantibus nimium favere D. Heylino, expresso nomine reprehensio, & jam palam in partes vocato viderentur, ille ira excandescens, & hac lite de Sabbato per multos annos sopita, jam reviviscente, hac nova provocatione irritatus, in sui defensionem, *Usserii* epistolam ad *Twissum*, varia eruditione refertam, amplo commentario refutare aggressus est.

VI. *Epistola ad D. Bernardum de Ministrorum in Reformatis Gallia & Hollandia*

landia Ecclesiæ ordinatione.

VII. *Episcopatus ad Synodici regiminis formam in veteri Ecclesia receptam Reductio.* A. MDCXLI. *proposita.*

Longè meliùs D. *Usserii* famæ consuluiſſet *Bernardus*, ſi ab hac *Sylloge*, uti & à ſequentē, edenda prorfus abſtinuiſſet. Nemo fanè illius ſacros cineres nuperrimè conditos tunc temporis temeraſſet: nemo illi acerbam de aberrationibus iſtis intentafſet litem. Sed cùm *Bernardus*, adjectis quoque Apologiis & ſententiæ *Uſſerianæ* de dogmatibus controverſis, de diſciplina Eccleſiaſtica, aliisque argumentis, ex proprio ingenio explicationibus, multa in favorem Presbyteranorum, quos nimis officioſè, ne dicam, turpiter palpare ſolebat, immiſcuerit, ipſius imprudenti zelo imputandum eſt, quod D. *Uſſerius* Episcopaliū Theologorum cenſuris & cavillis objiceretur.

A. MDCLIX. idem *Bernardus* aliū ſub eodem titulo librum edidit, continentem D. *Uſſerii* *judicium de Babylone* Apoc. XVIII, quam de hodierna Romana Eccleſia interpretatur, uti & D. *Bedellus*, Episcopus *Kilmorensis*, in concione annexa, in Eccleſia Chriſti *Dublinienſi* coram D. Deputato & Parlamento *Hiberniæ* A. MDCXXXIV. habita: & de *beſtia Apocalyptica*: Capp. XVII. & XVIII. Hæc brevia fragmenta parum digeſta videntur, nec digna, quæ ſub illius nomine in publicam exirent lucem, quod verſutia Bibliopolæ factum videtur, ut liber magnifico titulo, tanquam *τηλαυγεί προσώπω* munitus ornatusque plures alliceret emptores.

Quæ ſequuntur, viz. de *impoſitione manuum*, de *formæ verborum in Presbyterorum ordinatione ſenſu & uſu*, & de *preſtitutæ precum formula uſu*, *Bernardum* habent Auctorem; in quibus ſe *Uſſerii* *judicium* & ſententiam fuſiùs explicare & firmare neſcio quam verè affirmat. Sed viderint alii. Non autem tam imbelli in hiſce Articulis, qualis erat, *Bernardus*, defenſore egebat Eccleſia *Anglicana*.

De po-
teſtate
Regum
& obe-
dientia
ſubdito-
rum li-
ber.

A. MDCLXI. prodiit D. *Uſſerii* de *potestate Regum*, & *obedientia ſubditorum* liber, auguſtiſſimo Regi, *Carolo II.* à Nepote dedicatus, & doctiſſima plurimùm reverendi & ob penitiſſimam & exploratiſſimam Caſuiſtica Theologiæ cognitionem, & ob merita laboresque Eccleſiæ *Anglicanæ* contra ſchiſmaticorum inſultationes tuendæ per univerſam vitam impenſos, nunquam ſatis laudandi viri, D. *Roberti Sanderſoni*, Episcopi

pi *Lincolniensis*, præfatione, in qua, postquam illius, utpotè ex originali autographo descripti, *εὐθερίας* ostendisset, Democraticorum, qui omnigenæ potestatis originem à populo pendere insulsè contendunt, principia, solidissimis, quibus nihil ritè opponi possit, argumentis convellit, munitus.

Partus sanè *Usseriano* ingenio, pietate, & solertiâ perquam dignus, & qui parentem probè refert. Ansam scribendi dedere *Scotorum*, qui impio fœdere sociati sub reformandæ Ecclesiæ & libertatis vindicandæ specie & prætextu adversus Regem *Carolus* I. arma sumpserant, motus: de quibus *Usserius*, ut sententiam judiciumque suum è sacris rostris proferre vellet, ab illustrissimo Comite *Straffordia*, Prorege, si quis unquam, meritissimo, rogatus, duas conciones apud augustum Proregis Regionumque Consiliariorum confessum in Ecclesia Christi *Dubliniensi* in verba hæc *Ecclesiastis* cap. VIII. 2. *Præstitutum meum, præstitutum Regis observa; sed pro ratione juramenti Dei*, non sine summa Auditorum approbatione & applausu habuit. Porro iterùm rogatus ut aut conciones istas in publicam lucem edere, aut saltem librum de eodem argumento, h. e. *à quo auctoritatem suam derivent legitimi Reges, & quomodo Regibus subditos obedire oporteat*, majori apparatu & ampliori rerum enarratione è sacris scripturis, è veteris ævi Christianorum exemplis & praxi, è Patrum testimoniis, è sanioris Philosophiæ, juxta rectæ Rationis dictamina, placitis, & ex Ethnicorum Scriptorum consensu, quam temporum angustia paterentur, instructum evulgare vellet, posterius, re benè pensitata, malebat. Hisce consiliis facilè inductus, ad præsens opus scribendum se accinxit, tandemque absolvit, rem hoc pacto, tum serenissimo Regi gratam, tum suis civibus, ne illorum animi Demagogorum, rebus novis studentium technis irretiti, à fide erga Regem præstanda abalienarentur, maximè utilem factururus. Postquam autem in *Angliam* venisset, librum istum, eleganter & accuratè exscriptum, Epistola dedicatoria præfixa, Regi, qui illius usu & lectione delectabatur, curavit exhibendum. Exemplar verò *Londinum*, ab *Usserio*, ut typis ibi mandaretur, prout Rex jusserat, transmissum, sive ex negligentia, sive ex perfidia illius, cui sacrum istud depositum fuerit concreditum, non amplius comparuit, ex oculis omnium sublatum. Archetypum verò, ad jacturam istam refarciendam inter sarcinas ingentemque librariæ suppellectilis struem investigavit: sed omninò frustra, veritus, istud quoque in crebris istis migrationibus, quas obibat, deperditum fuisse. Doluit verò

& ingemuit, tot tantosque labores & vigilias in isto elaborando impenso perisse. Sed dum, post animam ejus in coelos receptam, cistas, schedas, codices manuscriptos, fasciculosque literarum diligenti admodum & curioso examine explorant hæredes, ut quicquid ad D. *Usserium* pertinebat, in inventarium, si ita loqui liceat, referretur, archetypum istud ex tenebris post tot annos sepultum, emicabat: de quo, tanquam de thesauro, ex crypta effosso, omnes, qui illius pretium usumque noverint, sibi invicem gratulati sunt.

Duo denique schediola, quæ sanè absque piaculo prætermitti non possunt neque debent, utpote planè aurea & magni usus, à D. *Parro* edita quorum alterum pias eruditasque admonitiones & consilia ad juvenes Theologos sacris Ordinibus initiatos, alterum responsiones ad varia quæsitæ, an quovis prætextu arma contra Regem sumere liceat, & ejusmodi, tempore flagrantis rebellionis Parliamentariæ scriptas, complectitur.

Concio-
nes.

Post mortem, *Londini* semel, iterumque editæ erant viginti Concionæ, quas *Usserius Oxonii*, dum illic studiorum causa degeret, A. MDCXL. habuit, à quodam Academico ab ore notis tachygraphicis exceptæ: inelaboratæ quidem, & omni quæsito orationis fuce & artificiali compositione nudæ & vacuæ: in quibus tamen perspicuitas cum pietate certat. Non enim elegantiam sermonis, non Rhetoricæ colores, non minimam quidem eruditionis speciem in concionibus ad populum habitis affectavit ostentavitque; neutiquam sibi indulgens placensve; in subtilibus perplexisque Theologiæ speculativæ articulis excutiendis, aut in sententiis S. S. Patrum aliorumque minorum gentium citandis, orationis cursu absque omni linguarum Græcæ & Latinæ admixtione, ne Auditorum mentes, obstaculis hisce impeditæ, labascerent, continuato. Si quod sacrum argumentum tractandum esset, selecto *Textu*, uti appellamus, congruo, de quo erat dicendum, sola futuræ concionis præcipua capita, quasi compendiarium illius summam, perquam seria meditatione præmissa, chartæ illevis, explicationibus, quas tenax memoria, sagax judicium, facilitasque & copia fandi, ex sacris scripturis communibusque Theologiæ locis, utrisque ipsi maximè familiaribus, pro re nata suppeditaverint, inter scribendum omisissis. Cujus methodi ope & subsidio, assiduum istud munus concionatorium, parum intermissis reconditoris literaturæ studiis, facilè quidem & absque tædio & anxietate sustinuit: ad quod obeundum nunquam si ali-

aliquot horarum daretur interstitium, accessit imparatus. Si quod spiritua-
lis commodi, quod aliquomodo animarum saluti conducere posset,
Auditor perceperint, si qui inter præsentes illius documentis monitifi-
que, concitato affectu raptim effusis, meliores sanctioresque redde-
rentur, hoc sanè magno solatio fuit; nec quicquam mentem, dum
in vitæ mortisque confiniis steterit, ad cœlites avolaturam, cumula-
tiori voluptate perfudit. Sed cùm ab ejusmodi concionibus edendis
semper animum habuerit *Usserius* averfissimum, ab avaris istis man-
gonibus, qui lucro intenti, ex mala Notariorum, multa pro libitu
aut interpolantium, aut omittentium fide pendentes, illas contra
mentem Auctoris in publicam lucem protruserint, magnam injuriam
Usseriano nomini & famæ illatam fuisse declaramus, & cum justa in-
dignatione querimur.

Quod pari jure censendum est de libro, qui *Corpus Theologiæ, sive Corpus
Summa & Substantia Christianæ Religionis*, inscribitur, quem pro suo, ^{Theolo-}
quo tempore *R. V. D. Barlovio*, à quo ante triginta annos id accepi, ^{giæ.}
exemplar dono dederit, non agnovit. Sed non opus est, ut alios testes
ad fidem faciendam huc advocem: ipsum *Usserium* in epistola ad *D.
Joannem Downamum* editorem, Maio mense A. MDCXLV. scripta,
id asserentem habemus, quædam nimirum, quæ, adhuc juvenis nondum-
que studiis Theologicis imbutus, in *Adversariis* congeffisset, illic repe-
riri, eandemque methodum, quam olim inibat, servari, multa autem a-
lia ex *Cartwrighti & Crockii Catechismis*, aliorumque nostratium Theo-
logorum institutionibus, ad verbum desumpta; multa quoque ipsius menti
& judicio prorsus contraria & dissona, & quæ sanam doctrinam haud
sapiunt, quasi per saturam inserta fuisse, de cujus editione, illo in *Wal-*
lia tum commorante, procurata, cùm primum audivisset, non parum
angebatur.

Cùm verò non multò post *brevis Catechismus de principiis Christianæ re-* ^{Brevis}
ligionis, majoris operis tumultuariò congeffi summa & epitome, in suo- ^{Catechis-}
rum, aliorumque neophytorum, gratiam & usum, in studiorum Theo- ^{mus.}
logicorum tyrociniis conscriptus, & mox in *Hibernicam* linguam versus,
ex surreptitio apographo, multisque in locis deformato, sub ipsius no-
mine editus fuerit, sua interesse duxit, ut interpolationibus expunctis de-
letisque, in commune bonum pristinæ integritati restitueretur, cui, in
iterata editione, distinctionis causa, ne incautis emptoribus deinceps frau-
di fieret, præfationem, subscripto nomine, A. MDCLIV. præfigendam
curavit.

Alii libri
ab Usserio
elabora-
ti sed i-
nediti.

Delitescunt adhuc in privatorum manibus sequentes libri, quos à D. Usserio florentibus annis compositos fuisse mihi certò constat.

I. *De Corbis, Herenachis, & Termon-lands*, de quo vide, quæ supra memoravi, qui non ita pridem erat penes reverendissimum D. *Gulielmum Sandcroftum*, Archiepiscopum *Cantuariensem*, quo nemo istiusmodi cimeliis justum pretium statuere meliùs norat. Collectanea autem in Adversariis raptim & festinante calamo ingesta, ex quibus, tanquam ex rudi indigestaque materia, pulchrum hoc surrexit opusculum, artificii manu concinnatum, in Bibliothecæ *Dubliniensis* archivis hodiè profant.

2. *De primis fidei Christianæ in Hibernia propagatoribus*, h. e. de S. *Palladio*, S. *Patricio*, ejusque in Sede *Armachana* successoribus, quem, ut ipse in epistola ad V. Cl. (a) *Gulielmum Camdenum*, A. MDCXVIII. data, refert, rogatu D. *Hamptoni*, Archiepiscopi *Armachani*, scripsit. Sed de hoc opusculo non adeo sollicitè laborandum videbitur; cum quicquid inibi exstat, procul omni dubio in amplissimo de *Ecclesiarum Britannicarum primordiis* opere longè majori apparatu & accuratiori examine reperiendum sit.

3. *De jure primitialis dignitatis, sedi Armachanæ à S. Patricii temporibus annexæ*, quem ex lite de præcedentia inter illum & Archiepiscopum *Dubliniensem* orta, animo prorsus invito A. MDCXXXV. composuit. Variæ schedæ de hoc argumento, ex Ecclesiarum registris regnique tabulariis propria ipsius manu conscriptæ, è quibus multa de Ecclesiasticis *Hiberniæ* antiquitatibus, in isto libello omissa, & prorsus à quoquam intacta, erui possint, in iisdem archivis *Dubliniensibus* etiamnum supersunt.

Memini me ejusdem brevem *Joannis Harrisoni*, ultimum mundi excidium A. MDCXXX. fore, scripto, prout fanatici Euthusiastæ solent, mira quadam audacia asserentis, *Elenchum* olim vidisse: in quo non solum hujus deliri calculatoris ineptiæ, ridiculis absurdisque hypothesibus fundatæ, èque perversa annorum ab orbe condito è scripturis sacris dispositione, & pessima & insulsissima interpretatione loci *Apocalyplici* cap. XIV. 20. de mille sexcentis stadiis, (juxta illum pro periodo durationis mundi habendis, quæ pro toti-

(a) *Camd.* Epist. CLXXXVIII. p. 233. & in Epist. *Usser.* Sylloge Ep. XXXIII. pag. 64.

tidem annis, à baptismo S. Joannis, cùm Christus quasi triginta annorum esse incepisset, inchoandis, & superioris seculi tricesimo anno terminandis sumit) exsculptæ; sed etiam crassi Matthæi Beroaldi, in *Chronico*, quod S. Scripturæ auctoritate se constituisse somniavit, errores solidis demonstrationibus refelluntur.

Multa alia, & magna quidem, animo agitabat D. Usserius, vir Elenchus
aliorum
operum,
quæ ag-
gressus
est Uss-
erius. omni literarum genere excultissimus, & sublimi ingenio, ad omnia apto & composito, pollens: cujus igneo vigori, vires corporis, si non profligatæ, saltem assiduis laboribus imminutæ, haud responderunt, & apud se seriò constituebat, præter (a) *Institutionum Chronologicarum* libros tres, in publicam lucem edere.

1. Canonem regnorum *Ptolemei*, ab ipso è codice MS. in Museo *Saviliano Oxonii* exscriptum, variis notis Historicis & Chronologicis illustrandum, nudè quidem à V. Cl. Joanne Bainbridgio, Saviliano in ista Academia Astronomiæ Professore, ad calcem *Procli de Sphæra, & de hypothesebus Planetarum* Londini MDCXX. editum.

2. Commentariolum de annis magnis Romanorum, in quo de lustris, agonibus Capitolinis, indictionibus, seculis, & ludis eorum secularibus differitur.

3. *Observationes in fastos Magistratuum & triumphorum Romanorum*, ab urbe condita usque ad excessum *Cæsaris Augusti*, ex fragmentis marmoreis è foro Romano effossis, & à doctissimis nostri temporis *Chronographis* suppletis.

4. *Mariani Scoti Chronicon*: Exemplar autem suum ex codice *Cottoniano* transumptum, & illius deflorationem seu Epitomen *Roberti Lotharingi*, Episcopi *Herefordensis*, cum alio apparatu ad (b) V. Cl. *Gerardum Joannem Vossium*, ejusdem Chronici editionem eodem tempore molientem, literis interpellatus, admodum generoso & benevolo affectu transmisit.

5. *Novum Testamentum Græcè* (c) cum Scholiis variisque lectionibus, è multis MSS. codicibus, & præsertim codice *Alexandrino* in Bibliotheca Regia, accuratè collectis, quas postea (d) viro

Q 3

præ-

(a) Vide Epist. Uss. ad S. Wardum anno 1630. scriptam, Ep. CLIX. p. 435.

(b) Ibid. p. 435. & epist. 193. ad Vossium A. 1632. scriptam p. 483. vide etiam de *Mariano Scoto* D. *Langbainii* Epist. ad Uss. 225. p. 523.

(c) V. Epist. 235. p. 535.

(d) V. Epist. 246. p. 543.

præstantissimo & eruditissimo, D. *Henrico Hammondo*, tum *Paraphrasin* & amplos in N. T. commentarios, adornanti, uti etiam postea (a) D. *Briano Waltono* benignè communicavit.

(b) 6. Libri *Jobi* Latinam versionem S. *Hieronymi*, ex Græca *Origenis* editione factam, obeliscis & asteriscis distinctam.

7. Veteres *Epistolas Paschales*, ut ex sequenti titulo, olim è schedis autographis à me exscripto, liquebit :

Paschasii Lilybetani, Proterii Alexandrini, Dionysii Exigui, & Bonifacii, primicerii Notariorum, Paschales Epistolæ, quibus computi Ecclesiastici, ex præscripto Concilii Nicæni, à Patriarchis Alexandrinis promulgati, & in universo orbe Christiano ante Gregorianam reformationem fontes aperiantur, ex vetustissimis MSS. codicibus in lucem editæ, & notis illustratæ à J. U. D.

Hiscæ *Epistolis quinque cyclos Dionysianos, cum quinque aliis sequentibus A. DCXVII. à Continuatore quodam Dionysii adjectis, & argumenta titulorum Paschalium, Egyptiorum investigata solertia, addere proposuit. Epistolam istam Dionysii Exigui cum duobus aliis MSS. codicibus, quorum alter in Bibliotheca Bodleiana, alter olim ad Monasterium Whitbeienfense pertinens, in museo doctissimi viri D. Thomæ Alleni, exstat, variis lectionibus margini appositis, summa accuratione contulit: quod de cæteris quoque dicendum est.*

8. *Epistolas Alcuini, sive Albini, Magistri, uti appellatur, Caroli magni Imperatoris, hætenus ineditas, quas ex variis codicibus MSS. in Bibliotheca Cottoniana repositis, exscribi curavit.*

9. *Epistolas Lanfranci, Archiepiscopi Cantuariensis, ad diversos missas, quas etiam è codicibus Cottonianis accuratè collegit.*

10. *Anastasi Bibliothecarii librum de vitis Romanorum Pontificum, olim, viz. MDCII. Moguntia excusum, cum additionibus & emendationibus.*

Collectanea,

Præter hæc ingentem quoque, imò & planè obstupescendam Collectanea-

(a) In præfatione ad *Biblia Polyglotta. Quod ad textum Græcum N. Testamenti attinet collegerat etiam reverendissimus Ufferius ex aliis libris XVI. MSS. antiquissimis, ex Academiis utrisque & alibi conquisitis, loca variantia, quæ nobis benignè communicavit.*

(b) V. D. *Uffer. Epist. ad Capell. p. 206.*

taneorum, partim propria ipsius manu, partim Amanuensium, quos in ædibus suis aut alibi lauto stipendio aluit retinuitque diligentiam exscriptorum, ex quibus duo grandia volumina, præsertim de rebus Chronologicis, jam in archivis Bibliothecæ Jurisperitorum Hospitii *Lincolniensis* servata exscribi curavit D. *Matthæus Hale* supra memoratus, molem reliquit *Usserius*, quorum pars magna, quam olim celeri manu versavi, penes hæredes manet, reliquæ in Bibliothecarum tum *Oxonien*sis tum *Dublinien*sis archivis reponuntur.

Jam per superioris seculi dimidium, ex quo nomen ipsius inclarescere cœpisset, arctam cum plurimis viris, dignitate & eruditione insignissimis, amicitiam habuit, sanctèque, præstitis omnibus officiis, coluit: quales erant, præter illos, quos in hoc commentariolo vitæ & studiorum ejus passim pro re nata memoravi, *Thomas Morton*, Episcopus *Dunelmensis*, *Joannes Prideauxius*, Episcopus *Wigornien*sis, D. *Henricus Spelman*, cujus præclarum de *Conciliis Britannicis* opus, antequam ederetur Auctoris rogatu ad accuratum examen revocaverat, multisque paralipomenis suppleverat, *Joannes Bainbridgius*; ad quem inter alia, exemplar Synodi à S. *Patricio* olim indictæ & postea à D. *Jacobo Waræo* publicatam misit: *Joannes Bainbridgius*, Astronomiæ in Academia *Oxonien*si Professor *Savilianus*, *Joannes Gravius*, ejusdem in cathedra Astronomica Successor, *Thomas Jamesius*, *Gulielmus Gilbertus*, *Abrahamus Wheloc* & *Arnoldus Boot* inter nostrates: inter verò exteros *Gerardus Joannes Vossius*, hîc iterum nominandus, quem juxta secum in *Hibernia* habere voluit, & Ecclesiæ *Armaehane* decanatu donandum, licet irritò conatu, maximè cupiebat: *Christophorus Justellus*, *Isaacus Vossius*, τὸ πατρὸς το παιδίου, *Claudius Sarravius*, *David Blondellus*, *Fredericus Spanhemius*, *Jacobus Goar*, aliique, quibuscum commercium verè literarium & eruditum instituit, ut abundè ex ingenti Epistolarum Sylloge, *Londini* MDCLXXXVI. publici juris facta, constat. Diffiteri non oportet, multas ex iis deperditas, multas ab Editore pro prudentia sua subductas & suppressas fuisse: nihilo secius thesaurum doctrinæ multi generis, magni æstimandum, jure appellaverim: in quo variæ rerum curiosarum in Theologia, Historia, & Chronologia notitiæ & documenta occurrunt. Ex his Lector *Usserii* tam in suis quæsitis, quàm in responsis, ingenium, solertiam, judicium, sapientiam, & promptissimam aliorum, quos hîc nominare omnino superfluum videbitur, studia ad-

Amici
familia-
res.

Epistola-
rum Syl-
loge.

ju-

juvandi & promovendi, consilio, commendatione apud Magnates & Præsules, liberalibus largitionibus, codicibusque MSS. commodatis, voluntatem magis magisque mirabitur. Sed in hisce communibus elogiis, quæ tamen magno in pretio haberi debent, referendis longiorem moram facere tædio foret.

Usserii
Biblio-
theca in-
structis-
sima.

Pauca de Bibliotheca illius, non sine magna industria sumptibusque magnis per quinquaginta annos & ultra collecta, restant dicenda, quæ uti à suscepti operis ratione neutiquam aliena & dissona, ita ingenuo, & candido Lectori non ingrata, uti spero, censebuntur.

Olim, dum florente Ecclesia, res domesticæ integræ starent, *Usserius* selectissimam hanc Bibliothecam, è decem millibus libris, tam impressis, quàm (a) manu exaratis, conflata, Collegio *Dublinensi*, in quo educatus fuerat, in perpetuum observantiæ & grati animi testimonium & monimentum, post mortem dono dare apud se constituerat: sed mutatis temporibus, novaque rerum facie ubique per universas *Britannias* inducta, de filia, cujus virtus, pulcherrima forma, ingenium, modestia, reliquaque muliebris sexûs decora, quando nupserrat, amplissimæ dotis vicem supplebant, ejusque numerosa prole, aliquo modo providendum esse jussit potentior paternæ curæ & pietatis ratio. Dum enim post exortam *Hibernorum* execrandam rebellionem & lanienam, omnibus redditibus, fundis, fortunisque exspoliatus, angustiis rei familiaris opprimeretur, vix aliud quicquam, quo erat donanda, illi suppetebat. Omnes verò, quibus harum rerum erant aliquis usus, cura amorque, ne in multorum manibus distraheretur, in publicos literarum, & literatorum usus alicubi integram servari cupiebant: quam ex certa fide constat, tum serenissimum Regem *Daniæ*, tum Cardinalem *Mazarinum*, singulos nimirum in suum peculium, redimere voluisse. Sed intercessit *Cromwellus*. Quis autem crederet hominem, enthufiasmi furoribus subindè correptum, & humanioris literaturæ osorem, cavisse, ne thesaurus iste extra *Angliam*, non sine summa injuria genti inurenda, exportaretur? Interim commodum accidebat, ut Ductores copiarum, quæ duce *Cromwello Hiberniam* expugnauerant, perquam laudabili æmulatione incitati, pecuniis ad bis mille & ducentas libras sterlingicas excrescentibus, tum ex suis, tum ex gregariorum in exercitu

(a) Vide Catalogum librorum MSS. apud Dublinium qui præter alia, Viri optimi & fama sempiterna, Jacobi Usserii, totius Hiberniæ illustrissimi Primatis, Bibliothecam selectam explicat: in magno opere Catalogorum Oxon. 1697. in voluminis secundi parte altera pag. 16.

citu militum stipendiis simul collectis, ut in Bibliotheca *Dubliniensi* primum condenda factum fuerat, de libris *Usserianis*, ut nobilis eidem Bibliothecæ fieret accessio, redimendis convenerunt. Sed postquam in *Hiberniam* advecti fuissent, rejecto isthoc proposito, ne tali admixtione quippiam exinde gloriæ, quam captabant, decederet, de novis conclavibus alibi exstruendis, in quibus ad majorem munificentiae ostentationem seorsim reconderentur, deliberarunt. Nondum constituta ista re, in quasdam arcis *Dublinensis* cameras, quibus propemodum incustoditis, nimium facilis patebat aditus, detruduntur; malorum hominum, qui multos, uti fertur, tam excusos, quam manuscriptos optimæ notæ, codices clam surripuerant, fraudibus obnoxii. Post instauratam Monarchiam, viz. anno MDCLXI. quo tempore excellentissimus & illustrissimus Princeps, *Jacobus*, Dux *Ormondiae*, summa prudentia & fortitudine *Hiberniam* gubernabat, serenissimus Rex *Carolus II.* ad quem omne illud jus devolutum erat, Prorege & Ordinibus regni petentibus, communi Bibliothecæ, quotquot supererant, inferri pro benignitate sua jussit.

In Basilica *Westmonasteriensi*, quod mortale erat *D. Usserii*, reconditum jacere supradixi, sed ibi inter tot Regum Magnatumque Mausolea, tumulum illius, utpote nullis notis insignitum, quispiam curiosus frustra quæret, quem hæredes, sive quia ille vetuit, sive potius ad declinandam invidiam, in istis calamitosis temporibus condidisse neglexerunt. Sed isthoc adscititio, licet maximè debito, honore non eget ille, qui monimentum, omnibus sepulchralibus titulis gloriosius, & quovis marmore & ære perennius, scriptis immortalibus sibi vivus posuerat, quorum perpetua utilitate & beneficio fama per omnium seculorum memoriam usque ad ultimam perituri mundi ætatem propagabitur. Quantis verò elogiis præconiisque condecorari meruerit, vir præstantissimus, *Joannes Gravius*, quicum illi magnus amicitiae usus & necessitudo intercesserat, pro summo erga illum affectu, ingenti reverentia, & justissima illius virtutum & consummatissimæ eruditionis admiratione (a) olim hac sequenti epigraphe, digna, quæ tabellæ deauratæ, ad murum Sacelli, juxta quem situs est. appendendæ, inscribatur, posteris testatum voluit.

R

M. S.

(a) A. MDCXLV.

M. S.

JACOBUS USSERIUS,

Archiepiscopus Armachanus,

Hic situs est.

Ob

Rerum eruditionem,

Ingenii acumen,

Dicendi & scribendi facilitatem,

Morum gravitatem suavitate conditam,

Vitæ candorem & integritatem,

Æquabilem in utraque fortuna animi constantiam,

Orbi Christiano & piis omnibus charus ;

Omniumque judicio , præterquam suo ,

Præsul verè magnus :

Qui Ecclesiam veterem institutis,

Clerum suo exemplo,

Populum concionibus ,

Assiduè instruxit :

Qui scripturas Veteris ac Novi Fœderis

Commentariis ex ultima

Et recondita antiquitate illustravit ,

Chronologiam sacram pristino nitori restituit,

Bo-

Bonarum artium Professores, inopia afflictos,
Munificentia sublevavit.

Denique qui hæreses repullulantes calamo erudito
contudit.

His ingenii dotibus, his animi virtutibus ornatus,
Antistes optimus, piissimus, meritissimus,
Inter bella civilia, & patriæ suæ & Ecclesiæ funesta,
Sibique luctuosa,
Cum nec Patriæ nec Ecclesiæ diutius prodesse poterat,
In Christo pacis auctore placidè obdormivit.

Anno Christi . . .

XXI. Martii MDCLV.

Ætatis suæ . . .

LXXVI.

E L O G I A

E T

T E S T I M O N I A

illustrium & Doctissimorum Virorum

DE D. JACOBO USSERIO,

Archiepiscopo Armachano.

JOANNES BRAMHALLUS, Archiepiscopus *Armachanus* in fine Dissertationis de Sabbato & die Dominico, illum appellat *eruditum suumque reverendissimum Metropolitanum*, sub cujus pio & moderato regimine per aliquot annos Episcopus in provincia Ultoniæ vixit: pag. 934. & denique in extrema conclusione, addit *that he was an honour to his native country, an ornament to the Reformed Church, a conscionable Preacher, and an exemplary pattern of piety.* pag. 938. in editione operum illius, *Dublinii. MDCLXXVII.*

BRIANUS WALTONUS, Episcopus *Cestriensis*, in præfatione ad Biblia Polyglotta, *Londini.* Inter quos primas meritò tenet Primas ille *reverendissimus Hiberniæ, Jacobus Usserius Armachanus, ὁ πρωταρχὴς*, cui inter alias virtutes, hæc propria laus erat, nil proprium habere, sed ex effusâ bonitate omnia in Reip. literariæ bonum communicare, qui ex instructissima sua Bibliotheca libros plurimos MSS. & impressos variorum idiomatum nobis libenter commodavit, consiliumque suum, quando ipsum convenirem, impertivit: quo in multis me adjutum profiteor: haud iniquè tamen tulit, quo erat animi candore, si in quibusdam dissensum liberè profiterer.

JOANNES PEARSONUS, Episcopus *Cestriensis*, in epistola dedicatoria ad Gilbertum Archiepiscopum *Cantuariensem Vindiciis Ignatianis* præfixa, *Cantabrigiæ 1672.*

Quid felicissimos eruditissimi Primatis Armachani conatus, quid conspi-

spirantem originalis Græci codicis à doctissimo Vossio peropportune procuratam editionem, quid Hammondi viri optimi consummatissimique Theologi, lucubrationes commemorem?

In proœmio :

Jacobus Usserius, *Archiepiscopus Armachanus Hiberniæ Primas, Vir mira in his rebus perspicaciæ fideique.*

JOHANNES DAVENANTIUS, Episcopus *Sarisburiensis*, in adhortatione ad fraternam communionem inter Evangelicas Ecclesias restaurandam *Cantabrigiæ* 1640. pag. 84.

Rectè observavit reverendissimus Archiepiscopus Armachanus, Vir singularis pietatis & omnigenæ eruditionis laude cumulatus. Quod si quis &c. in concione coram Rege pag. 28.

JOHANNES PRIDEAUXIUS, Episcopus *Wigorniensis*, in *Lectio- ne XIII. quæ est de mille annis Apocalypticis* pag. 209. *Oxonii* 1648.

Infinita hîc congeri possent ad hoc firmandum testimonium, sed ista non capit mei instituti compendium : peti possunt à locupletissimo solidæ eruditionis & totius Antiquitatis gazophylacio, Archiepiscopo Armachano, de Christianarum Ecclesiarum successione & statu : cap. 3. 4. 5. 6.

JOSEPHUS HALLUS, Episcopus *Norwicensis*, in epist. ad D. Usserium Maio 1647. in *Sylloge* pag. 516.

Gratulor vero ex animo, te, Antistitum decus, S. Ignatio tuo : gratulor tibi, imo universo orbi Christiano, Ignatium, meritissimò tuum, sed quidem & tuo beneficio nostrum. Gratiorem profectò operam navare Dei Ecclesiæ nullus unquam potuisset, quàm tantum, tam antiquum pietatis exemplar ab injuria temporis vindicando.

In epistola ad eundem Julio 1650. p. 554.

Accepi à te pridem, honorandissime Præsul, munus egregium, teque uno dignum, Annales sacros veteris Testamenti accuratissimè digestos.

D. JOANNES FELLUS, Episcopus *Oxonien- sis*, in præfatione ad epistolam S. Barnabæ : *Oxonii* 1685.

Hæc postquam per plurima secula in Bibliothecarum pluteis delituisse, reverendissimi Usserii Armachani Primatis studio & auspiciis prelo hoc in loco subjiciebatur anno 1643.

Deinde ——— quæ de opere ipso dicenda supersunt, ut viri magni memoriæ li- tem, verba illustrissimi Primatis prædicti, quæ flammæ evaserant, exhibe- bo. ——— Quid autem eruditissimus Hiberniæ, juxta & melioris litera- turæ Primas de Epistola hujus auctore senserit, quanquam non ex dictis liqui-

dò appareat; indicia tamen sunt satis clara, quæ fidem faciant, propendisse eum in hanc sententiam, ut crederet, opus hoc Scriptori ignoto deberi.

HENRICUS HAMMONDUS in epistola ante Dissertationes quatuor de juribus Episcopatus Londini 1651. editas.

Alii interim, nec pauci nec contemnendi Theologi ad tutandam Episcoporum πρεσβυτεριαν operas & Symbolas suas contulerunt, singuli singulis & justis voluminibus rem integram exorsi: quibus ut fas erat, reverendissimus Archiepiscopus Armachanus, Hiberniæ Primas, suis de origine Episcoporum & Metropolitanorum, & de Asia Proconsulari eruditissimis Diatribis, facem prætulit.

In Dissertatione secunda de S. Ignatio cap. 2. pag. 57.

Taceo lubens, quid in hac re reverendissimus Primas Armachanus præstiterit, & quàm feliciter ille (nec sine peculiari Dei providentia sic disponente) Latinam, licet barbaram, versionem, Vossiano Græco exemplari per omnia respondentem, eodem ferè tempore (ipsoque sanguinari seculi, Episcopis adeo infensi, articulo) ex vetustissimis Angliæ codicibus erutam Oxoniæ lucem videre jusserit.

ABRAHAMUS WHELOCUS in epist. dedicatoria, Bedæ Historiæ Ecclesiasticæ Gentis Anglorum præfixa, Cantabrigiæ 1644.

Ea (historiæ Ecclesiasticæ Britanno-Saxonum professio) mihi destinata à viro nobili, nunc non sine detrimento literarum hac in terris vita defuncto, antiquissimæ, dum vixerat, literaturæ & fidei, D. Henrico Spelmanno, & (quod me aliàs huic oneri planè imparem plurimum confirmavit) sub auspiciis reverendissimi Armachani, totius Hiberniæ Primatis, qui Londino huc ad majora Comitia Cantabrigiam 1640. veniens, voluntatem pii & inclyti Senis ——— explicuit, mihiq; ipse Prasul amplissimus Saxonica Evangelia Auditoribus, ex idiomate Saxonum antiquo aperienda tunc quidem proposuit.

In epist. ad Lectorem.

Historicum opus commentationes historicas desiderat has, si reverendissimi Armachani Britannicarum Ecclesiarum primordia, (quibus quid addere conari, esset Iliadas, post Homerum scribere) ad manus habeas, ex illis pete.

Idem in præfat. in Evangelia Persica cap. vi. S. Matthæi ver. 13. Londini 1652. qui operi immortuus sola priora XVIII. capita excuderat.

Quin & cum patriam Gothicam Persæ ex parte pro sua agnoscant, clausulam hanc è Gothicis à Cl. Grutero, ut vir summus in Ecclesia, reverendissimus Armachanus, Jacobus Usserius, mihi indicavit, erutam, à grege Christi sub Ulphila Episcopo circa annum Christi plus minus CCC. recitari solitam, hîc describere non supervacaneum duxi.

Gu-

GULIELMUS CAVEUS in Scriptorum Ecclesiasticorum Historia literaria : in S. Chrysostomo. Lond. 1688. pag. 269. Præter ea , quæ ad scripta Chrysostomi enucleanda hæcenus observavimus , cum plurima incredibili planè diligentia undique collegerit notaveritque ὁ πᾶν Usserius in Bibliotheca Theologica MS. placet in Lectoris gratiam pauca inde seligere , & in certa capita distribuere.

HENRICUS WHARTONUS in præfat. ad Jacobi Usserii Historiam dogmaticam controversiæ inter Orthodoxos & Pontificios de scripturis & sacris vernaculis Londini 1690. Norunt quotquot literas meliores colunt ; norunt & semidocti , quanta fuerit Usserii , & quàm diffusa eruditio , quàm infinita lectio , quanta judicii gravitas. Inter tot certè literaturæ instauratores & orthodoxæ religionis pugiles , quos sæculo postremo tulit orbis Britannicus , illum præ aliis habemus , quem nobismet ipsis gratulemur , & in re literaria ducem statuamus.

DRAXUS apud Eyrum in epist. ad Usserium in Sylloge , epist. XXVIII. pag. 59.

Lumen illud Irlandiæ & in Academia Dubliniensi Professor Regius , Theologus tam πανοπλωμένος , ut sive scripta sive disputationem requiras idoneus est , qui cum tota Papistarum natione concertet.

D. JOANNES MARSHAMUS in προφυλαίῳ ad Monasticon Anglicanum. Londini. Anno 1655. & recusum Anno 1682.

Sed quid ego spicilegium post uberrimam messem ? De Britannicarum Ecclesiarum primordiis usque ad Augustini missionem , non ita pridem , summa cum laude , scripsit Jacobus Usserius , Archiepiscopus Armachanus , vir ob eruditionis immensitatem , morumque sanctitatem toti orbi venerandissimus , ob benevolentiam mihi colendissimus.

JOANNES SELDENUS in Prolegomenis ad Marmorum Arundellianorum Inscriptiones. Londini 1628.

Codicem , qui hæc nobis suppeditavit , Samaritanum , magnis impensis ante quadriennium aut circiter ex Oriente sibi comparavit reverendissimus Antistes , Jacobus Usserius , Archiepiscopus Armachanus , vir summa pietate , judicio singulari , usque ad miraculum doctus , & literis severioribus promovendis natus. Mecum exemplar , quod vetustius est , & charactere Samaritano , scilicet vetustissimo , & Ebræis in usu ante Esdræ tempora , descriptum , pro humanitate sua , cui plurimum me debere semper agnosco , in Anglia circa id tempus communicavit. In Hiberniam secum postmodum transvexit , priusquam iis , quæ volui inde exscribere , adversaria
mea

mea ditassem. Literis igitur nuper rogatus, eas capitum V. & X. Geneseos partes, quæ Patriarcharum tempora designant, ex eodem ad me ex Hibernia transmisit exscriptas, seu potius accuratissime depictas.

JOANNES GRAVIUS, Astronomiæ in Academia Oxoniensi Professor Savilianus Londini MDCL. 4^o. reverendissimo Præsuli, Jacobo Usserio, Archiepiscopo Armachano, pietate, doctrina, cæterisque animi virtutibus maxime conspicuo, binas Abulfedæ tabulas, unam Chorasmî, alteram Mawaralnahræ, summa observantia D. D.

In Epistola ad D. Georgium Entum ante D. Joannis Bainbridgii Canicularia, ab illo edita. Oxoniæ 1648. 8^o.

Eruditos hos, vir doctissime, de anno Caniculari commentarios scripsit non ita pridem Joannes Bainbridgius, suasu ac impulsu reverendissimi Archiepiscopi Armachani. — Ne autem viri eruditi foetus unâ cum Parente exspiraret, idem reverendissimus Antistes me convenit, rogans efflagitansque, ut id negotii susciperem, Parui non invitus, tum, Præsulis undiquaque doctissimi auctoritate commotus, tum studio memoriam Viri mihi, dum vixit, amicissimi, conservandi adductus.

D. HENRICUS SPELMANNUS in præf. ad Concilia Britannica. Londini. 1639.

Claros multos Episcopos (fautores hujus operis) intelligo me dicere: reverendissimos in primis tres Metropolitæ, (liceat eos omni cum honore & humilitate nominasse) D. D. Georgium & Gulielmum Cantuarienses, atque D. Jacobum Armachanum.

In notis ad Synodum aliam S. Patricii pag. 59.

Secundam hanc S. Patricii Synodum ex Andegavensi Bibliotheca transcriptam, ad reverendissimum Patrem, D. Jacobum Armachanum Archiepiscopum, Primate[m] Hiberniæ, misit aliquando Jacobus Sirmondus: & eandem mihi Præsulidem, eruditione & pietate spectatissimus, 1 Aprilis. 1628.

D. ROGERUS TWISDEN in præf. ad Historiæ Anglicanæ scriptores antiquos: Londini 1652. de Ailredi Scriptis — quod & dignissimo Armachano debemus, in quo cum incredibili doctrina & rara purioris antiquitatis cognitione, quam

norunt

Et Tagus & Ganges, forsân & Antipodes, morum eximius candor, & in instruendo imperitiores mira suavitas, seria quadam & Episcopali mixta gravitate, certare dignoscuntur: à quo non parum me in hoc opere provehendo adjutum profiteor, utpote qui tuto hærentem sapiens extraxit, & deviantem in viam reduxit.

GI-

GULIELMUS SOMNERUS in præfatione ad Dictionarium Saxonicum Oxonii 1659. sect. 6.

Hujus autem generis liber ille Medicus in Bibliotheca quondam Regia, Paraphasis etiam Saxonica, cujus usum reverendissimo totius Hiberniæ Primati, Jacobo Usserio, Archiepiscopo Armachano, viro quidem incomparabili & seculorum omnium memoria dignissimo, me debere gratus fateor.

D. JACOBUS WARÆUS, Eques Auratus in Antiquitatibus Hibernicis: Londini 1654. cap. XV. pag. 67.

De hac re (i. e. de Academiis sive scholis insignioribus Hiberniæ) qui plura scire avet, consulat profunda eruditionis virum, D. Jacobum Usserium Armachanum in opere suo eximio, de Britannicarum Ecclesiarum primordiis.

In præfatione ad S. Patricii opuscula. Londini 1656.

Librum ejus (i. e. de tribus Habitaculis) hætenus ineditum mihi communicavit D. Jacobus Usserius, nuper Archiepiscopus Armachanus, vir ob eruditionem cum moribus suavissimis conjunctam celeberrimus. Ejus suassu, & ex illius bibliotheca instructissima, nec non è nobili codicum MSS. thesauro Cottoniano, & aliis, in annotationibus nostris passim citatis, Bibliothecis, conquisitis subsidiis, hoc pensum aggressus sum, eo fine, ut bono publico inserviat, cui quidem nostram in ea parte industriam prodesse is olim existimabat.

In annotationibus p. 137.

Atque hæc hætenus — quorum plurima è Brittannicarum Ecclesiarum Antiquitatibus à D. Jacobo Usserio, nuper Archiepiscopo Armachano editis Anno 1639. me hausisse libens agnosco.

In notis ad Synodum S. Patricii pag. 116.

Canones hujusmodi debemus apographo ex antiquo codice MS. Andegavenfi descripto, quod jam olim ad D. Jacobum Usserium, nuper Armachanum Archiepiscopum, è Gallia misit doctissimus Jacobus Sirmondus.

In notis ad alios novem canones S. Patricio adscriptos. pag. 121.

Quintum & sextum edidit jam pridem doctissimus Jacobus Usserius, nuper Archiepiscopus Armachanus.

In præfat. ad librum de Scriptoribus Hiberniæ. Dublinii. 1639.

Ex his, ut de MSS. musei mei taceam, plurimos suppeditavit mihi illustrissimus Præsul, Jacobus Usserius, Archiepiscopus Armachanus.

Idem in libro de Præsulibus Hiberniæ, pag. 29.

Jacobus Usserius &c. vir propter exquisitam eruditionem, facundiam,

vita sanctimoniam, moresque humanissimos, meritò celeberrimus.

ARTHURUS DUCKIUS, LL. D. de usu & auctoritate juris civilis Romanorum, Londini 1679. lib. 2. cap. 8.

Constantinum magnum fuisse in Britannia ex Helena matre Britanna natum, constanter asserunt, non soli Historia nostra Scriptores, sed & exteri; idemque contra Julium Firmicum & Justum Lipsium strenuè defendit reverendissimus Jacobus Usserius Armachanus, qui suo merito ob insignem literarum omnium scientiam inter Britanniae nostrae ornamenta annumeran-

FRANCISCUS TAYLERUS in Epistola dedicatoria ad D. Usserium ante Capitula Patrum, Hebraicè & Latinè edita, Londini 1651. 4o. Libellum hunc ut claritatis tuae patrocinio committerem, multa persuaferunt. Insignis tua eruditio per totum orbem Christianum divulgata, pietas egregia, ubique terrarum celebrata, benevolentia in me eximia, per plurimos annos continuata. In libro hoc transferendo, si opera mea tibi placeat, aliis profit, mercedem me satis amplam recepisse libens lubensque profitebor. Interim Deus optimus maximus te, literaturae ornamentum peculiare, in Ecclesiae emolumentum singulare diutissimè servet incolumem.

ARNOLDUS BOOTIUS in calce Epistolae ad D. Usserium Armachanum, Parisiis editae 1650.

Ut scias, Amice Lector, quàm vera sint, quae paragrapho hujus Epistolae duodecimo memoravi, de D. Armachani mente super veritate Hebraica, & ut ibi constet, quàm diversa ille sentiat à Capello in ea controversia, quam hîc contra ejus Criticam agitavi, ac quantoperè illi displiceat improbus istius viri conatus, varias Hebraici textus lectiones ex LXX Interpretum discrepantiis atque ex codice Samaritano procidentis: visum est hîc attexere litteras, quibus venerabilis ille Praesul, non magis eximiâ pietate morumque sanctitate & Episcopalis muneris sedula executione, verbi-que Divini annuntiatione indefessa, quàm omnigena ac recondita eruditionis laude, linguarumque Orientalium peritia planè singulari inclytus, ad istam meam contra Capellum epistolam respondit, ac quibus eam publico donandi auctor mihi ac impulsor fuit.

In appendice ad Buxtorfium. ib. p. 97.

Et quomodo in me sibi temperasset, quum in ipsum Praesulem Armachanum, illud venerabile toti Europae caput, & tot tamque eximiis dotibus ac virtutibus conspicuum, hand obscure incurrat.

p. 98. Quum Capellum, medullitus ureret, profanam ipsius innovationem damnari à tanto talique viro, uti omni virtutum genere, ac verâ sapien-
tia

tia præfulgenti, ita in cunctis tum Theologiæ, tum reconditiore literature partibus, inque linguis Orientalibus consummatissimo.

HUGO GROTIUS in prolegomenis p. 60. ad Historiam Gothorum &c. Amstelod. 1655.

—— Archiepiscopus Hiberniæ, Ussherius, magnæ diligentie judicii vir.

HENRICUS NORISIUS Cardinalis, in Cenotaph. Pisan. Dissert. 11. cap. 5. p. 131. Venetiis 1681.

Usserius in rebus Chronologicis summa cum laude versatus.

—— De Epochis Syro-Macedonum. Dissertatione prima cap. 2. editionis Lipsiensis 1696. p. 21.

Proponendum est diagramma anni Macedonum Asianorum, quod omnium primus, Jacobus Usserius, præformavit, à quo Langius Ricciolius, alique idem exscripserunt.

HENRICUS VALESIIUS in epistola ad D. Usserium Decembre 1654. Parisiis data in Sylloge epist. 294. pag. 613.

—— Ac primum ago gratias, quantas possum maximas, ob illud literarium munus (Annales Veteris Testamenti) quo me honorandum esse censuisti. Sunt quidem omnes libri tui eruditissimi & accuratissimi: Sed hic præ cæteris abundè testatur, quantus sis in omni genere doctrina. Atque ut ejus lectione multum me profecisse ingenue fateor, ita etiam ex secunda parte ejusdem operis, quam à te editam esse nuper accepi, spero non mediocrem fructum me esse capturum.

In præfatione ad Eusebii Historiam Ecclesiasticam. Paris. 1659.

Tertius codex fuit Henrici Savilii, viri doctissimi, ad me missus ex Anglia, à Jacobo Usserio Armachano. Nam cum in Usserii notis ad martyrium B. Polycarpi manuscriptum Eusebianæ Historiæ codicem ex Bibliotheca Saviliana laudari animadvertissem, eumque codicem optime notæ esse, ex aliquot locis, ab Usserio prolatis, deprehendissem, postulavi ab eo per literas, ut varias ejus codicis lectiones (integrum enim ab eo collatum esse existimabam) ad me transmitteret. Ille verò codicem quidem ipsum, in charta scriptum bombycina, Bibliotheca Oxoniensi, à Savilio donatum fuisse mihi rescripsit. Cæterum editionem Roberti Stephani statim ad me misit, in cujus margine Savilius emendationes ex suo illo manuscripto codice depromptas adnotaverat. Quantum tamen conjicere potui, non omnes scripti codicis lectiones ad latius editionis illius apposuit Savilius, sed eas tantum, quas bonas certasque esse existi-

timabat. *Quædam enim lectiones ab Usserio è scripto illo codice proferruntur, quas à Savilio prætermittas esse postea deprehendi. Præterea idem Savilius ad oram illius editionis multas adscripsit emendationes ex codice Joannis Christophorsoni, quem scilicet Christophorsonus cum aliquot manuscriptis exemplaribus contulerat.*

GERARDUS JOANNES VOSSIUS, de Scientiis Mathematicis cap. 66. sect. 16. p. 391. 392.

A. 1648. Jacobus Usserius, *Archiepiscopus Armachanus, & totius Hiberniæ Primas, de Macedonum & Asianorum anno solari dissertationem edebat, cum Græcorum Astronomorum parapegmate, ad Macedonici & Juliani anni rationes accommodato. Quo de viro rerum divinarum humanarumque peritissimo, nihil possim dicere tam sublime, quin ejus id virtus superet.*

P. 446. in addendis.

Priusquam verò abeam à Ptolemæo, aliquid addam de tot parapegmatibus, quæ tribuunt Ptolemæo. Faciam verò id verbis Jacobi Usserii, Archiepiscopi Armachani, & Hiberniæ Primatis, viri vastæ eruditionis, nec sine laude nominandi.

Idem in libro de vitiis Sermonis lib. vi. cap. 10. pag. 44. loquens de Thoma Dempstero, qui pro Scythici apud Martialem, legit Scotici, antepenultima syllaba producta:

Atque hoc etiam observatum reverendissimo Jacobo Usserio, Armachano Archiepiscopo, & universæ Hiberniæ Primati, in laudatissimo opere Antiquitatum Britannicarum, cujus ego in re majori meminisse malim, quam iis, quæ ad pulverem pertinent Grammaticalem: sed enim & isthoc occasione meliori non eo minus fiet; summa enim summi Viri, & undecunque doctissimi, merita de Ecclesia & tota Rep. literaria, nunquam sinent, ut non æternum ab omnibus literarum amantibus memoria grata celebretur.

In epistola ad D. Usserium p. 529.

Accepi Dissertationem tuam de vetere Romana Ecclesiæ Symbolo, sanè eruditam: quam cum iis, quæ summo bono publico adtexuisti, vocare possumus ἀγαθὴν ἀγαθίδας. Quod verò illa nomini meo inscripseris, nimium quantum obstrinxisti: Nam quantillus ego sum, qui tanto à viro eximium hoc beneficium accipio? Equidem gaudeo, gratiasque ago immortales.

ISAACUS VOSSIUS, in epistola ad D. Usserium, Holmiæ scripta Octobre 1650. in Sylloge pag. 556.

Si non planè ignores eruditionem & magnitudinem Christinæ , dubitare non possis , vir reverendissime , opus tuum Chronologicum longè ei fuisse gratissimum. Bidui tantum effluxit spatium , quod ad manus ejus pervenerit : plurimum verò temporis effluxit spatium , ut existimo , ex quo nullum ei tam charum contigit munus. Placuit ei supra modum , cum ipsius operis ordo & œconomia , tum etiam illud , quod res Ægyptiacas & Asiaticas , à nemine hætenus in unum redactas , diligenter adeo & copiosè tradideris. — Legit illa non sine maxima voluptate Acta illa de Polycarpo , quæ Ignatianis tuis adfixisti. Nunc verò , quod alia ejus generis plura à te expectet , facit Bibliotheca tua recepta , quam flammis esse absumptam constans jam olim ad nos detulerat rumor. Multum itaque & tibi & literis gratulatur , quod tam insignis thesaurus saluus ad te sit reversus.

— In notis ad Barnabæ Apostoli Epistolam Catholicam Londini 1680. p. 307.

Dum Angliam lustro , alia sese obtulit occasio , qua scriptum illud , quod jam diu lucem merebatur , tandem aliquando divulgaretur. Parabat tum novam Ignatii editionem reverendissimus Hiberniæ Primas , Usserius Armachanus. Illi itaque postulanti , & offerenti , ut una cum Ignatianis hac quoque Barnabæ excuderetur Epistola , non tantum libenter id concessi , sed etiam maximoperè gavisus sum , in illas manus incidere antiquissimum istud monumentum , à quibus immensum quantum splendoris mutuare sibi posset. Et nisi ingens isthoc incendium , quod non exiguam partem Urbis Oxoniensis vastavit , omnia quoque exemplaria absumpsisset , pulcherrimam ejus Auctoris editionem jam diu habuissemus.

FRANCISCUS JUNIUS in observationibus ad Willeramii Abbatis Francicam paraphrasin Cantici Canticorum Amstelod. 1655. pag. 248.

— Initium, item origo, h. e. illud ex quo alia res ortum trahunt. Priore modo accipitur in illa Geneseos ac præcipuarum V. Testamenti historiarum paraphrasi poetica, cujus mihi copiam benignè prorsus fecit vir maximus, Jacobus Usserius, Archiepiscopus Armachanus, & totius Hiberniæ Primas.

Idem in Gothico, Runico, Anglo-Saxonico, aliisque Alphabetis, quæ Gothico Glossario præmisit pag. 14.

Injecta interim Commentarioli hujus (i. e. de literis & lingua Getarum five Gothorum, quem edidit Bonaventura Vulcanius Lugduni Batavorum 1597.) mentione, opportunè quoque venit in mentem ejus epistolæ, quam super Auctore præfati opusculi, pluribusque aliis rebus huc spectantibus, olim ad me dedit magnus ille ac multæ lectionis Antistes, Jacobus Usserius,

serius, *Archiepiscopus Armachanus, totiusque Hiberniæ Primas.*

Idem in præfatione ad paraphrasin *Geneseos Saxonice Amstel. 1655.*

Supervacaneum esset, Lector benevole, pluribus verbis hoc in loco repetere, quæ non ita pridem de Paraphraseos hujus Auctore attigi pag. 248. observationum nostrarum in Willeramum, ubique præclarum hunc reconditæ antiquitatis thesaurum acceptum fero summo Præsuli, & nunquam non infra merita sua laudato, Jacobo Usserio, Archiepiscopo Armachano, & totius Hiberniæ Primati.

CLAUDIUS SARRAVIUS in epistola ad D. Usserium Octobre 1647. pag. 521.

Dudum tibi obstrictum pro honorifica in Ignatio nominis mei mentione, novo rursus beneficio devincire voluisti. Dono enim tuo accepi eximiam tuam Diatribam de Symbolis veteris Ecclesiæ. Pro tuis istis erga me meritis debitam rependo gratiarum actionem. Magna cum voluptate, nec sine fructu legi, postrema hæc tua opuscula, in quibus igneum ingenii vigorem & eruditionem reconditam, abstrusissima quæque rimantem, & bono publico eruentem, ex animi sententia dico, sum admiratus.

FRIDERICUS SPANHEMIUS in epistola ad 3. partem *Dubiorum Evangelicorum Genevæ 1639.*

— *Ingentes tuæ virtutes, summe Usseri, non vestro tantum orbi notæ sunt, sed & nostro, & ubicunque pietati suum decus, eruditioni suum pretium constat. Sacrum sanè munus illud, ad quod divina bonitas te evexit, per se magnum est & splendidum, sed cui major à te dignitas, accedit. Nec cum sede Armachana unquam felicius actum, quàm ex quo tu illam omnium applausu occupas, & Ecclesiasticæ rei in amplissimo regno præes. Non Hibernorum hoc tantum & Britan-
norum vestrorum judicium est, sed bonorum omnium, qui eximias illas virtutes tuas in te suspiciunt. Victura eruditionis tuæ monumenta haud quaquam intra Hiberniæ vestræ littora coercentur, sed magna cum nominis tui gloria, ubique terrarum teruntur. Quàm eruditè & solide Orthodoxæ veritatis antiquitatem, & Romæ sequioris novitatem contra personatum quendam Emissarium asserueris, ne illa quidem Societas non sentit, quæ te, omnia alia cogitantem, in eristicam illam arenam temerè pertraxit. Thesaurum antiquitatis & penum uberem eruditionis priscae vident, qui opus tuum vident. Nec ignorare voluisti orbem Christianum, quàm parum prisca Hiberni & Britones vestri se abjecerint coram Vaticana sede, immò quàm alieni fuerint à novitia illa Theologia, quam pro veteri obtru-*
dunt

dunt scrutorum Gibeoniticorum institores & propola. Quod tam apertis documentis à te probatum constabilitumque, immo iis etiam testibus, quibus ne Romæ quidem fides derogari potest, ut contra niti, non nisi illorum sit, qui prorsus depudere. Quantam insuper magno tuo merito laudem consequutus sis in juramenti fidelitatis æquitate Hibernis persuadenda, ne serenissimus quidem Rex Jacobus, cujus regii spiritus & erudita sapientia orbi nota, ignorari voluit, quem ipsum fidei & prudentiæ tuæ præconem habuisti.

Et quamvis publicæ illæ curæ, quæ amplissimo muneri tuo annexa sunt, totum sibi hominem vindicent, & vastissimum etiam pectus implere possint; ingens ille tamen & sublimis animus tuus sibi inter negotia ipsa otium facit, sed otium eruditum, & cujus fructus ultra Oceanum vestrum porrigitur. Testes hujus rei foetus illi tui eximii, Goteschalci & Prædestiniana controversiæ Historia, ut & veterum Epistolarum Hibernicarum Sylloge, & alia id genus scripta tua, quæ summa cum cura ex antiquitate eruta, multa etiam vindicta prius, à blattarum & tinearum, quo pulverabantur, imperio, orbi Christiano per te vindicata passim leguntur, nec eruditionis tantum tuæ monumenta sunt, sed & judicii & pietatis. Et sanè eo ipso laudi tuæ non exigua sit accessio, quòd illa demum tibi eruditio probetur, quæ cum pietate conjuncta est, & cujus fructus ad illius gloriam pertinet, cui omnis nostra debetur Bibliothecam tuam Theologicam, & veterum Scriptorum Ecclesiasticorum Criticum, omnes antiquitatis genuina studiosi à subactissimo judicio tuo summo cum desiderio expectant.

Qua vero tu integritate sublime illud munus tuum sustineas, quo zelo, qua vigilantia, in amplissimi gregis tuæ fidei commissi salutem incumbas, qua assiduitate omnes fidei Episcopi partes exequaris, non Armachana tantum Diœcesis novit, & reliquæ tuis curis obnoxia, sed & tota Britannia vestra, immo & illi, qui toto Oceano à vobis disjunguntur. Ea certè pietatis tuæ, ea eruditionis apud nos est existimatio, ut Usserii nomen pietatis nobis & virtutis nomen sit, quibus fama constans frequenter ingerit tot ingentes illas dotes, quibus te Deus ad tantum munus instruxit. Et quamvis summa cum laude, voce doceas & calamo, plus tamen exemplo doces inter illos, qui in vitam tuam & integerrimos illos mores tuos quotidie intuentur. Vident illi in te non anxiam, non affectatam pietatem, sed gravem & seriam, & quæ in illum solum fertur, cui soli debetur. Vident raram humilitatem, per quam è fastigio tuo descendis, nec quicquam infra dignitatem tuam esse existimas, quod ad promovendum Dei regnum facit.

Vident charitatem & summam in egenos & extorres liberalitatem, quâ in sacros usus confers, quæ sacris usibus jam olim destinata fuere. Aedes tuæ eruditorum collegium sunt, vita sancta, mores inculpati, oculi vigiles, curæ publicæ, animus cœlestis, & qui unum Deum spirat, unum Deum loquitur. Bibliotheca tua non tam tua, quam orbis literati Bibliotheca est, quæ à te ingenti ære instructa, omnibus in publica commoda patet, & eruditorum hominum usibus prostat, à quorum candore tuus candor publicam commendationem jam pridem impetravit. Spirans ista veri Episcopi imago te merito Hibernis tuis pretiosum, Britannis venerabilem, ceteris omnibus admirabilem facit.

Non mirum itaque foret, vel has causas solas satis mihi fiduciæ addere, ut ad te accedam, & publicè profitear, quanta Genevæ nostræ nominis tui sit claritudo, quantus apud nostrates honor, quanta apud me privatim veneratio. Sed novum mihi argumentum tui compellendi humanissimæ tuæ literæ fecere, quibus ex ima Hibernia mihi testari voluisti, Dubiorum Evangelicorum partem primam, non visam tibi duntaxat, sed & accuratissimo judicio tuo probatam, cœptique operis continuationem à te avidè expectari. Laudationes, quas in primum istum conatum pro tua comitate congeffisti, tuæ bonitati in solidum debentur. Quàm impensè verò honorifico tuo suffragio, quàm singulari candore, quàm affectu delectatus fuerim, quàm excitatus in instituto meo persequendo, publico documento constare volui.

LUDOVICUS DE DIEU in præfatione ad Commentarium in IV. Evangelia Lugd. Bat. 1631. loquens de edendo in IV. Evangelia, præfertim Syriacè versa commentario:

Quo in instituto paucis post septimanis factus fui confirmatior, quum earundem illarum, quas dixi, Epistolarum, simul & Apocalypseos exemplar aliud MS. elegantissimo charactere Syro exaratum, addito etiam divino Beati Ephremi tractatu de amore sapientiæ, ab ornatissimo, doctissimo, & æterna memoria digno Præsule, Jacobo Usserio, Archiepiscopo Armachano, qui & ante biennium me Pentateucho Samaritano beaverat, ex Hibernia allatum fuit.

— Ad S. Matthæi cap. XIX. v. 5.

Neque hîc tantum, sed & in aliis plurimis Pentateuchi locis τῶν LXX. interpretationem ad Samaritanum magis, quàm Hebræum, exemplar accedere, alias fortasse, si vitam Deus otiumque concesserit, beneficio reverendissimi, amplissimi, ingenio, virtute, eruditione cultissimi Præsulis, Ja-

Jacobi Usserii, Archiepiscopi Armachani, à cujus liberalitate exemplar Samaritanum penes me habeo, ostendere dabitur.

BERTIUS in Geographicis Tabulis Amstelodami 1616.

— Quam quum ista scriberemus, ornabat Jacobus Usserius, Theologus, eruditione & pietate & scriptis in primis clarus: ei patria Dublinum.

MORANEZIUS, in Anti-Jansenio suo:

Non ipse primus excogitavit, sed à Calvinistis accepit, præcipuèque à Jacobo Usserio, insigni Calvinista, Hiberno, qui anno 1631. librum edidit, inscriptum, Gotteschalci &c. neque sensum duntaxat, sed verba etiam ferè ipsa transcripsit Jansenius; neque tamen, ut æquum erat, ullam ejus mentionem facere dignatus est. Disp. XI. § 1.

ALEXANDER MORUS, dedicat D. Usserio Orationem suam, cui titulus Calvinus, Geneva habitam 1648. Epistolam in Lectoris Usseriani nominis studiosissimi gratiam hîc exscribo.

Diu quæsitum inveni tandem Patronum Calvino dignum, Reverendissime Vir Dei, nec diu quæsitum inveni tamen ΑΝΤΙΔΩΡΟΝ te non indignum, si materiam spectas, non industriam. Nec tam inveni, quàm reperi. Quod enim absque divina quadam virgula contigisse non equidem putaverim, quo die proditura erat in lucem publicam hæc mea, qua Calvinî laudes ac vindicias complexus sum, Oratio, illo ipso die tuis me literis beâsti summa humanitate conditis, & Ignatiana à te edita, nisi libri moles obstitisset, eodem tempore missurum te fuisse significasti, ac leviculam, quæ tua est modestia, æstimatione meâ prorsus auream, de veteris Ecclesiæ Symbolis, ne prorsus ΑΣΥΜΒΟΛΟΣ, ut tu scitè loqueris, ad nos scilicet accederes, Diatribam literis tuis, Diatribæ Iconem tuam comitem adjunxisti. Nempe nos Epirotæ, qui nec faciem tuam nec te loquentem (nam sic quoque melius te videndum præbes) vidimus unquam, ne desideremus expressissimam effigiem animi tui, calamus tuus effecit, ne dignissimam ideam oris tui & instar, effecit cælum. Ego certè, qui te seculi nostri Athanasium vocare soleo, ΠΕΖΟΝ ΤΟΙΣ ΤΑΠΕΙΝΟΤΕΡΟΙΣ, ΥΨΗΛΟΤΕΡΟΝ ΤΟΙΣ ΜΕΤΕΩΡΟΤΕΡΟΙΣ, ΦΙΛΟΞΕΝΟΝ, ΙΚΕΣΙΟΝ, ΑΠΟΤΡΟΠΑΙΟΝ, sic de illo veteres, nos de te loquimur, qui juxta cum illo duorum admirabilium lapidum naturam imitaris, & percutientibus Adamas, dissidentibus Magnes occurris: ΤΟΙΣ ΠΑΓΟΥΣΙΝ ΑΔΑΜΑΣ, ΤΟΙΣ ΔΕ ΕΤΑΣΙΛΑΖΟΥΣΙ ΜΑΓΝΗΤΙΣ; faciam id ipsum paulò libentius, posteaquam te novi ΥΨΗΛΟΝ ΤΟΙΣ ΕΡΓΟΙΣ, ΤΑΠΕΙΝΟΝ ΔΕ ΤΩ ΦΡΟΝΗΜΑΤΙ, ΚΑΙ ΤΗΝ ΜΕΝ ΑΡΕΤΗΝ ΑΠΡΟΣΙΤΟΝ,

ΤΗΝ ΕΝΤΥΧΙΑΝ ΔΕ ΚΑΙ ΔΙΑΝ ΕΥΠΡΟΣΙΤΟΝ: ac denique (liceat hoc enim cum ceteris encomium , quod Nazianzenus tribuit Athanasio, tibi reddere , ΑΓΓΕΛΙΚΟΝ ΤΟ ΕΙΔΟΣ , ΑΓΓΕΛΙΚΩΤΕΡΟΝ ΤΗΝ ΔΙΑΝΟΙΑΝ. Sed quid rependam ? Etsi nec tua sors desiderat redhostiendi vicem , nec mea suppeditat remunerandi facultatem. Accipe tamen observantia in te mea Symbolum , sed benigno & qualem tua praefert vultu , à me delineatam imaginem Calvinii , quae , nisi fallor , identidem ostendet tibi te. Quas enim laudes ille meruit , cum apicibus vestris prope major libenter carendo exstitit , pariter ii merentur , qui quo celsiori honoris fastigio supra ceteros mortales eminent , eo majori virtutum beneficio Ecclesiae commodant , & Solis instar lucent , ut prosint. Neque verò summis dignitatibus ad privatas utilitates aut seculi typhum abutuntur , nec dominationem in Christi gregem usurpant , quod Petrus interdixit , Petrus ille , cujus interea Successores profitentur , qui doctrinam respuunt. Usserius profectò adeò nihil tale molitur , ut aurea Ecclesiae tempora nobis referat , nec infra se quicquam putet , quod ad adificationem fidelium , quibus Angeli ministrant & Archangeli , pertineat. Sic est , Vir maxime : Quacunque via nobis occurras ingens , nunquam tamen ingentior , quam cum ex illa , in qua te Deus collocavit , sublimi specula descendis ad Pastoritiae curae laboriosa munia , ut propius afflictis opem feras , & commodius innascentem agro Domini horrendam filicem ac infelix lolium avellas. Non te majorem unquam ipsa sedes Armachana vidit rebus florentibus , quam nunc Londinum in mediis aerumnis , quas infularum loco habes. Tanti penè fuit sua Praesulibus decora & opes adimi , ut nobis hoc aequabilis in utraque sorte animi specimen proderes. Multò minus debes dignitatis tuae culmini , quam tua dignitas virtutum tuarum coelestium splendori. Sed inter omnes virtutes tuas ista praecipuè micat animi moderatio , dicam , an magnitudo , quà dum te nimio plus demittis , longè altius assurgis , quam fastu & pompà tot alii toto passim orbe.

Quos tulit ad scenam ventoso gloria curru.

Multum profectò Ecclesiae dederas , quamvis nihil ei dedisses praeter exemplum. Quamvis nec viro Apostolico dignarum concionum frequentia , nec scriptorum non aestimanda utilitate cis & ultra Oceanum nobis & Posteris profuisses ; quamvis nec errorum novitatem , ac veritatis antiquitatem fortiter asseruisses , nec tot veteris Ecclesiae thesauros felicissime eruisses

eruiſſes industria ; quamvis nec opus illud idiomate patrio dediffes , nuper à nobis avidè luſtratum , quo Theologiæ Summam , ſed quàm illuſtri brevitate , quàm nervoſa ſimplicitate ! complexus es ; quamvis nec tuum pectus foret Bibliotheca ſpirans , nec Bibliotheca tua Muſeum obambulans , ut vetus dictum detorqueam : quidni enim obambulat , cujus pretioſa ſupellex tam ſæpe mare tranat , & eruditio totius orbis Europæi veteris ævi memorias , & Orientis opes tam effuſè dilargitur , & œcumenica ſuo quodam jure dici mereatur ? Mirari tamen oporteret , ut nihil eſſet in te aliud , extremam in ſupremo dignitatis & eruditionis ſaſtigio mo-deſtiam . Nam cùm hæc due res , licèt ſingulæ , licèt modicæ , ſui plenos & veſanos homines reddere ſoleant , dignitas & eruditio , meritò ſtupemus in te felici nexu copulatos atque ad ſummum perductas nihil ex illa divina tua virtute delibare : humilitatem dico , quæ , tametſi repugnante apud Latinos vocabulo , virtutum omnium apud Chriſtianos altiffima eſt ; ſed cùm hæc ipſa virtus plura dicere nos vetat : laudes enim ſpernit , quibus non eſt ullum aliis acroama jucundius : tum epiſtolæ modus tuas non capit . Voto finienda præſatio eſt . Deus immortalis Pater Domini noſtri Jeſu Chriſti Eccleſiæ ſuæ laboranti velut è cœli machina opportuno tempore ſuccurrat . Inſulis veſtris Fortunatarum elogium & Alcyonia reddat , adeoque te per diu rebus afflictis grande ſolacium intereſſe patiatur . Sera ſit , & noſtris demum nota nepotibus , dies , quæ cœlo tradat , quo mundus non eſt dignus , Uſſerium . Hic ſemper ſit Britannix , quod Auguſtinus Hipponi , nec illa unquam , ſicut hæc olim , Præſulem ademptum ſentiat . Vale , maximum Britannix Decus , & à nobis oblatum non illibenter ſuſcipe Genevæ Decus maximum . E muſeo meo . III. Non. Jul. An. vulgaris Æræ Chriſtiane MDCXLVIII.

Auctor Vindiciarum Hiberniæ adverſus Dempſterum Scotum :

Quod ſi adverſæ religionis homines inferere voluiſſem , verè affirmare poſſem , quod Uſſerium alterum nunquam viderit Scotia : cujus utinam ſublime ingenium atque humaniſſimos mores infauſta inter Sectarios educatio non vercata non fuiſſet .

2
V I T A

reverendissimi & eruditissimi Viri,

JOANNIS COSINI,

Episcopi Dunelmensis:

SCRIPTORE

THOMA SMITHO,

*S. Theologiæ Doctore & Ecclesiæ Anglicanæ
Presbytero.*

THE
LIBRARY
OF THE
MUSEUM OF
ART AND
ARCHAEOLOGY
OF THE
UNIVERSITY OF
CAMBRIDGE
100, MARKET STREET
CAMBRIDGE
ENGLAND

I

V I T A

JOANNIS COSINI

Episcopi Dunelmensis.

JOANNES COSINUS in lucem editus erat tricesimo die Novembris, memoriæ S. *Andree* Apostoli sacro, anno divini Verbi incarnati MDXCV. *Norwici* præcipuæ *Norfolciæ* urbis, quæ licet inter celebriores *Angliæ* civitates ob ædificiorum elegantiam, civiumque copiam, industriam, & opulentiam merito recenseatur, maximam tamen sui à sede Episcopali, ante sexcentos annos & ultra, illuc translata, decoris partem derivat. Patrem habuit *Ægidium Cosinum*, melioris notæ civem, & ob lautiores fortunam, egregiam probitatem, candidosque mores apud suos valde celebrem: matrem verò *Elisabetham Remington*, ex antiqua nobilique familiâ oriundam; utroqueque religiosos doctrinæ rituumque Ecclesiæ *Anglicanæ* cultores, ut inde ab ipsa pueritia fidem istam verè Christianam & Catholicam profiteri, sacrisque Ecclesiæ *Anglicanæ* institutis, quæ postea contra Pontificios Puritanosque sapienti zelo & imperterrito animo strenuè tutatus est, assuescendi didicerit. Primogenitus hic dilectus filius illorum curâ rudimentis Grammaticæ, aliarumque artium institutionibus, quibus ætas puerilis imbuere solet in schola publica istius civitatis probè perceptis, ita ut altioribus disciplinis capeendis, præ bonâ indole, ingenio, & industria, optimis futuri in literis progressus indicibus & quæ magna de tantæ spei juvene præfagebant, omnino (a) par haberetur; desinente ætatis anno decimo quarto *Cantabrigiam* alterum *Angliæ* lumen, & fecundissimam ingeniorum omnigenæque eruditionis altricem, missus, primo accessu inter Alumnos, deinde post exactum studiorum tyrocinium, in numerum Sociorum Collegii *Cajo-Gonvillani* adoptatur. Fama verò illius virtutis & eruditionis non modicæ, ex sedula industriâ, quam solidum direxit inque melius auxit iudicium, partæ, ubique spargebatur. Anno MDCXVI. tum à reverendissimo viro, *Lancelloto Andrea* tunc temporis Episcopo *Eliensis*,

A

(a) A. Ch. MDCX.

si, tum à D. *Joanne Overallo*, Episcopo *Lichfieldensi*, neutris istius consilii & propositi, de quo seorsim convenerant, consciis, ut Bibliothecarii munere apud ipsos fungeretur, invitatus: suasu nuperi sui Tutoris, se in posterioris clientelam dedit. Ille autem elogiis de *Cosino* sparsis fide adhibita, tantarumque virtutum, quas nobile eximii Juvenis ingenium præ se ferebat, coramque oculis quasi præsentibus sistebat decora facies, ex eleganti beneque compaginata totius corporis structura commendatior, amore captus, illum inter Domesticos suos, ut sibi etiam à secretis & epistolis esset, benignissimè admisit. Quod munus, alteri superadditum, omni ex parte præstitit, non ob solam καλλιγραφίαν (literas licèt optimè formare & pingere cognovisset: hoc enim vix in censum laudis venire debet) sed ob sagax ingenium, subtilioremque intelligentiam, rem qualemcunque, sive civilem, sive Ecclesiasticam, quæ disceptaretur, vasto ambitu complectentem, unde Patrono indies charior redditus, illius gratiam inire magis magisque mereretur.

Qualis quantusque fuerit D. *Overallus*, vix quispiam sacri ordinis, paulò elevatioris ingenii, è nostratibus, citra culpam magnæ stupiditatis, ignorare potest, nec exteri id quidem ignorabant: inter quos duos instar omnium nominare sufficit, viz. *Hugonem Grotium*, & *Gerardum Joannem Vossium*, qui illum summâ cum observantia & veneratione profecuti sunt. Meritissimo enim jure inter maximos istius ævi, ne dicam, superiorum seculorum, Theologos recensebatur: utpote quo nemo in rimandis abstrusioribus Theologiæ scholasticæ articulis sagacior: nemo in ejusmodi litibus, quæ tum in *Belgio* oriri cœpissent, componendis felicior, magisque idoneus: nemo pacis Ecclesiasticæ studiosior, modo ipsius monitis & determinationibus, sive ex cathedra, sive ex rostris, sive ex prelo sæpè dictatis, adversarum partium Antesignani consensissent, & ad sobrietatem sapere voluissent. A Professorio munere, quo *Cantabrigiæ* præclarissimè defungebatur, à serenissimâ Regina *Elisabetha* paucis ante obitum annis, ineunte superiori seculo ad decanatum Ecclesiæ S. *Pauli*, quæ est *Londini*, primò evectus; mox sub initiis regni R. *Jacobi* in inferiori domo synodi Provincialis *Cantuariensis*, de rebus ad religionem, disciplinam, regimenque Ecclesiasticum Ecclesiæ *Anglicanæ*, ad normam sacrarum Scripturarum & primævæ Antiquitatis, contra sacrilegos impiosque schismaticorum & Monarchomachorum ausus moderandis coactæ, electus Prolocutor: tandem anno MDCXIV.

ad

ad Episcopatum *Coventriensem* & *Lichfieldensem* nominatus, ubi postquam quatuor annis summâ cum laude sedisset, Ecclesiæ *Norwicensis* Præsul, uti dixi, constituebatur.

Tali Patrono, tali Magistro felix *Cosinus*, adhuc juvenis viginti quatuor annorum, & hætenus amœnioribus politioris literaturæ studiis innutritus; illius paternis consiliis & sapientissimis amantissimisque adhortationibus facilè victus, animum disciplinis sacrationibus diligentia indefessâ, nec ab hoc tempore unquam cessaturâ, applicuit, habituque sacerdotali indutus, se Deo & Ecclesiæ totum deinceps consecravit. Sed bonam istam spem, aut singulari hoc exemplo coram quotidie spectato, in solidæ sinceræque pietatis officiis, & frequentibus colloquiis in doctrinâ melius proficiendi, aut opulentioris fortunæ ex isthoc læto augurio ortam, subitò intercisam mœstus videt & experitur. (a) Anno enim sequente non sine omnium bonorum, & potissimum *Cosini*, luctu ad Beatorum in cœlis sedes migrat Vir optimus. Sed divinæ voluntati, absque murmurationibus & querelis, submisso animo & invicta patientia, obsequi oportet. Imaginem autem tantæ sapientiæ, eruditionis, & pietatis, quæ in illo præluxere, memoriamque istius miræ benignitatis, quam ipse expertus est, nunquam obsolescere, aut ex animo excidere passus est *Cosinus*: quod præclaro documento publicè ostendit. Nam, ut ipsius pietatem & gratitudinem erga Patronum, de se optimè meritum, testaretur, restauratis, sub serenissimi regis *Caroli* secundi reditum, Monarchiâ & Ecclesiâ, magnificum elegansque monimentum, in Ecclesiâ *Norwicensi*, ad columnam prope locum, ubi sepultus jacet, erigi curavit.

Hoc funesto casu *Cosinum* planè attonitum fuisse, & penè inconsolabilem redditum, quisque violenti humanorum affectuum impetûs sibi conscius, facilè opinabitur: sed hanc jacturam, licèt gravissimam, citò reparavit benignior providentia. Receptus enim in clientelam magni Præfulis, *Richardi Neli*, tunc temporis Episcopi *Dunelmensis*, illi factus est à sacris domesticis: cujus favore & patrocínio suffultus, facilem sibi ad opima sacerdotia & dignitates, quas longa annorum serie, non sine vendicatione meritorum, postea adeptus est, viam stravit.

Ab hoc tempore omnia ex voto, imo supra votum fluxere. Gratiâ optimi Patroni pollens *Cosinus*, promovetur circa A. MDCXXIV. ad archidiaconatum Orientalis regionis in provincia *Eboracensi*, cedente

reverendo Viro, D. *Marmaduco Blakeston*, cujus filiam *Franciscam* conubio sibi junxerat : (a) feminam piam, prudentem, conjugis amantissimam, & in utraque fortuna, tam adversa, quàm prospera, juxta institutum divinum, à primis rerum exordiis ordinatum, adjutricem : paulò post opulento Ecclesiæ Cathedralis *Dunelmensis* canonicatu, & XX. Julii MDCXXVI. opimo *Bransgethæ* rectoratu & Sacerdotio auctus. Tantùm verò aberat, ut hac eximiâ statione positus otiaretur, vitamque ageret desidem, ut potius dignitates hæ illius industriæ novos fortioresque subderent stimulos, tum ut iis se neutiquam indignum, sed omninò parem ostenderet, tum ut ad altiora lentis gradibus methodisque honestis, quas nimirum non ambitio, non opum cupido, non artes adulatoriæ, sed quas amplificandæ gloriæ sanctissimi Numinis, & benè de Ecclesia & religione merendi desiderium & prudentiâ verè Christiana solent suggerere, favente Deo, tandem aliquando, senioribus annis, faciliùs & securiùs ascenderet. Interim satis gnarus, quantum honoris viris verè eruditis ex titulis Academicis accedat, *Cantabrigiam* repetiit, ut præstitis exercitiis gradu Baccalaureatus in Theologiâ ornaretur ; quibus quoque de causis postea tempore debito summam in eadem sacra facultate dignitatem jure meritissimo assecutus est.

Anno 1626. *Londini* in ædibus D. *Neli*, *Dunelmensis* Episcopi, tanquam in Collegio & sacro confessu, venerabiles viri, D.D.D. *Laudus*, Episcopus *Bathoniensis* & *Wellensis*, *Whitus*, mox Episcopus *Carleolensis*, *Richardus Montacutus*, aliique pietate, doctrina, & flagranti Ecclesiæ *Anglicanæ* contra tum Pontificiorum, tum Puritanorum insidias & impetus tuendæ zelo insignes, de rebus ad Ecclesiam & religionem spectantibus consultaturi, convenire soliti erant : quorum colloquiis *Cosinus*, licèt annis & dignitate longè inferior, præsens aderat. Hoc Puritanos, odio & invidia, adversus moderatioris æquiorisque animi Theologos, qui non pariter insaniissent, exæstuentes, diu latere non potuit ; hinc convitia atrocesque calumnias in vulgus spargendi anfam captantes, quasi res *Romanensium* illic clam agerentur, cùm nulli illorum aut errores aut superstitiones pejus odissent, aut de defectoribus à communione Anglicana inclementiùs ominarentur.

Quod mox insigni exemplo ostenderunt. Cùm femina & natalibus &

(a) Obiit illa xxv. Martii MDCXLII. & sepulta jacet in Ecclesiâ *Petroburgenfi*, monumento in illius perpetuam memoriam illic condito, in quo femina præstantissima & generosa & pientissima conjux nuncupatur.

& conjugio nobilissima, cujusdam Sacerdotis Pontificii fraudibus artibusque sophisticis circumventa, ad Romanam Ecclesiam transisset, de illa in viam Veritatis, ex qua præceps aberraverat, reducenda, tum familiari sermone, tum scriptis, maximè solliciti, cùm omnibus argumentis suasibusque cedere præfractè recusaverit, de periculo animæ, quod incurfura erat, acriter monent, præsertim *Montacutus* & *Cosinus*; ille ingerendo, si in ista apostasia ex hac vita decederet, vix spem salutis fore reliquam; hic verò, illam lethaliter peccasse, quæ Ecclesiæ, in qua nata, baptizata, & educata fuerat, temerè & inconsultis nostris Theologis, communionem deseruisset. Sed cùm pervicax mansisset, argumentis in lachrymas, misericordiam, & preces conversis, illam solius conscientiæ arbitrio sapientioribusque cogitationibus, in mente sobria, sedato æstu, posthac orituris, tristes reliquere. Quam verò largam triumphandi de hisce venerabilibus Viris, illisque probro vertendi materiem Puritanis dederit infelix iste unius feminæ lapsus, videre est in (a) epistola *Alexandri Coci*, Viri non ineruditi, sed illorum fermento non parum imbuti, ex inanibus incertisque narratiunculis corrasâ, ad *D. Usserium Armachanum*. Sed quàm iniquè, quàm protervè, quàm absurdè, judicent omnes æquitatis & moderationis Christianæ studiosi & amantes.

(b) Cum serenissimus Rex *Carolus I.* sæpè observasset in famulantium R. *Mariæ* consorti, præsertim feminarum, quæ in vicino conclavi manserint ad obsequia suæ Dominæ paratæ, manibus versari Horas B. Virginis aliasque precum formulas, quas, ut fallerent tempus, alias tædio futurum, & ne penitus otiosi viderentur, subinde legere solebant, ille non potuit non laudare istud institutum, quod sanè maximè laudandum foret, si superstitio indebitusque sanctorum cultus hisce sacræ religionis officiis non sese admiscuissent. Rex verò pro summa sapientia pariter ac pietate, quò tam propriæ, quàm aliorum in Aula aut alibi degentium saluti magis consuleret, libellum mole exiguum, in sinu circumgestandum, è sacris scripturis, Liturgicis vete-

(a) In Sylloge Epistolarum *Usserii Londini* edita 1686. Epist. CXII.

(b) Hujus rei historiolum primum familiari sermone, deinde scripto configuratam, mihi communicavit V. C. *Joannes Evelinus* Armiger, notissimæ & celeberrimæ apud Nobiles *Anglos*, ob sublime ingenium, ob insignem Philosophiæ naturalis culturam, ob denique strenuum felixque politioris literaturæ studium, prout libri ab illo editi faciunt testatissimum, famæ, eam ab ore D. *Cosini* ante quinquaginta annos *Parisiis* edoctus.

ris Ecclesiæ Christianæ, tum *Græcæ*, tum *Romanae*, libris, Patrumque antiquorum scriptis collectum, qui, stylo & lectu & intellectu facili, tam Christianæ doctrinæ summam, & vitæ piæ ac sapienter juxta Evangelii normam ordinandæ regulas, quàm precum domesticæ & privatæ pietati fovendæ maximè conducibiles formulas, præstitutis horis, uti in solennioribus religionis exercitiis recitandas, complecteretur, condi voluit. Communicatis cum duobus tribusve, qui regali pollebant gratia, Episcopis, hisce pientissimis consiliis, ex commendatione D. *Francisci White*, tunc temporis Episcopi *Norwicensis*, Eleemosynarii Regii, jubetur *Cosinus*, quem prorsus idoneum judicassent, ejusmodi opusculum aggredi: tum ut enthusiasticis Puritanorum furoribus publicè obviam iretur, tum ut nostratium animi in fide verè Catholicâ retinendâ, & in Christianarum virtutum praxi firmiores redderentur. Quam autem probè & accuratè sacrum istud pensum absolverit *Cosinus*, hîc paulò fusiùs indicabo.

Ille Regio jussu auctoratus & communitus, ad partes suas exequendas se accinxit: & alacriori quidem animo, eo quod spirituali eorum, qui in sancta Ecclesiæ *Anglicana* communione vixerint, hoc præsertim pacto, in colligendis istiusmodi pietatis subsidiis & documentis profectui optimè consuli posse præsensisset. Propositum sanè erat in se verè Christianum & Rege piissimo & Christianissimo perquam dignum, & si illorum temporum statum rectè perpendamus, maximè necessarium. Puritani, qui regimine Episcopali, quod à primis nascentis Christianismi initiis continua neutiquamque intermissa successione ubi-vis locorum obtinuerat, rejecto, ritibusque sacris & Liturgiâ repudiatis, à publicis cœtibus sese deplorando schismate subducentes, calumnias inter plebem, prætextu simulatæ sanctimonix, ab iis miserè delusam, spargebant, de *coarctato*, uti loquuntur, flatu istiusmodi precibus, *spiritu* ogganientes, non inde privatorum hominum profectui fuisse satis consultum. Hinc extemporaneæ istæ apud hosce sectarios preces, distorto vultu, spumeo ore, inconditisque clamoribus, temerè & festinanter, prout singulis libitum erat, effusæ, quas cerebri parum sani fervor, zelusque enthusiasticus suggessere, ab omni bono sensu sæpenuerò vacuæ, & quæ divini cultûs officiis immiscerentur, prorsus indignæ, olim duxere originem. Non defuere quidem ab omni tempore pietatis clam & seorsim exercendæ subsidia, à Viris doctis piisque subinde edita, in quibus tamen genium suum mentemque potius, quàm

quàm veteris Ecclesiæ ac Patrum normam secuti sunt. *Cosinus* verò, non improbatis horum sanctis conatibus, aliâ methodo uti oportere, pro pietate & prudentia sua, prout ordinatum & injunctum fuerat, apud se statuebat, tum, ut Puritanorum strophis technisque, tum, ut *Romanensium* de *nova fide* apud nos introducta, de religione majorum abolita, de sacris divini cultûs ritibus, quasi cuncta, nulla aut decori aut ordinis ratione habita, peragerentur, sublatis, & de debita cura instituendi populum in rebus ad religionem Christianam perquam necessariis neglectâ, insuperque habita, criminationibus & puris putidisque calumniis commodiùs ac manifestiùs iretur obviam, in omnium *Anglorum* usum, *privatarum precum*, è *sacris Scripturis*, ex *Antiquorum Patrum scriptis*, ex *veteribus Liturgiis*, èque *Liturgia Anglicana desumptarum*, juxta veteris Ecclesiæ praxin, in determinatas horas distinctam, *Syllogen*, juxta formam & exemplum earum, quæ olim Latinè ex (a) auctoritate Regia sub temporibus R. *Elisabethæ* anno hominum salutis reparatæ MDLX. editæ erant, edendam, celato licèt nomine, *Londini* MDCXXVII. curavit, approbatione D. *Georgii Monteine*, Episcopi *Londinensis*, præmissa. Aureus liber & Ecclesiæ *Anglicanæ* alumnis, imo omnibus sobria mente præditis, solâ Puritanorum factione exceptâ, longè acceptissimus. Hi enim, eò quod preces quædam illic juxta horas, Veterum ritu, digererentur, quasi totus liber superstitionem Papisticam inde sapuisset, æstro perciti, in illum, illiusque Editorem, tum lingua tum calamo debacchati sunt: præsertim verò duo, viz. *Henricus Burtonus*, Parochus quidam *Londinensis*, in libro (b) qui *Examen Privatarum precum, sive Horologium pro horis orationis* inscribitur, convitiis calumniarumque pleno, ac si antedictus Auctor viam ad unionem cum Ecclesia *Romana* in superstitionis divini cultûs ritibus, cæremoniisque ex industria stravisset; (hic verò, ut hoc obiter addam, ex sententia Adfessorum Curix stellatæ, præcis auribus multatus, postea A. MDCXXXVII. ob quasdam seditiosas, scandalosas, infamesque conciones, eructatas & in lucem editas, adversus Aulam Regiam & Ecclesiam *Anglicanam*, perpetuo carceri addicebatur;) & *Gulielmus Prynnius*, Jurisconsultus,

(a) *Horarium* Regiâ auctoritate editum *Londini* 1560. & postea recusum sub hoc titulo, *Preces privata in studiosorum gratiam collectæ*, & Regia auctoritate approbata, noviter impressæ, & quibusdam in locis etiam auctæ. *Londini* excudebat *Gulielmus Seres*. A. D. 1573. cum Privilegio Regiæ.

(b) *Londini* 1628. 4^o.

non infimûs ex schismaticorum primipilariis, postea ob virulentos ac infames in serenissimum Regem *Carolus* I. & Reginam *Mariam* libellos multatus erat auribus, collistrigio damnatus, & carceri ex sententia eorundem legitimorum judicum quoque mancipatus, edito in lucem publicam scripto, (a) cui inficetus titulus, allusione ad *Cosini* cognomen facta, præfigebatur, censuram, spurcis convitiis oppletam, in illum, tanquam dogmatum *Arminii* fautorem, quasi à *Calvino* & à Synodi *Dordracenæ* placitis in istis articulis controversis, tunc temporis nimio & planè intemperanti ab utrisque partibus zelo agitatis, in crimen hæreseos venisset, petulantissimè strinxit. Sed istiusmodi vociferationes & calumniæ compendium istud è manibus Lectorum excutere non poterant, imò iisdem magis commendabilem reddidere; prout ex editionibus crebrò repetitis abundè constat. In tanta autem librorum ejusdem sacri argumenti, quantivis pretii, & maximi usus, à reverendis Præfulibus & Presbyteris ad quosvis sanctioris vitæ æternæ & beatitudinis fruendæ studiosos, in viis veritatis, pacis, & sanctitatis quasi manu ducendos, ab A. MDCLX. post nimirum extinctam impiam rebellionem, ad hunc usque diem compositorum copia, hic quoque adhuc magni æstimatur legiturque, & cum fructu legetur in perpetuum.

D. *Matthæo Wrenno*, qui olim serenissimo Principi *Carolo* I. dum ille in *Hispania* de nuptiis cum Domina *Maria*, Infanta R. *Philippi* IV. sorore contrahendis præsens egerit, erat à sacris domesticis, ad præfultum *Herefordensem* A. Ch. MDCXXXIV. evecto, illius in præfecturâ Collegii S. *Petri* memoriæ dicati *Cantabrigiæ* successor communibus sociorum suffragiis renunciatus est *Cosinus*. Idem animi vigor in tutandis ritibus & disciplinâ Ecclesiæ *Anglicanæ*, idem in promovendis bonis literis studium illi constabat. Præfectis Collegiorum utriusque Academiae cedit in perpetuæ laudis argumentum, quod illorum vigilantia & fide factum erat, ut perpauca illic tunc temporis degentes Puritanismi labe, quæ per *Angliam* fraudulentis seditiosorum hominum artibus grassari incepisset, inficerentur. Cum verò *Cosini* pietas, eruditio, & summa in rebus Ecclesiasticis moderandis prudentia, illum maximè commendabilem ubivis reddidissent, à serenissimo Rege *Carolo* I. cui erat à sacris, optimo meritorum æstimatore & remuneratore, dignus habitus erat, qui magno Theologo, D. *Thomæ Jacksono*, Collegii Corporis *Christi* in A-

ca-

(a) Briefe survey and Censure of Mr. Coxens cozening devotions. London. 1628.

cademia *Oxonienſi* Præſidi , in decanatu Eccleſiæ Cathedralis *Petroburgenſis* ſuccederet , anno nimirum MDCXL. ut illius aliorumque conſimilium operâ ſchiſmati , quod tum paſſim gliſcebat , ſi quo modo fieri poſſet , obex poneretur. Sed gens occæcata ad ſobriam mentem nolebat reverti , nullis conſiliis , ſuaſibus nullis , imò ne legibus quidem , in ordinem cogenda , quod erat triſtiſſimum futuræ calamitatis omen.

Dum autem *Cosinus* in hiſce laudatiſſimis inſtitutis juxta Canones Eccleſiaſticos , legitima auctoritate ordinatos , dum tranquillitati publicæ , dum honori & utilitati Eccleſiæ *Anglicanæ* , damnum qualicunque innovandi pruritu aliter paſſuræ , dum divini cultus reverendiſſimorum Antifitum , in hoc unicè intentorum ut ab omni confuſione & labe purus & integer ſervaretur , exemplo & juſſu , honori & ſplendori conſuluerit , Pueritanorum atroces calumnias & odium irreconciliabile in ſe derivavit : qui ſub prætextu introducendæ purioris diſciplinæ , ritus ſacros , quaſi ſuperſtitionem redolentes , univerſamque Eccleſiaſticam hierarchiam funditus evertere & delere animis exacerbatis ſummisque viribus annifi ſunt : quod tandem fatuam plebem , cives *Londinenſes* , aliquosque excelsioris notæ , Eccleſiaſticis redditibus , utpote opimis ſpoliis , ſacrilegè inhiantes , ad arma ſub Parlamenti *Westmonaſterienſis* auſpiciis inſtigantes , junctis cum rebellium *Scotorum* Antefignanis conſiliis , illorum proſpero ſcelere animati , non ſine totius Chriſtiani orbis ſtupore , & maximo Chriſtiani nominis ſcandalo dederunt effectum : *Scotis* conſcripto exercitu , poſt fanatico furore abolitum episcopatum , *Angliam* invadentibus , R. *Carolus* I. dum arma parat , ut vim vi repelleret , ſpe tamen melius ſopierendæ funeſtæ iſtius rebellionis , ope ſubditorum noſtræ Gentis , menſe Aprili A. MDCXL. Ordines regni , triſti neceſſitate compulſus , convocavit : ſed ſucceſſu planè irritò. Obſtabat enim quorundam novis rebus ſtudentium perversitas , ne huic ingruenti malo opportunum remedium adhiberetur. Cùm ergò vix quicquam ſubſidii contra rebelles *Scotos* ſibi eſſet exſpectandum , Parlamentum illud diſſolvi juſſit , copiis militariſus ſuo ære conſcriptis conſiſus. Interim recrudelſcentibus publicis malis , militibusque *Scotis* contra fidem promiſſorum non exauctoratis , ſequente Novembre novum indicitur Parlamentum. Puritani opportunitatem toties expetitam jam naſti , facta per univerſam *Angliam* conſpiratione de hominibus furioſis , ſuarumque partium fautoribus , in numerum Senatorum , qui inferiorem Cameram conſtituunt , eligendis pertinaciſſima induſtria ubivis laborant. Ab hiſce infauſtiſſimis initiis , ſtra-

strages illæ, quæ *Britanniam* mox superobruerant, fluxere. Hi verò, quò suis electoribus gratificarentur, de quorundam Procerum, eodem fermento imbutorum, subsidio & suffragiis securi, reformandæ religionis maximam præ se ferunt curam: zelotis *Londinum* undiquaque confluentibus, ut supplices libellos & querelas contra Episcopos & Presbyteros proximæ dignitatis, qui Ecclesiæ saluti promptius invigilassent, contra Curias *excelsæ*, uti vocantur, *Commissionis* & *Camera stellatæ*, olim sapientissimè stabilitas, quibus illorum vesania fuerat suppressa, contra denique Regios Consiliarios, Judices, aliosque Magistratus, quorum fidei civile regimen concredebatur, exhiberent. Commissarii hisce querelis promiscuè audiendis, merè Laïci, deputantur. Coram hisce Inquisitoribus, inter alios viros verè venerabiles sistitur *Cosinus* noster, hac de causa.

Quidam nomine *Smartus*, olim Ecclesiæ *Dunelmensis* Præbendarius, ob contumeliosas seditiosasque conciones in Ecclesia Cathedrali A. MDCXXVIII. habitas, in quibus cæremonias ritusque Ecclesiæ *Anglicanæ*, tanquam scedæ superstitionis manifestos, malesano indoctoque zelo actus, gravissimè debacchatus est, ab ista dignitate, cùm palinodiam canere præfractè recusasset, deturbatus, & omni sacro munere per degradationem exutus, carcerique mancipatus, jam quasi *dies retributionis ac vindictæ*, uti loquebantur, advenisset, *Westmonasterium* properat, mox porrecto supplice Libello, putidissimis mendaciis & convitiis in *Persecutores* suos, uti appellavit, ingestis gravido, & præsertim in D. *Cosinum*, quem primo præ aliis omnibus loco nominat. Criminationes hæc & querelas, absque omni examine avidè admissas, quidam Commissarius ex ordinatione reliquorum Dominis superioris Cameræ defert, oratione, in quâ *Smartum* indebitis elogiis tituloque *Protomartyris Angliæ* in hisce ultimis persecutionis temporibus, exornat, præmissa. Quantas poenas luiturus fuisset *Cosinus*, si vera narrasset infamis schismaticus; quàm multis pecuniis mulctandus, quàm perpetuo carceri addicendus! Ab hisce malis capiti impendentibus, quo pacto sese extricare posset, summa prudentia opus erat. Quid ergo? singulis articulis tum scripto, juramento prius interposito, tum viva voce, cùm responsa adaptasset, innocentiam suam, allatis ex fide rerum & testium argumentis & probationibus, adeò luculenter tutatus est, ut illarum vi convictus Adversarii Advocatus, causa, quam defendendam susceperat, protenus abrenunciata, palam dixerit, se *harum criminationem à Cliente viris in-*

regerrimis impactarum, omnino puduisse nec salva conscientia illius partes amplius sustinere potuisse: multis quoque ex Baronibus, ad quorum tribunal lis ista gerebatur, clarâ voce affirmantibus, Actorem inferioris Cameræ Adfessoribus ejusmodi querelis frivolis nullique fundamento innixis fucum fecisse. Disceptationes istæ ad quintum usque diem producebantur: nec ultra contra *Cosinum* actum erat. Inde demissoria charta facilè impetrata, *Cantabrigiam* redeundi libertas conceditur, interposita tamen cautione se modo esset accersendus, iterum compariturum. Sed ab omni molestia deinceps erat cessatum. (a).

In hisce difficillimis temporibus h. e. A. MDCXL. *Cosinus* Academiæ *Cantabrigiensis* Vice-Cancellarius constituebatur, quod egregium munus summâ cum prudentia & fortitudine administravit: Postea verò, cum serenissimus Rex ob seditiosos civium aliorumque tumultus Urbem relinquere cogeretur, omni præsidio, quo Majestatem Regiam tueretur, vacuus, pecuniis utpote publicis, arcibus, tormentis, pulvere pyrio, reliquoque bellico apparatu in armamentariis reposito, à Senatu *Westmonasteriensi* occupatis, destitutus, ut hisce necessitatibus, quantum in illis erat, subveniretur, *Cantabrigienses* vasa argentea aliamque pretiosam suppellectilem, & pecunias numeratas illi circa annum MDCXLII. deferri curarunt.

Quanti verò hæc fides, hæc debita in Regem, omnium rerum egenum, liberalitas illi constaret, tristis eventus demonstravit. Nam rebellione adulta cum militares Parlamentariorum copię, numero longè superiores, vicinos comitatus in suam potestatem redegissent, de visitanda Academia sub *Mancestrię* Comite statim decretum erat. De illorum violentia, crudelitate, rapinis & sacrilegiis, non est, quod hinc multa referam. Venerabiles Collegiorum & Aularum Præfecti & Socii, qui fidem integram & intemeratam servavêre, Ministellorum & mili-

X

tum

(a) Videat curiosus Lector, si libet ipsius *Cosini* literas Apologeticas, scriptas *Parisiis* Aprilis VI. A. MDCLVIII. contra *Fulleri*, qui hæc omnia nimio erga Presbyteranos affectu abreptus, non mala fide, saltem iniquè prorsus parte inaudita altera, repræsentavit, cavillationes, & à D. *Petro Heylino*, strenuo Ecclesiæ *Anglicanæ* Pugile, in appendice examinis & animadversionum in Ecclesiasticam *Britanniæ* Historiam ejusdem *Fulleri*, Rhapsodiam potius nuncupandam, indoctam, ineptam, omni judicio, profundâque rerum indagine vacuam, foedisque erroribus scatentem A. MDCLIX. editas.

tum fannis & insectationibus expositi, citra omnem humanitatem malè habiti, & contra jus fasque muneribus suis vi armatâ exuti, aut in Regia castra non sine ingenti periculo transferunt, aut apud amicos clam latuere, Patriæ malis ingemiscientes, aut de vertendo solo cogitant. Hoc est juxta Presbyteranos *reformare Ecclesiam & Academias*. Eandem enim horrendam sortem, Rege debellato, subire cogitur Academia *Oxonienfis*. Non aliter cati homines, rerum potiti, credebant, se securos fore de schismate propagando, de anarchia introducta, de sacrilegis possessionibus, & Præfulum Ecclesiarumque Cathedralium redditibus impiè arreptis, aut prosperæ rebellionis fructu & beneficio diu posse frui, quod maximè cupiebant, nisi hisce præclarissimis veræ & antiquæ, tum erga Deum & Christum, tum erga Regem fidei seminariis, hoc modo, uti blaterabant, *purgatis*. Mox post diram hanc cladem *Cantabrigiensem*, funestissimo bello magis magisque exardescente, rebusque deploratissimis, *Cosinus*, omnibus suis dignitatibus & fortunis exspoliatus, cum sibi nullum præsidium ab schismaticorum insultibus & insectationibus fore, satis perspectum habuisset, relicta *Anglia*, A. MDCXLIII. *Galliam* aufugit, quem nimirum horror carceris in exilium coëgit.

Cosinus fixas sedes habuit *Parisiis* jussu serenissimi Regis, *Caroli* primi, præcipuè ut viris sceminisque clarissimis è familia Regina consortis, qui erant Protestanticæ communionis, domesticis, in sacris & spiritualibus ministraret, ibique primò in privatis ædibus, postea confluentibus *Anglis*, à patria extorribus & Parlamentariorum tyrannide expulsis, in sacello amplissimi & optimi Viri, D. *Richardi Bruni*, Equitis Aurati & Baronetti, à Serenissimo Rege *Carolo* I. ad *Ludovicum* XIII. Regem *Gallia*, ad publica negotia procuranda, quibus ob prudentiam politicam, subacto judicio firmatam, fidemque integerrimam, erat, si quis alius, maximè idoneus, Ablegati, omnia sacrae religionis munia juxta Ecclesiae *Anglicanae* institutiones, subindè obire solebat, quo tempore *Angli* zelotæ *Romanae* communionis, versipellis ingenii homines, omnia loca vociferationibus, tum irrisoriis, tum orantibus, complebant, ut nostrates incautos, *Parisiis* potissimum tanquam ad asylum confugientes, facilius & plausibilius fallerent, eosdemque à fidei Catholicæ, in Ecclesia *Anglicana* retentæ & assertæ, doctrina & professione seducerent, jam actum esse de Ecclesia *Anglicana*, nec quicquam spei de ipsius restau-
ratio-

ratione amplius relictam; omnia, hæreticis pravisque opinionibus apud nos in *Anglia* introductis, & sacro regimine Episcopali penitus everso, illic vacillare & confundi; & ipsius constitutionibus sublatis, ad finem Ecclesiæ *Romane* sibi redeundum esse oportere, si salvi esse vellent: sed ejusmodi argumenta ab horrendis rerum vicissitudinibus ducta, qui paulò perspicacioris erant ingenii, contra universos Christianos sub *Decii*, *Diocletiani*, aliorumque Imperatorum, in illos ex insano idololatriæ amore sævientium, lanienis, & præsertim sub *Constantio* & *Valente*, *Ariana* hæreseos fautoribus, dira passos, pariter valuisse, facillè viderunt. Ecclesia *Anglicana* nunquam erat gloriosior, quam sub cruce. Milleni illius alumni, nullis minis, persecutionibus nullis succubere, Conventus sacri, ringentibus schismaticis, clam ubique habiti, omni metu aut carceris aut mulctarum abjecto, qui cum Episcopis Sacerdotalibusque ritè ordinatis in sacris integram retinere communionem. Ecclesiam *Anglicanam* gravissimè afflictam & externum illius splendorem periisse veris lamentis deplorabant omnes boni, sed non penitus destructam fuisse, quod illis exprobrabant Adversarii, tantus fidelium in *Anglia* relictorum numerus, etiam hoc sacellum quod exules sub fide publica & jure gentium muniti, singulis festis ac Dominicis diebus frequentes adierunt, fecit testatissimum. In immortalem laudem cedit admodum reverendis D. D. D. *Bramhallo*, *Cosino*, *Erlo*, aliisque fortissimis Confessoribus, quorum pietati, constantiæ, ac indefessæ in concionibus habendis, in Liturgicis sacris celebrandis, in disputationibus, si qua provocatio cum nostratibus adversæ partis Patronis, intervenisset, denique in scriptis edendis industriæ, adstipulante divina gratia, adscribendum est, quod Ecclesia *Anglicana*, licet domi miserimum in modum oppressa & sub jugo Presbyteranæ tyrannidis ingemiscens, foris in exteris plagis, & præsertim in *Gallia*, sub D. *Richardo Bruni* Equitis aurati, Viri nunquam satis laudandi, qui per novemdecim annos usque ad restauratam anno MDCLX. Monarchiam ista Legatione ibi summa cum laude functus est, auspiciis & tutelâ, quasi triumphos ageret & quod perpauci vacillantes & infirmæ mentis ad Pontificios, illa relictâ, deficerent.

In horum censu (neque enim illud celandum arbitror, quod ille in summæ infelicitatis loco posuit,) numerandus venit *Cosini* filius, in Grammaticali Jesuitarum schola, prout apud alios Protestantes moris erat, ut linguarum *Græcæ* & *Latinae* cognitione imbueretur, Patre ni-

mium facilè id concedente, educatus, juvenis sanè incautus, & in abstrusis Theologicis dogmatibus malè intellectis & pro judicii defectu inexploratis nimium sibi placens, fraudibusque Præceptorum, fide violata, irretitus: qui contra omne jus divinum humanumque à Patre mox abreptus, nullis, ut ut blandis, interpellationibus & monitis, argumentis suasibusque nullis, præ perversa ipsius obstinatione & subdolis fallacibusque seductorum artibus, ad sobriam mentem tunc temporis revocari potuit. Ad alios ergo confirmandos, ne hoc domestico exemplo ad similem defectionem pertraherentur, majori industria advertit animum. Cùm Serenissima Regina, *Henrica Maria*, Regis *Caroli I.* uxor, famulos nostræ communionis, qui illam, prout debita fides exigebat, in *Galliam* secuti sunt, apud se retinuisset, illorum intercessionibus, effectum erat, ut *Cosino* hoc modo in clientelam benignissimæ Dominæ adscribendo, quem Patrem ac Directorem in spiritualibus voluere, ædiculæ, illi illiusque familiæ recipiendis satis commodæ, unà cum qualiquali annua pensione, in *Lupara*, Palatio Regali, ubi illi habitarent, assignarentur: quod non parum ad sublevandam rerum, qua laborabat, inopiam conducebat.

Anno MDCXLV. cùm Emissarii pro versutia illorum machinas novas ad fidem nostrorum expugnandam adhibuissent, quasi, ex quo tempore, integra Reformatione introducta & legum civilium sanctionibus stabilita, Papismum ex *Anglia* expulisset Regina *Elisabetha*, nulli essent apud nos Episcopi & Sacerdotes, utpote ut more solito calumniati sunt, non debita consecrandi sacra elementa, sive ut veteratores isti loqui amant, *conficiendi Corpus Christi*, ob verborum in Ordinationis formula defectum, potestate pollentes, neque juxta Ecclesiæ Catholicæ Canones ritè ordinati, *Cosinus* ad hanc novam palæstram lacescit (non enim, ut dixi, temerè & præcipiti zelo sese istiusmodi litibus ingessere Theologi nostri in alienis terris, ubi Religio Romana dominatur; ne in τῶν Δουλασευόντων offensam & censuram incurrerent) acrem habuit cum D. *Robinsono*, *Anglorum* Benedictinorum Priorè, modo illo nomine & titulo nuncupandus sit, *de ordinationum Ecclesiasticarum in Angliâ factarum validitate* disputationem, postea scriptis pro tempore continuatam, donec à respondendo abstinuisset iste Monachus: (cujus summam & compendium ad reverendum Virum, D. *Georgium Morleium*, αὐτῆς ἀδελφὸν καὶ συγκαινωνὸν ἐν τῇ θλίψει, tunc in *Belgio* exulantem, scriptis, nondum in lucem publicam productis, postea complexus

plexus est) ex qua hunc fructum commodumque lætus, ut accepi, percepit, quod nobilissimus ille vir, cujus importunis precibus ista concertatio inita erat, in communione nostra confirmatior redderetur.

Post fatale illud & funestum prælium inter *Scotorum* exercitum & *Cromwellianos* tertio Septembris MDCLI. apud *Wigorniam* commissum, Serenissimus Rex *Carolus II.* qui imperterritito animo interfuerat, à mille periculis, per tot tantosque itinerum circuitus & ambages, magna *Angliæ* parte peragrata, viis publicis ab armato milite, aliisque sceleratis hominibus, infestis, proposita ingenti ad illum, ne elaberetur, interceptiendum mercede, obstupescenda faventissimi Numinis providentia, ereptus, post trimestre spatium tandem, à littore *Suxsexiano* solvens, maritimas *Galliæ* oras salvus appulit, moxque se *Lutetiam Parisiorum* recepit, summa lætitiâ à Regina matre, fideliumque subditorum gratulationibus exceptis: quò, inter alios, nobilissimi Viri, fidelissimi & sapientissimi Consilarii, D. *Jacobus* Marchio, postea Dux, *Ormondia*, *Hiberniæ* Prorex, & D. *Edwardus Hydus*, olim Scaccarii, deinceps merito suo magnus *Angliæ* Cancellarius, paulo antè ex *Hispania*, post peractam legationem, in *Flandriam* reversus, extemplò properârunt. Memoratu dignum censeo, Regem, dum illic ferè per triennium manserit, diebus ordinariis in sacello privato *Luparæo*, diebus festis & dominicis in ædibus Ablegati sui, sacris religionis officiis, *Cosino* & *Erlo* illic quoque publicè alterna vice ministrantibus, assiduè interesse consuevisse, omnibus proposito constantiæ in Ecclesiæ *Anglicanæ* fide & doctrina exemplo, pro quibus tuendis augustissimus Paterens, triumphata Parricidarum rabie, ferali pegmate obtruncatus, universo orbe Christiano, impiissimum istud execrante facinus, gloriosum passus est Martyrium. Quo tempore, h. e. circa A. MDCLII. D. *Hydi* qui honori, salutis, ac juribus Ecclesiæ *Anglicanæ* pari zelo in exteris regionibus, prout occasio tulerit, ac olim, & postea domi, consuluit, rogatu, *Cosinus* illius religionem Catholicam, castam, & à Pontificiorum corruptelis defœcatam, disciplinam, regiminisque formam, universum denique statum, quem ne centesimus quidem è Clero *Gallicano*, sive ex ignorantia, sive ex præjudiciis injustis maleque fundatis intellexerit, brevi compendio, quod ex autographo jam publica luce donare operæ pretium duxi, demonstravit: cum politicæ quædam rationes in causa essent, quod in ista urbe tunc temporis non imprimeretur. Hujus sanctissimæ & verè Christianæ religionis se stre-

num propugnatorem & pugilem præstitit, inque illius vindictis, omni bona occasione captata, contractis omnibus ingenii & industriæ nervis, nulli labori pepercit. Nec longum ab ejusmodi concertationibus, oppugnationibusque induciarum aut quietis dabatur tempus. Rex enim *Carolus*, vi foederis inter *Gallos* & *Cromwellum*, absque illa conditione, non aliter ineundi, ut Cardinalis *Mazarinus*, qui omnia tunc sub juvene Rege *Ludovico XIV.* despotica plane potestate moderabatur, in tam tetraë atrocitatis, contra omnia hospitalitatis jura, perpetrataë defensionem, caussatus est, è *Gallia* exire coactus, novas, in quibus aliquantisper conquiescendum erat, in *Germania* sedes quæsit : quem in istis peregrinationibus comitari sapienti ac pia apud se deliberatione habita, præfractè statuit *Cosinus*. Sed Rex ipse intercessit, noluitque Protestantes subditos, quibus jam per multos annos utilissimam impenderat operam, illius præsentia orbari : cujus jussibus sibi obsecundari pro pietate sua, invitus licèt & quasi reluctante animo, fas duxit. Sed non diu altera de novo exsurgens illum de rebus gravissimis ad religionem spectantibus consulendi deerat occasio. Dum Rex extorris *Colonia Agrippina*, vicinisque regionibus huc illuc discurrens, ageret, Jesuitæ, præsertim *Angli*, Principum, sub quorum ditione erat, monitis & instigationibus acti, sive ex infano suo zelo, insidias, quibus illum fidissimosque Assceclas ad fidem suam pertraherent, indefinenter parabant, vana ac fallaci spe, se in hoc certamine religioso tandem aliquando fore victores. Dum, inter alia, dogma Transsubstantiationis, quod nostrates, ut planè novum, & monstrosum, & ab omni sensuum fide & experientia, à Philosophiæ placitis, à principiis denique Christianæ Theologiæ, & ab omni sacrarum scripturarum auctoramento alienissimum, ingenti cum horrore rejecerint, per omne ævum inter Christianæ fidei articulos fuisse admissum, more solito mirâ quadam confidentia clamosè admodum jactaverunt, rem totam cum *Cosino*, quem in scriptis Patrum legendis & in omni historia Ecclesiastica versatissimum pro comperto habuerant, communicare consultissimum videbatur, ut quod hisce strophis & versutiis opponeretur, sibi in subsidium præsidiumque haberent. Quorum ut justis piisque satisfaceret desideriis, ille sine morâ figmentum illud esse, primis ac sequioribus quoque seculis inauditum, malisque artibus introductum, discussa Papalis istius transsubstantiationis universa historia, inibi tamen tum S. Scripturæ, tum veterum Patrum, & Reformatarum Ecclesiarum, doctrina

trina Catholica de sacris symbolis & præsentia Christi in sacramento Eucharistiæ assertâ, adeò luculentis invictisque argumentis, libello illuc transmissso abundè refutavit, ut hac ex parte non amplius impeterentur. Dissertationem hanc historicam, postquam in paucorum manibus, quasi sepulta jacuisset, utpote dignissimam, quæ clara luce ab omnibus legatur, venia ab ipso Auctore paulò ante obitum impetrata, Vir reverendus & apprimè eruditus, D. Durellus, Ecclesiæ Dunelmensis Præbendarius, & postea Decanus Windsorensis, A. MDCLXXV. Londini edendam curavit.

Horis subsecivis studiis Theologicis non minus animum intendebat Cosinus, tum ut de universa religione Christiana, tum speciatim ut de Ecclesia Anglicana scriptis in omne ævum victuris benè quidem mereretur. Quò huic sancto proposito meliùs satisfieri posset, observationibus, quas ex Patribus Historiisque Ecclesiasticis cujuslibet seculi jam à longo tempore collegerat, methodo felici digestis, *scholasticam canonis sacra Scriptura, sive certorum indubitatorumque librorum, prout in Ecclesia Anglicana recipiuntur, Historiam*, amploque apparatu absolutam, & sermone vernaculo scriptam, opera Viri eruditissimi, D. Petri Gunningi Londini MDCLVII. (uti postea A. MDCLXXII.) edi curavit: quam admodum reverendo Patri, D. Matthæo Wrenno, Eliensi Episcopo, olim ob fidem erga Regem & Ecclesiam præstitam à senatu Westmonasteriensi in turrim Londinensem conjecto, ibique tunc temporis sub arcta custodia detento, non sine maximis elogiis, inscribi impensè voluit. Opus sanè summo cum judicio elaboratum, omnibusque numeris perfectum: in quo tum veteris Judaicæ Ecclesiæ, tum Christianæ & Apostolicæ, testimonia recensentur, producta nimirum per omnia secula, usque ad A. MDXLVI. h. e. ad tempus Synodi Tridentina, quæ novum Scripturæ Canonem arrogantissimè tum condidit, de quo, neque ipsam Romanam Ecclesiam, neque quancunque aliam, ubi Christianum nomen vigeat, unquam antea audivisse ille nervosè probavit. Omittendum hîc non est, Cosinum istius Historiæ calci Auctorum, quorum testimonia inibi produxerat, brevem *Tabulam chronologicam*, juxta illorum particulares uniuscujusque seculi ab ipsis æræ Christianæ initiis annos subjecisse: contra quam acerbam censuram præter omne jus & æquum strinxit Philippus Labbe Jesuita, in appendice in alteram partem Dissertationis *de Scriptoribus Ecclesiasticis* editæ Parisiis A. MDCLX. pag. 811. cavillationibus nimirum prorsus ineptis de quibusdam annis illic

illic perperam signatis, de ætate præcisa, in qua aliqui dicuntur floruisse, ad calculos non rigidè exacta, & de uno aut altero ex Scriptoribus illis Ecclesiasticis non debito & recto ordine dispositis, illaudabili industria affatim congestis: interim oblitus, quàm multos gravesque errores longè majoris monumenti ab ipso paritèr admissos, postquam librum suum sedato animo relegisset, corrigere suarum esse partium duxerit: & cardinem controversiæ, quam intactam reliquit, in istis temporum minutiis excutiendis neutiquam verti aut posse aut debere. Sed non opus erit in ejusmodi exceptionibus, ne dicam convitiis, quæ in *Cosinum* aliosque Reformatæ Communionis magni nominis Scriptores, pro genio suo & ex prætextu *Catholici zeli* evomuit, in apricum explicatius producendis, cùm id à nostro proposito sit prorsus alienum, diutius immorari.

Erubescant jam schismaticorum filii de parentum avorumque convitiis, mendaciis, & calumniis in *Cosinum*, aliosque præclaros hujus Ecclesiæ Confessores, ubique per populum ex industria sparsis, quasi sub pientissimi & fortissimi Martyris, G. *Laudi, Cantuariensis* Archi-Præfulis, auspiciis, ductu & præsidio, Papismum in *Angliam* essent introducturi; quorum innocentiam ab hisce Presbyteranorum criminationibus & maledicentiis prorsus immunem intactamque fuisse, integramque fidem, innumeri libri, adversus Pontificios ab iisdem editi, in æternum testabuntur.

Multa alia opera Theologici argumenti, puta *Annales Ecclesiasticos, Historiam Conciliorum, & Chronologiam sacram*, congesta observationum mole, condere & Latinè edere constituit: hæc verò sive sacris functionibus, quæ omne illud tempus, hisce studiis aliàs impendendum, occupaverint, sive ægritudinibus malisque ex calculo, præsertim ingravescente ætate, supervenientibus, impeditus, imperfecta reliquit: ut varios tractatus MSS. *Anglicè* scriptos, ab ipso elimatos, repetitisque curis excussos, (quorum meminit vir reverendus & doctissimus D. *Isaacus Basirius*, Ecclesiæ *Dunelmensis* Præbendarius, & Archidiaconus *Northumbriæ*, qui defunctum, egregia funebri concione habita, pro rostris laudavit) de controversiis cum Pontificiis, dum in *Gallia* maneret, agitat, omittam, à quibus edendis licèt ille ex modestia abstinendum duxerit: vix tamen illud ultimi Testamenti Executoribus, quod in Ecclesiæ *Anglicanæ* commodum & honorem, & publicam utilitatem nondum in lucem exiisse passi fuerint, in excusationem cedere posse arbitror: quod illos vel quoscunque alios, in quorum scriniis adhuc delitescunt, tandem
factu-

facturos, acri hac contestatione monitos rogatosque, ardentissimis votis opto precorque.

Celari neutiquam aut decet aut debet, quod postea crimini & probro objiciebatur, ut mox videbimus, illum longa apud *Parisienses* mora arctam cum viris reverendis & doctissimis, D. D. D. *Amyraldo*, *Dallao*, *Gachao*, aliisque, ut nuncupantur, *Ecclesiæ Carentoniana Pastoribus* amicitiam coluisse, & ad testandam illam, qua erga illos ferebatur, charitatem, eorundem concionibus interdum interfuisse: nec obstabat iste in ritibus formaque regiminis Ecclesiastici ante sesquiseculum introducti dissensus, quominus illos, in præcipuis Catholicæ religionis capitibus & articulis unanimos & concordēs, fraterno affectu complecteretur, qui reciprocante affectu erant ad omnia officia paratissimi. Horum enim permisso virum clarissimum D. *Guilielmum Carnabeum* Equitem auratum, superpellicea linea veste indutus, juxta ritus in libro Liturgico præscriptos, in cœmeterio *Carentoniano*, frustra indignante & opponente Parocho Pontificio, sepulturæ mandavit: ut & plures in altero juxta *Parisiōs*, in sterquilinia, fossas, aliaque immunda loca, pro effero Pontificiorum zelo cæteroquin abjiciendos. (a) Illorum infantes, subinde & occasione data, illis petentibus, sacro tinxit baptisinate, alios connubio junxit juxta ritus nostros, approbantibus quoque Ministris, & ad sacram Eucharistiam admisit, quosdamque Theologiæ studiosos, sacroque ministerio destinatos, ab Episcopis communionis *Anglicanæ*, siqui forte ibi aderant, Diaconos & Presbyteros, distincta collatione, juxta Ordinale nostrum, fieri & ordinari, promote, ad majorem solennitatem, Concionatoris munere fungens, curavit. Cùm verò *Galli* Protestantes in istis temporum angustiis, dirissimisque, quibus majores involuti essent, circumstantiis *ordinationibus* *Episcopalibus* destituerentur, misericordia & charitate uti, putabat, verè Christiana erga illos incensus non se nimio & præcipiti æstu abripi passus est *Cosinus*, quasi non veri fuissent sacrorum Ministri, nullaque esset legitima apud illos sacramentorum administratio. Ideò à D. *Cordello*, viro pio, qui istiusmodi scrupulos in mente dubia aluerat, *Blesis* tunc agente, an cum iisdem integra conscientia communicare posset, A. MDCL. consultus, hac re accuratissimè perpensa, literis responsoriis, quarum *Apographum* apud me retineo, pari judicio ac pietate exaratis, *salvo tamen Ecclesiæ Anglicanæ jure*, illud, præsertim in casu

Y

ne-

(a) V. literas Apologeticas supra citatas.

necessitatis, & etiam aliàs, sub certis, interposita protestatione, conditionibus, admitti posse, non dictatorio more statuit, sed sub moderamine inculpatæ tutelæ, concessit, permisitque. Veruntamen hac prudenti moderatione, hac pia charitate, hâc restricta indulgentia, non modicam apud unum & alterum è Confratribus, in *Gallia* tunc religionis & fidei causâ exulantibus, quorum nominibus parco, invidiam & odium, imo & acerrimam censuram sibi conscivit, quasi hac ex parte Ecclesiæ, tum Catholicæ, tum Anglicanæ, jura tradidisset, indeque ex consequenti Presbyteranis *Anglicanis*, seipsos, abdicatione, à quo tanquam à fonte, reliqui sacri ordines canonicè fluunt & derivantur, Episcopatu, ab impii schismatis, quod scelestissimam rebellionem, horrendasque istas clades, quæ postea secutæ, induxit, reatu tuendi ansam dedisset. Quid ille interim? Equidem satis sibi conscius, multisque argumentis convictus, longè disparem *Gallorum* & nostratium rationem haberi oportere, & quotidiana conversatione & experientia compertum habens, illos ordinem Episcopalem venerari, calamitatibus Ecclesiæ afflictissimæ indolere & miserescere, ritus, quibus in divini cultus officiis utimur, innocentes & ab omni superstitione Papisticâ puros, approbare & Liturgiam *Anglicanam* juxta primitivæ Ecclesiæ formulas compositam esse patente ore promptoque animo fateri; à quibus omnibus quàm maximè abhorrent Sectarii nostri, nullo aut necessitatis aut justæ secessionis à communione Ecclesiæ prætextu excusabiles, hæc impropéria censurasque, quas nimis exacerbata mentis fervor dictarat, ne dicam, invidia & æmulatio, quæ viris optimis quandoque ex humanæ infirmitatis vitio solent irrepere, patienti, imo & forti, animo, tulit contempsitque, nec unquam, uti videtur, hujus Christianæ & pacificæ *εὐχαισβάσεως* se poenituit. Interim tamen Presbyteranorum, Independentium reliquorumque Sectariorum sacrilegam alieni juris usurpationem, perfidiam, perjuriam, & impudentiam in sacris ministeriis ex propriâ auctoritate, quæ planè nulla est, sibi arrogandis, flagranti & justissima quidem indignatione usque ad extremum vitæ halitum detestatus est.

Monarchia A. MDCLX. conspirantibus universi populi *Britannici* animis, restituta, post septendecim annorum exilium in patriam reversus est *Cosinus*, qualem qualem publicæ felicitatis fructum modicamque partem percepturus. Cùm verò omnes illum summos quosque honores ob consummatam sapientiam, eruditionem, fidelitatemque ubivis testatissimam meruisse

ruisse concorditer censuissent, ille, omni ambitione vacuus, perpeffiones suas Ecclesiæ *Dunelmensis*, cui primùm designabatur, Decanatu, abundè compensari pro egregia animi æquitate existimavit: nec aliud redhostimentum aut petiit, aut expectavit. Serenissimus verò Rex, cui illius ingentia merita & excelsæ dotes erant à multis annis perspectissimæ, longè aliter sentiebat, neminemque, qui ad istius Ecclesiæ Episcopatum, præcipuè post *Londinensem* dignitatis, ob jura regalia ad comitatum Palatinum pertinentia, amplamque civilem jurisdictionem illi antiquissima consuetudine annexam, amplissimisque redditibus dotatum promoveretur, digniorem esse pro prudentia sua judicavit. Mox canonica electione jussu regio pro more peracta prima Dominica Adventus, secundo die Decembris ejusdem anni, in Abbatiali *S. Petri Westmonasteriensis* Ecclesia, una cum sex aliis, ritè consecratus est, ipsius Sacellano, *D. Guilielmo Sandcrofto*, postea merito suo ad sedem Metropoliticam *Cantuariensem* evecto, viro optimo & sapientissimo, cum summis istius sacri & maximè venerandi Confessûs laudibus concionem habente: quam Patrono suo, cujus jussu edita erat, magnificâ inscriptione præmissâ, dedicavit.

Quamprimùm per publica regni negotia licuit, venerandus noster Præsul, *Dunelmum* se contulit, ingenti gaudio obsequiosisque gratulationibus, à vicinis generosioris prosapiæ civibusque in urbem, ubi magnum sui desiderium olim reliquerat, decora pompa deducantibus, exceptus. Jam prima cura instabat, omnia, quæ in turbatissimis temporibus miserè distracta, & confusa jacuissent, pristino nitori, quantum fieri potuit, restituendi, & divinum cultum disciplinamque in Ecclesia Cathedrali, impia sectariorum rabie nuper polluta, juxta veterum statutorum normam, additis quoque novis, redintegrandi: viris & piis & doctis, in partem curæ venientibus, in locum Præbendariorum pridem defunctorum, quos fanaticus furor exegerat, itidem suffectis. Deinde universam Diœcesin sapienti consilio visitavit, ut contra fanaticos Ministros, qui aliorum beneficia Ecclesiastica, Rebellium patrocínio suffulti, occupaverant, populo à Deo, Rege, & Ecclesia sibi commisso, melius provideretur. Sed hac illius aliorumque Præsulum diligentia non fatis ab ista labe purgata erat Ecclesia *Anglicana*, donec anno sequente, viz. MDCLXII. ex decreto Parlamentario de uniformi in precum publicarum formulis, sacramentorumque administratione, praxi & consensu, aliorumque rituum & cæremoniarum usu, cujuspiam mu-

neris sacri incapaces, pœnisque obnoxii redderentur, nisi qui hætenus vafre & dissimulanter egerint, bonis legibus morem gesserint. Non aliter aut regni tranquillitas, aut Ecclesiæ salus salva & integra servari poterat. Civilium igitur legum sanctionibus pariter ac potestate Episcopali munitus, in iis, quæ deerant, corrigendis, rebusque componendis & moderandis, contra schismatis, nondum penitus sopiti, licet publicis legibus damnati, reliquias, alacriore animo perrexit. Inferiorem Clerum omni cum paterno affectu, sine supercilioso fastu, sine tetrica asperitate, non tanquam Dominus, sed Frater in *Christo*, excipere & amplecti solebat: interim tamen de singulorum vita, moribus, exemplo, doctrina, diligentia, & disciplinæ Ecclesiasticæ rituumque observantia maximè sollicitus, & si quid aliqua ex parte deliquerint, monitis primùm & objurgationibus, deinde in inemendatos & pervicaces acri censura animadversurus. Inter alia statuebat, ut quotidiana religionis officia bis singulis diebus publicè legerentur, ut quotquot erant ad pietatem propensiores, à necessariis vitæ occupationibus liberi, sacro cultui simul adesse possent; insuperque nolebat illos pro nuperorum temporum licentia, sive conceptas, sive extemporaneas preces, in quibus malas de religione opiniones dementatæ plebis animis vafri homines sub ferventioris zeli & sanctimonix specie & prætextu plausibiliùs & faciliùs instillare consueverint, concionibus, præmittere: revocato in usum Canone nostræ Ecclesiæ quinquagesimo quinto: quo brevi & in genere omnes monendi sunt, pro quibus & in quorum gratiam Deo supplicare oportuerit. Exploratissimum est, & à nemine quoque negandum, olim cautum fuisse, ne preces privatæ, cujusque arbitrio & lascivienti ingenio relictæ, in sacris publicis cœtibus recitarentur. Ferunt, & fortasse quidem non dubiâ fide, *Carturritum*, Puritanorum sub temporibus R. *Elisabethæ* Antesignanum, earum usum in suis conventiculis, inhonestis quidem de causis & conculcata Ecclesiæ auctoritate, primò introduxisse.

Tanta verò tamque assidua sedulitate, quantum humanæ vires passæ sunt, Clericis, illius spirituali ditioni subditis, invigilavit D. *Cosinus*, ut nullibi terrarum fortean aut sanctius aut prudentius sacrum istud munus præstaretur, sed in illius laudes nimium effusus videbor; nolo quippiam meritissimæ reliquorum venerabilium Episcoporum, qui partibus suis laudatissimè perfuncti sunt, famæ detractum iri: quorum omnium eximia pietate, indefessa industria, pastoralique

cura optimè administrata, *Anglia*, perpetua pace & tranquillitate, fuisset beata, si per vafra primùm, deinde palam vi apertâ erumpentes, Presbyteranorum & Democraticorum machinationes licuisset.

Nemo magis pro dignitate, quam adeptus est, vixit, illamque meliùs sustinuit. Nemo vicinos nobiles, quosvis peregrinantes, civesque ad mensam admissos (ut illius effusam in egenos largitatem præte-ream) majori hospitalitate & animi promptitudine excepit. Sed absque omni vana profusione & luxu, prout Episcopum Christianum, juxta mandatum Apostolicum, maximè decebat: cujus, à tempore, quo ante triginta annos Præbenda primùm auctus fuerat, dum res domesticæ manerent prosperæ, erat retinentissimus: ad quam etiam (uti & ad canonicam residentiam sine quæsitis impetratisve quovis prætextu dispensationibus) uti olim exemplo suo, jam repetitis monitis publicisque adhortationibus frequens exstimulavit.

Opimum Episcopatum invenit D. *Cosinus*: sed longè opimiorum reliquit: annui nempe oneris octingentarum octoginta librarum sterlingarum post mortem Reginae matris, ob ablatum jus tutelæ pupillorum isti sedi antiquo jure annexum, nec à se neque à successoribus suis deinceps exigendi, remissione à benignissimo Rege procurata.

A Rege Magnatibusque ob pietatem morumque gravitatem, ob judicii firmitatem & acumen, ob sapientiam denique multiplici lectione, diligenti studio, longoque rerum usu, acquisitam magni habitus. Ordinibus regni Regio jussu convocatis, in Superiori camera Parlamenti, cujus non modica pars fuit, si quippiam magni momenti quoquo modo ad Ecclesiam, resve Ecclesiasticas spectans, in disputationem venisset, illo perorante, illustrissimi Proceres, avidis auribus oculisque intenti, ejus sententiæ non sine quadam delectatione & reverentia auscultare visi sunt. Cujus hoc insigne exemplum dabo. In acerrima lite inter illustrissimum quendam Virum & uxorem illius, violati connubialis thori manifestis indiciis ream, de nuptiis post divortium contrahendis agitata, ille tandem sententiam rogatus, non temerè & leviusculè, sed deliberato animo, libratifque alterutrinque argumentorum momentis, longa, eaque gravi, oratione, disseruit, se quidem opinari, vinculum illud matrimonii adulterio dissolvi, & ex consequenti maritum, qui tantam injuriam, introducta spuria prole, passus est, ad secundas nuptias admitti debere, nec illud liberis ex nova

sponsa procreandis, in cernenda hæreditate fraudi fore. Cùm verò per Ecclesiasticas leges *Anglia* id fieri non liceret, reliquos omnes Præsules, si unum & alterum excipias, sibi adversos & dissentientes habuit. Post multos dies, collectis suffragiis, numerosioribusque ad sententiam, quam tutatus est D. *Cosinus*, propendentibus, prius illud matrimonium ab omni vinculo solvi, & planè irritum fore, ac si nunquam fuisset initum, aut morti succubuiisset scæmina, lege Parliamentaria decernitur. Hoc maximè solenni decreto præeunte, (exempla enim neque consistunt, neque consistere possunt, ubi primum incepère) idem ter quaterve eadem auctoritate factum fuisse in consimilibus causis ante paucos annos vidimus. Ne typis publicis exscriberetur hæc Dissertatio, omnem cautionem, uti videtur, adhibuit D. *Cosinus*: veruntamen multis post ipsius obitum annis, versuta eorum, quorum intererat, industria, emerfit in lucem, ut alteri congeneris argumenti causæ in eadem suprema Curiâ patrocinaretur. An rationes illæ, quæ ibi proponuntur & exstant, invictam cogendi mentem ad assentiendum vim habeant, nec ne, judicent alii. Hoc tantùm addam, quod à quodam illustrissimo viro me olim accepisse memini, D. *Cosinum*, strenuum hujus causæ patronum & vindicem, illo ipso die, quo res hæc gravissima, sine ulteriori aut disceptatione aut appellatione esset absolvenda, tunc abfuisse, nec suffragium aliquantulo tempore antecedente, aut vivâ voce aut scripto dedisse.

In hac eminente dignitate constitutus, & omnium rerum copia cumulatisque opibus felix, probè in mentem revocans, hujus villicationis à supremo Domino sibi concreditæ rationem tandem reddendam, sacrosque redditus non ad ditandas privatas familias, ut inde in feros nepotes amplæ hæreditates derivarentur, à piis munificisque Benefactoribus Deo & Ecclesiæ donatos fuisse, sed in majorem Dei gloriam, divini cultus, illiusque Ministrorum, splendorem & decus, ac pietatis bonarumque literarum incrementum, impendi debere, quibus modis divinæ benignitati, quæ ipsi centuplum in hac vita reddidisset, votisque omnium respondere posset, quaquaversum oculos animumque seriò intendit. Ante omnia verò de castellis sive palatiis, antiquis Decessorum sedibus *Dunelmi* & *Anklandiæ*, uti etiam *Darlingtoniæ*, sacrilego Fanaticorum ausu & furore dirutis, ac omni apparatu nudatis, post instauratam Ecclesiam Cathedralem, quod sibi proprium erat, cogitavit; & quod auspiciatò aggressus est, post paucos annos auspiciatissimè absolvit; sedecim ferè mil-

millibus nostrarum librarum in illorum integra fabrica & ornatu impensis; facella inibi, (quorum illud *Anklandia*, flagrante rebellione Parliamentaria, pulvere pyrio eversum, è fundamentis exstruxit & consecravit A. MDCLXV.) argenteis vasis deauratis, libris sacris & Liturgicis, organis musicis, reliquoque decoro apparatu, non in sui solius, sed successorum usum instrui curavit: quorum omnium valor ad mille libras exsurgebat. Ad egenos in omne ævum alendos cum proxima accesserit cura, duo Xenodochia ibidem quoque fundavit & dotavit, duasque quoque Scholas sub nupera rebellione dirutas in viridario juxta palatium *Dunelmi*, iterum exædificavit; itemque prope Scaccarium ibi situm Bibliothecam publicam, in communem Literatorum usum condidit, librisque suis, (saltem quoad maximam partem) quos ingenti sumptu & industria per quinquaginta annos collegerat, refertam, addito fundo, ut novis accessionibus aliqua ex parte magis magisque inclaresceret; & vicariam parochiæ *Anklandia* sedecim librarum stipendio in perpetuum augeri voluit: nec tacendum duco, licèt id ineluctabilis quædam necessitas exegisse videretur, illum octingentas libras in ripis prope mare, quo agrorum suorum prædialium fines pertigerint, contra aquarum furentium impetus reparandis reficendisque expendisse, fundum quoque tunc temporis *Collegium* nuncupatum, quem turbulentissimis temporibus occupaverat infamis iste rebellis, *Haslerigus*, à Rege *Carolo* ipsi & hæredibus datum, successoribus suis ultimis tabellis consignarit & largitus est. Sed non angustis unius urbis aut comitatus limitibus munificentiam suam circumscribi & coarctari passus est. Præsulibus *Anglicanis* tunc temporis crebræ dabantur effusæ liberalitatis exercendæ occasiones. Inter hos *D. Dunelmensis* trecentas libras pro redimendis nautis aliisque, è nostratibus à prædonibus *Algirensibus* in mare mediterraneo captis, contulit, quingentas etiam ad inopiam militum, qui Regiis partibus stetissent, quibus aliunde non erat provi- sum, sublevandam, ducentas item libras & quod excedit, instaurandæ *S. Pauli Londin.* ecclesiæ. Non unum verò amoris sui ac benevolentiae in *Collegium S. Petri Cantabrigiæ*, cui olim præfuerat, indicium ac testimonium, quamdiu ædes sacræ bonæque literæ à barbarorum invasionibus intactæ & integræ perstabunt, exstare quoque voluit. Hoc Sacellum novum, ipsius pecuniis pulcherrimè resectum, hoc Alumni quinque, singuli nimirum perpetuo decem librarum stipendio donati, hoc denique Bibliotheca, mille libris ab illo illuc transmissis, aucta, & cista communis testabuntur. Munificus quoque erat, licèt non pari propor-
tione,

tione, in Collegium ubi olim fuerat socius, in quo præter annuam pensionem communi cistæ addendam, tres Scholares perpetuo viginti librarum redditu alendos esse constituit, qui, uti & priores, *Episcopi Dunelmensis Alumni* omni tempore erant nuncupandi: dumque facellum Collegii *Emanuelis* de novo condendum esset, pro amore, quo erga sacras ædes ferebatur, symbolam qualem qualem, quinquaginta libris dono datis, contulit. Hæc aliaque minoris momenti, quæ à me in hac compendiaria recensione omittuntur, ille in ultimas tabellas quasi in acta publica, referri curavit, non ostentationis & jactantiæ causa (hoc enim averfissimo animo ibi expressissimè deprecatur) quasi rem magnam fecisset, sed tum ut se ab omni avaritiæ nota & labe purgaret, tum ut ingentes istas pecuniarum, quas ex elocatis terris suis per septem annos perciperet, summas, non in suos privatos usus conversas & abalienatas fuisse in omnem memoriam in Archivis Curiae Prærogativæ *Cantuariensis* luculentiùs constaret.

Post tot tantaque benefacta nemo mirabitur, aut invidabit, aut probro & vitio illi vertere jure poterit, quod filias quatuor Viris generosioris prosapiæ, lautis patrimoniis gaudentibus, congruis dotibus assignatis, prout bonum & amantissimum decebat parentem, sapienti delectu elocaverit: quarum natu minimam dedit in uxorem D. *Dionysio Granvillo*, illustrissimi Viri, *Joannis Comitis Bathoniæ* fratri, tunc temporis Ecclesiæ *Dunelmensis* Præbendario, & mox Decano. Unicum habuit filium, cujus iterata à communione Ecclesiæ *Anglicanæ*, ad quam redierat, secessio perennem dolendi Patri, quoad vixerit, materiem suppeditavit: interim tamen paterna misericordia erga immorigerum filium, qui se per quatuor annos subduxisset, non amplius visendus, annuam centum librarum pensionem, ut quod reliquum erat vitæ sine alienis subsidiis, omnique egestatis aut periculo culo aut metu procul amandato, toleraret, solvi jussit. Cùm jam ex acutissimis calculi doloribus, hydrope pectorali, malisque aliis; connectuti admodum provectæ quotidie accrescentibus moriendi tempus non procul abesse, imò potius instare videri sensisset, tabulis testamentariis renovandis condendisve & ultima manu signandis confirmandisque, intellectu, judicio, & memoria illæsis, sensibusque manentibus integris, animum operamque applicuit Decembris undecimo A. MDCLXXI. in quarum prima parte, Latinè à se scripta, fidei Christianæ & verè Catholicæ adversus infames veteris ævi hæreticos, item doctrinæ & discipli-

plinæ Ecclesiæ *Anglicanæ*, contra Pontificios pariter ac sectarios, professionem, quam in Appendice edendam curabo, piè & animosè exhibet: in altera de sui ipsius exequiis & supultura, itemque de bonorum temporalium, quæ supererant, dispositione amplum in modum agit. Sed cum tædiosum & tum nostratibus tum exteris, in quorum gratiam commentarium hunc scribo, prorsus ingratum foret huic specialiùs insistere, summatim dicam, quod post legata filiabus illarumque liberis, etiam filio immorigero, cognatis, affinibus, amicis, & famulis relicta, pauperibus *Dunelmi*, *Auklandiæ*, *Petroburgi*, & *Norwici* degentibus, aliisque illic aut *Cantabrigiæ* ære alieno oppressis, & in carceribus detentis, ducentas libras in partem solaminis distribuendas ordinavit: cavitque non sine ingenti sollicitudine, ut quæsitis repertisque, quotquot superessent, liberis & nepotibus *D. Joannis Haynard*, olim Præbendarii *Lichfieldensis*: singuli viginti librarum honorario donarentur: quod profitetur se in grati erga Parentem animi *πνευµόσπουον* & indicium jam facturum, ex cujus commendatione potissimùm in *D. Overalli* familiam clientelamque primis juventæ annis adscisceretur.

Hujus testamenti quatuor Executores, ut verbo nostro forense utar, constituit, quos honoris causa hîc nominabo, viz. *D. Theman Orby*, Equitem Auratum & Baronettum, *D. Joannem Durellum*, Præbendarium *Windsoriensem* & *Dunelmensem*, *Georgium Davenportum*, Virum doctissimum, ipsi à Sacris domesticis, & *Milonem Stapiltonum*, Armigerum, ipsius Secretarium, quorum omnium fides, probitas, amicitia & prudentia erant ipsi longo usu exploratissimæ.

Hac sarcina deposita, ad solam cœlestium divinarumque rerum contemplationem se componit, & ad portum æternæ quietis & tranquillitatis, post tot tantasque in hac vita, tanquam in procelloso mari, aberrationes & jactationes, anhelans, animam, ad Beatorum sedes avolaturam, procuratis omnibus religionis juxta Ecclesiæ institutiones officiis, cœlesti viatico munivit: & jam mox expiraturus, Deo Opt. Max. pro pace Ecclesiæ & divini cultus puritate ferventissimis precibus exorato, liberis, & nepotibus, Presbyterisque, qui humillimè rogârunt, circum adstantibus, benedictionem suam impertitus est. Ita reverendissimus Pater, postquam Ecclesiam *Dunelmensem*, summa cum laude & sanctissimis vereque Pastoralibus curis, undecim annos rexisset, satur dierum in ædibus conductis in vico vulgo vocato *Pel-mel* in suburbiis *Westmonasteriensibus*, placidè obdormivit in

Christo, (quem verbis divini Apocalyptæ, *veni Domine Jeshu, veni citò*, extremo vitæ halitu invocavit) septuagesimo octavo ætatis anno, XV. die Januarii anno reparatæ hominum salutis, juxta computum Ecclesiæ Anglicanæ, millesimo sexcentesimo & septuagesimo primo.

Per inclementiam hiemis lutosasque vias difficile istud longumque iter in Septentrionales *Angliæ Scotiam* versus plagas citò ingredi non licebat: sed adulto vere admodum solenni pompa ex Urbe elatum est funus, præeuntibus, quò exequiæ fierent honoratiores, duobus Heraldis *Anklandiam* usque, ubi corpus sepeliendum jussisset Antistes noster. Illic concurrente ingenti spissaque virorum omnium ordinum, viz. Cleri, nobilium, civium, & plebeiorum multitudine, *D. Basiro*, uti antea dixi, concionem funebrem habente, & admodum reverendo Viro, *D. Guidone Carletono*, Episcopo *Bristolienfi*, istius Ecclesiæ Præbendario, officium sepulturæ juxta Ecclesiæ nostræ ritus celebrante, XXIX. die Aprilis A. MDCLXXII. in crypta sacelli ædium Episcopaliū reconditus est. Monimento, marmoris nigri, quod sibi in medio sacello vivus erigendum curaverat, hanc Epigraphen, relictis lacunulis, quæ hîc supplentur, sine omni affectatione & fastu à se scriptam, incidi voluit:

In non morituram memoriam Joannis Cosini, Episcopi Dunelmensis, qui hoc Sacellum construxit, ornavit, & Deo consecravit, anno Domini MDCLXV. in festo S. Petri: obiit XV. die mensis Januarii anno Domini MDCLXXI. & hîc sepultus est, expectans felicem corporis sui resurrectionem, ac vitam in cœlis æternam.

Requiescat in pace.

Uti & in ambitu minoris saxi ad quatuor latera hunc S. Joannis Apocalyptæ versiculum in quatuor incisa divisum.

Beati mortui, qui moriuntur in Domino:

Requiescunt enim à laboribus suis.

Post simplicem hanc rerum, quam solo amore & reverentia Veritatis incitatus, brevi hoc compendio scripsi, narrationem, ne utiquam opus erit, ut elogiis magni hujus & optimi Viri aut quærendis

rendis aut ampliandis , me sollicitiùs & importuniùs ingeram. Cùm *optimum* appellaverim , faceſſat omnis obtreſtatio , quaſi illum ab humanæ vitæ aberrationibus , quibus cuncti mortales urgentur , aut ſubitaneis efferveſcentis bilis correptionibus prorsus immunem & eximendum fuiſſe credidiſſem. Exagitent , ſi velint aut poſſint , illius nomen & famam iniquiſſimi cenſores , ſive *Romanenſes* , ſive Sectarii : at ceſſantibus calumniis , invidia , & partium ſtudio , (ſi tamen per illorum immortale odium , irreformabilemque perversitatem ceſſantibus) nullus dubito , quin omnes boni & cordati Lectores , veri Eccleſiæ *Anglicanæ* filii , in eandem ſententiam mecum ituri ſint , D. *Cosinum* nimirum de Religione , de Eccleſia , de Patria , deque bonis literis , tam ſcriptis , conſtantia , & fide in temporibus periculoſiſſimis uſque ad omnium bonorum temporalium jacturam ſervata , quam exemplo , & fideliffima ſacri muneris , cùm Presbyter eſſet , & poſtea in ſupremo Sacerdotii ordine conſtitutus , adminiſtratione , & denique munificentia , præclare admodum meruiſſe , & inter eminentiſſimos Eccleſiæ *Anglicanæ* Præſules . in Hiſtoriæ Eccleſiaſticæ Gentis noſtræ ſaſtis & annalibus æternitati conſecrandos , jure merito recenſeri debere.

R E G N I
ANGLIÆ RELIGIO
CATHOLICA,

Prisca, casta, defœcata:

Omnibus Christianis Monarchis,
Principibus, Ordinibus ostensa.

Anno MDCLII.

Auctore JOANNE COSINO, tunc temporis
Ecclesiæ Cathedralis *Petroburgensis* Decano, &
postea *Dunelmi* Episcopo.

31

R E G N I ANGLIÆ RELIGIO CATHOLICA,

Prisca , casta , defœcata :

C A P U T I.

Perpetua Religionis norma.

Perpetua nobis in Ecclesiâ *Anglicanâ* religionis & fidei nostræ *norma* hæc est :

Unus canon, à Deo in duo Testamenta relatus.

In iis enim, quæ apertè in S. Scripturâ posita sunt, continentur illa omnia, quæ fidem spectant, moresque vivendi.

Post illa, Instrumenta nobis authentica sunt

Tria Symbola,

Quatuor priora Concilia,

Quinque secula, &

Catholicorum Patrum per ea series ac consensus.

In his enim invenitur & explicatur Fides illa prima sanctis semel tradita, prisca, casta, & defœcata, absque hominum corruptelis & assumentis novis.

Ea denique, quæ in sequioribus seculis huic primæ non repugnat, Theologia.

C A P. II.

Sacra Dei Scriptura.

Recipimus & amplectimur omnes Canonicas Scripturas, tum Veteris, tum Novi Testamenti.

Quas semper ante oculos habemus, ne vel humanâ fraude, vel insidiis Dæmonum, ad errores & fabulas abduceremur.

In illis solis posse hominum animos acquiescere ; in iis omnia, quæ sunt ad salutem necessaria, inveniri ; eas esse fundamenta Prophetarum

& Apostolorum, in quibus ædificata est Ecclesia Dei; normamque certissimam, ad quam omnis doctrina Ecclesiastica debeat revocari; & contra quam nec legem, nec traditionem, nec consuetudinem ullam sequendam vel audiendam esse, profiteamur & firmâ fide credimus.

C A P. III.

Antiqua fidei Symbola.

EA fides nostra & doctrina est, quam complectitur
 Symbolum Apostolicum,
 Symbolum *Nicanum*,
 Symbolum *Constantinopolitanum*,
 Symbolum *Athanasianum*;
 Confessio *Ephesina*, &
 Confessio *Chalcedonenfis*.

Quæ omnia firmissimis S. Scripturæ testimoniis comprobari possunt.

Ista autem Symbola non modò continent, quæ credere Christianum hominem oportet, sed omnibus etiam eandem *ὑποτύπωσις ὑγιαίνοντων λόγων* præscribunt.

Novum igitur fidei Romanæ Symbolum, quod nec in S. Scripturâ legitur, neque inde per ullam evidentem aut solidam consequentiam probari possit, quin & ab eâ prorsus alienum est, totique Antiquitati penitus incognitum, procul à nobis amandavimus.

Neque enim verum est, (imò à *veritate & verbo Dei* quàm maximè abhorret) fidem sive *Tridentinam*, sive *Lateranam*, esse Catholicam, aut extra nuperam professionis fidei formulam, à Papa *Pio IV.* & *Tridentinis* excogitatam, neminem posse esse salvum.

C A P. IV.

Quatuor prima Concilia.

Magnam in Ecclesiâ & saluberrimam Conciliorum auctoritatem esse dicimus, sed eorum, quæ à Catholicis, doctis & piis Viris celebrata sunt, quæque à sanâ & infallibili S. Scripturarum doctrinâ nullatenus recedere aut deviare perhibentur.

Qualia sunt Vetera Concilia, quæ sancta & Universalis Ecclesia recepit,

cepit, quatuor illa prima Oecumenica, & quæ ab illis approbata, quæque iis postea fuere consona.

Ea enim omnia unicè amplectimur, atque in tantum venerati sumus, quòd (quoad substantiam quidem dogmatum) etiam legum illis vim in publicis regni Comitibus conciliandam curavimus: adeò ut nemini apud nos liceat eis publicè contradicere.

Reliqua verò, quæ sequioribus seculis à Pontificiis habita sunt, Concilia, & vel contempto vel prætermisso verbo Dei celebrata, (quibusque illi maximè nunc nituntur) nos missa facimus. Sicut enim Oecumenica ea non fuisse, certò scimus, ità in multis non minimi momenti decretis, tum à doctrinâ Apostolorum, tum à regulis sanctorum Patrum aberrasse, nimis manifestum est.

Porro summum Concilii cujusvis Præsidentem, alium, quàm *Christum* quærere aut agnoscere nefas ducimus. In Oecumenicis autem *πρωτοβουλιας* Papalis non usus magis quàm jus olim penes Romanum fuit Pontificem, qui nec illis præfuit, nec interfuit, neque suâ unquam auctoritate ea indicendi aut cogendi potestatem habuit, uti ex antiquissimorum Conciliorum Actis & Historiâ Ecclesiasticâ vel cuivis non prorsus excæcato evidentissimè liquet.

C A P. V.

Quinque priora Patrum secula.

SCRIPTA sanctorum Patrum in mysteriis fidei consentientium, (qualia multa recta & salubria nobis reliquerunt) tum ob sublimem illorum eruditionem & Spiritûs sancti gratiam, quâ præ cæteris eos imbutos esse constat, tum propter ipsorum pietatis ac veritatis testimonium, non solum atramento obsignatum, sed multorum quoque sanguine sancitum, meritò magnam apud nos existimationem & auctoritatem habent.

Quò enim propiùs ab Apostolorum temporibus abfuerunt, tantò rectiùs *veritatis* doctrinam intellexisse, puriùsque & incorruptiùs explicuisse creduntur, præsertim ubi unanimes sunt, & in rebus fidei idem sentientes.

Idcirco quia testantur inprimis universi de origine & auctoritate S. Scripturæ Canonice, plurimi etiam utilissimos sacrorum Librorum Commentarios scripserunt, *hæreses* suorum temporum strenuè profligarunt,
Histo-

Historiam de *Ecclesiâ Dei* laudabili diligentîâ consignarunt, & nervosis sententiis studium pietatis inflammant, ad frequentem eorum lectionem (non sine prudentiâ tamen & iudicio exercendam) nostros omnes in sacris Ordinibus constitutos, literisque imbutos sedulò adhortamur.

Quinetiam ut toti simul orbi Christiano constaret, nos nullam in *Angliâ* vel religionem fovere, vel fidem profiteri, nisi quæ verè Catholica & communi priscorum Patrum consensu recepta, atque ex S. Scripturis firmata fuerit; hujusmodi decretum verè quidem aureum, in Ecclesiâ nostra sancitum est, ac unâ cum Articulis religionis promulgatum A. D. MDLXXI. cap. de *Concionatoribus*.

Inprimis videbunt, nequid unquam doceant, quod à populo religiosè teneri & credi velint, nisi quod consentaneum sit doctrinæ Veteris ac Novi Testamenti, quodque ex illâ ipsâ doctrinâ Catholici Patres & veteris Ecclesiæ Episcopi collegerint.

Nempè ità animati sumus, ut nec quidquam à quoquam credi cupimus, nisi de quo constet ex sacro Dei verbo in scriptis tradito, & quod consensu Apostolicæ primævæque Antiquitatis probari possit.

Sacræ igitur Scripturæ ità traditionem subjungimus, ut hæc illi semper subordinata sit, & per omnia congrua.

Quod enim Apostoli vivâ voce prædicârunt, hoc ipsum scriptis (quæ suâ naturâ doctrinæ rerumque memoriæ fidelitèr conservandæ maximè sunt idonea) posteris suis tradiderunt. Et vicissim, quæ ad hunc modum ab illis tradita fuere Viri Apostolici veterisque Ecclesiæ Episcopi quotidie sermonibus & continuata prædicatione inculcabant, & praxi ipsâ exprimebant; atque adeò sincerum Christianismum & quæ doctrinam, & quæ ritus, & quæ mores, ad posteros propagârunt.

Traditiones autem de quibus neque Apostoli neque Episcopi, ab Apostolis instituti, horumque successores proximi nec quicquam testantur, nobis *traditiones* legitimæ non sunt, & quod illi neque docuerunt, neque cognoverunt, *Apostolicum* aut Catholicum censerî non debet.

Antiquitatis consensus patescit è Symbolis potissimum & Confessionibus, quas prisca Ecclesia unanimitèr in Conciliis edidit, & ætas postera universim (quâ latè patet orbis Christianus) recepit. Quicquid autem non unus aut alter tantum, sed omnes pariter uno ore eodemque consensu apertè, frequentèr, perseverantèr tenuisse & docuisse cognoverimus, id nobis quoque pro indubitato ratoque habetur. Quicquid verò, quam.

quamvis ille sanctus & doctus, quamvis Episcopus, quamvis Confessor aut Martyr, sibi extra sacram *Scripturam*, & *consensum Ecclesiæ* arrogaverit, posterisve tradiderit, quod ipse à Patribus & Christi Apostolis non recepit, id inter proprias occultasque & privatas opiniones à communis, publicæ, ac Catholicæ sive universalis sententiæ auctoritate secretum esto; cui equidem non sine magnæ arrogantix, & temeritatis notâ quisquam derogaverit.

C A P. VI.

Hæreses repudiata.

DOCTRINAM Catholicam, quam in Ecclesiâ Apostolicâ, in Oecumenicis & veteribus Conciliis viri Deo dilecti professi sunt, etiam & nos profitemur; quam rejecerunt, velut ab eâdem religione Catholicâ alienam, etiam & nos rejicimus; hæreses, quas illi damnârunt, & nos damnamus; earumque Magistros pariter & Discipulos universos detestamur: viz. *Cerinthianos*, *Gnosticos*, *Montanistas*, *Novatianos*, *Arianos*, *Photinianos*, *Manichæos*, *Pelagianos*, *Donatistas*, & eorum propagines, quibuscunque tandem nominibus appellentur.

Quin & si forte erumpant uspiam, ac sese vel blasphemos in Deum, vel seditiosos in Principem, Ecclesiam aut Rempublicam ostendent, eos tum legitimis censuris Ecclesiasticis, tum civilibus suppliciis, coercendos esse, omni, quâ possumus, diligentia curavimus.

C A P. VII.

Novitates rejectæ, superstitiones depulsæ, & religionis corruptela sanata.

QUÆ sive temporum vitio, sive hominum nostrorum incuriâ, sive *Romanensium* improbitate in Ecclesiam nostram irreperant, aut palam introductæ fuerant intolerandæ penitus ineptiæ, doctrinæ novæ, & praxes peregrinæ, eæ apud nos ex verbo Dei præscripto, in Synodo legitimè congregatâ, publicisque Regni Comitibus, jamdudum reformatæ sunt.

Nulla nobis Romana nunc fides non scripta, nulla *Novatorum* quorumcumque religio. Vanas enim hominum traditiones, & nuper nata dogmata (quæ testimonio, cum sacræ Scripturæ, tum piæ antiquita-

tis, omninò destituta sunt) procul à nostris amandavimus, & in una Catholicâ veritate, religione, ac fide, primitùs nobis traditâ acquievimus.

Coram pictâ, sculptâve, & vestibus ornatâ, similitudine nosmetipsos non incurvamus.

Id quod nescimus, in Reliquiis, adeoque in Hostiis & Imaginibus, nequaquam adoramus.

Eâ, quam non intelligit *populus*, *linguâ* sacra nostra non celebramus.

Illos, in quos non credimus, non invocamus.

Sacram Eucharistiam mediâ parte non mutilamus.

Romanam Ecclesiam nec aliarum omnium Ecclesiarum, nec nostræ, Matrem aut Magistram esse agnoscimus.

Figmentum Transsubstantiationis, fumum Purgatorii, fermentum meriti, iteratum Christi Sacrificium, à quovis Sacerdote pro vivis & defunctis quotidie offerendum, auctoritatem Romani Episcopi in omnes omnium per universum Christianorum orbem Ecclesias, Papalium Conciliorum decreta, & Synodi *Tridentina* anathemata, (quæ sub jacturâ æternæ salutis pro articulis *fidei*, extra quam nemo potest esse salvus, inauditâ à seculis audaciâ, Papa *Pius* quartus recipienda esse mandavit), tanquam carcinomata & spongiosa religionis avitæ tubera, penitùs ab Ecclesiæ nostræ corpore resecaimus; atque adeo sanitatem & nativam pulchritudinem eidem restituimus.

C A P. VIII.

Religio prisca, verè Christiana Catholica & stabilita.

AB avitâ Patrum & Antecessorum religione, quâ Christianâ, quâ Catholicâ, nullatenus recedimus; neque ab ullâ uspiam Ecclesiæ Catholicæ parte (in hac ipsâ religione & fide adhuc permanente) secessionem aut scissuram facimus.

Eandem enim religionem, curam, cultumque Numinis divini retinemus, qualem ipse nobis Christus verbo suo, Apostoli, eorumque vestigiis inhærentes *Patres*, exemplo suo & praxi commendârunt.

Disciplinam Ecclesiasticam, quantum maximè potuimus, ad antiquioris Ecclesiæ mentem revocavimus, omnemque vitæ licentiam & morum dissolutionem, quâ par erat severitate, latis legibus compescuimus.

Regni statum eo quo accepimus loco, & supremam Principis Majestatem

tatem Regiam sine ullâ vel imminutione, vel mutatione incolumem conservavimus; externæ verò dominationis Romanæ (cui nec divino nec humano jure obstricti eramus) indebitam auctoritatem & jugum excusimus.

De omnibus denique religionis Christianæ dogmatibus, quæ tum ad pacem Ecclesiasticam & Civilem spectabant, tum ad salutem æternam erant necessaria, uno ore, unoque spiritu, cum aliis quibuscunque hominibus, Deum Patrem Domini nostri Jesu Christi ritè colentibus & invocantibus, firmiter convenimus.

Fundamentis salvis, diversitatem ut opinionum, ità quoque *rituum* & cæremoniarum circa res juxta enatas & minus necessarias, in aliis Ecclesiis, quibus nobis præsidendum non est, amicè, placidè, & pacificè ferre possumus, atque adeo debemus.

Quinetiam reliquis ubicunque terrarum Ecclesiis Christiano nomine censis, & verè Catholicam religionem fidemque profitentibus, si nos actu aliquando jungi prohibet sive distantia regionum, sive dissidia hominum, sive persecutio & dissipatio fidelium, sive aliud quodcunque obstaculum; semper tamen animo & affectu jungimur, (id quod de Protestantium præsertim *Ecclesiis* intelligi cupimus) reapse eum demonstrare parati, cum justâ aliquâ ratione demonstrandi occasione obtulerit. Qualem ab illis vicissim animum & affectum nobis etiam demonstrandum instantèr deposcimus.

Eis verò, qui malè consulti nos iniquis odiis & convitiis insectantur, ignoscat Deus, & meliorem mentem inspiret.

Dandam enim nobis existimamus operam, quantam ex Dei gratia possumus, *ut pacem sectemur cum omnibus & sanctimoniam, sine quâ nemo videbit Dominum.*

Denique, exercemus nos *ad conscientiam habendam sine offensâ apud Deum & homines.*

Atque hæc est summa nostri Christianismi.

Convitium, quòd quandoque Lutherani sumus, quandoque etiam Calvinistæ protritum jam est. Fuit *Lutherus* Vir doctissimus, singularibus donis eximioque animi robore à Deo instructus, ut veritatem Evangelii, errorum tenebris passim ferè in hisce Occidentalibus Ecclesiis obstructam; in lucem apud suos exterosque multos clariorem revocaret. Infallibilis verò haud fuit, nec sine verbo Dei & testimonio Antiquitatis (cujus erat scientissimus) ipsi aliquid asserenti credimus. Habet &

Calvinus laudes suas meritissimas: nemo tamen nostrum eum pro Magistro habet, aut in illius verba jurare (sicut in *Pontificis* effata quilibet *Papista*) paratus est. Tanti ille apud nos est, quanti esse debet apud omnes, hoc est, quanti rationes, quas in qualibet pro se affert, nec pluris. Quod si non magis *Paparum* dictatis decretisque addicti essent, qui nunc à nobis appellantur *Pontificii*, quàm nos vel *Luthero* vel *Calvino*, vel cuicunque tandem mortalium, non essent, qui jam nunc sunt, atque meritò à nostris audiunt.

Definant igitur nobis tum *Lutherum* tum *Calvinum* exprobrare. Tam non *Lutherum* vel *Calvinum* sequimur, quàm nec ipsum Papam, ubi hic vel illi à S. Scriptura & veterum Patrum in fide Catholicâ consentientium vestigiis discedunt.

Ex his omnibus manifestum est, novam in orbem aut Ecclesiam nostram *Anglicanam*, religionem invec̃tam non esse, nec ex principiis nostris invehi potuisse vel debuisse, quin & integram & illibatam mansisse; atque retentam esse eandem religionem Christianam ac Catholicam, quâ substantiam suam, quæ pridem fuerat, quæque sola nos & Antecessores nostros in gremium Ecclesiæ introduxerat, salvosque reddere poterat. Abusus enim corruptelæ, errores, & dogmata quæ partim inscitia & temporum injuria, partim præposterus quorundam zelus, partim, & potissimum quidem, avaritia hominum & ambitio adjecerat, partes religionis non sunt, nec ad essentiam aut corpus Ecclesiæ magis pertinent, quàm ad corpus hominis tubera & ulcera eidem accrescentia; quibus tandem sublatis, non in aliud mutatur corpus, sed idem ipsum manet, quod antea fuit, pristinæ interim sanitati & pulchritudini suæ naturali restitutum.

Summa est: Quæ perspicuo & certo Sacrarum Scripturarum, & his subjunctæ primorum seculorum traditionis Ecclesiasticæ testimonio ac consensu comprobari poterant, apud nos steterunt inconcussa, reliquis suapte imbecillitate corrudentibus, & à majoribus nostris diligenter eliminatis. Quod autem ad ritus & cæremonias attinet innoxias, eæ, quæ ad decorem & ordinem maximè facere videbantur, retentæ nobis atque constitutæ sunt.

C A P. IX.

Ordo Ecclesiasticus.

QUos omnis agnovit & venerata est Antiquitas, ritè ordinatos de Clero habemus, Diaconos, Presbyteros, & supra utrumque ordinem, Episcopos. Presbyteros de mediâ plebe, nec in Clero positos, Apostolis & Veteri Ecclesiæ inauditos, non novimus; non Diaconos sacris nunquam initiatos, annuos bimulosve, pòst munere exuendos; non mutilum Episcopis Clerum, quorum series nullo unquam tempore apud nos interrupta est, nec in eis consecrandis Canon antiquus Apostolicus aut *Nicanus* violatus.

Ordinem enim amplectimur tuemurque verè Ecclesiasticum, & ab Apostolorum temporibus per totum Christianum orbem receptum, quo nihil equidem cum S. Scripturæ regulis & exemplis, tum Ecclesiæ & Reipublicæ statui magis consentaneum.

C A P. X.

Consecratio & munus Episcoporum.

Consecratio Episcoporum (omni sublatâ superstitione) à tribus ad minimum Episcopis, ordine prius Episcopali constitutis, per invocationem Spiritûs Sancti, & impositionem manuum peragitur, præmissâ tamen tum solenni Liturgiâ, (quæ lectionum ac precum formula est eidem negotio congruenter aptata) tum sacrâ concione de Pastoris in gregem munere & officio; subsequente verò sacrâ Eucharistiâ ab omnibus Episcopis & Clero tum præsentis, frequentique gravissimorum hominum cœtu celebratâ.

Porro Episcoporum sive Pastorum munus apud nos non nudum tantum nomen, sed res est, Presbyteros & Diaconos ordinare, Curatos Ecclesiarum instituere; Clerum & populum in rebus sacris dirigere, diligenter concionari, ignaros instruere, immorigeros punire, contumaces & graviter delinquentes excommunicare, hæreticos pertinaces condemnare, Clericos inertes, facinorosos, & inobedientes ab officio & beneficio suspendere, deprivare, deponere, & pro delicti magnitudine degradare, universam Diœcesin quolibet triennio visitare, in blas-

phemos, idololatrias, fortilegos, schismaticos, simoniacos, ebriosos, incontinentes, adulteros, incestuosos, & id genus alios, si qui reperti fuerint, animadvertere, initiatos in fide confirmare, Ecclesias & loca sepulturæ dedicare; causas denique matrimoniales & testamentarias cognoscere, atque in omnibus, quæ jura spectant Ecclesiastica, quæque ad pietatem, justitiam, & sobrietatem pertinent, omni, quo possunt, nisu, officium suum præstare & adimplere.

C A P. XI.

Ordinatio & munus Presbyterorum.

Presbyterialis potestatis in Ecclesiâ propagandæ Minister inde ab Apostolorum temporibus semper fuit Episcopus.

Apud nos igitur sacram Antiquitatem, quantum possumus, per omnia sequentes, Presbyteri postquam examinati, atque ad tantum munus idonei reperti fuerint, ab uno Episcopo per invocationem Spiritûs Sancti, impositionem manuum sacri Codicis traditionem & verborum Christi (*Accipe Spiritum S. quorum peccata &c.*) prolationem solenni more ordinantur, assistentibus eidem Episcopo in impositione manuum Presbyteris tum præsentibus.

Præmittitur verò Liturgia sacra, unâ cum concione & subsequitur Eucharistia.

Presbyterorum in Ecclesiâ nostrâ munus & officium est, populum illorum fidei curæque commissum, omni adhibitâ industriâ, ad veram Dei cognitionem & vitæ sanctimoniam perducere, diebus Dominicis & Festis Evangelium prædicare, preces matutinas & vespertas quotidie recitare, sacris lectionibus diligentè attendere, sacramenta religiose & reverenter administrare, ægrotos visitare, afflictos consolari, poenitentes absolvere, aliaque quæ illis incumbunt, divina officia peragere, ad omnem denique sese sobrietatem & pietatem componere; decenti & Clericali habitu incedere, moresque & vitam universam ad normam sacrarum Scripturarum ac receptæ apud nos disciplinæ regulas instituere.

C A P. XII.

Ordinatio & munus Diaconorum.

DIaconi à solo Episcopo per impositionem manuum & nominis divini invocationem ad obeundum, quod iis incumbit, officium ordinantur.

Ad illos autem pertinet sacras Scripturas & Homilias publicâ auctoritate editas diligenter populo perlegere, in celebratione divinorum officiorum ac distributione Sacramenti cœnæ Dominicæ Presbyteris assistere, juniores in articulis fidei & Catechismo erudire, infantes baptizare in absentia Presbyteri, de conditione pauperum & ægrotantium inquirere, aliquando etiam prædicare, si ad id muneris ab Episcopo censeantur idonei; denique omni studio sic vitam moresque suos ad regulas Christianæ religionis & Ecclesiasticæ disciplinæ dirigere, ut quantum in illis fuerit, salutaria aliis exempla semetipsos præbeant.

C A P. XIII.

Liturgia.

IN ordinatione Liturgiæ hoc inprimis observatum est, quod per omnes hujus regni Ecclesias una jam & eadem divinarum Læctionum, cantionum, & precum publicarum forma habetur, cum antea plurimis retrò annis alii *Salisburiensem*, *Eboracensem*, aut *Lincolniensem*, alii alios usus sequerentur; ex quo cum æmulationes prævæ, tum rixæ & contentiones, nimium sæpè inter ipsos oriebantur.

De multitudine otiosarum cæremóniarum, quibus Ecclesia nostra plus satis erat onerata, magnum numerum refecavimus.

Retinuimus tamen, atque etiamnum colimus, non tantum ea, quæ ab Apostolis scimus fuisse tradita, sed etiam alia quædam, quæ sine Ecclesiæ incommodo & religionis detrimento fieri posse videbantur; ea verò omnia, quæ cum sacris literis pugnabant, & sobriis hominibus indigna essent, meritò repudiavimus.

Porro constitutum est, ut omnia eâ linguâ psallantur & legantur, quam

quam nostri intelligunt , quæ veteres universi sub utroque Testamento & precati sunt ipsi & populum precari docuerunt.

C A P. XIV.

Officium Matutinum & Vespertinum.

DIvinorum officiorum celebratio , tam manè quàm vesperè , nobis quotidiana est. In Ecclesiis *Cathedralibus* & *Collegiatis* consuevimus omnia voce sonorâ & cantu Musico peragere , in *Parochialibus* verò & *Capellis* minoribus simplici tantum lectione ea recitare.

Presbyter , veste Ecclesiasticâ indutus , incipit matutinas & vespervas à selectissimis S. Scripturarum sententiis , quibus Auditorum animi ad pœnitentiam & pietatis affectum excitantur.

Excipit illas gravis admodum ad populum exhortatio , quâ moventur omnes errata sua coram Deo publicè confiteri , ut absolutionem ab iisdem consequantur : simul invitantur ad agendas Deo gratias pro suis in nos maximis collatis beneficiis , ad debitas ipsi laudes in Psalmis & Hymnis decantandas , ad auscultandum sacris lectionibus , ex ipsius verbo depromptis , atque ad ea piis precibus efflagitanda , quæ tum ad corporis , tum ad animæ salutem sunt necessaria. Hæc enim summa est totius *Officii*.

Sequitur Confessio ab omni populo humiliter genuflexo post Presbyterum recitata , atque Absolutio ab ipso tantum Presbytero generali verborum forma , & erecto corpore pronuntiata.

Deinde Sacrorum Minister altâ voce orditur orationem Dominicam , quæ omnium Officiorum , Laudum , & Precum subsequen-
tium fundamentum est.

Post usitatos versiculos , (*Domine labia nostra aperias* &c.) unâ cum responsis , & *Gloria Patri* &c. cantatur Alleluia , & Psalmus XCV. ad laudes Dei invitatorius , quem & alii sequuntur , singulis eo ordine & numero ita dispositis , ac per singulos dies distributis , ut infra mensis spatium totum Psalterium finiatur.

Psalmos alternatim recitados sequuntur Lectiones binæ , è Veteri Testamento prima , quam ad matutinas excipit Hymnus , qui dicitur S. *Ambrosii* , *Te Deum Laudamus* ; ad vespervas verò Canticum B. *Mariæ* Virginis , è Novo Testamento altera , post eam ad matutinas Hymnus *Zachariæ* , ad vespervas Canticum *Simeonis*.

Lectiões autem ità ordinatæ sunt, ut Testamentum Vetus singulis annis absolvatur, Novum verò ter in anno perlegendum sit.

At in Dominicis & Festis habentur Lectiões propriæ, & in Festis majoribus Psalmi de mysterio celebrato Prophetici.

Deinde altis vocibus & corporibus erectis Symbolum fidei Apostolicum ab omnibus recitatur; in quibusdam verò Festis Symbolum quod dicitur S. *Athanasii*.

Postea genibus flexis dicuntur preces & responsa pro diverso hominum statu, unà cum tribus Collectis, prima de tempore secundum anni ordinem, altera pro pace, tertia pro gratiâ & Dei in omnibus nostris actionibus adjutorio atque moderamine.

C A P. XV.

Litania.

Diebus Dominicis, feriis quartis & sextis, atque aliis temporibus, cum ab Episcopo requisitum fuerit, post matutinas recitantur aut decantantur Litanie, ab omni invocatione hominum mortuorum defæctæ, plurimisque piis petitionibus auctæ, quæ tandem precatione S. *Chrysostomi*, & verbis Apostoli votivis terminantur.

C A P. XVI.

Officium Eucharistiæ.

Summâ cum reverentia & religione celebratur apud nos Eucharistia, tam festis majoribus, quàm singulis primis cujusque mensis anni Dominicis. Quod si reperti fuerint, qui eandem sæpiùs postulaverint, & dignè communicare potuerint, aliis etiam temporibus, Dominicis, festis, & feriâ qualibet celebrare licet, atque adeò oportet.

Servantur autem antiquitus usitatæ cæremoniæ, ordo Lectiõnum, Orationum series, vestitus Ecclesiasticus, & alia similia, quæ vel ad ædificationem, vel ad decorem pertinent.

Fit initium ab Oratione Dominicâ, Collectâ pro puritate mentium, & recitatione Præceptorum Dei, in fine cujusque Præcepti misericordiâ ejus ab omni populo genuflexo imploratâ. Subjungitur precatio pro Rege, utriusque scilicet Tabulæ à Deo constituto custode.

Hanc precationem excipit Collecta de anni tempore, Collectam E-

pistola, Epistolam Evangelium, Evangelium verò Symbolum fidei *Nicano-Constantinopolitanum*.

Sequitur Homilia sive Concio sacra ad populum; atque initio concionis publicantur preces ab omnibus publicè privatimque faciendæ, primò, pro Ecclesiâ Christi Catholicâ per totum terrarum orbem disseminatâ, ut qui nomen Domini confitentur, in verâ fide & charitate ad præscriptum S. Scripturæ consentiant universi; deinde pro omnibus Regibus, Principibus, ac Gubernatoribus Christianis, ut inter se concordēs vivant; pro Rege nostro, veræ fidei Defensore, & supremo Subditorum suorum tam in causis Ecclesiasticis, quàm Secularibus, Gubernatore post Deum unico, pro familiâ & Consiliariis Regis; pro omnibus, qui sub illo magistratum gerunt; pro regni Nobilibus, Episcopis, Clero, & populo universo, ut eorum unusquisque officium suum præstent, veram religionem promoveant, & vitam piè, justè, sobrièque instituant; denique pro his, qui sunt in angustiis, aut infirmitatibus constituti, ut illis Deus succurrere dignetur. Nec vivi tantum ei commendantur, sed gratia etiam aguntur pro iis, qui in Christo obdormiunt, & requiescunt in pace, laudabili imprimis Patriarcharum & Prophetarum numero, sanctissimo Apostolorum Choro, candidato Martyrum, exercitu, & pro aliis omnibus, qui fidem Christi servarunt integram, ac religionem illibatam; simul oratur Deus, ut tam illis quàm nobis propitiis beatam à mortuis resurrectionem indulgeat, perfectamque absolutionem in die supremo, atque eternam in regni sui gloriæ felicitatem concedat. Clauditur autem ista precum & gratiarum actionis publicatio oratione Dominicâ.

Habitâ demum & finitâ concione (quæ partem aliquam vel Evangelii vel Epistolæ vel alterius loci S. Scripturæ & explicare & applicare solet) dies festi atque jejunales, siqui sint proximâ septimanâ observandi, indicantur, atque unâ excitantur omnes, (quibus est copia) ad elargiendam eleemosynam, quâ pauperum egestas sublevetur.

Subsequitur Offertorium (delectis & recitatis in hanc rem S. Scripturarum sententiis) quod supplet vicem veterum oblationum. De pane itidem & vino in Eucharistiâ consecrandis prospectum est, quæ super Altare sive mensam Domini decenti ornatu paratam, mundisque lineis coopertam, in patina & calice argenteis, ac plerunque deauratis, collocantur.

Peraçto offertorio, rursus oratur ad Altare Dei pro statu Ecclesiæ Catholice, in hoc sæculo militantis, pro Imperatoribus & Regibus, pro

rerum quiete, pro Episcopis & Clero, pro pauperibus & infirmis, atque insuper ut rata & accepta apud Deum sint oblata à nobis munera.

Posteà, qui nobiscum communicaturi non sunt, emittuntur foras; jubet etiam Sacrorum Minister, *nequis blasphemia, adulterii, odii, aut ira flagrantis, alteriusve sibi criminis reus, nobiscum maneat, aut ad mensam Dominicam audeat accedere, priusquam peccata sua dignâ poenitentia defleverit & absolutionem consecutus fuerit.*

Reliquos autem omnes adstantes monet, *ut in quem finem sanctissimum hoc Sacramentum à Domino nostro institutum sit, in animos suos revocent, ut passionis & mortis Christi memores, gratias humillimè agant; ac denique, ut quilibet, qui juxta præceptum Apostoli seipso probârunt, ita de pane illo edant, & de calice bibant, ut Christi simul corpus manducare & sanguinem haurire possint, ad animarum suarum spirituale, vivificum, & efficax nutrimentum, atque tandem sacrorum mysteriorum verè participes fiant.*

Finitâ exhortatione communicaturi chorum ingrediuntur, atque in genua procumbunt.

Sequitur Confessio & Absolutio, unâ cum sententiis aliquot Conso-
latoriis, è S. Scripturâ selectis.

Ad hunc modum paratis omnibus, sacrorum Antistes orditur præ-
fationem communem in Ecclesiâ universâ à primis usque seculis usi-
tatam *de cordibus sursum habendis, & gratiis Deo habendis, sicut dignum & justum est &c.* cui in festis quibusdam solennioribus proprias etiam
præfationes subnectit, atque has Hymno Trisagio claudit.

Tum ad Altare genuflexus omnium nomine precatur, *ut sic carnem Christi manducemus, ejusque bibamus sanguinem, ut corpora nostra per mundissimum suum corpus purificentur, animaue nostræ pretioso suo sangui-
ne laventur.*

Deinde, sese erigens, per preces solennes institutionem Sacramenti,
& ipsa Christi instituentis verba continentes, panem in manus acceptum
frangens vinumque in calicem effundens, utrumque Symbolum benedi-
cit, atque in Sacramentum corporis & sanguinis Christi consecrat.

Absolutâ benedictione, primò seipsum, flexis genibus, communi-
cat, deinde reliquos (si qui adsint) Ministros; posteà populum præ-
sentem; quibus omnibus & singulis utrumque sacrum porrigens, clarâ
voce ait, *Corpus Domini nostri Jesu-Christi custodiat corpus tuum & ani-
mam tuam in vitam aeternam. Accipe, & manduca sacramentum istud*

in commemoratione mortis Domini, & de illo pascere te ipsum in corde tuo cum fide & gratiarum actione. Similiter, Sanguis Domini, qui pro te effusus est &c. Ipsi autem interea dum accipiant, atque adeò usque ad finem totius sacræ celebrationis, in genua procumbentes, Christum non Sacramentum, adorant.

Post communionem recitantur ab omnibus Oratio Dominica.

Eam verò comitatur solennis Ecclesiæ Eucharistia sive Sacrificium laudis in commemorationem Sacrificii Christi propitiatorii, semel in cruce peracti, Deo Opt. Max. oblatum.

Subjungitur oblatio nostrarum omnium animarum & corporum in *hostiam vivam, sanctam, & rationalem*, unà cum oratione, *ut rata hæc omnia atque accepta Deo habeantur, ita ut per merita & mortem filii sui, Jesu-Christi, nos & universa ejus Ecclesia remissionem peccatorum, ceteraque passionis illius beneficia consecuti, cœlesti suâ gratiâ & benedictione repleamur.*

Deinde, dicitur aut canitur Hymnus, *Gloria in excelsis Deo &c.* & postremò, post unam aut alteram Collectam, populus cum solenni Sacerdotis aut Episcopi, (si præsens sit) benedictione dimittitur.

C A P. XVII.

Baptismus.

Sacramentum Baptismi Dominicis festisque diebus, quum maxima populi frequentia confluerit, tempore vel matutini vel vespertini Officii à Sacrorum Ministro, surpelliceo & stolâ induto, ad Baptisterium, non procul ab ingressu Ecclesiæ collocatum, administratur.

Quòd si tamen necessitas urgeat, nihil prohibet, quominus alio five loco, five tempore, per eundem aut alium quemcunque Ministrum idoneum, infantes baptizentur.

In administratione verò hujus sacramenti adhibentur preces & lectiones, eidem actioni congruentes. Subjiciuntur quæstiones & responsa *de abrenunciando diabolo, & omnibus ejus operibus, unà cum mundi & carnis illecebris; atque de fidei articulis credendis in Symbolo Apostolico comprehensis.* Infans in manus Ministri traditus, ab eo vel cautè immerfus vel aquâ tantum tinctus, *in nomine Patris & Filii & Spiritus sancti* baptizatur, Signo crucis fronti illius impresso.

Post

Post gratiarum actionem Patrimi à Ministro admonentur, ut eundem infantem (quamprimum ad ætatem pervenerit) in eadem ipsâ religione & fide Christi, in quam baptizatus est, diligenter instruant, atque instructum ad Episcopi confirmationem adduci curent.

C A P. XVIII.

Confirmatio.

C Onfirmatio purâ tantum prece & manuum impositione, absque aliis ritibus, nuper à superstitiosis hominibus inaniter excogitatis, ab Episcopo perficitur.

C A P. XIX.

Matrimonium.

S Olennizatio matrimonii, quod S. Apostolus *in omnibus honorabile* esse pronuntiavit, more antiquo, (præmissis per tres dies Dominicos aut Festos promulgationibus) cum precibus & benedictionibus peragitur.

C A P. XX.

Visitatio infirmorum.

Q Uando infirmi & moribundi visitantur, à Sacrorum Ministro adhibentur preces & exhortationes, huic Officio maximè congruæ. Recitantur articuli symboli Apostolici; interrogatur infirmus, num illos omnes firmâ fide credat; num in eadem fide & charitate cum omnibus moriturus sit; num testamentum condiderit; & an pauperum memor fuerit; denique, num de omnibus, quæ perpetraverit, peccatis seipsum pœnituerit; & spem suam unicam in Christi meritis collocaverit? Quod si conscientiam in re quâlibet gravatam sentiat, monetur, ut de illâ privatam & specialem confessionem Deo faciat. Finitâ verò confessione, Presbyter eum consolatur, & ab omnibus peccatis suis illum (verè pœnitentem) solenni verborum formâ absolvit, & tandem ultimò munit Viatico sacro.

CAP. XXI.

Sepultura mortuorum.

ELato corpori mortuo, Sacrorum Minister it obviam ad ingressum Cœmeterii, & euntibus, qui cum ipso sunt, Clericis aliisque ad sepulchrum, recitantur primò sententiæ sacræ de mortalitate & miseriâ hominum; deinde de resurrectione & vitâ æternâ fidelium.

Dum cadaver terrâ injectâ operitur, cum certâ spe resurrectionis ad felicitatem cœlestem, dicitur Antiphona, *Audivi vocem de cœlo, beati mortui, qui in Domino moriuntur; amodò requiescunt à laboribus suis.*

Posteà legitur XV. Caput primæ Epistolæ ad Corinthios, *Christus resurrexit à mortuis, primitiæ dormientium &c.*

Finitâ lectione, & omnibus genuflexis, dicitur Κύριε ἐλέησον unâ cum Oratione Dominicâ & duabus Collectis, quibus tum gratiæ Deo aguntur pro felici defuncti fratris aut sororis exitu, tum preces fiunt, *ut & nos & idem frater noster, unâ cum omnibus aliis in verâ fide & confessione Christi demortuis, perfectam consummationem & beatitudinem tam corporis quàm animæ in cœlis consequamur.*

Ex his autem five votis five precibus, five gratiarum actionibus, quas pro mortuis juxta universalem antiquæ Ecclesiæ consuetudinem fundimus, Purgatorium, quod vocant, nullatenus imus stabilitum.

Novitèr enim inventa, neque inter credenda nobis, neque agenda ponimus.

A P P E N D I X.

C A P U T I.

Dies Festi.

S Acrati Deo apud nos sunt
Omnes totius anni dies Dominici.
Dies festus circumcisionis Christi.
Dies festus Epiphaniæ ejusdem.
F. purificationis B. *Mariæ* Virginis.
F. Annunciationis ejusdem.
F. Sancti *Matthiæ* Apostoli.
F. Sancti *Marci* Evangelistæ.
F. SS. *Philippi & Jacobi* minoris, Apostolorum.
F. Ascensionis Domini.
F. S. *Joannis* Baptistæ.
F. S. *Petri* Apostoli.
F. S. *Jacobi* majoris, Apostoli.
F. S. *Bartholomæi*, Apostoli.
F. S. *Matthai*, Apostoli & Evangelistæ.
F. S. *Michaëlis*, & omnium Angelorum.
F. S. *Luce* Evangelistæ.
F. SS. *Simonis & Judæ* Apostolorum.
F. Omnium Sanctorum.
F. S. *Andree* Apostoli.
F. S. *Thomæ* Apostoli.
F. Nativitatis Domini.
F. S. *Stephani* Protomartyris.
F. S. *Joannis* Apostoli & Evangelistæ.
F. SS. Innocentium.
Feria secunda & tertia post Pascha.
Feria secunda & tertia post Pentecosten.
præter
Diem conversionis S. *Pauli*, &

Diem

Diem S. *Barnabæ*.

Quibus omnibus divinis officiis & rebus sacris attenti sumus.

C A P. II.

Dies Jejuniorum.

Vigiliæ sive dies antecedentes
Dominicam Paschatis;

Dominicam Pentecostes:

Festum Nativitatis Domini:

Festum Ascensionis ejusdem:

Festum purificationis B. *Mariæ* Virginis:

Festum Annunciationis ejusdem:

Festa Apostolorum: (exceptis tantum diebus S. *Joannis* Evangelistæ, & S. S. *Philippi* ac *Jacobi* minoris) &

Festum omnium Sanctorum, apud nos in operibus pietatis & exercitio jejunii transigendæ sunt.

In his enim sumptionem cibi ultra consuetam horam differre, & per integrum diem solâ frugali cœnâ, aut saltem solo prandio, contenti esse jubemur.

C A P. III.

Dies Abstinentiæ.

Totum tempus Quadragesimæ.

Feria sexta & septima uniuscujusque hebdomadis: (nisi in eas festum Nativitatis Domini inciderit.)

Feria quarta, sexta, & septima quatuor anni temporum.

Tres dies Rogationum ante Ascensionem Domini.

Omnesque præfatæ Vigiliæ tempora nobis sunt ad majorem sobrietatis, moderationis, ac temperantiæ exercitationem constituta.

Quibus (nisi nonnullorum corporis ratio evidentè & necessariò aliud exegerit) à communi carniū esu (vi legis etiam Politicæ) abstinere oportet.

Interea tamen in mero ciborum delectu vel minimam religionis partem collocare nefas ducimus, nisi quatenus liberiores gulam compescat.

C A P. IV.

Angliæ divisio in suas partes Ecclesiasticas.

Totum *Angliæ* regnum ratione Ecclesiasticæ jurisdictionis in duas Archiepiscopales Provincias, *Cantuariensem* & *Eboracensem* dividitur.

Utraque autem Provincia in suas Episcopales Diœceses.

Singulæ Diœceses, præsertim quæ majores sunt, in suos Archidiaconatus.

Isti in Decanatus, qui Rurales sive Regionales appellantur.

Atque hi quidem in suas Parochias dispescuntur.

Parochiæ verò per universum Regnum computatæ nonies mille sunt & amplius.

Sunt & Ecclesiæ Cathedrales XXVI. præter Collegiatas aliquot, & Hospitalia quamplurima.

C A P. V.

Cantuariensis Provinciæ Diœceses sive Episcopatus.

1. **I**psa Diœcesis *Cantuariensis*.
2. **I***londinensis*.
3. *Wintoniensis*.
4. *Eliensis*.
5. *Wigorniensis*.
6. *Salisburyensis*.
7. *Lincolniensis*.
8. *Norwicensis*.
9. *Batho-Wellensis*.
10. *Herefordiensis*.
11. *Exoniensis*.
12. *Coventrio-Lichfeldensis*.
13. *Cicestrensis*.
14. *Roffensis*.
15. *Glocestrensis*.
16. *Oxonensis*.

17. *Petroburgensis.*
18. *Bristolensis.*
19. *Menevensis.*
20. *Asaphensis.*
21. *Bangorensis.*
22. *Landavensis.*

Quæ omnes *Cantuariensi* Metropolitano subditæ sunt,

C A P. VI.

Eboracensis Provincia Diœcesis sive Episcopatus.

1. **I**psa Diœcesis *Eboracensis.*
2. *Dunelmensis.*
3. *Carliolensis.*
4. *Cestrensis.*
5. *Sodorensis.*

Quæ Metropolitano *Eboracensi* subjiciuntur.

C A P. VII.

Ecclesia Cathedrales.

IN his plura sunt membra.

1. Lectores Epistolæ & Evangelii.
2. Cantores Symphoniaci.
3. Presbyteri subcanonici, qui studio Sacrarum Scripturarum incumbentes, matutinas & vespervas quolibet die in choro celebrare tenentur.
4. Presbyteri Canonici, seu Præbendarii, quorum alii sedem tantum habent in choro, alii etiam suffragium ferunt in Capitulo, & statis suis vicibus omnes in Ecclesia concionantur.
5. His omnibus præest Decanus, qui verbum Dei sedulò prædicare, hospitalitatem exercere, & festis majoribus sacra celebrare obstringitur.

C A P. VIII.

Synodi Provinciales.

Synodi apud nos ex sunt legitimæ, quæ ex licentiâ & mandato Regis ab Archiepiscopo indictæ, veris & genuinis suis membris constant.

Vocantur ergò ad Synodos Provinciales, tam Episcopi, Decani, & Archidiaconi, quàm bini Presbyteri ex singulis Diocesibus, totidemque è Cathedralibus Ecclesiis communibus suffragiis electi.

A quibus cum de religionis dogmatibus vel Canonibus Ecclesiasticis maturè deliberatum & definitum aliquid fuerit, Regiâ auctoritate & confirmatione accedente, censetur ratum, & ex statuto regni vim legis obtinet, modò nihil ibi definiatur, quod vel sacræ Scripturæ vel juribus publicis contrarium sit.

C A P. IX.

Sectæ Regni & Religionis hostes.

Magno Ecclesiarum & Regnorum omnium detrimento enati olim sunt Anabaptistarum & Perduellium greges. E quorum reliquiis & sectarum & seditiosorum hominum multitudo maxima non ita pridem apud nos in apertam rebellionem, cruentas cædes, barbara latrocinia, universæ religionis Christianæ contemptum, & (quod vel dictu horribile nimis est) in ipsum Regicidium eruperunt. Sunt enim genus hominum tum Divinis tum humanis legibus (inauditâ à seculis audaciâ atque infernali prorsus superbiâ & iniquitate) maximè repugnantium; qui nisi Principum ope tempestivè supprimantur, omnia passim, quæ latè pateant Christianorum regna & Ecclesiæ, brevi pessundabunt. Quam fatis jam ex Religionis & Reipublicæ nostræ constitutionibus orbis terrarum videt, nos quidem nec ipsos peperisse, nec aluisse, nec docuisse, sed lolium facilè nimis cum frumento nasci solet, & palea cum grano.

Interim, aliud est, quod docemus, aliud, quod sustinemus; & donec emendare valeamus, tolerare compellimur.

INDEX CAPITUM.

CAP. I. <i>Perpetua Religionis norma.</i>	Pag. 31
CAP. II. <i>Sacra Dei Scriptura.</i>	<i>Ibid.</i>
CAP. III. <i>Antiqua fidei Symbola.</i>	32
CAP. IV. <i>Quatuor prima Concilia.</i>	<i>ibid.</i>
CAP. V. <i>Quinque priora Patrum secula.</i>	33
CAP. VI. <i>Hereses repudiata.</i>	35
CAP. VII. <i>Novitates rejectæ, superstitiones depulsæ, & Religionis corruptela sanata.</i>	<i>ibid.</i>
CAP. VIII. <i>Religio prisca, verè Christiana & stabilita.</i>	36
CAP. IX. <i>Ordo Ecclesiasticus.</i>	39
CAP. X. <i>Consecratio & munus Episcoporum.</i>	<i>ibid.</i>
CAP. XI. <i>Ordinatio & munus Presbyterorum.</i>	40
CAP. XII. <i>Ordinatio & munus Diaconorum.</i>	41
CAP. XIII. <i>Liturgia Sacra.</i>	<i>ibid.</i>
CAP. XIV. <i>Officium Matutinum & Vespertinum.</i>	42
CAP. XV. <i>Litania.</i>	43
CAP. XVI. <i>Officium Sanctæ Eucharistiæ.</i>	<i>ibid.</i>
CAP. XVII. <i>Baptismus.</i>	46
CAP. XVIII. <i>Confirmatio.</i>	47
CAP. XIX. <i>Matrimonium.</i>	<i>ibid.</i>
CAP. XX. <i>Visitatio infirmorum.</i>	<i>ibid.</i>
CAP. XXI. <i>Sepultura mortuorum.</i>	48

IN APPENDICE.

CAP. I. <i>Dies festi.</i>	49
CAP. II. <i>Dies Fejuniorum.</i>	50
CAP. III. <i>Dies Abstinentiæ.</i>	<i>ibid.</i>
CAP. IV. <i>Angliæ divisio in suas partes Ecclesiasticas.</i>	51
CAP. V. <i>Cantuariensis Provinciæ Dioeceses.</i>	<i>ibid.</i>
CAP. VI. <i>Eboracensis Provinciæ Dioeceses.</i>	52
CAP. VII. <i>Ecclesiæ Cathedrales.</i>	<i>ibid.</i>
CAP. VIII. <i>Synodi Provinciales.</i>	53
CAP. IX. <i>Sectæ Regni & Religionis hostes.</i>	<i>ibid.</i>

ULTIMUM TESTAMENTUM JOANNIS COSINI,

Episcopi *Dunelmensis*, ita incipit.

*Adjutorium nostrum in Nomine Domini, qui fecit
cælum & terram.*

*In nomine & honore ejusdem Domini Dei nostri, Pa-
tris, & Filii, & Spiritus sancti, summæ ac indi-
viduæ Trinitatis. Amen.*

QUoniam statutum est omnibus semel mori, & corpus unius cujus-
que dissolutum iri, tempus verò dissolutionis meæ cùm incertum
sit, de qua tamen quasi in propinquo esset, assiduâ animi meditatione
sollicitus, & frequenti corporis infirmitate pulsatus, subinde cogito;
Ego *Joannes Cosinus*, humilis Ecclesiæ Dei Administer, & modò,
permissione altissimi, Episcopus *Dunelmensis*, non ponens spem meam
in præsentī hac vita, sed ad alteram (quæ futura est) in cœlis æternam,
ex divinâ tandem misericordiâ, adipiscendam semper anhelans, & humi-
liter orans pro salute animæ meæ, ut per merita *Jesu-Christi*, Filii Dei
vivi, & Redemptoris ac Mediatoris nostri unici, omnia mea mihi re-
mittantur delicta, hoc Testamentum, continens ultimam voluntatem
meam, sanâ mente & puro corde condo, ordino, & facio, in hac for-
mâ, quæ sequitur.

Ante omnia, Domino nostro Deo Omnipotenti gratias ago, quas
possum, maximas, quod me ex fidelibus, & bonis Parentibus in hanc
vitam nasci, atque in Ecclesiâ suâ, per sanctum Baptismi Lavacrum ab
ipso institutum, ad vitam æternam renasci voluerit, meque à juventute
meâ in doctrinâ sanâ erudiverit & sanctorum suorum participem effece-
rit, fidemque non fictam vel mortuam, sed veram & vivam in animo

meo imprefferit , unà cum adjunctâ spe firmâ fore posthac , ut perducar ad vitam sempiternam. Quæ quidem fides in eo consistit, ut adoremus & veneremur Deum, in eumque credamus, & in quem misit, Filium ejus dilectissimum, verbum æternum, ante sæcula genitum, *Jesum Christum*, Dominum nostrum, qui propter nos nostramque salutem, ex beatissimâ Virgine *Mariâ*, superveniente in eam Spiritu sancto, carnem in seculo sumpsit, & homo factus est, deinde natus, passus, crucifixus, mortuus ac sepultus, & postquam ad inferos descendisset, ex sepulchro suo resurrexit, & captivam ducens captivitatem, adscendit in cœlos, ubi ad dexteram Dei Patris sedet, & regnat in æternum; indè verò, Spiritum sanctum (in quem pariter nobis credendum est) misit, à Patre Filioque procedentem, per quem largissimè dona distribuit hominibus, & Ecclesiam suam Catholicam in communionem sanctorum, in divinis Sacramentis, in verâ fide, in doctrinâ sanâ, ac moribus Christianis instituit; unà cum remissione peccatorum piis omnibus, & dignos in eadem Ecclesiâ pœnitentiæ fructus proferentibus, impertiendâ; quibus etiam quum in supremo sæculi die de cœlis rediturus, ut mortuos resuscitet, & omnes judicet, collaturus est æternam beatitudinem; reliquis verò infidelibus, aut qui secundum carnem vixerint, & converti, sive pœnitentiam agere, nolentibus æternum supplicium irrogaturus. In hac fide, quæ totius sacræ Scripturæ summa est, & absolutissimum compendium, sanctis semel tradita, & ab Apostolis, eorumque successoribus propagatâ, atque ad nos usque derivatâ vivere me profiteor & ut in ea ad ultimum vitæ spiritum constanter ac sine hæsitacione perseverem & moriar, assiduus, quantum possum, precibus à Deo contendo; unitatem intereâ colens, & servans vinculum pacis ac charitatis cum omnibus ubique Christianis, qui inter tanta Ecclesiæ mala, distractiones, & calamitates, (quibus equidem non possum non illachrymari) hanc fidem integrè admittunt, nullamque ejus partem in dubium vocant. Spero etiam, quæ est Dei Christique *Θεοῦ καὶ Χριστοῦ*, Servatoris nostri; benignitas, omnes eos, qui hæc à Deo revelante tradita simpliciter nobiscum crediderint & piè vixerint, in magno illo die Dominis salvos fore, etiamsi singulorum rationem reddere, vel modum exponere, vel quæstiones circa ea exortas solvere, vel, dum fortè fatagunt, allucinationes aliquot effugere, & penitus ab errore immunes esse nequiverint.

Sed quasunque olim Hæreses & quæcunque etiam Schismata, quibuscunque

buscunque tandem nominibus appellentur, prisca & universalis sive Catholica *Christi* Ecclesia unanimi consensu rejecit & condemnavit, ego pariter condemno & rejicio; unà cum omnibus earundem Hæresium fautoribus hodiernis, Sectariis, & Fanaticis, qui Spiritu malo acti mentiuntur sese spiritu Dei afflari. Horum omnium, inquam, hæreses & Schismata, Ego quoque Ecclesiæ nostræ *Anglicanæ*, imò *Catholicæ*, Symbolis, Synodis, & Confessionibus addictissimus, pariter improbo constanterque rejicio atque repudio. In quorum numero pono non tantum segrege Anabaptistas, & eorum sequaces (proh dolor) nimium multos, sed etiam novos nostrates Independentes & Presbyterianos, genus hominum malitiæ, inobedientiæ, & seditionis spiritu abreptum, qui inauditâ à seculis audaciâ & perfidiâ, tanta nuper perpetrarunt facinora, in contemptum & opprobrium omnis Religionis & Fidei Christianæ, quanta quidem non sine horrore dici aut commemorari queant. Quia etiam à corruptelis & ineptis nuperque natis, sive Papisticis (quas vocant) superstitionibus, doctrinis, & asumentis novis, in avitam ac primævam laudatissimæ olim tam Orthodoxæ & Catholicæ Ecclesiæ religionem ac fidem jam dudum contra sacram Scripturam, veterumque Patrum Regulas ac mores introductis, me prorsus jam alienum esse, atque adeo à juventute mea semper fuisse, sanctè & animitus adsevero.

Ubicunque verò terrarum Ecclesiæ, Christiano nomine censæ, veram, priscam & Catholicam religionem fidemque profitentur, & Deum Patrem, Filium, & Spiritum sanctum uno ore & mente invocant ac colunt, eis, si me uspiam actu jam nunc jungi prohibet vel distantia Regionum, vel dissidia hominum, vel aliud quodcunque obstaculum; semper tamen animo, mente, & affectu conjungor ac coalesco; id quod de Protestantibus præsertim, & benè Reformatis Ecclesiis intelligi volo. Fundamentis enim salvis, diversitatem, ut opinionum, ita quoque rituum circa res juxta enatas, & minùs necessarias, nec universali veteris Ecclesiæ praxi repugnantes, in aliis Ecclesiis (quibus nobis præsidendum non est) amicè, placidè, & pacificè ferre possumus, atque adeo perferre debemus. Eis verò omnibus, qui malè consulti quoquomodo me iniquis calumniis infectati sunt, vel adhuc infectari non desinunt, ego quidem ignosco, & Deum seriò precor, ut ipse quoque ignoscere, & meliorem eis mentem inspirare velit. Operam interim & mihi, & aliis omnibus fratribus, præsertim

sertim Episcopis, & Ministris Ecclesiæ Dei, quantum ex illius gratiâ possumus, dandam & conferendam esse existimo, ut tandem sopiantur, vel saltem minuantur, Religionis dissidia, atque ut pacem sectemur, cum omnibus, & sanctimoniam. Quod ut fiat quàm ocyssimè, faxit Deus Pacis Auctor, & Amator concordiæ. Cujus immensam misericordiam oro & obtestor, ut me in peccatis & iniquitatibus conceptum ab omni humanæ infirmitatis labe & corruptela repurget, dignumque ex indigno per magnam clementiam suam faciat, mihiq̃ passionem & immensa merita dilectissimi sui Filii, Domini nostri *Jesu-Christi*, ad delictorum meorum omnium expiationem applicet : ut quum novissima vitæ hora non improvisa venerit, ab Angelis suis in sinum *Abrahæ* raptus, & in societate sanctorum & electorum suorum collocatus, æternâ felicitate perfruar.

Hæc præfatus, quæ ad Religionem & Animæ meæ statum ac salutem spectant, quæque Latino Sermone à me dictata atque exarata sunt; reliqua, quæ ad sepulturam corporis, & bonorum meorum temporalium dispositionem, attinent, sermone patrio perscribi faciam, ac perorabo.

REVERENDO
IN CHRISTO PATRI, AC DOMINO
D^{NO.} MATTHÆO

ELIENSI EPISCOPO,
ANTIQUÆ FIDEI VIRO,
ET IN REBUS SACRIS
EXERCITATISS.^{mo}
DOCTR. ET RELIG. IN ECCL. ANGL.
ADSSERTORI AC CONFESSORI
MAXIMO
VERÆ INVICTÆQUE MAGNANIMITATIS
PRÆSULI,
ET COLL. S. PETRI IN ACAD. CANTABR.
PATRONO:
JO. COSINUS DEC. PETROB.
EJUSD. FIDEI, DOCTR. RELIGIONIS,
ECCLESIAE, ET COLL.
ADMINISTER,
HANC SUAM HIST. SCHOLASTICAM
E SACRIS PAGINIS
VETERIB. QUE AC RECENTIOR. SCRIPTIS
ADORNATAM,
ATQUE VIRIS RER. DIVIN. PERITIS
LECT. ET APPROBATAM,
L. M. D. D. D.

Epigraphe in sepulchrali marmore
reverendissimi Viri , D. Joannis O-
veralli , Episcopi *Norwicensis*, incisa.

MEMORIÆ NON INTERITURÆ

R. Patris ac Domini, D. Joannis Overalli, Viri
undequaque doctissimi, & omni encomio majoris :
qui in Regia *Cantabr.* Academia Cathedra, & Pro-
fessione S. Theologiæ D. D. *Whitakero* successit, Au-
læque S. *Catharinæ* ibidem præfuit. Postea Decana-
tum S. *Pauli London.* Episcopetum etiam *Litchfield.*
ac tandem hanc sedem *Norwicensem* rexit : & sexa-
genarius obiit XII Maii, Anno Domini MDCXIX.
atque ad pedem hujus columnæ sepultus est.

Posuit Joannes Cosinus, ejusdem R. P. D. D. O-
veralli olim Secretarius domesticus, & devo-
tissimus Discipulus, nunc verò Episcopus
Dunelmensis A. D. MDCLXIX.

REVERENDO

IN

CHRISTO

PATRI, AC DOMINO,

D^{NO.} JOANNI EPISCOPO

DUNELMENSIS,

EOQUE NOMINE JURA

HABENTI COMITIS PALATINI,
SACRÆ THEOLOGIÆ PROFESSORI,
VETERIS SCRIPTURARUM CANONIS
ADSSERTORI ET VINDICI;

PETROBURGENSIS EX DECANO.

DUNELMENSIS { DECANO DESIGNATO,
DIU CANONICO, JAM
ETIAM KANONI,

ECCLESIAE { ANGLICANÆ ET FILIO, ET PATRI OPTIMO.

ROMANÆ { HODIERNÆ ET NUPERÆ OP-
PUGNATORI STRENUO,
VETERIS, ET PRIMITIVÆ, UT &

CATHOLICÆ { ADMIRATORI PERPETUO,
CULTORI DEVOTISSIMO

Ο μακάριος, καὶ ὁ μακάριος :

V I R O

QUI, IN UTRIUSQUE FORTUNÆ SEU DURIS, SEU LUBRICIS,
 EODEM ANIMI TENORE USUS,
 NONDUM PAR ANIMO PERICULUM INVENIT:
 CUI, BONÆ, MALÆQUE FAMÆ MEDIO PERGENTI,
 NEC AB EA, QUAM FIXERAT ECCLESIA,
 VERITATIS LINEA RECEDENTI USPIAM,
 (UTPOTE NEC HUIUS CONVITIIS TERRITO,
 NEC ILLIUS ILLECEBRIS DELINITO:)
 UBIQUE SUI SIMILI, UNDIQUE *τετραγώνῳ*,
 CESSIT TANDEM CALUMNIA,
 NON VICTA SOLUM, SEDET TRIUMPHATA,
 ET QUANTUMVIS GARRULA, OBMUTUIT:
 HANC CONCIUNCULAM,

EJUS { JUSSU CONCEPTAM,
 NATAM AUSPICIIS,
 HORTATU, ET MANDATO,
 IN LUCEM EDITAM,
 PERPETUÆ OBSERVANTIÆ PIGNUS ET *Μνημόσυλον*

L. M. Q. D. D. C. Q.

GUILHELMUS SANCROFT,

PRESBYTER INDIGNUS,

PATERNITATI EJUS A SACRIS.

COMMENTARIOLUS

DE

VITA ET STUDIIS

Clarissimi & doctissimi Viri,

D. HENRICI BRIGGII,

Olim Geometriæ in Academia
Oxonienſi Profefſoris Saviliani.

SCRIPTORE

THOMA SMITHO,

*Sacræ Theologiæ Doctore, & Eccleſiæ Anglicanæ
Presbytero.*

COMPTON

OF

WIAH STUDES

1850

D. HENNING BRIGGS

Old German in German
German in German

FOR

THOMAS SMITH

and his family, & his friends
in the city of New York

COMMENTARIOLUS

DE VITA ET STUDIIS

HENRICI BRIGGII,

Olim Geometriæ in Academia Oxoniensi
Professoris Saviliani.

MAGNOS viros ex humilibus casis interdum prodire felix omnium seculorum experientia comprobavit, ipsa etiam invidia agnovit, & in perpetuum justis elogiis agnitura est grata & æqua posteritas. In horum censu meritò collocandus est HENRICUS BRIGGIUS, qui, licet à parentibus proletariis, tenuiorisque fortunæ, progenitus, magnum decus intulit Patriæ, & Mathematicas Scientias sublimi ingenio, & sagacissima solertia illustravit. Circa annum MDLX. in sub-1560 obscuro propè *Hallifaxiam* in Comitatu *Eboracensi* viculo, nuncupato *Warleywood*, in lucem editus, cum in puerilibus annis ingenii bonæque indolis in schola igniculi emicuisset, & jam adolescens in *Græcis Latinisque* literis magnos fecisset progressus, Amici pariter ac parentes illum ad mechanicum aliquod artificium damnari, primitiasque illas, quæ opimam lætamque frugem auspicatò spondebant, aut arescere, aut suffocari nolentes, de illo, altioris disciplinæ maximè capaci, ad Academiam *Cantabrigiensem* mittendo, in commune consultarunt. In collegium D. *Joannis* Evangelistæ memoriæ sacrum, in quo de selectis quibusdam istius amplissimæ provinciæ adolescentibus educandis à piis Benefactoribus peculiari cura provisum erat, decimo septimo ætatis anno admissus, non multò post, cum id beneficii gratiæque ejus mira industria & probitas vendicaverint, inter (a) alumnos recensebatur,

&

(a). E privatis Collegii & publicis Universitatis Registris mihi hæc perquam benignè communicavit reverendus, doctissimus, sagaxque Historiæ Antiquitatum, tum Ecclesiæ Anglicanæ, tum Academiae *Cantabrigiensis* indagator, *Thomas Baserus* S. T. B. ejusdem Collegii focius.

Admissus Discipulus 5. Nov. 1579

Baccalaureus Artium. 1581

Magister Artium 1585

Electus focius 1587

& Magistri in artibus gradu & titulo A. MDLXXXV. insignitus, tandem post tres annos elapsos in numerum Sociorum adscitus est. Sui juris jam redditus, otium istud beatum Mathesi excolendæ, ad quam naturali quadam propensione ferri videbatur, geminata industria, impendit, nec in illarum Scientiarum cortice & superficie hæsit, sed in medullam & abstrusiora arcana penetravit. Hisce disciplinis excultus, magis magisque non tantum apud Collegas suos, sed etiam per universam Academiam inclaruit, & circa A. MDXCII. (a) in Mathematicum Examinatorem ac Prælectorem, & mox in Lectorem Medicinæ ex fundatione Doctoris *Linacri* eligebatur. Sorte hac sua privataque in Collegio vita contentus, imò maximè lætus, & ab omni fastu, ambitione, & invidia liber, Deo, sibi, studiisque severis vacavit, nullis opimioris fortunæ blandimentis per aliquot annos inde abstrahendus: sed divinæ providentiæ ductum sequi, illique, prout pietas & prudentia jubent, morem gerere oportet. Evocatus enim ex umbris Academicis ad publicum mundi theatrum, *Londinum*, A. MDXCVI. quicquid animo prius statuerat, lubens lætusque contendit, ibi primus Geometriæ Professor constituendus in Collegio *Greshamensi*, quod Vir præstantissimus, & sempiterna laude dignissimus, D. *Thomas Greshamus*, Eques Auratus, ante paucos annos in ædibus suis *Londinensibus* fundarat: ille, ille *Greshamus*, qui magnificum illud Forum, primò *magna Britannia Bursam*, more *Flandrorum*, apud quos olim vixerat, nuncupatum, brevi longè augustiori titulo, qui hodie retinetur, *Excambium Regale* i. e. *The Royal Exchange*, insignitum, regio planè animo, magnisque sumptibus exstruendum curavit, ubi Mercatores & Navarchi de rebus suis in universo orbe terrarum, qua patet, oceano circumambiente disponendis acturi, conveniunt: ex cujus redditibus, inde provenientibus, pensiones, pro isto quidem tempore non contemnendæ, septem Professoribus sequentium Facultatum & Scientiarum, viz. Theologiæ, Medicinæ, Juris Civilis, Geometriæ, Astronomiæ, Rhetoricæ, & Musicæ, in perpetuum solvendæ assignantur.

Hic primò edidit *Briggius* tabulam ad calcem libelli (b) *de fabrica, descriptione, & usu duorum instrumentorum à D. Gilberto excogitatorum*, ad inveniendam latitudinem cujusvis loci, nocte tenebrosissima, absque Solis, Lunæ, & Stellarum ope, nempe per declinationem acûs Magneticæ,

(a) Ex iisdem Registris.

(b) V. Theoricæ Planetarum per *Blundevillum*. Londini. 1602.

ticæ, *Anglicè* editi A. MDCII. ex doctrina Triangulorum constructam, ut ex ista declinatione altitudo poli erui & cognosci posset. Subtilitèr quidem pro seculo isto, quo nondum arcana variationis erant plenè detecta.

Anno MDCIX. *Briggius* arctam cum eruditissimo Viro, D. *Jacobo Usserio*, postea Archiepiscopo *Armachano*, inibat familiaritatem & amicitiam, quam uterque literis amœbæis de rebus Astronomicis & Chronologicis per multos annos excoluit. Dolendum est, illas omnes, duabus exceptis, quæ in Epistolarum *Usserianarum* Sylloge continentur, periisse. Non enim ita se subtilitatibus Geometricis totum addixerat, quin interdum in indagandis quoque *Urania* arcanis, animi causa, tanquam in aliena provincia, diverteretur. Hinc seriem eclipsium ex tabulis *Prutenicis*, si modo, uti putabat, supputationes istæ accuratè cum cœlestibus motibus convenissent, ad calculos revocare & pertexere proposuit: sed sive nova *Kepleri* de revolutionibus Planetarum hypothesi, quam licèt multum culpæ non ausus sit, illam tamen ingrata, quæ tædium parit, prolixitate, affectata obscuritate, & aliquo defectu ex industria omisso, & ex tabulis *Rudolphinis*, quas tunc molitus est Vir ille doctissimus, postea supplendo, laborare queritur, sive postea *Nicolai Mulerii* Tabulis Lunæ-Solaribus *Frisicis* accuratiùs subductis, qui *Prutenicarum* fidem & auctoritatem convellit, ab isthoc opere instituto, utpote propriæ, quam adornandam susceperat, professioni non prorsus congruo, cessavit, & eò quidem lubentiùs, quod sese nobile argumentum, quo majori cum fructu & utilitate summas ingenii & solertiæ vires explicare posset, ex inopinato & felicissimè obtulisset.

Circa initium superioris seculi & deinceps, crebris navigationibus versus Septentrionalis *Americæ* oras ex spe viam ingressumque vel aperto liberoque mari, vel æstuante angusto freto, in Australem Oceanum inveniendi conceptâ, à nostratibus susceptis, apud Mathematicos variè disceptatum erat, an ratione aliqua è Geographiæ principiis petita, quâ ad tot discrimina infaustosque casus necessariò intercurrentes, si non cum laude prudentiæ, saltem cum venia & iusta ab omni nota temeritatis excusatione subeundum nautæ inducerentur, constaret. In re dubia & toties frustrâ tentata, solis argumentis à verisimilitudine ductis utendum erat. Hoc sibi præsidio fore, adversus difficultates objectas insignes quidam viri, nauticæ artis admodum periti, qui multis malis, quæ perpeffi fuerant, absteriti, an talis trajectus dare-

tur, usque & usque experiri certatim cuperent. In horum verò gratiam & vindicias, libellus cujusdam Anonymi *Anglicè* conscriptus, *de circumferentia terra, sive de meatu inter Septentrionis & Occidentis littora ad mare pacificum pervio*, communissimè à nostris nuncupato, *the North-West Passage*, cis nimirum sexagesimum sextum gradum borealis latitudinis, *Londini* A. MDCXII. prodiit. An hæc Dissertatiuncula, varia quidem eruditione referta, & insigni Mathematico prorsus digna, D. Briggium habuerit Auctorem, quod aliqui suspicantur, incertum est: imò potius contrarium constat, origine erroris petenda ex confusione hujus libelli cum altero ejusdem argumenti, sive eodem tempore, sive paulò post à Briggio conscripto, quem literis nominis initialibus subscriptis à se agnitum V. Cl. Samuel Purchassus in *Collectaneorum* tertio volumine pag. 852. unà cum illius Mappa Septentrionalis *Americæ*, præmissis miris elogiis, *Londini* MDCXXV. publicavit sub hoc titulo, *A treatise of the North-West passage to the south sea thro' the continent of Virginia and by fretum Hudson*. Vel potius, ut ille in contextu tractatuli explicatiùs dicit, *per sinum D. Thomæ Buttoni Equitis aurati*, qui ibi in portu *Nelsoniano*, CXC. Leucis magis ad occidentem vergente, ubi polus borealis quinquaginta septem gradibus attollitur, hibernavit. Hujus Briggiani opusculi etiam meminit *Lucas Foxus* navarchus in navigationis suæ ad viam, hucusque ignotam & inaccessam, versus *Sinas & Japoniam* per easdem maritimas plagas eodemque sinus aperiendam, *Diario*, Pag. 160. *Londini* MDCXXXV. edito. Sed horum virorum doctissimorum rationes & argumenta in utrisque libellis comprehensa, mihi in hoc Commentariolo in medium proferre, aut in rigidum examen vocare neutiquam convenit: neque id jam agitur. Tantùm dixero, Mathematicorum in museis, doctè licèt, muginantium speculationes & conjecturas in rebus claræ demonstrationis haud capacibus, ut ut ingeniosissimas, non semper navigantium periculis & explorationibus quadrare & respondere. Ad hæc, cum Vir præclarissimus, *Edwardus Wrightus* novam libri nunquam satis laudandi *de corrigendis erroribus in arte navigandi hætenus admissis* cum egregiis additamentis editionem pararet, D. Briggs pro insigni artem nauticam faciliùs, tutiùs, & accuratiùs excolendi studio, summoque erga Amicum integerrimum, sub negotiorum mole penè fatiscentem, affectu, etiam post mortem duraturo, impulsus, non modica laboris parte in se derivata, tabulas *declinationis eclipticæ in singulis gradibus, minutis*

nutis primis & secundis, prostaphæresum Solis, æquationum ephemeridum Solis, & declinationis Solis pro quinque annis h. e. ab anno MDCVIII. ad A. MDCXII. inclusivè; item tabulas, quarum ope altitudinem poli ex altitudine Stellæ polaris exquirere & invenire licet, calculis summa cum industria & cura subductis, condidit: quod in præfatione gratus agnovit Auctor.

Anno MDCXIV. Edinburgi prodiit nobilissimi Viri, D. Joannis Neperi, Baronis Merchistonii, Mirifici, Logarithmorum Canonis descriptio, ejusque usus in utraque Trigonometria, ut etiam in omni Logistica Mathematica, amplissimi, facillimi, & expeditissimi explicatio. Percrebuit olim fama, licet incerta, de cujus veritate meritò dubitandum videtur, D. Craigium Scotum, è Dania reducem, quo tempore illum honoris & amicitiae causa invisebat, enarrasse, Christianum Longomontanum methodum invenisse, vel saltem de nova methodo invenienda, qua numerosæ perplexæque multiplicationes & divisiones, quarum usus in Astronomicis supputationibus hætenus non sine summo tædio & labore obtinuit, in breve compendium facili operâ redigi possent, idque proportionalium numerorum ope, sollicitum esse. Illud quidem fortasse illi, summisque Astronomis, Joanni Mullero Regiomontano, Nicolao Copernico, Tychoni Braheo, aliisque, quibus compertissimum erat Astronomiam absque accuratissima doctrinæ triangulorum cognitione non posse instaurari, maximè in votis & optatis fuisse videtur, & si quid hac ex parte conarentur, post frustra tentatas investigationes, pro deplorato habitum, & quasi supra humanum captum, vix ingenio & solertia cujusquam superandum, abjecisse. An verò quicquam simile aut quovis modo analogum, hac ex parte præstiterit celeberrimus ille Tychonis discipulus, aliter famæ in se ex scriptis editis & inventis derivandæ cupidissimus, nullibi ab illo memoratum reperio. Inventum hoc prorsus mirabile cœlesti ingenio Neperi unicè debetur. Splendidissimo autem titulo optimè & plenissimè respondet aureus iste liber, præstatque, quod ille in epistola ad serenissimum Carolum, Walliæ Principem, unicumque Regis Jacobi I. filium, dedicatoria, verè & absque omni jactantia spononderat, ut illius adminiculo plures quæstiones Mathematicæ unius horæ spatio, quam pristina & communiter recepta forma sinuum, tangentium, & secantium vel integro die absolvantur.

Quamprimùm comparuit liber, præclarissimi quidam Mathematici, viz. Benjaminus Ursinus, Joannes Keplerus, Frobenius, Bartschius,

alique, arrepta hac expedita & compendiaria Logistica, nondumque in meliorem methodum redacta, quam secuti sunt, illum magno cum honore exceperunt: sed nemo magis quàm *Briggius* noster, qui canonem, res tantas paucis pagellis adeò subtiliter & artificiosè complexum, in omnem partem versavit, & etiam, ac si ipse proprio Marte invenisset, in profundiora illius arcana penetravit. Hunc in deliciis habuit, in sinu, in manibus, in pectore gestavit, oculisque avidissimis, & mente attentissima iterum iterumque perlegit, (a) literis ad D. *Usserium* scriptis, nullum librum ipsi melius placuisse, animumque uberiori perfudisse voluptate, aut in veriore excelsi Auctoris ingenii, cui nihil impervium aut inaccessum videbatur, admirationem abripiuisse, seriò professus. Hinc in illo illustrando, novisque augmentis in ultimum perfectionis statum provehendo, aut in Museo, aut in lecto, omnes cogitationes advertit, nec studia aut fructuosius, aut pulchrius, aut gloriosius, quàm in hoc præclarissimo instituto, cæteris vice *παρέργων* deinceps habendis, impendi posse duxit. Hunc familiari apud Amicos sermone summis laudibus extulit: hunc Auditoribus suis ex cathedra explicavit: interim tamen re accuratissimè & sæpè sæpius quidem perpensa, *longe commodius futurum judicavit*, si pauxilla mutatione admissa, si o esset logarithmus unitatis, totius verò sinûs 1000. de qua literis obsequii plenis inventorem monuit, nec hoc officioso affectu contentus, proxima æstate, anno videlicet MDCXVI. ut colloquiis & aspectu illius frueretur, deinde etiam iterum sequente anno, in *Scotiam* contendit, tertium profecturus, nisi D. *Neperi* mors intervenisset, de hisce communibus studiis elaborandis simul cum illo consultaturus. Hic dum per integrum mensem omni cum humanitate exceptus moram fecerit, de illa, cujus in epistola meminisset, mutatione D. *Neperum*, in illius sententiam promptissimo assensu concedentem, idem dudum sensisse, gratulatus est, coram dicentem se, quominus istos numeros reformaret, valetudine & negotiis impeditum fuisse, quod ille anno proximo in præfatione *Rhabdologiæ Edinburgi* MDCXVII. editæ faciendum monuit. Reversus *Londinum* Logarithmorum tabulam sive Chiliadem primam, utpote omnium numerorum ab unitate ad mille excurrentium logarithmos complectentem, quasi

πρά-

(a) V. Epist. XVI. pag. 36. in Sylloge Epistolarum *Usserianarum* Londini. 1616.

πρόχειρα ad sedandam discipulorum sitim, edendam curavit, donec magnum illud opus, quod jam condere inceperat, absolveretur.

Hanc Canonis Logarithmorum descriptionem idiomate *Anglicano* in usum nostratium donavit V. Cl. *Edwardus Wrightus*, de quo paucula supra inferui, longinquis navigationibus susceptis, & Mathe-
seos artisque Nauticæ peritia perquam insignis, quod præclarissimi libri ab ipso conscripti faciunt testatissimum. Versionem verò istam, antequam prelo mandaretur, in *Scotiam* honoris causa ad Auctorem, ut ille exploraret, si in omnibus ipsius menti probè & fidelitèr respondisset, priùs transmissam, illiusque calculo approbatam, dum typis excludere parat, non sine luctu omnium bonorum, quibus eximix illius animi dotes erant compertissimæ, inopinato fato ex hac vita ereptus est. Mox, amicis propositam editionem suppressi nolentibus, & de posthuma Interpretis fama sollicitis, filius *Londini* MDCXVI. fieri procuravit: *Briggius* verò, facilè se ad id induci, tum amicitix & benignitatis erga defunctum, tum argumenti causa, passus, præfatione erudita quidem, quò utilitatibus Lectorum, quod impensè cupiebat, consuleretur, tabulam triangularem à D. *Wrighto*, nulla, ne minima quidem, descriptione relicta, aut modo utendi, nudè delineatam, excogitatam, ut videtur, ad inveniendam quamlibet partem proportionalem, pro ubertate & solertia ingenii, quasi numerorum quovis artificio congestorum mysteria & complicationes ex intuitu intellexerit, in calce libri, addito egregio commentariolo, explicavit.

Post annum unum & alterum fatis concessit D. *Neperus*, vir sanè omnium seculorum memoria dignissimus, cujus opera posthuma *Edinburgii* A. MDCXIX. à clarissimo Viro D. *Roberto Nepero*, filio & hærede, publici juris facta erant: viz.

1. *Mirifici ipsius canonis constructio, & Logarithmorum ad naturales ipsorum numeros habitudines.*

2. *Appendix de alia atque præstantiore Logarithmorum specie construenda, in qua scilicet unitatis Logarithmus est 0: prorsus eadem cum illa, quam Briggius suggessit.*

3. *Propositiones quadam eminentissimæ ad triangula Spherica mira facilitate resolvenda.*

In hanc appendicem quasdam lucubrationes, uti & in propositiones istas Trigonometricas aliquot annotationes adjecit doctissimas D. *Briggius*, à clarissimo Editore in præfatione magnis laudibus celebratas: cujus verba hîc apponam.

Lucubrationes etiam aliquot Mathematici excellentissimi, D. Henrici Briggii, publici apud Londinenses Professoris, in memoratas propositiones, & novam hanc Logarithmorum speciem, typis mandari curavimus: qui novi hujus canonis supputandi laborem gravissimum, pro singulari amicitia, quæ illi cum Patre meo intercessit, animo libentissimo in se suscepit, creandi methodo & usum explanatione Inventori relictis. Nunc autem ipso ex hac vita evocato, totius negotii onus doctissimi Briggii humeris incumbere, & sparta hæc ornanda, illi sorte quadam obtigisse videtur.

Hoc eodem anno viz. MDCXIX. cùm Vir summus, D. *Henricus Savilius*, Eques auratus, Collegii Regalis *Ætonæ* Præpositus, & Collegii *Mertonensis* apud *Oxonienſes* Custos, duas Lecturas, alteram Geometriæ, Astronomiæ alteram, pro intensissimo, quo ardebat, Scientias Mathematicas in *Anglia* promovendi amore & desiderio, lautis pensionibus in omne ævum duraturis, in ista Academia instituisſet, professionem Geometriæ ab illustri Fundatore ipsi oblatam, magna cum animi lubentia amplexus est *Briggius*, qui non longè post, rebus in urbe compositis, munereque, quod in *Greshamensi* Collegio per viginti tres annos multa cum laude sustinuit, relicto, *Oxonium* se recepit, inter Convictores apud *Mertonenses* admissus, ubi omne illud vitæ spatium, quod restabat emetiendum, magno cum omnium Academicorum applausu & amore continenti labore tranſegit.

Hîc quasi in transcurso memorabo, quod fortasse à re præſenti non omninò abhorret, D. *Savilius*, exemplo suo præire volentem, tredecim Prælectiones in principium Elementorum *Euclidis* A. MDCXX. publicè habuisse, quas anno ſequenti in lucem exire paſſus eſt, quarum ultimam hoc Epiphonemate concludit.

Exolvi, per Dei gratiam, Domini Auditores, promiſſum, liberavi fidem meam, explicavi pro meo modulo definitiones, petitiones, com-

munes sententias, & octo priores propositiones Elementorum Euclidis. Hic annis fessus Cyclos artemque repono. Succedent in hoc munus alii fortasse magis vegeto corpore, vivido ingenio. De nobis Senibus verissimum est illud apud Herodotum ἡγήσασθαι τῷ σώματι συγῆγάσκειν καὶ φρένες: Senescente corpore una consenescent & animi vires: omninoque stat sententia nunquam posthac in aeternum hanc dicendi cathedram conscendere. Itaque trado lampadem Successori meo, doctissimo Viro, qui vos ad intima Geometriae mysteria perducet.

Ita hac debita commendatione huic inquilino benevolentiam Academicorum conciliare D. Savilius, pro sapientia sua, mundo pariter ac Academiae mox valedicturus, studuit.

Briggius in ipsis Professorii muneris initiis, ad demerendam tum D. Fundatoris, miro, eoque sapienti, erga veteres Græcos Mathematicos, putà *Euclidem*, *Apollonium Pergæum*, *Archimedem*, *Pappum*, quos explicandos iusserat, affectu nimium quantum quasi abrepti, tum studioforum Geometriæ, quò magni illius Magistri mentem, verbis ipsius expressam, melius intelligerent, gratiam, VI. priores libros Elementorum *Euclidis secundum vetera exemplaria restitutos, ex versione Latina Frederici Commandini, aliquam multis in locis castigata*, Londini A. MDCXX. publici juris fecit: Sed in nova hac, perpulchra, & accurata editione præ modestia nomen celandum voluit, utpote ex hoc mustaceo laureolam neutiquam quærens: utinam verò in cæteris hujus præclaræ scientiæ fundamentis similem impendisset operam! Sed ad alias subtiliores Geometriæ & Arithmeticæ partes, quibus à multis annis assueverit, & utilissimas quidem, studia, cogitationes, labores, & vigilias convertere illi placuit; uti mox videbimus.

A. MDCXXIV. *Briggius* librum, cui titulus, *Arithmetica Logarithmica*, Londini publici juris fecit, & Serenissimo Carolo Principi Walliæ, unico Jacobi I. filio, dedicavit; siphra pro logarithmo unitatis, prout inter ipsum & Inventorem convenisset, constituta. Opus sanè, ut subtilissimi, ita penè immensi laboris, in triginta Logarithmorum Chiliadibus accuratè supputandis, quæ tabula sive canone comprehenduntur impensi, h. e. pro viginti Chiliadibus numerorum absolutorum ab unitate ad viginti millia naturali serie crescentium: deinde à 90. 000. ad 100. 000, superaddita centesima prima chiliade: cui præ-

præfigitur ampla de natura & constructione canonum logarithmicorum eorundemque usu *Dissertatio*, in qua facilem chiliades interjectas, consultò præ tædio calculandi omittas, inveniendi & supplendi methodum inferendam curavit. Ipse verò, ut in præfatione dicit, spatium illud intermedium inter vicesimam & nonagesimam nimirum, postquam vires diuturna intentione animi & vigiliis fractas recuperasset, explere ferriò proposuit. Sed ab hoc novo labore subeundo D. *Adrianus Vlacque* illum liberaturus, pro amore erga hoc admirandum Logarithmorum inventum, integrum canonem, juxta regulas à D. *Briggio* propositas & repræsentatas, capitibus XI. & XII. complevit.

Prodiit ergo *Goude* post octennium opus recoctum auctumque cura ejusdem *Vlacci*, cum hoc insigni titulo, quem hâc integrum, cum venia candidi Lectoris, exhibere non gravabor.

Arithmetica Logarithmica, sive Logarithmorum chiliades centum pro numeris naturali serie crescentibus ab unitate ad 1000000. unâ cum canone triangulorum, seu tabula artificialium sinuum, tangentium, & secantium ad radium 1000000. 00000. & ad singula scrupula prima quadrantis.

Quibus novum traditur compendium, quo nullum nec admirabilius, nec utilius, ad solvenda pleraque problemata Arithmetica & Geometrica.

Hos numeros primus invenit clarissimus Vir, Joannes Neperus, Baro Merchistonii: eos autem ex ejusdem sententia mutavit, eorumque ortum & usum illustravit Henricus Briggs in celeberrima Academia Oxoniensi Professor Savilianus.

Editio secunda aucta per Adrianum Vlacq Goudanum.

Goude MDCXXVIII.

Quid vero mutaverit, omiserit, adjunxeritque doctissimus Editor, clariùs ex illius præfatione edisci possit.

Hisce studiis maximè intentus D. *Briggs*, quasi hoc unicum ad justam debitamque muneris Professorii dignitatem abundè suffecerit, ad fidem, quam in fine *Arithmetice Logarithmicæ* dederat, liberandam, se strenuè, quantum ingravescentis ætatis senilis pateretur, accinxit. Adhuc enim supererat, uti ille fatetur, *Logarithmorum usus nobilissimus & maximè necessarius in doctrina triangulorum Sphericorum*, quem seorsim, volente Deo, peculiari libro exhibere apud se constituit. Postquam

quam igitur maxima cum accuratione & industria canonem trigonometricum, sive tabulam naturalium sinuum, tangentium, & secantium ad gradus & centesimas graduum in numeris, sese ad quindecim loca extendentibus, composuisset, illi alterum Logarithmicorum sinuum, & tangentium, omiſſis ſecantibus, utpote hac ex parte non magni uſus, canonem, pari locorum numero conſtanti, adtexuit, præmiſſa de conſtructione eorundem canonum Diſſertatione, in varia capita, ordine & methodo, juxta Mathematicæ demonſtrationis leges, congruis, diſtincta: ad alteram partem propoſiti operis de uſu & praxi, qua canon iſte in reſolvendis triangulis, præſertim ſphæricis, adhiberi poſſit, abſolvendam proceſſurus. Sed jam cùm ſeptuageſimum ætatis annum attigiſſet, fractis & de ſubito concidentibus viribus, quas hæcenus ſapienti cura, temperantia, & robuſta corporis conſtitutione & craſi, cœlebs ſuſtentaverat, ſentiens ultimum vitæ terminum non procul abeſſe, imò & propemodum inſtare, egit cum Viro clariffimo & doctiſſimo, D. *Henrico Gellibrando*, Aſtronomiæ in Collegio *Greſhamenſi* Profeſſore, inter quos ex morum & ſtudiorum ſimilitudine arctiſſima per multos annos interceſſerat neceſſitudo, ut in ſe prius ſuſcepta in publicam lucem edendi ſchedas de hoc nobiliſſimo argumento ab ipſo elaboratas, quas reverendiſſimis, illuſtriſſimis, & clariffimis Dominis, Profeſſorum Savilianorum in Academia *Oxonienſi* Electoribus, in perpetuum illius obſervantiæ *μνημόσυνοι* inſcribendas obnixè rogabat, cura; ille, qui optimè potuit, quod intactum, appropinquante morte impeditus, eſſet relicturus ſupplere & perficere vellet. Hujus autem precibus æquiſſimisque poſtulationibus, ex ſenſu religionis, & amoris, pariter ac ex reverentia erga moribundum Amicum, quem ſæculi hujus Mathematici planè ſtuporem merito jure nuncupat, facile morem gerens D. *Gellibrandus*, ſuis partibus omni debita cum fide & ſedulitate poſt paucos annos functus eſt, præclariffimumque iſtum librum, ſub magnifico *Trigonometriæ Britannicæ* titulo, *Goudæ* MDCXXXIII. à Viro clariffimo, & in hiſce ſtudiis exercitatiſſimo, D. *Adriano Vlacco*, communi utriusque Amico, qui, pauculis quibusdam, ſive detractis, ſive mutatis, paucula etiam, prout licebat, ſubinde inferuerat, edendum curavit. Immortale hoc obſtupescendi ingenii, ſubtiliſſimæ ſolertiæ, indefeſſæque induſtriæ monimentum, *Briggiani* nominis famam & celebritatem in omne ævum, quamdiu

honor Scientiis Mathematicis salvus erit ; sic enim spondere ausim , propagabit.

Rebus ita compositis, *Briggius* placidissimis sanctisque moribus polens , nemini molestus , omnibus accessu facilis , omni arrogantia , fastu , morositate , invidia , ambitione , avaritiâ vacuus , opum contemptor , sorte sua felix beatusque , utpote qui tranquillitatem animi in umbris Academicis & Museo captavit , & invenit , tandem cùm ab adolescentia ad provec̃tam senilem ætatem , continenti studio parumque intermissa industria disciplinis Mathematicis , in Patriæ , Reipublicæ literariæ , universique generis humani commodum , promovendis se totum applicuisset , vitalibus spiritibus penitus exhaustis , animam placidè & piè efflavit , in ædiculis suis *Mertonensibus* , quas per undecim annos tenuerat , obdormivitque in Christo vicesimo sexto die Januarii , die Mercurii , paulò post horam octavam matutinam , uti in Ephemeride cujusdam Viri doctissimi nimium curiosè annotatum reperi , A. MDCXXX. juxta computum *Anglicanum*. D. Vicecancellarius Academiæ , Præfecti Collegiorum & Aularum , reliquique Doctores , affectum & observantiam , quibus illum , dum in vivis esset , prosecuti fuerint , jam mortuo etiam deberi præsentia sua testaturi , triduo post solennibus exequiis confertim interfuere ; quo tempore viri clarissimi , *Guilielmus Sellarus* , & *Hugo Cressaus* , *Mertonensis* Collegii Socii , ille in concione sacra , hic in oratione funebri , in sacello , ubi corpus erat conditum , ibidem habitis , in meritissimis defuncti laudibus celebrandis perorarunt.

Quanti verò D. *Briggius* , tum ob eminentissimas virtutes , summamque eruditionem , tum ob diuturnum , eumque suavissimum , magni honoris & beneficii loco habendum , apud ipsos convictum , cùm alibi in Academia morari pro libitu integrum fuisset , fecerint *Mertonenses* , ex hoc insigni elogio , quod rogatu meo ex Registro Collegii exscribendum curavit Vir doctissimus , D. *Foannes Bateman* , Collegii Medicorum *Londinensium* jam , uti olim *Mertonensis* Collegii , Socius dignissimus , abundè constabit.

Januarii 26. 1630. Obiit apud nos Commensalis Magister Henricus Briggs , Vir quidem moribus ac vita integerrimus , quem in rebus Geometricis , quarum studiis primum Cantabrigiæ in societate Collegii S. Joannis sese à juventute sua addixerat , deinde publicus Prælector Londini in Collegio Greshamensi multos per annos sustinuerat , omnium sui temporis eruditissimum D. Henricus Savilius , ut primò ex fundatione sua Geometria Profes-

oris

foris munereungeretur, Oxonium evocavit: cujus exequias 29. die proximè sequente, concione habita à Magistro Sellar, & oratione funebri à Magistro Cressy, unà cum Primoribus Academia celebravimus.

Defuere superstites Amici, (neque enim illos hac ex parte excusandos arbitror) qui in memoriam illius monumentum marmoreum, debita epigraphe insigniendum, quod curiosorum peregrinantium, pulcherrimum istud & magnificum sacellum invisere solitorum, oculis observaretur, erigere neglexerint. Licet enim nemo tali apud posteros repræsentatione minus indigeret, nemo tamen magis meritus est. Cui elegantissimo Græco Epitaphio, pro ingenti illa, qua erga nomen memoriamque D. Briggii ferebatur, veneratione Vir doctissimus, D. Henricus Jacobus, Collegii Mertonensis Socius, parentavit: quod hîc apponam.

E P I T A P H I U M

D. HENRICI BRIGGII,

Ob Mathesin & pietatem famigerati.

Βρειγιάδης ζωῆς γαίης, καὶ σύνδρομος ἄσρων,

Ἐυκλείδην φρονέων, καὶ Πτολεμαῖον ὄχως

Ἦν ἔτι τεχνιόβιος (μᾶλα γὰρ πῆλιν αὐτοφανὴς τις)

Ἦθα σύμμετρος, φροντίδας ἑράνιος.

Πᾶυσε δὲ μιν τέχνης ἑδ, ἰαυτὴ μοῖρα. θανόντες

Ἀστρονομεῖ ψυχὴ, σῶμα γεωμετρεῖ.

Frustra quæsi vi multiplices Prælectiones, Epistolas ad superioris seculi Mathematicos scriptas, aliasque schedas ab ipso elaboratas, quarum maximam partem in tanto annorum, quod ab illius morte decucurrit, intervallo intercidiisse nimium quantum verisimile est: eò magis quidem dolendum, quod quicquid ille dictaverit scripseritque, à solidissimo judicio & à profunda rerum contemplatione profluxisse videatur. Interim pauculas quasdam pretiosas tabulas ex isthoc tristi naufragio salvas subductasque adhuc servari, orbi literato gratulari mearum esse partium duco: duas intelligo longas, & quidem eruditissimas,

epistolas, quas D. Briggs ad celeberrimum Virum, *Christianum Severini Longomontanum* hac occasione scripsit. Hic enim libro suo, cui titulus, *Cyclometria verè ac absolutè in ipsa natura circuli cum rectilineo inventa*, *Hamburgi* A. MDCXXVII. edito, in *Angliam* ad D. Briggs transmissa, ejus sententiam & judicium de hoc opere, in quo se circuli quadraturam, cujus problematis solvendi ingenia Mathematicorum per mille nongentos annos exercuerat difficultas, invenisse & demonstrasse gloriatur, sollicitè admodum exquisivit. Ne verò Amico roganti imò exigenti, ne Veritati, ne Geometriæ, ne sibi defuisse censeretur, Epistolam primam *Oxonii* Septembre ejusdem anni datam reponens, penè invitus, paratissimus quippe ad illi in omnibus assentiendum, quæ non cum ipsa veritate pugnare, & ipsius Geometria fundamenta convellere videntur, clarè tamen & candidè in hypothefibus & calculo errores ab illo admissos & paralogismos ostendit. Nemo autem magis instructus & paratus ad istud examen ritè instituendum accedere poterat, utpote qui penè nimia diligentia integrum sinuum canonem, ad centesimas graduum, unà cum tangentibus & secantibus, supputatum, circa annum MDCIV. absolvisset, inventa annis plus minus triginta per trisectionem & quinquesectionem peripheria, qualem numeris determinatis ibi statuit. Post responsorias *Longomontani* literas acceptas, vel librum potius, in secundis pridie Calend. Quintilis A. MDCXXX. scriptis, se aliosque Analystas, uti ille per contemptum quasi appellavit, à criminatione injusta & homine Mathematico indigna, quasi Geometriam, lineas irrationales numeris explicare conantem conspurcassent & inquinassent, impacta acriter vindicans, de eodem argumento fusiùs differuit: addito, se quidem Geometriam nisi Arithmeticam conjunxeris, penè mortuam existimare: quòd sine illa perexiguum præbeat usum, si Mechanica & Architecturam excipias: nec multum interesse sintne numeri, quibus utimur, rationales an irrationales, si veritatem aut usum spectemus. Sed sublime D. Briggsii ingenium, undique in his Epistolis emicans, aliqua rudi defloratione amplius non deteram, quas integras, cum calculis & schematismis tandem aliquando, si Deus dederit, in publicam lucem dabo.

Ex quibus, uti & libris editis, nullus dubito, quin omnes harum rerum intelligentes, D. Briggsium inter summos istius seculo Geometriæ Magistros numerari oportere mecum sensuri sint.

Trigonometria Britannica, sive de doctrina Triangulorum libri duo: Quorum prior continet constructionem Canonis sinuum, tangentium, & secantium, unà cum Logarithmis sinuum, & tangentium ad gradus & graduum centesimas, & ad minuta & secunda centesimis respondentia:

A clarissimo, doctissimo, integerrimoque Viro D. HENRICO BRIGGIO, Geometria in celeberrima Academia Oxoniensi Professore Saviliano dignissimo, paulò ante inopinatam ipsius è terris emigrationem compositus.

Posterio vero usum sive applicationem Canonis in resolutione triangulorum, tam planorum quam Sphaericorum, è Geometricis fundamentis petita, calculo facilissimo eximiisque compendiis exhibet.

Ab HENRICO GELLIBRANDO, Astronomiae in Collegio Greshamenfi apud Londinensis Professore constructus.

Goudæ MDCXXXIII.

MATHEMATUM CULTORIBUS HENRICUS GELLIBRAND S. D.

QUàm immatura semper & damnosa Reipublicæ literariæ sit mors eorum, qui immortale aliquid parant, utinam aliunde, quàm ex doctissimi nostri *Briggii* (seculi hujus Mathematici planè stuporis) sentiretur. Ita quidem nec posterì luce hac sua orbatì fuissent, neque humeris meis parum validis tantæ molis incubuisset onus, aut tanta in pertexenda hac tela disparilitas deprehensa foret. Quod si Auctori laboriosè antea actam in Mathefi vitam hoc nobilissimo epilogo cohonestare, si inchoatum hoc opus absolvere contigisset, non defuissent Gratia, quæ monumentum istud auferrent, atque in cœlis reponerent: vix quidem in alium omnibus suis numeris tam absolutum cadit opus, quàm in *Atlantem* hunc nostrum, virum in Arithmeticis Geometricisque consenescentem. Cui invenire præclarè, nervosè proponere, disponere concinnè, adeò feliciter datum fuit, ut de inchoato hoc opere affirmari possit, quod Antiqui de *Veneris* imagine, quam præmatura *Apellis* mors imperfectam reliquerat, æminem, qui secundùm perscripta ab ipso lineamenta reliquum absol-

veret, inventum fuisse: nedum ut nobis æternitatis penicillum post talem tantumque arrogemus. Deo autem moderatori omnium sapientissimo visum est *Apellem* hunc nostrum septuagenarium, in ipso quasi operis hujus vestibulo, sibi è terris evocare. Cum enim ante annos plus minus triginta, Canonem hunc sinuum, ad quindecim loca per æquationes Algebraicas, & differentias ipsis sinibus proportionales, à primis fundamentis accuratè exstructum absolvisset ac continuis Amicorum efflagitationibus fatigatus, ut Canonis unà cum constructione & usu editionem meditaretur, (quam propter negotia publica, quibus implicatus erat, vix licuit) tandem operi manum ægrè admovens, in ipso, ut obstetricum more dicam, puerperii quasi nisu vitam simul cum libro primo terminavit, ne vestigia quidem fabricæ libri secundi post se relinquens.

Jussu itaque Auctoris jam beati (cui adhuc in vivis nihil justum & æquum denegare religio mihi fuit) hortatu deinde clarissimorum ac Mathematæ egregiè callentium Virorum, D. *Christophori Gardineri Halingensis*, Armigeri, D. *Joannis Wellefii Deptfordiensis*, Armigeri, D. *Joannis Leverii Londinensis*, Generosi, & aliorum, quibus plurimùm debeo, ornatissimi denique nec non eruditi viri, D. *Adriani Vlacci*, rogatu, qui suis sumptibus Canonem typis primò mandaverat, permotus, pro modulo ac tenuitate nostra Canonis illustrationem aggressus sum, lineamenta *Neperiana* & *Briggiana*, quoad potui, secutus.

Lectores exoratos velim, ut hæc nostra, qualiacunque sint, candidè interpretentur, & errata, quæ occurrunt, (Typographo enim transmarino adesse non potui) emendent. Quod si in rebus majoris momenti numerus aliquis Canonicus erroris suspectus sit, poterit per differentiarum differentias non difficulter explorari. Valete. E Collegio *Greshamensi* ante diem tertium Calendas Novembris anno salutis MDCXXXII.

4^e
COMMENTARIOLUS

DE

VITA ET STUDIIS

Clarissimi & doctissimi Viri,

D. JOANNIS BAINBRIDGII,

Medicinæ Doctoris, & *Saviliani* Astronomiæ Professoris in Academia *Oxonienſi*.

SCRIPTORE

THOMA SMITHO,

*Sacræ Theologiæ Doctore, & Ecclesiæ Anglicanæ
Presbytero.*

COMMENTARIOLUS

DE

VITA ET STUDIIS

JOANNIS BAINBRIDGII.

JOANNES BAINBRIDGIUS probis clarisque parentibus in celebri Provinciæ *Leicestriensis* oppido, nuncupato *Ashby de la Zouch*, anno Verbi incarnati MDLXXXII. natus, ibique in schola publica *Græcis Latinisque* literis imbutus, *Cantabrigiam* mittebatur, auspiciis & cura Cognati sui, D. *Josephi Halli*, postea Episcopi *Norwicensis*, severioribus disciplinis in collegio *Emanuelis* instituendus. De tam bona & præclara indole & ingenio à natura insito, quibus pollebat, omnes, qui illum propiùs norant, benè quidem ominati sunt, nec illorum aut spem, aut expectationem, aut judicium frustratus est. Curriculo *Dialecticæ* & *Philosophiæ* ingenti cum laude confecto, quamprimùm in virum maturescere incepisset, de peculiari vitæ instituto, quo tum sibi tum aliis prodesse posset, eligendo sollicitus, tandem seria apud se deliberatione habita, genium naturæ secutus, artem Medicam sibi excolendam constituit, in cujus variis partibus discutiendis, non neglectis interim insuperque habitis amœnioris literaturæ studiis, ad scholæ cujuspiam, quam paucis annis tenuit, præfecturam invitatus, sedulam navavit operam, ut gradum titulumque Doctoris in ista facultate, quem postea tempore juxta normam statutorum *Academiæ* præfinito, capeffivit, absque omni gratiæ aucupio mereretur. Reversus ad propinquos & familiares, artem istam salutarem, quam professus est, apud viros nobiles aliosque circumcirca degentes, tum ob insignem medendi peritiam, tum ob obviam humanitatem, placidissimosque mores, utpote ad opitulandum ægris vel tenuioris fortunæ paratissimus, omni morositate vacuus, & ad quem quavis occasione data cuiquam facilè erat accedendum, ab omnibus tanquam tutelaræ genii loci magno in pretio habitus, per multos annos exercuit. Sed cùm subcesivas horas sibi in Museo relictas omninò perire vetuisset igneus animi vigor, quantum tantulumcunque illud otii esset, in arcanis Scientiarum Mathematicarum, & præsertim *Astronomiæ*, cujus amore & desiderio ab adulta ju-

ventute flagraverat, rimandis sedulò impendebat. Amicis autem, quibus egregiæ illius animi dotes erant compertissimæ, indignantibus, virtutem magis magisque, crescentibus annis, emicantem, quæ in longè ampliori & patientiori theatro explicari debuerat hætenus nimium diu celatam, & angustiis fordibusque ruris oppressam fuisse, illorum consiliis & hortatibus obsecutus, *Londinum*, omnium Artium Scientiarumque emporium, non tam certioris majorisque lucri captandi, quàm studiorum, quæ in deliciis habuit, & amicitiae cum viris eruditissimis, tum Medicis, tum Mathematicis, conciliandæ causa, sese contulit, illic qualicunque literarum subsidia, sive ea ex libris, sive ex faciliore & copiosiore instrumentorum ad cœlestes observationes accurandas apparatu, petenda sint, nullo negotio reperturus. Mox in ordinem numerumque Sociorum celeberrimi Collegii Medicorum *Londinensium* adscitus est.

Illuxit A. MDCXVIII. in cœlo nova stella ex genere Cometarum, qui, ut plurimum inveterato errore, ex superstitione & ignorantia orto, abreptorum mentibus terrorem metumque incutere solent, quasi essent mortis Principum, aut cujuspiam horrendæ stragis, sive bello, sive peste, sive qualitercunque infligendæ, prænuntii; sic Astronomis & Philosophis amplam & idoneam, tum infinitam omnium rerum Conditoris sapientiam & potentiam contemplandi & suspiciendi, tum horum mirabilium insolitorumque phænomenon naturam, qualitates, figuras, variosque per vasta ætheris spatia motus, illorumque periodum & durationem explorandi materiem & argumentum affatim subministrant. Inter hosce egregios Viros, quibus hæc cœlestia maximè curæ erant, jure merito recensendus est *Bainbridgius* noster, qui observandis hujus Cometæ motibus singulis noctibus, quando cœlum serenum permiserit, h. e. à decimo octavo die Novembris ad decimum sextum insequentis Decembris, quo sese ab humanis oculis subduxit, invigilavit: quorum ordinatam seriem accuratè digestam, libelloque *Anglicè* conscripto comprehensam, anno sequente serenissimo Regi *Jacobo*, primo *Britanniarum* Monarchæ, dedicavit.

Quod verò ad Astronomicam hujus Cometæ descriptionem spectat, delineationes istæ juxta Opticæ normam in plano, eclipticam in vicesimo gradu dodecatemorii Libræ tangente, projiciuntur. Linea verò illius proprii motus, magni circuli arcu comprehensi, qui erat retrogradus in antecedentia signorum, eclipticam in decimo quinto gradu & dimidio aut circiter Scorpionis interfecabat; deinde pertran-

fiens

fiens Libram, via transversa prope Arctophylacem, usque ad Ursæ majoris caudam, nimirum continenter sursum, Polum Arcticum versus, pauxillula variatione, tendens. Dein, *Bainbridgius* ex perpetua illius declinatione, quibus nostri orbis habitabilis regionibus singulis diebus verticaliter immineret, uti & omnes illius, tam in suo circulo, quàm inter sydera inerrantia vias transitusque ostendit. Post vulgari *Aristotelis* ejusque sequacium, quasi omnes Cometæ essent infra Lunam deprimentidi, hypothese ex regulari & ordinato illorum motu refutata, stellam hanc plusquam sexcentis terræ semidiametris ab illa distare ex irrefragabili Parallaxeos doctrina demonstrat: ut multa alia, quæ illic occurrunt, curiosa omittam. In hisce verò observationibus conficiendis Geometrica quædam instrumenta, pro modulo istorum temporum satis accurata, sibi in usum adhibuit, qui hac ex parte parum famæ suæ consuluisse visus est, quod observata hæc lingua *Latina* non edidisset; quod postea se in *Cometographia*, quam tunc omni cum diligentia molitus est, (cujus hic libellus erat brevis epitome & synopsis, ut nostratium importunis precibus & curiositati aliquo modo responderet & gratificaretur, in lucem maturiùs æquo protrusa) facturum animo constituit, veruntamen an Cometicum hoc opus unquam absolveret, nec ne, me penitus latet. Celandum non arbitror, *Bainbridgium* vulgi opinionibus de hisce terrificis apparitionibus ab ultima antiquitate conceptis nimium quantum indulgentem, in calce *Prognostica quadam*, ut appellat, *moralia*, ut Lectores cœlestium rerum prorsum inanes sapientiores & meliores redderentur, ingeniosè admodum addidisse.

Hac erudita lucubratione *Bainbridgius* non modicam sibi laudem & gratiam apud quosvis nobiles ingenuosque Viros, & præcipuè apud summum Virum, D. *Henricum Savilium*, conciliavit. Hic autem, cum pro flagrantissimo Scientiarum Mathematicarum in *Anglia*, ubi Benefactorum munificentia & patrocinio destitutæ pro tempore penè neglectæ & incultæ jacebant, promovendarum amore incensus, isthoc anno duas Lecturas in Disciplinis Mathematicis, quarum altera erat Geometriæ, Astronomiæ altera, in Academia *Oxonensi*, amplis latifundiis in perpetuum duorum Professorum usum & emolumentum, juxta municipalis nostri formulas transcriptis, mense Augusto MDCXIX. fundasset, quanti *Bainbridgii* doctrinam fecerit, illustri documento testatus est, utpote dignissimum censens, cui publica ista Astronomiæ Professio primò demandaretur. Honorificum hoc munus, omni cum læ-

titia amplexus est *Bainbridgius*: & eò quidem lubentiùs, tum quod sine ambitu & prensatione oblatum esset, tum quod in isto amœnissimo Musarum secessu procul ab omni strepitu & tumultu, & à negotiosæ vitæ molestiis, in urbe populosissimâ vix fugiendis, liber, severiori rerum cœlestium contemplationi se totum foret impensurus. Relicta igitur Urbe, *Oxonium* profectus est, A. MDCXX. in nova sua Professione inaugurandus, ibique in Collegio *Mertonensi*, cujus dignissimus erat *Custos* (sic enim Præfectus nuncupatur) illustris *Savilius*, in quo præclarissimi Astronomi, *Richardus de Wellingford*, *Joannes Manduit*, *Rogerus Suicet*, quem alii appellant *Swineshead*, *Joannes de Killingworth*, *Joannes de Eshendon*, *Joannes de Chilmark*, aliique, suorum temporum miracula, superioribus seculis vixere, recipitur, facta per multos annos morâ, usque dum laxiores ædes vicinas, majoris commoditatis causa conduxisset. Postea (a) A. MDCXXXI. in juniorem, & A. MDCXXXV. seniore Prælectorem *Linacrianum* in isthoc Collegio electus est.

Hoc autem nobile & felix otium nactus, dum de sparta ornanda seriò cogitaret, veterum *Græcorum* Astronomiam, ex illorum scriptis, aut ineditis in lucem producendis, aut editis, ex manuscriptis codicibus collatis, novo & defæcatori lumine donandis, eruendam, redintegrare, non minimam sui muneris partem duxit, Fundatoris consiliis & statutis hac ex parte libentissimè morem gerens, *Savilius* enim cùm pro sapientia sua optimè perspectum habuisset, fideralem hanc Scientiam non meliùs, ut cum venia dicam, ad suam apsidem pervenire posse, quàm si præclarissimis illustrium Virorum, *Georgii Purbachii*, *Joannis Mulleri Regiomontani*, *Nicolai Copernici*, *Erasmii Reinholdi*, & *Tychonis Brahe*, (quibus heroibus illa, spississima antecedentium barbarorum seculorum caligine sepulta, suam *καλιγγενισία* &

(a) E Registro Collegii Mertonensis. Ad A. 1643. In superiorem Linacrianam Lecturam, vacantem ob mortem clarissimi doctissimique Viri D. Bainbridge, M. D. & in Academia Oxoniensi Astronomiæ Professoris, qui paulò ante cum summo omnium eruditorum desiderio & luctu è vivis excesserat, electus est Doctor Greaves è Collegio omnium Animarum. Sciat Lector, insignissimum & doctissimum Virum, D. Thomam Linacrum, olim regnante R. Henrico Octavo, cujus fuerat Medicus, duas in Facultate Medicinæ Lecturas in Academia Oxoniensi, jam Collegio Mertonensi assignatas, unamque in Academia Cantabrigiensi, jam Collegio S. Joannis Evangelistæ affixam, prædiis in Professorum emolumentum ex jure transcriptis, fundasse & instituisse.

& instaurationem debet) antiquissimorum, quos *Ægyptus*, *Chaldea*, & *Græcia* olim produxerint, divinæ Matheseos Magistrorum primæ explorationes conatusque felicissimi adderentur, *Græcos* codices optimæ notæ manuscriptos, quos, *Germania*, *Italia*, & *Gallia* peragrat, magnis sumptibus & diligenti investigatione comparaverat, in Museo in omne ævum asservari curavit, ut illorum scita, placita, observationes, & hypotheses feliciùs certiùsque inde possent exhauriri. Hoc igitur auctoramento & præsidio munitus, (munificus enim Patronus adhuc erat in vivis) horumque codicum manu exaratorum copia & subsidio instructus; quo faciliùs in *Ptolemæi* μεγάλην σύνταξιν, quam explicandam susceperat, pateret aditus, *Procli Sphæram*, in qua prima Astronomiæ, quatenus nimirum ad doctrinam Sphæricam refertur, elementa clariùs & luculentiùs explicantur, *Græce* cum sua *Latina* versione hoc ipso anno *Londini* edi voluit, Lectorem monens hanc *Introductionem*, sub *Procli* nomine editam, *Gemino*, peritissimo tum *Geometræ*, tum *Astronomo*, potiori jure adscribendam esse, utpote ex illius in *φαινόμενα* *Isagoge* totam absque aliqua variatione à *Proclo* exscriptam. Accessere (a) *Ptolemæi* περί ὑποθέσεων Πλανημένων, sive de *hypothesibus Planetarum*, liber nunc primùm in lucem editus, illic, ut in priori, figurarum delineationibus insertis, & ejusdem *Ptolemæi* κανὼν Βασιλειῶν, sive *Canon regnorum*. Sed fortean longè præstat, in majorem eruditi Lectoris utilitatem, integram Auctoris Præfationem, in qua de ratione hujus editionis eruditè differitur, hîc exhibere.

LECTORI CANDIDO

ὑγιαίνειν.

Duas in Artibus Mathematicis professiones liberalibus stipendiis instituisse, non magni estimavit magnificus & prudentissimus noster Mecænas,
Gg 3. *nisi*

(a) *Joannes Gravius* in præfatione ad Astronomica quædam ex traditione *Shah Cholgii Persæ*, unâ cum hypothesibus Planetarum, *Londini* 1652. loquens de *Ptolemæo* jam sene:

Qui postquam μεγάλην σύνταξιν feliciter absolvisset, sive memoria sua sollevanda gratia, sive ut tyronibus prodesset, huic etiam ὑποθέσεις tanquam coronidem adjunxit. Sed alta nocte jacebant involuta, vix ipsis Græcis nedum Latinis, cognita, donec clarissimus Joannes Bainbridgius eas non ita pridem à tenebris situque vindicavit.

nisi antiquos etiam, eosque optimos, *Matheseos Magistros* in Cathedras suas, unde prioris seculi barbarie, hujusque fastu, turpissime deturbati sunt, restitueret: comparatis in hunc finem variis Antiquorum exemplaribus Græcis manuscriptis. Ad quorum regulam & normam Euclidem τετραγωνον δι' ἀνεν φόρυς, fecit facietque doctissimus meus Collega, H. Buggius. Eorundem etiam radiis Ptolemæus à me tandem spero, illustrabitur. At cum difficilis admodum & obscurus sit, in Magnam illam Syntaxin aditus, hanc duplicem ὑσυχωγὴν, faculas preferentem, præmittere placuit. Alteram titulo quidem Procli, jure tamen Gemini, Geometra & Astronomi nobilissimi, ex cujus in Πανήγιον Isagoze eam totam & ad verbum λογιάματος excerpfit Proclus; Alteram Ptolemæi & nomen præferentem, & ingenium geniumque referentem, Sphæram longo usu, aut potius neglectu, mutilatam & distortam, duobus Gemini codicibus MSS. usus, jam integram & accuratè sphericam exhibeo: locis restitutis, parentheses clausura in Græco textu indicatis: nam γεωφικῆς ἀμαγίας in ipso Gemino nonnullas à nobis, emendatas libens prætereo, inanem illam gloriolæ umbram Criticis captandam relinquens. Ad Hypotheses, reconditissimas Astronomie thecas, venio, quas, annos ferè M. D. ἐν σκοτεινῇ τειροσυστοιμίας, ex eodem tandem Matheseos sacrario felici quodam astro desumptas, in lucem meliorem primus profero: & quanto labore, quanta cura eas repurgavi! Ex tribus enim exemplaribus MSS. ne unum quidem integrum aut incorruptum fuit, omnibus similiter inquinatis, eademque ferè conspurcatis labe. Multas lacunas, parenthesi inclusas, explevi. Omnes periodos & epochas ad Magnæ Syntaxis leges & numeros, analysi non ita facili, retextui, plurimasque viuiatas restitui.

In latitudinem verò hypothesibus nihil mutare volui: hic enim Ptolemæus prudens, si quid judico, ab illis in Syntaxi constitutis desciscit, aliasque faciles, expeditas, longèque veriores candidè proponit. His tandem adjunximus aureum illum, ex pulcherrimo Καρόλων προχείρων volumine MS. desumptum, Regnorum Canonem, in motibus cœlestibus ad antiqua illa secula supputandis, ut χρονολογίαν præteream, pernecessarium: quo ad Antonini Pii regnum usus est ipse Ptolemæus. Reliquum à Theone, Ptolemæi interprete, additum fuisse mihi valde persuadeo. Tralationem Sphæra & Hypothesium Latinam feci planam, & plenam, atque, ut Astronomicè loquar, dilucidam. Figuras denique utrobique desideratas apposui eas, quæ res ipsas clarissimè ante oculos ponerent. Qui hæc carpit mordetque, μωμῶσεται ὅσους ἢ μωμῶσεται. Tu, Lector benevole, conatus meos equi bonique consule, &
annos

annos Nestoreos nostro Matheseosque Mecænati optimo exopta felicissimos.

Hunc fanè Canonem cùm D. *Abrahamus Scultetus*, Londini agens A. MDCXIII. à viro summo, D. *Joanne Overallo*, Decano Ecclesiæ Cathedralis S. *Pauli*, acceptum, mox post reditum in Germaniam *Se- tho Calvisio*, alteram Operis Chronologici editionem adornanti commu- nicavit. Hic verò illum pro admirabili mentis in instauranda Chro- nologia post *Josephum Scaligerum* sollertia, præcipuè subsidio cœles- tium characterum, & civilium annorum cum annis astronomicis in singulis Epochis comparatione, rectè nec quisquam isthoc ævo me- liùs potuit, omni auro pretiosiores esse judicans, in Isagoge præmis- sa, primus edendum curavit.

Sed, ut de hoc *Mathematico Canone* pauca, ὅς ἐν περίοδῳ, dicam:

Hunc fanè summi Chronologi antecedentis seculi, præter *Calvisium*, maximo in pretio habuerunt, quem, ut certissimam normam & du- cem in Regum *Assyriorum Persarumque* gestis & annis, spinosis per- plexitatibus aliàs involutis, statuendis secuti sunt, & cujus beneficio utraque Historia, tum quæ in sacris Scripturis, tum quæ in ultimæ antiquitatis Scriptoribus, *Herodoto*, *Ctesia*, *Diodoro Siculo*, aliisque ex- stat, facili methodo rectoque ordine simul connectitur: utpote qui seriem & successionem annorum Regum, ut dixi, *Babyloniorum, Me- dorum, Persarum, Græcorumque* in *Ægypto*, & deinde *Romanorum*, ad *Theodosii Magni* obitum productus, exhibet & repræsentat. Non à veritate aberrabo, si dixerò, vix quicquam simile hisce tabulis re- conditissimis, quod illustrandis temporibus antiquissimis magis condu- cat, hætenus erutam fuisse. Nemo enim prudens celeberrimam *Na- bonassari* æram, à qua eclipsium, quas memorat, recensitionem & cal- culum iniit *Ptolemæus*, hujus ipsissimi canonis, quem, ut verisimilli- mum est, præ oculis indefinenter habuit, fide fretus in dubium vo- caverit. Si qui errores, & quidem paucissimi, in numerorum, lite- ris Alphabeti signatorum, adnotatione, sive in hunc aureum Cano- nem, sive apud *Ptolemæum* irrepsent, id neutrius auctoritati ullate- nus detrahi oportet, cùm in reliquis ferè omnibus mira sit connexio & convenientia. Frustra ergo ex pauculo dissensu fidem canonis con- vellere videtur D. (a) *Conringius*. Sed hæc disquisitio non est hujus loci; alii, qui Chronologiam ex professo tractant, viderint. Inte- rim non possum, quin candorem in Viro doctissimo desiderem, qui ad-

(a) In Adversariis Chronologicis cap. XII.

adversus D. Bainbridgium, hujus Canonis continuationem *Theoni Alexandrino* adscribentem, dictatoriè nimis, pronuntiat, eò quod illic *Julianus* Imperator Παρεβάτης nuncupatus sit, quod homini pagano, qualis erat *Theon*, excidere posse parum verisimile videtur. Sed certissimè constat, illum in τῶν προχείρων Κανόνων libros, uti & postea Imperatorem *Heraclium*, ubi istud quantivis pretii cime-
 lium occurrit, sicut etiam in *Ptolemæi τὴν μεγάλην Σύνταξιν*, commentarios scripsisse; & par est credere, ab aliquo Christiano, canonem sequiori seculo exscribente, cognomentum illud, quò tanquam nigro stigmatè ab omni Christiano populo communissimè sermone inurebatur, ex veteri adversus Apostatam odio in suo exemplari additum fuisse. Eandem, quam primò iniit, viam insistens *Bainbridgius*, de edendis veterum Astronomorum scriptis fragmentisque genuinis, & præsertim de aureo *Hipparchi περὶ μεγεθὸς ἐνιαυσίᾳ*, sive de anni solaris quantitate libello maximè erat sollicitus: de quo reverendissimum virum, D. *Jacobum Usserium*, Archiepiscopum *Armachanum*, quocum illi arctissima inter-
 cesserat necessitudo (a) consuluit, ut ipsius ope è Bibliothecis, aut *Scorialensi*, aut *Vaticana*, in quarum utrisque exstabat apographum, quod doctissimi Viri, *Dionysii Petavii*, S. J. in *Uranologio* suo diligentiam fugerat, inde in *Angliam* transmitteretur. Sed nec illi neque (b) Viro præstantissimo, *Joanni Gravio*, quem postea ejusdem nanciscendi par desiderium tenuerat, contigit esse tam felicibus. Hoc tamen mihi constat, illum, *Historiam Astronomicam*, in qua, ut ipsius verbis utar, nonnullas antiquæ Astronomiæ reliquias, tanquam ex naufragio tabulas, collegerat, composuisse; ultra gravissimè dolentem, antiqua illa Astronomiæ monu-
 menta, (quæ nimirum à *Ptolemæo* memorantur) non sine maximo hujus Scientiæ damno aut periisse, aut Bibliothecarum quarundam quasi carcerum vinculis & tenebris damnatas esse. Sed vereor, ne præclarum hoc opus idem quoque triste fatum subierit: saltem, ubi thesaurus iste literarius adhuc delitescat, frustrà quæsi.

Verùm intra hosce angustos Astronomicæ literaturæ apud *Græcos* servatæ limites non se stitit *Bainbridgii* improbus labor. Cùm enim multos *Arabum*, qui hæc studia, potissimum sub *Almamoni* præsidio & auspiciis, mirabili industria coluerant, æmulorumque *Persarum* libros MSS. de hac sublimi Scientia conscriptos, tabulasque de motibus Solis & Lunæ, de longitudinibus & latitudinibus sive inerrantium stella-

(a) V. Epistolam CXXV. ad *Usserium* in Sylloge pag. 390.

(b) V. Epist. *Gravii* CCXI. pag. 509.

stellarum, five civitatum in orbe terrarum, quâ Oriens, quâ Occidens longè latèque ipsis patebat, longè ante *Americam* audacibus *Hispanorum* navigationibus periculisque felicissimè detectam, maximè celebrium, vidisset, tanto ardore, quid in Canonibus Observatores adnotaverint, (nam tabulas frequenti inspectione & usu accuratè intellexisse videtur) penitiùs explorandi inflammatus, quadragenario major, linguæ *Arabice* addiscendæ operam impendit, nulla difficultate objecta absterrendus. Sed hæc fuisse videtur peculiaris laurea præstantissimi Viri, D. *Joannis Gravii*, qui tunc temporis in numerum Sociorum Collegii *Mertonensis*, five consiliis, five exemplo *Bainbridgii* incitatus, Scientiarum Mathematicarum studio accuratissimam linguarum *Orientalium* cognitionem ab ipsa juventute summa industria conjunxit. Utcunque res ista à *Bainbridgio* sapienter suscepta, non adeo feliciter ceciderit, non possum, quin illius tentamina debitis elogiis commendem, qui rectè judicabat, neminem, licèt Arabicè benè peritum, interim rerum istarum non satis intelligentem, boni, cui fidendum est, Interpretis munere defungi posse: nec evitandum, quin multos, eosque crassos, errores in versionibus subinde sint admissuri. Ideo suis oculis non aliorum videre impendio cupiebat, ut Σύνταξις Μαθηματικὴν, quam tunc instituebat, *observatis Arabum*, uti loquitur, *tanquam tot pretiosis lapillis ex Arabia felici erutis adornatam* loqupleret. In quo opere facilem istam expeditamque, quam se excogitaturum in literis ad D. *Vsserium* dicit, calculandi eclipses methodum, uti par est credere, reposuit.

Quò verò cœlestes istæ observationes, quibus oculorum mentisque aciem assiduè intendebat, certiores accuratioresque fierent, instrumenta, five ex ære, five ex buxo conficienda, magni ambitus & minutissimarum divisionum capacia, quorum usum necessarium fore quotidiana experientia edocebatur, fabricare in animo habuit. Sed cùm sumptus in iis accurandis impendendi privatum ipsius censum superaverint, suppetiis & ope Magnatum, quod non sine luctu & indignatione memorandum arbitror, post mortem Patroni, destitueretur, instrumentis, quæ absque rei domesticæ detrimento & jactura sibi comparare licuit, neutiquam tamen inde imminuta diligentia, aut sub istis angustiis fatifcente, contentus esse adigebatur.

Mirari subit, quibus de causis, ab istis lucubrationibus, quas apud se habuit, in lucem producendis, tempore Professionis Astronomicæ, per viginti quatuor annos continuato, prorsus abstinuisset: nec in illas

curiosius inquiram. Frustrà & injustissimè rigidi censores, si qui sint, hanc omissionem desidiae imputabunt, neutiquamque crimini vertere ea de causa debent: cum indefessae industriae tot luculentos in Academia Oxoniensi habuerit testes: nec opus erit aliqua excusatione aut apologia, postquam varia illius scripta ad illustrandam Astronomiae Scientiam spectantia, quae adhuc supersunt, ab illo relictà, statim in indicem retulero.

Emigravit, & placida quidem morte, Vir optimus & doctissimus, ex rerum coelestium in terris contemplatione ad coelos ipsos, ut sperari fas est, propius & penitus inspicandos, in ædibus suis Oxonii tertio die Novembris, hora sexta matutina A. MDCXLIII. ætatis verò LXII. Mox solennes exequias, tanto verò debitas, peregit Academia Oxoniensis, funere omni cum decora pompa elato. In Schola Theologica, quò corpus erat paulò antè clam deportatum, Vir florentissimi ingenii, D. *Guilielmus Strobus*, publicus Orator, post triduum viz. 6^{to}. die ejusdem mensis, præsentibus Vicecancellario, Professoribus, reliquis omnium Facultatum Doctoribus, confertissimaque Magistrorum corona, in laudem defuncti elegantissimè peroravit. Inde longo ordine bini post sandapilam incedebant ad Collegii *Mertonensis* sacellum, in quo, post sacrum officium, juxta Liturgiæ Anglicanae formulam, præstitum, propè conjunctissimi sui Collegæ, D. *Henrici Briggii*, tumulum, maximo cum honore & luctu deponebatut. Non longè post elegans monimentum erigendum curarunt Amici superstites, hac Epigraphe insignitum:

Si cupias Viator, quis & quantus, hîc jacet,

Alibi quæras, oportet, dicere satis nequeo:

Britannia tota Viri famam non capit.

Ne cetera tamen ignores, in rem tuam pauca hac accipe.

JOANNES BAINBRIDGIUS,

Vir fama integerrima, & doctrina incomparabilis,

Medicinæ Professor & Matheseos,

Morborum tam felix expugnator novorum,

Quàm sagax indagator siderum:

Quem primum Astronomiæ Professore,

Et dignum Collegam,

In Mathematicis Praelecturis, quas magnificè crexerat,

*Prudens hominum & librorum estimator elegit ,
Savilius :*

*Quem Cantabrigiæ educatum ,
Academia Oxoniensis fovit , ut suum ,
Defunctum publicè deflevit , ut par utriusque ornamentum :*

Qui Scaligerum feliciter correxit ,

Quam Scaliger

Tempora :

In non levem literarum jacturam immaturus obiit ,

MDCXLIII.

Abi jam , cetera quære vel ab Exteris.

An Epitaphium hoc D. J. Gravii ejus in Astronomiæ Cathedra Successor , amicitiae , observantiae honorisque testandi causa , quod aliqui asserunt , composuerit , mihi saltem non liquet. Sequens verò ex ipso Gravii autographo , ex illius schedis propria manu conscriptis , in quibus multa ejusmodi commiscuit , olim exscripti , quod hîc meritò apponendum , tum in Bainbridgii honorem , tum in Lectoris gratiam , nec forsitan temerè quidem , censeo.

Quod superest

Clarissimi Viri ,

D. JOANNIS BAINBRIDGE ,

In Academia Oxoniensi

Publici Astronomiæ Professoris ,

Sub hoc marmore clauditur.

Quod verò amavimus ,

Quod suspeximus ,

Quod mæsti desideramus ,

Frustra hîc quæras :

Illud cælo , cui vivus animo

Cogitationeque incubuit ,

Receptum est.

Obiit. A. D. CIO. CIO. XLIII.

IX.bris III. ætatis suæ LXII.

Hora sexta matutina.

V. Cl. *Joannes Gravins* commentarios *Bainbridgii* de anno *Caniculari*, h. e. de *Aegyptiorum* anno naturali, à *Caniculæ* ortu heliaco incipiente, suasu ac impulsu reverendissimi Archiepiscopi *Armachani* conscriptos, A. D. MDCXLVIII. *Oxenii* edidit: in quibus etiam de diebus *canicularibus*, ortuque istius splendidissimæ stellæ, & de periodo *Sothiaca*, non sine varia amœnioris literaturæ ex *Græcis Latinisque* veteribus Auctoribus, quorum sententias exponit & castigat, admixtione, agitur. Hos verò *Bainbridgius*, sive turbatissimis illis, flagrante rebellione *Parlamentaria*, rebus impeditus, sive morte in ipsis viridis senectæ initiis præreptus, imperfectos reliquit, ad istius stellæ ortus heliaci demonstrationem, quod unicum erat, uti *Gravins* loquitur, istius *Diatribæ* columnen, neutiquam progressus. Præcipuam autem illam partem apodicticam maximè desideratam pro parallelo inferioris *Aegypti*, rogatu ejusdem reverendissimi Antistitis, eruditissimis de obliquitate *Zodiaci*, de longitudinibus & latitudinibus, uti & ascensione recta & declinatione stellarum observationibus, ex *Astronomorum Arabum, Persarum, Indorum, Græcorumque* scriptis, insertis, adjecit supplevitque *Gravins*.

Ab isthoc tempore nullum aliud *Bainbridgii* opusculum hætenus in lucem exiit. Sanè proximo post mortem illius anno, aliæ *Dissertationes*, *Vice-Cancellarii Oxoniensis* permissu & approbatione, prelo paratæ & mandatæ erant: sed multiplex iste industriæ ingenique *Bainbridgiani* foetus in primis nixibus inauspicatissimè quasi suffocatus, nondum benignam *Lucinam* expertus est. Harum titulos hîc dabo:

Antiprognosticon, in quo partim Astrologica, coelestium domorum, & triplicitatum commentis, magnisque *Saturni* & *Jovis* (cujusmodi anno 1623 & 1643. contigerunt, & vicesimo ferè quoque deinceps anno, raris naturæ legibus, recurrent) conjunctionibus innixæ, vanitas breviter detegitur.

De Meridianorum sive longitudinum differentiis inveniendis Dissertatio.

De stella Veneris Diatriba.

Accessit & in funere ejus à D. *Gulielmo Strodo*, *Academia Oxoniensis*, *Oratore publico*, brevis *Oratio* habita.

Cùm verò eruditæ hæ lucubrationes mihi in manus felicissimo casu inciderint, ne penitus interirent, quantum in me erit, & si per *Bibliopolarum* avaritiam liceat, tandem aliquando curabo.

Specimen cœlestium observationum, quas *Oxonii* fecerat *Bainbridgius*, intueri est apud V. Cl. *Ismaelem Bullialdum* in *Astronomiæ Philolaicæ* * libro XII. pag. 467. ubi exstant.

Parisiis,
1645.

Sed quantula hæc sunt, si cum reliquis ineditis, quæ inter D. *Usserii Armachani*, cujus fidei & curæ olim ex legato, ni fallor, Auctoris testamentario commissa erant, MSS. codices, in Archivis Bibliothecæ Collegii S. Trinitatis *Dublin.* hodie supersunt, conferantur: cujusmodi sunt, (neque omnes illius lucubrationes illic reperiendas recensere lubet)

Solis Theoria.

Lunæ Theoria.

De anni quantitate.

Observationes Astronomica. 2 Vol.

Miscellaneorum Mathematicorum novem aut decem Volumina.

Operæ pretium & magni usus foret, si quispiam ex *Hibernis Mathematicis*, quibus facilis est horum librorum copia, si quid eximium & bonæ frugis, quod huic cœlesti Scientiæ illustrandæ conducatur, inibi exstet, de quo dubitare nefas meritò censebitur, inde excerptum digestumque cum orbe literario communicare vellet. Licet enim nemo, nisi harum rerum imperitissimus, diffitebitur, quamplurima nova & prorsus admiranda *Urania* arcana, per sexaginta subsequentes annos, sagacissima mente, ingenio, & industria præclarissimorum Virorum, *Gassendi, Hevelii, Riccioli, Bullialdi, Cassini, nostratium Wardi, Hookii, Flamsteedii, Hallæi*, aliorumque detecta fuisse, quæ illum latuerant, tamen quid Astronomi tempore priores observaverint, quibusque mediis, ratione, & methodo fideralis hæc Scientia ad culmen assurrexerit, ex illorum scriptis deducere, id quidem non soli studiosorum voluptati, sed commodo inservire possit: ansa ex illorum imperfectis notitiis, conjecturis, & suggestionibus, plura, quibus non aliter venisse in mentem, inveniendi & excogitandi inde arripienda.

Post hæc referre penè piget, *Bainbridgium*, ut ex epistola ad R. *Jacobum I.* dedicatoria, supra memorata, liquet, *Monarchiæ Britannicæ historicam, panegyricam, & prophylacticam*, verba ejus sunt, *descriptionem*, tribus columnis distinctam, aggressum fuisse, eo fine, ut ex illa auspicatissima regnorum *Angliæ & Scotiæ* sub uno eodemque Mo-

narcha coadunatione, universos subditos æterno, uti sperari fas erat, scœdere consociatos, tum ad piissimum faventissimi & maximè misericordis Numinis, cujus benignissima providentia id effectum erat, cultum, tum ad fidem Regi communi debitam, mutuamque inter se concordiam in omne ævum servandam, summo cum animi affectu incitaret. Sed lucubrationcula ista, cujus argumentum, si quis alius, pro dignitate tractaturus esset, adhuc-dum desideratur, nec unquam postea, quod sciam, sive ab ipso derelicta, sive suppressa, comparuit.

Pauca hæc in memoriam D. *Bainbridgii* in hoc brevi commentariolo, ex justo eruditionis virtutumque illius sensu, tumultuaria quasi opera, collegi, ne qualis quantusque fuerit, feros in secuturis seculis nepotes lateat, ne dicam in vindicias illius famæ, quam, licèt in re levicula, læsit mendacissima quorundam obtrectatio, quasi in prælectione habita contra Grammaticæ Syntaxeos regulas ex ignorantia semel peccasset, quàm, utpote scomma absurdum, ridiculumque, & quod seriò refutetur, prorsus indignum, penitus omissem, nisi insignis quidam fannio in nupero libello Epigramma istud inficetum, rythmis *Anglicanis* olim conscribillatum, ad captandum puerorum plausum, irrisorium planè in modum inseruisset. Persuasissimum autem habeo, nec dubito, quin omnes æqui rerum arbitri mecum hac ex parte consensuri sint, *Bainbridgium*, tam ob Scientiarum Mathematicarum amœniorumque literarum studium & peritiam, quàm ob pietatem suavissimosque mores, quibus, dum vixerit, omnium bonorum amorem & gratiam sibi mirè conciliavit, inter magnos seculi proximè elapsi viros perennibus elogiis celebrari, prout meritus est, debere.

Clarissimi ac doctissimi Viri ,

JOANNIS GRAVII,

Olim Astronomiæ in Academia Oxoniensi Pro-
fessoris Saviliani,

V I T A :

I N Q U A

De illius Studiis , Itineribus in *Italiam* , ad *Constanti-*
nopolim , & in *Ægyptum* susceptis ,

E T

Libris editis ineditisque, fusè differitur.

Scriptore

THOMAS SMITHO,

*S. Theologiæ Doctore & Ecclesiæ Anglicanæ
Presbytero.*

V I T A

Clarissimi & doctissimi Viri ,

JOANNIS GRAVII,

Astronomiæ apud Oxonienses Professoris
Saviliani.

JOANNES GRAVIUS in lucem editus erat *Colmora* propè *Alresfordam*, oppidum non incelebre, in Provincia *Hantonensi*, anno hujus seculi secundo, sapientissimæ & gloriosissimæ Reginæ *Elisabethæ* emortuali. Patrem habuit *Joannem Gravium*, istius Ecclesiæ Rectorem, mascula prole perquàm felicem. Vidit enim admodum provectæ ætatis senex quatuor filios, quorum natu maximus *Joannes* noster, pari industria & honesta æmulatione ad literarum studia in adolescentia contendentes, jam adultos viros factos, famæ longè latèque propagandæ & opimioris fortunæ, si summis virtutibus & doctrinæ debita constarent præmia honorque, quam ille angustis viculi limitibus circumscriptus, privata licèt sorte sua contentus, obtinuisset, fundamenta jecisse. Ille verò, sive insito liberorum amore, sive benè merendi de Viris generosioris prosapiæ aliisque, qui in vicinia habitaverunt, studio incitatus, erudiendæ juventutis in se citra sacre functionis præjudicium laudabilem curam suscepit: quali autem peritia quantaque diligentia professionem suam exercuerit, felicissimi, quos filii præsertim postea fecissent, progressus luculenter satis in omne ævum testabuntur. *Joannes* Græcis Latinisque literis probè instructus, decimoquinto ætatis anno, mittitur *Oxonium*, gravioribus Philosophiæ disciplinis instituendus. Non eguit consiliis & hortatibus parentis aut amicorum, ut vitæ Academicæ institutum seriò persequeretur; quippe bonam mentem, contra desidiæ & luxum, lubricæ adolescentiæ pestes, satis obfirmatam, acre ingenium, maturumque, quantum ista fert ætas, ju-

1621.

dicium, secum illac attulit, ab isthoc studio, quod ingressus est, nullis objectis aut voluptatibus aut impedimentis, dimovendus, donec optatam metam attigisset. Pro more (neque enim præcocibus ingeniis quicquam hac ex parte indulget Academia) quadriennio exacto, Baccalaureatum in artibus adeptus est; deinde Magistri gradu & titulo post tres annos insigniendus: nisi quippiam magni momenti, & ex quo futuræ vitæ felicitas penderet, ex insperato intervenisset. Cum enim expletum istud tempus instaret, nempe anno 1624. accidebat, ut Custos & Socii magnifici Collegii *Mertonensis* jam de novis Sociis in defunctorum aut honestis de causis cedentium vicem substituendis apud se deliberarent. Hoc prudenti illorum curæ & probitati permisit munificentissimus Fundator, *Gualterus de Mertona*, Episcopus *Roffensis*, & bis Cancellarius *Angliæ*, primò in posterioribus annis Regis *Henrici* tertii, ac iterum regnante Rege *Edwardo* primo: nihil certi de tempore, quo electio fieri debet, statuens. Inde mora quatuor aut quinque annorum quandoque interponitur, prout res domesticæ postulabunt. Quamprimùm autem ejusmodi propositum propalatur, Baccalaurei (omnes enim alii, sive Magistri, sive nondum ad gradum promoti, excluduntur) per Academiam sparsi, eruditione & ingenio præstantes, quibus non ita felicibus esse contingit, ut ex Fundatorum Benefactorumque latifundiis alantur, potissimùm qui in Academia per plures annos aut per integram vitam degere studiorum causa cupiunt, istius beatæ sortis, qualis revera est, si votorum compotes illa rectè uti nossent, adipiscendæ desiderio incenduntur, rigidissimum examen subituri. Inter hosce candidatos comparens *Gravius*, primus merito suo eligebatur, jam severa disciplina, nunquam intermissa, nunquam intermittenda, per quam oriri & segnescere absque acri censura non licet, & qua forsitan vix severior alicubi gentium in qualicunque Seminario exercetur, per quatuor annos ab ipsa prima admissione numerandos exercendus. Hæc tot præclaros Viros & in omni literarum genere præstantissimos peperit, puta *Thomam Bodleium*, *Henricum* & *Thomam Savilios*, *Joannem Chamberum*, *Franciscum Masonum*, *Georgium Carletonum*, *Isaacum Wakum*, *Johannem Halesum*, *Theodorum Galstonum*, *Joannem Earle*, *Richardum Brunum*, *Guilielmum Berkeleium*: ut à cæteris tum superiorum temporum tum hujus ævi recensendis abstineam, quorum omnium fama universum Orbem pervagata est.

Manente hac studendi necessitate, quam sibi, ut arbitrari æquum videtur, gratulatus est *Gravius*, ex qua durus improbusque labor longo usu

usu & consuetudine primò fit toleratu facilis, deinde transit in delicias, post lectos relectosque classicos omne genus Auctores, sive *Græcos* sive *Latinos*, animum ad Philosophiæ naturalis, tum veteris tum novæ, quæ, instaurante magno *Bacono*, florere & magno in pretio haberi cœperat, & Scientiarum Mathematicarum culturam studiumque seriò admovebat: tanto literarum amore inde contracto, intimisque medullis infixo, ut in naturam conversus videri possit, nunquam, ne quidem quando ademptæ libertati restitutus, licentiùs pro arbitrio ad industriæ viriumque relaxationem agere potuisset, evellendus. Tandem verò laboriosum hoc nimisque restrictum vitæ institutum, cui tamen doctrinam, famam suam, reliquaque vitæ præsidia & ornamenta illum debuisse cettò constat, feliciter emensus, mense Junio A. C. 1628. Magistri laurea donatus est: mox inita cum Viris doctissimis, D. D. D. *Henrico Briggio* & *Joanne Bainbrigio*, primis Professoribus *Savilianis*, altero Geometriæ, & ad mensam Sociorum convictore, Astronomiæ altero, ejusdem quoque Collegii Prælectore *Linacriano*, & *Petro Turnero* consocio, insigni quoque Mathematico, amicitia, qui illum tanquam omnino parem, licet ætate longè inferiorem, mira de se ex hisce præclarissimis initiis tacitè spondentem, pro innata, qua viri solidè docti & egregia virtute præditi erga sui similes feruntur, bonitate, sinu suo humanissimè exceperunt. Ex ista familiaritate honorifica pariter ac utili studium istud, quasi ex sponte naturæ mentisque insita propensione priùs in pectore accensum, Mathesin majori cum sedulitate excolendi magis magisque ardebat. Ille verò *Copernici*, *Regiomontani*, *Purbachii*, *Brahei*, *Kepleri*, aliorumque insignium Astronomorum hujus aut superioris sæculi lucubrationes diligenti manu versasse non contentus, veteres Mathematicos, non solum *Græcos*, sed & *Arabicos Persicosque*, in hac præsertim siderali Scientia optimè exercitatos, sibi reddidit familiares, accurata linguarum Orientalium, quibus, tanquam tot clavibus Scientiarum, illarum gentium, quæ sub *Almamone Chalipha* literarias *Græcorum* opes in suas regiones transfudissent, arcana & inventa aperiri & explicari solent, cognitione priùs acquisitâ: quanto autem cum fructu, qui in rempublicam literariam esset redundaturus, libri ab ipso editi, quos post memorabo, satis clarè docebunt. Jam vita facilis, expedita, omnibus præsidiis subsidiisque ad eruditionem necessariis instructa, & abs omni inertiae aut læsæ modestiæ & probitatis labe pura decurrebat; nulli quoque certæ facultati, sive Theologiæ, sive Medi-

cinæ, sive Jurisprudentiæ, ex indulgentia statutorum alligata. Socii enim peculiari hoc privilegio gaudent, ut hanc, illam, istamve, aut qualemcunque aliam ingenuis viris dignam, tanquam provinciam suam, pleno jure possessam, prout lubitum est, ornare liceat. Inde noster nobili otio abundans, non ex levitate mentis, quod sciorum vaneque *πολυμαθείας* famam affectantium est, qui quippiam tenue & pusillum, quasi solam superficiem radendo, nunc ab hac, statim ab altera solent excerpere, sed solerti ingenio in profunda & ima rerum penetrabat, adhibitaque indefessa industria, vasto mentis capacissimæ ambitu, quicquid in Scientiis naturalibus, & præsertim in Mathesi, rarum, aut curiosum, aut eximii in communi vita usus exstitisset, post aliquot annos facile complexus est.

Circa A. 1630. fama ipsius etiam apud *Londinenses* percrebrescente, in Collegio, quod insignissimus Vir, D. *Thomas Greshamus*, equestri dignitate ornatus, de civitate *Londinensi*, de universa *Anglia*, imò de universa Rep. literaria optimè meritus, ad promovendas propagandasque naturales Scientias, olim regnante *Elisabetha*, illic fundavit amplisque dotavit redditibus, Geometriæ Professor cooptabatur, integro jure, quod in Collegio *Mertonensi* habuit, servato.

Inter omnes verò illos extra Academiam, quorum amorem & benevolentiam sibi conciliavit *Gravius*, maximè & primo in loco recensendus est reverendissimus *Guilielmus Landus*, Archiepiscopus *Cantuariensis*, & Academiae *Oxonienfis* Cancellarius, quo nemo retroactis seculis de Ecclesia Anglicana, nemo de illa Academia meliùs meritus est: quod omnes boni sapientesque grato ore agnoscent & sempiternis laudibus prædicabunt: omnes, inquam, præter exulceratæ mentis Presbyteranos, horrendi & in perpetuum lugendi schismatis fautores, reliquamque insanientium Sectariorum, tanquam tot vermium ex ista gangræna enascentium, colluviem. Ille Vir maximus *Gravium* pro summo, quo literas literatosque fovebat, amore, suum esse voluit, & favore & patrocinio suo dignatus est. Præsenferat enim, nil nisi eximium, verè magnum, & admirandum ab illo expectari potuisse. Non potuit sanè dari major acriorve ad virtutem & industriam stimulus, quam à tali tantoque Viro amari & æstimari.

Sed ignea vis mentis angustis *Londini* & *Oxonii* limitibus neutiquam erat coercenda. Licet enim diligentissimè excussis Bibliothecarum nostrarum forulis, & frequenti familiarique eruditissimorum virorum conversatione domi sapere didicisset, & *Anglos* suos nullis Gentibus in qua-
li-

licunque literarum genere hac ex parte cessuros probè habuisset comper-
tum ; longinquas tamen regiones invifendi pectus adeo forti defiderio
percutsum quotidie sentiebat, ut illi resistendo omnino impar videretur.
Confilium laudaverunt amici, & præsertim reverendissimus Archipræ-
sul. An verò circa hoc tempus, hoc est, circa annum 1636. quod verifi-
milis videtur, an post reditum ex *Oriente*, *Parifios* adierit, (certò
enim constat ex Epistola dedicatoria, de qua postea, ad D. *Claudium*
Hardy, illum ibidem aliquantisper moratum fuisse) deinde *Lugdunum*
Batavorum, ubi cum Viro celeberrimo *Jacobo Golio*, amicitiam con-
traxit, vix pro certo statuere possum, utpote omni ope, qua hæc alia-
que, licet non magni momenti, erui queant, post dimidium seculum
& ultra elapsum, destitutus. Non longâ autem deliberatione opus ha-
buit, quò destinatum illud iter esset dirigendum, cum universa studio-
rum, quibus assidue erat intentus, ratio semitam longè antè pate-
fecisset. Voluit nimirum ipsos fontes, ex quibus omnis doctrina ad nos
emanavit, *Orientem* & *Ægyptum* invifere, ut locis, quos antiqui Scien-
tiarum inventores præsentia suâ nobilitarunt, perlustratis, illorumque
observatis ad novum examen revocatis, passim disjectas antiquæ erudi-
tionis reliquias colligeret. Jam non mediocri curæ erat quadrantes, sex-
tantes, automata, reliquumque instrumentorum, quorum in stellarum
altitudinibus & distantis, latitudinibus urbium, eclipsiumque momen-
tis explorandis, & in pyramidibus dimetiendis usus est necessarius, ap-
paratum suis sumptibus comparare ; cum Magistratum *Londinensem*,
quorum honori & commodis in hoc itinere suscipiendo erat quoque
consulturus, patrocinium frustra expetiisset. Verisimillimum tamen vi-
detur, (neque enim id negaverim) illum à D. Archiepiscopo aliquo-
modo adjutum fuisse, qui discessuro traditis in manum literis ad illus-
trem Virum, D. *Petrum Wichium*, *Constantinopoli* nomine Serenissimi
Regis *Caroli I.* legationis munere fungentem, in illius gratiam conscrip-
tis, manuscriptos codices bonæ notæ, sive Arabicos, quovis pretio
redimendi plenam potestatem dedit : qualem ille verè *Φιλόβιβλος*, de
Bibliotheca Bodleiana istiusmodi gazis locupletanda pro paterno in Aca-
demiam *Oxonensem* affectu maximè sollicitus, doctissimo Viro *Edwar-*
do Pocockio, in *Syriam*, linguæ Arabicæ inter indigenas Arabismi ma-
gistros excolendæ causa, eunti, paulò antè dederat.

Ita olim magno animo intimos *Ægypti* recessus penetrarunt *Pytha-*
goras, *Eudoxus*, *Democritus Abderites*, *Plato*, *Strabo*, *Diodorus*
Siculus, alique ex vetustissimis *ὀδοιπόροις*, incolarum mores artesque,
sacri

facri cultus ritus & cæremonias, Hierophantarum scientias & symboli-
cam sapientiam, sub mysticorum characterum involucris absconditam
atque vulgari usu remotam, telluris dotes, fœcundissimarum *Nili* un-
darum fermentationem, prodigiosas Pyramidum, Obeliscorum, alia-
rumque substructionum moles, cæteraque, quibus à primis post gene-
ralem cataclysmum seculis tellus ista inclaruerit, admirando pernoſcendi
studio: quorum exemplum sequi proposuit *Gravius*, illorum vestigia
lento & sollicito pede relicturus: utpote subsidiis ab universa Matheſi
petitis, quam in *Petro Bellonio*, *Prospero Alpino*, *Nicolao Christophoro*
Radzevilo, *Georgio Sandio* nostrate, aliisque Viris clarissimis, quo-
rum itinerariis & descriptionibus *Ægypti* qualis qualis notitia, penè ru-
dis ac valdè imperfecta, primo post renatas literas debetur, meritò de-
sideramus, instructissimus.

Hoc modo animatus A. C. 1637. ille navim in *Thamesino* flumine ad
Liburnum, celebre emporium in littore *Tusciae* situm, jamjam rectà ten-
dentem firmo vegetoque corpore alacrique mente petit: ubi exscensione
in terram factâ, *Romam* properat, ibi aliisque in *Italiae* urbibus, ut fa-
miliarem sermonis istius politissimæ Gentis, qui omnium *Francorum*
aliorumque in maritimis oppidis ditionis *Turcicae* emporiisque degen-
tium communis est, nancisceretur, per semestre spatium moram trac-
turus.

Dum *Romæ* aderat, postquam palatia, basilicas, Collegia, Monaste-
ria, columnas, porticus, aquæductus, hortos, reliquaque egregia or-
namenta, quæ Urbi novæ ex Pontificum, nullis sumptibus aut operæ
ad summum istius gloriæ & pulchritudinis apicem absolvendum parcen-
tium, magnificentiam jam per duo secula accrevissent, curiosis oculis non
sine ingenti voluptate lustrasset, statim venerandæ antiquitatis reliquias,
quæ in ruderibus adhuc latent, penitiùs rimari indefesso studio & incre-
dibili mentis alacritate perrexit: nec quisquam facilè reperiendus erat,
tantis præſidiis aut à Veterum scriptis historiisque, aut à Scientiis Ma-
thematicis, aut à sagaciori genio paratus & instructus, qui id meliùs
aut accuratiùs præſtare potuiſſet. Hoc tantùm in genere dicam, quod
mihi codicillos ejus & adversaria versanti compertissimum est, *Gravium*
quicquid veterum monumentorum reliquum est sæpè sæpiùs penetranti-
bus oculis investigantem, non tantùm epigrammata exſcripſiſſe, sed in
iisdem marmoribus & columnis metiendis & figuris delineandis, ut
veteris architecturæ accuratio inde meliùs repræſentari poſſit, maximè
verò in explorandis tum *Cestii* pyramide, tum Pantheo *Marci Agrip-*
pæ,

pæ', quod, *omnium Sanctorum* memoriæ jam consecratum, *la Ronda* nuncupant, summam curam adhibuisse. Cryptas quoque subterraneas ingressus, diuque, quantum per caliginem crassosque halitus inde exspirantes licuit, illic moratus, multa, quæ aliorum ad res ejusmodi minus attentorum oculos solent effugere, digna cognitu observavit: nec quicquam ferè in scriptis adnotavit, nisi quod curiosam & eruditam indaginem saperet. Numismatibus reliquâque suppellectile literariâ, in Principum virorum aut Collegiorum Museis repositis, non neglectis, imò diligenter quæsitis, antiqua pondera, vasa, aliasque mensuras, quotquot supererant, sedulò examinavit, ut inde de pede, ex quo tum veterum ædificiorum concinnitas & pulchritudo juxta proportionem Mathematicas Artisque perfectissimas regulas, tum locorum intervalla penderent, & de numismatum sibi invicem collatorum valore certiùs constaret. Nec *Roma* tantum, sed quocunque fors fausta illum tulisset, puta *Genuæ*, *Liburni*, *Pisis*, *Senis*, *Florentiæ*, *Constantinopoli*, *Alexandriæ*, *Cahiræ*, alibique, quasi is esset non minimus itineris finis, pro more solenni in hisce instrumentis communis justitiæ, quæ gentium commercia ex æquo moderatur, perscrutandis diligentissimè versatus est. Loca etiam olim celebria, regionesque circumcirca jacentes, ad *Terracinam* usque, antiquitatis eruderandæ studio, adiit: & quidem cum eodem felici successu. Harum observationum quantilla pars edita! Ex hac autem vasta congestæ materiæ mole, quàm pulchrum & magnificum exsurrexisset opus, si quæque argumenta, quæ brevi verborum dimensionumque compendio, annexa rudi sciagraphia, ad adjuvandam memoriam, promiscuè coacervantur, suo ordine ille, qui solus potuit, cum debito ornatu & amplum in modum, prout moris est, disposuisset! Hic amicitiam iniit cum Viris clarissimis & eruditissimis, *Luca Holstenio*, *Athanasio Kircher*, & *Gasparo Bertio*, celebri Astronomo, à quo edoctus erat, altitudinem poli *Romæ*, juxta observationes ope ingentis instrumenti *Claviani* olim factas, iterumque repetitas, fuisse quadraginta unius graduum & quadraginta sex minutorum.

Gravius se *Roma Paduam* transtulit, mox *Venetias*, maris dominam, & propter situm in mediis lacunis planè admirandam urbem, visurus. Inde amor imo & veneratio Patriciorum *Venetorum*, quos ob sapientissimas leges, justitiæ & æquitatis studium, patriæ amorem, & ejusdem tutelam contra universas *Turcici* imperii vires non satis mirari potuit, illius animo adeò altas egerant radices, ut eo usque creverint, nunquam evellenda, adeo ut insigne quoddam testimonium illius cordatæ obser-

vantiæ erga præclarissimam Rempublicam in perpetuum exstare in *Angliam* redux curaverit.

Cum eodem genio animati videantur Viri verè eruditi, & optimarum Artium callentes, amorque ex similitudine studiorum oriri & conciliari soleat, nec longis ambagibus quæsitisque parariis opus sit, ut sibi invicem innotescerent, familiaresque redderentur, sese in magnorum Virorum, ubicunque accesserit, amicitias prudenti quodam consilio insinuavit *Gravius*; illi vicissim, quanti esset amandus & æstimandus, pro amore literarum & pro sagacitate sua facilè compertum habuerunt. Inter *Paduanos* Professores, quos maximè amicos expertus est, eminere *Franciscus Ursatus*, *Joannes Rhodius Danus*, & *Andreas Morettus*, quorum egregiam humanitatem deprædicavit. Sed ab illorum familiari consuetudine illum *Orientis* visendi desiderium, quod præcipuum erat hujus suscepti itineris institutum, citò abripuit. Ideo longum charissimis amicis valedicens, *Liburnum*, postquam per paucas septimanas *Florentiæ* alibique substitisset, petiit, inde primo tempore *Constantinopolin* navigaturus.

Circa mensem Aprilem 1638. appulit Constantinopolim, ibi ab illustri Viro, D. *Petro Wichio*, tunc temporis Regis *M. Britannia* Legato, benignissimè, prout illius singularis virtus & commendatio Viri maximi, D. *Landi*, Archiepiscopi *Cantuariensis*, meruere, exceptus, uti etiam mox à reverendissimo Patriarcha *Cyrillo Lucari*: quorum utriusque ope & patrocinio in procurandis Græcis codicibus MSS. multum adjuvabatur. Sed amicitiam cum hoc sanctissimo Viro, & *Græcam* Ecclesiam à fœdis dogmatum rituumque corruptelis, quas sequiorum seculorum superstitione induxerat, purgandi studiosissimo pariter ac cupientissimo, quasi in semine exstinxit illius tristissimum acerbumque fatum, quod ex malevolentia artibusque calumniatoriis quorundam *Græcorum* Antistitum, quos ad hoc scelus perpetrandum Jesuitæ, odio internecino contra *Cyrillum* perciti, stimularunt, jussu Imperatoris *Amurathi* quarti, tunc in expeditione *Bagdadina* occupati, non multò post subire cogitur, utpote in *Propontide* non procul à litore à barbaris *Turcis* funiculo strangulatus. Audiverat *Gravius* aure quidem faventissimâ, quod aliqui è *Græca* gente de Bibliotheca, quæ Imperatorum Christianorum olim fuerat, in Palatii *Constantinopolitani* conclavibus ad istum diem servata ipsi coram retulissent. Sed nemini nostræ religionis Symmystis loca ista inaccessa ingredi licet, ut certò constet, an thesaurus ille literarius illic exstet nec ne: & ab istoc tempore latet, &, uti vereor, in sempiternum

num latebit. Neque enim incertis inanibusque *Græcorum*, qui ex vanitate affectata & studio placendi res supra modum exaggerare, ne dicam susque deque habita veritate excogitare, solent, rumusculis fidentum esse puto: neque quicquam hac ex parte, dum in ista Urbe degerem, diligenti exploratione expiscari potui, quod vel leviusculam illorum sententiæ fidem conciliaret. Sed forsan quod in *Byzantio* desideramus, *Athos* suppeditabit, cum mons ille sacer, longè ante eversum *Græcorum* imperium, à solis Monachis, rerum cœlestium contemplationi deditis, & orationibus lectionibusque sacris horas impendentibus, quorum discipuli & alumni, longo ordine succedentes, in illius arduis editisque jugis, hodie ab omni strepitu, tumultu, & rapina immunes, & quasi à mundo seclusi, degunt, incoleretur: ubi fas est credere, nec id à verisimili omninò abhorret, codices vetustos, si qui olim fuissent, à rapacibus *Turcarum* manibus intactos, integros hodie superesse & relinqui. Hoc titulis opibusque, quibus fruuntur, dignum præstabunt magni aut Principes aut Præsules, si, quibusdam Viris idoneis ad istos secessus explorandos missis experiri vellent, an damnum istud, quod Christianus orbis dudum luxit, & nisi isti malo hisce præclaris ausibus obviam eatur, usque & usque lugebit, ex defectu codicum manuscriptorum, maximi usûs & momenti, præsertim in rebus Ecclesiasticis, quorum veteres Scriptores, putà *Eusebius*, *S. Hieronymus*, & *Photius* meminere, ortum, illinc reparari possit. Illò sibi eundem esse proposuit *Gravius*: sed nescio quis infelix casus consilium istud primò interturbavit: & post planè irritum reddidit. Quod de meipso quoque dicendum mœrens habeo. Quædam verò, licet perpauca, digna ingenio, solertia, & sedulitate suâ, quæ, dum per quinque aut sex menses *Constantinopoli* egerit, collegisset, ex ingenti observationum acervo delibata, tandem aliquando edenda curabo.

Ineunte Septembre, *Constantinopoli* relicta, navim adscendit, *Alexandriam* rectà petiturus: sed cum sive ventis adversis acti, sive potabili aqua destituti, *Rhodum* appulissent, ille exscensione in terram facta, sumpto *Gemma Frisii* astrolabio, cum ampliori instrumento uti non auderet, ne efferis *Turcis*, malas suspiciones qualicunque prætextu alentibus, calumniandi, remque istam, cujus erant imperitissimi censores, male interpretandi daretur occasio, polum supra horizontem triginta septem gradibus & quinquaginta minutis illic attolli observavit.

Tandem mare istud interjectum emensus, *Ægyptum*que auspiciatò pertingens, in urbe ista celeberrima ab *Alexandro Macedone* condita,

inque magnificis ipsius ruinis venerabili, per quatuor aut quinque menses, paucis excursionibus subinde interruptos, moratus est, ubi quicquid in cœlo, quicquid in terra, vel subtus terram in cavernis cryptisque, rarum aut eximium esset, erudita & sapienti diligentia exploravit: qualem quoque *Cabiræ* alibique in tellure istâ rerum mirabilium, sive eæ ad naturam, indolem, & constitutionem soli & climatis, sive ad artem veterumque Regum & incolarum ingenium referantur, abundè feraci constantissimè adhibuit. Supervacanei foret laboris hîc quasi anticipando recensere observata ejus de obliquitate Zodiaci, de altitudine poli, de temperie æris, de variis meridianis tum solis tum quarundam stellarum è fixis celebrium, puta Spicæ virginis, Canobi, & aliarum altitudinibus, maculis Solis ejusque diametro, de eclipsi Lunæ, ejusdemque à quibusdam fixis stellis distantia, de declinatione acûs magneticæ, de alveis *Nili*, de obeliscis illorumque figurationibus hieroglyphicis, de puteis, de cadaveribus ante bis mille annos conditis, de nitro in eremo *S. Macarii*, lapide *Ætite*, aliisque, quæ ad Astronomiam, Geographiam, naturalemque Historiam spectant: ea enim omnia in appendice novæ editionis opusculorum illius longè commodius & melius collocabuntur.

Nondum exstabat accurata vel quoquam modo laudabilis Pyramidum, quas veteres *Græci* inter septem mundi θεάματα seu *Spectacula* (quo vocabulo uti etiam maluerat *Vitruvius*, optimus artis Architectonicæ magister & instaurator) meritò recensuere, descriptio. Hactenus volupe fuerat peregrinantibus insanas istas substructiones giganteasque moles oculis attonitis coram intueri, illarumque ambitum passibus, quantum progredi aut circumire licebat, crasse admodum metiri, & gressus, quibus ascenditur ad fastigia, numerare, reliquaque obvia, quæ cujusvis vel incuriosi oculis sese solent ingerere, tum quoad externam illarum fabricam, tum quoad internas cavitates, in suis itinerariis adnotare, quibus Philosophorum Mathematicorumque curiositati & exspectationi neutiquam erat satisfactum. Ex illorum enim periculis hoc tantum consecuti sunt, Pyramidas, quarum meminere *Herodotus*, *Diodorus Siculus*, *Strabo*, *Plinius*, alique, ab edacitate temporis & terræ motibus per tot secula servatas adhuc in solitudinibus *Libyæ*, non procul à *Memphi*, superesse; interim quales sint, quibusque dimensionibus revera constent, penè omnino nescii, inexploratis utpote calculis modulisque, nullaque exquisita delineatione præstitâ, quorum subsidio debitaque applicatione judicium de illarum constitutione, pulchritudine, & artificio

ritè formari possit. Hoc quicquid est gloriæ, quicquid est utilissimi operis, industriæ & ingenio *Gravii* relinquebatur consummandum, qui quod desideraverint eruditi, benè noverat, & id in effectum dare optime potuit. Hac igitur de causa, relictâ *Alexandriâ*, *Kahiram* profectus, tres illas celebriores Pyramidas adversa parte *Nili* semel tantum vidisse & lustrasse ^{1638.} non contentus, post mensem unum & alterum iter istud remensus est, ^{1639.} ut observationes prius factas secundis curis ad rigidum examen revocatas, severiori limâ perpoliret, paritèr in utraque indagine diversis instrumentis, potissimum verò radio decem pedum in decies millesimas partes summa cum cura diviso, instructus. Quàm præclare autem hanc præcipuam itineris in *Ægyptum* suscepti partem consiliumque impleverit, id post editam Pyramidographiam neminem latere potest, nisi qui omnis politioris literaturæ expers sit, aut vix quippiam de obstupescendis istis sepulchralibus Regum *Ægyptiacorum* monumentis vel fando inaudiverit.

Codicibus manuscriptis, *Græcis*, *Arabicis*, *Persicis*que (quorum saltem præcipuorum catalogum ad D. D. *Hardy* & *Golinum* illorum rogatu postea misit) gemmis sculptilibus, icunculis, numismatibus, aliisque spoliis literariis, quæ ex barbarorum manibus redemerat, auctus onustusque, *Liburnum* circa solstitium æstivum anni 1639. reversus est, moxque *Florentiam* repetivit, ubi Serenissimo Principi *Ferdinando* secundo, magno Duci *Hetruriæ*, cui carmen paræneticum, paulò ante in *Alexandria* musis faventibus conditum, ut ultimos istos maris mediterranei recessus, Piratarum huc illuc myoparonibus triremibusque suis undique excurrentium infestationibus obnoxios, pacare vellet, inscripserat, gratus, & ab Aulicis ob ingenii & eruditionis, quas non ita pridem explicaverat, opes, & præcipuè ob felicissimum itineris *Ægyptiaci* successum, in honore erat habitus. Inter illos autem maximè coluit amicitiam illustris Viri, D. *Roberti Dudleyi*, (qui in *Italiâ* communissimè Dux *Northumbriæ* nuncupabatur) plurima apud *Ferdinandum* pollentis gratia, & ab eodem amplis aucti redditibus, quo majori cultu titulum istum eumentitum tueretur, studiisque Astronomiæ, Geographiæ, Artis Nauticæ, aliarumque Scientiarum, quas vasta mente complexus est, absque aliquo rei familiaris incommodo promovendis pertinaciùs incumbere. Cum illo frequentes de re literaria sermones miscuit *Gravius*, mora, quam in ista urbe pulcherrima fecerat, inde jucundiori reddita. Nescio, an sit adnotatu dignum, D. *Dudleium* coram retulisse, polum, diligenti observatione habita, refractionibusque & parallaxi juxta

methodum *Tychonianam* admissis, gradibus quadraginta tribus, & quadraginta sex minutis illic elevari. Post, relicta *Florentiâ*, *Romam*, Reginam Urbium, remeavit, ibi quoque antehac observata novis curis recogniturus, & plura aliquot mensium morâ additurus. Sed desiderio revisendæ patriæ, hisce placidissimis speculationibus ac innocentissimis deliciis, quibus consuetudo cum Viris sapientibus eruditisque, in transmarinis regionibus contracta, studiosorum virtutis & literarum mentes perfundit, sæpe sæpius intercurrente, de reditu in *Angliam* cogitat, quò, nave in portu *Liburnensi* conscensa, & trajecto iterum freto *Herculeo*, æstate anni 1640. felix salvusque appulit, gratulationibus amicorum, qui longam tam chari capitis absentiam non sine anxio animi æstu tulere, tum *Londini*, tum *Oxonii*, exceptus.

Sed en fatalem quasi remoram ipsius studiis injectam, mentisque ardori frigus affusum! Tristis vidit, omnia turbari cœpisse: *Scotos* rebelles, impio fœdere contra clementissimum Regem sociatos, nuper, conscripto milite, *Angliam* invasisse, nec post *pacificationem*, inanissimis cavillationibus arreptis, diu quietos fore: quosdam è Proceribus *Anglis*, populari aura tumentes, malisque affectibus percitos & exacerbatos, novis quoque rebus studere: cives *Londinenses* aliosque, præstigiis *Puritanorum* à doctrina, fide, & ritibus *Ecclesiæ Anglicanæ* abalienatos, variisque terriculamentis extra se raptos delusosque, fremere, quasi illico de Religione Protestantium, ni vi armata ipsi vindicandæ succurreretur, actum esset: horrenda mendacia diabolicasque calumnias in optimum Regem, quasi Pontificiorum partibus favisset, legibusque, quas nemo unquam è Decessoribus aut soliciùs aut sanctiùs coluit, conculcatis, ad imperium despoticum adspirasset, ubique sparsas: murmurationes inde excitatas, seditiososque tumultus passim grassari, cæteraque prænuntia & signa apertæ & non amplius celandæ rebellionis, quæ contra omne fas, jusque divinum & humanum, sub fallacissimo religionis reformandæ juriūque populi *Anglicani* tuendorum prætextu, auspiciis Parlamentariis, protinus erupit: reverendissimum denique *Laudum* spurcissimis convitiis & criminationibus ab efferata plebe vilissimisque Ministrellis, horrendi schismatis, quod adhuc luimus, auctoribus, qui clam in conventiculis suis latebrosis, mox ex sacris rostris ore impudentissimo classicum ad bellum hoc tanquam sacrum contra Regem Episcoposque ineundum publicè cecinissent, impactis primo impetum, mox carceri addictum, & deinde conspirantibus Presbyteranis, *Anglis Scotisque*, utrisque infensissimis Ecclesiasticæ hierarchiæ osoribus, capi-

te plexum, in quo maximum studiorum suorum præsidium collocaverat *Gravius*: hæc omnia ille, inquam, tristi oculo & anxia mente vidit, ut per hæc perturbatissima tempora de libris, quos meditatus est, in lucem producendis vix cogitare licuerit. Aliò animum avocabant pericula, quibus Regiarum partium, quas ille integerrima fide tuitus est, sequaces erant obnoxii. Cum verò Rex *Carolus* cum exercitu *Oxonium*, ubi per tres quatuorve annos castra stativa habuit, & quo securitatis causa Regina, serenissimi Principes, *Carolus & Jacobus*, cellissimi Principes, *Rupertus & Mauritius*, ac Nobiles quamplurimi cum suis familiis à Parlamentariis copiis fugati, convolarunt, pervenisset, Academici, togas sagis militaribus commutantes, librisque abjectis, gladiis & sclopetis armati, pro Ecclesia *Anglicana*, pro religione, proque aris & focus strenuè dimicarunt, literarum studiis, quæ solis pace & otio aluntur, si non penitus cessantibus, saltem per hæc obstacula valdè imminutis ac intermissis.

Inter hosce bellicos tumultus vitam in suis ædibus *Oxoniensibus* mense Novembri 1643. explente viro doctissimo, *Joanne Bainbrigio*, Medicinæ Doctore, & Astronomiæ Professore *Saviliano*, non diu inter illustrissimos Dominos Electores, à D. *Savilio* constitutos, quotquot tum in Aula Regia aderant, maximis regni muneribus admoti, de substituendo Successore diu erat disceptatum. Illorum oculis penè quotidie intercurrebat *Gravius*, quo neminem, aut ob fidem intemeratam Regi servatam, aut ob universæ Matheseos peritiam, qui cathedram vacuam impleret, digniorem, unanimes judicarunt. Illum ab his nominatum & electum eodem mense ad præclarum istud munus Professorium, solenni more, juramentis juxta legum & statutorum Universitatis normam prius præstitis, admisit Vicecancellarius. Sed cum flagrante rebellionem proventus è latifundiis quotannis à colonis, ex rapinis & excursionibus militum plurimum damni passis, percipiendus valdè imminueretur, illius Amici à serenissimo Rege, qui τὸ ἀντιβωδίναιον temperare, & mollius, quod æquum suadet, interpretari ex vi prærogativæ debitæ & à corona indivulsæ jure potuit, facultatem impetrarunt, ut jus istud in sodalitie *Mertonensi* olim acquisitum, & per tot annos productum, quo aliter post sex menses ex rigore statutorum *Savilianorum* fuisset exuendus, ipsi fartum tectum & illæsum constaret: quod quidam rigidissimi Censores, in rebus maximi momenti tum vitæ tum conscientiæ solutioris merito postulandi, nullo temporum discrimine, nulla circumstantiarum ratione habita, malè criminati sunt.

Cum

Cùm sermones inter Viros magni nominis & apud Regem auctoritatis de emendando Calendario Juliano familiari conversatione, quasi animi laxandi causa, agitentur, *Gravius*, posthabitis cæteris, quibus isti incommodo occurrendum esse olim putaverint, methodis, confusionis vitandæ causa, & ut qualescunque lites, decem diebus simul exemptis, inde ex versutia vitiligatorum orituræ, tollerentur, proposuit, ut nullus per quadraginta annos continuos, qui omnes forent æquabiles, bissextilis dies intercalaretur. Consilium istud, quod compendio descriptum exhibuit, (quale etiam *Gregorio XIII.* Pontifici Romano à quibusdam eruditis Mathematicis olim proponebatur) Regi & A. 1645. Consiliariis mirè placuit: sed res ista longè alia tempora postulabat. Tum enim de vitâ & salute Regis & Regiæ familiæ, de tutela Ecclesiæ Anglicanæ & Academiarum, deque juribus fidelium subditorum tuendis contra rebelles & schismaticos agebatur, nec istiusmodi minutiis vacare licebat. Sed ut rem paucis contraham: neque enim Annales aut Historiam istorum temporum scribo, quam hîc carptim & ὡς ἐν παρόδῳ attigi, quatenus inde vita *Gravii* elucidanda videbitur.

Postquam optimi Regis, Deo, summo rerum arbitro, *cujus judicia sunt incomprehensibilia, & viæ ininvestigabiles*, ita permittente, copię militares in funestis præliis prope *Eboracum* & in Campis *Nasebeyensibus* infelicissimè initis accisæ & fractæ concidissent, nunquam postea instaurandæ, & ipse Rex, alieno amictu indutus, noctu relicto *Oxonio*, ineunte Maio, A. 1646. ad suos *Scotos* (utinam suos! qui postea illum, numeratis pecuniis, confœderatis rébellibus perfidissimè tradiderunt) confugisset, Regii, provida & sapienti cura, ne Bibliotheca *Bodleiana* Scholæ publicæ tormentis à vicino monte explosis solo æquarentur, neve exercitus *Fairfaxianus*, è colluvie Sectarum conflatus, irruptione, quam interminati sunt, facta, pro iunato in bonas literas & Academiam odio, omnia ferro & igni miscerent, cùm ne minima quidem Urbem ab obsidione liberandi spes affulserit, illam, honestissimis, & quas viros bellica virtute præstantes in istiusmodi angustiis constitutos non decebat amplecti, conditionibus impetratis, invitissimi licèt, oppugnantibus 24. Junii 1646. dediderunt. De malis in Academicos certò casuris, & penè imminentibus, non uno tristi omine erat augurandum. Senatores enim *Westmonasterienses*, quorum auctoramento, quod planè nullum erat incitati malefani cives, in legiones & turmas dispertienti, ad arma furibundum in modum concurrissent, cùm antea Ecclesiæ Anglicanæ liturgiâ, jurisdictione, & ritibus omnino everfis, & episco-

patu abrogato, in sacrum patrimonium involassent, ut sibi suisque sacrilega ista præda, insulsisque in rebus sacris innovationibus utendi fruentique securitatem præstarent, tandem de reformanda, si Dis placet, Academia *Oxonienſi* decretum, jam, captivo innocentissimo Rege, rerum potiti, condidere. Commissarii, quos *Visitatores* nuncupant, armatâ potestate instructi, *Oxonium* amandantur. Hi verò in imperatis faciendis neutiquam segnes, plurimos Collegiorum Præfectos, Professores, Socios, aliosque inferioris gradus, suis muneribus, ædibus, fundis contra omne jus exuunt: & quidem non sine insultatione & feritate maximâ: aliis sub custodia militum detentis, aliis carceribus mancipatis, aliis denique indictâ horâ tympani pulsu extra Academiam & Urbem exire jussis: aliter cum ipsis tanquam exploratoribus & malæ fidei in hostico suspectis militaribus pœnis agi oportere. Si interrogaverint Exteri, quale crimen, quam grande & atrox, hisce *Oxonienſibus*, (nec mitius fatum subiere *Cantabrigienſes*) vera & solida pietate, Religionis Reformatæ juxta civilium & ecclesiasticarum legum normam sanctitæ amore & zelo, morum probitate, & summa eruditione insignissimis & perquam venerandis, fuerit impactum, bona fide referam. Nolebant nimirum fidem Regi datam ejurare, & animas voluntario perjurio polluere: nolebant *solemnis*, ut appellatur, *ligæ & fœderis*, quod erat perfidiæ & iniquitatis vinculum, articulis fictâ subscriptione assentiri: nolebant denique tyrannicam istam, quam arripuerant Rebelles, dominationem, & impiissima quæque facinora, contra Regem, *Unctum Domini*, contra Ecclesiam, & contra concives perpetrata, inhonestâ submissione approbare. Inter hosce egregios Viros, qui fortunas suas, libertatem, imò & vitam illibatæ fidei integræque conscientiæ paci postposuerint, eminuit *Gravius*, cui, ne in illum absque aliquo prætextu læyire viderentur, frivola quædam, putà de pecuniis in Collegii æratio repositis, ipso indicante & procurante, Regi, ferè ad summam inopiam redactò, qui fide interpositâ mutuo acceperat, cum fœnore redditurus, traditis; de familiari conversatione cum quibusdam Sacerdotibus, qui Reginæ in isto Collegio degenti erant à sacris, eo nimirum, quod unum aut alterum convivio exceperit, & Bibliothecam subinde intrandi studiorum causâ dederit licentiam, habitâ: de litibus cum *Brento* Custode, ob læsam fidem Regi debitam ejecto, & cum Consociis Presbyteranæ factionis, mox in castris Parlamentariis transfugis, non ita pridem agitatis, & ejusmodi, objecere, ut mirandum sit, hosce Censores suæ stultitiæ & futilitatis pariter ac nequitiae nullatenus puduisse.

Rebus post *Oxonii*, jam inde Presbyteranis, Independentibus, cæterisque Sectariis oppleti, deditioem maximè deploratis, ad amolendam animi ægritudinem *Londinum* profectus est *Gravius*, libris edendis tunc admodum intentus: quos hic juxta seriem temporis, quo editi erant singillatim recensebo, additis interspersisque subinde quibusdam observationibus, quæ singulorum argumentis explicandis & illustrandis forsitan non inutiles parumve necessariae videbuntur.

I. *Pyramidographia, sive Descriptio Pyramidum in Ægypto*. Londini 1646. in 8°. Anglicè.

Libellus hic verè aureus ab omnibus, qui literaturam politiolem studiumque Antiquitatum *Ægyptiacarum* excoluere, erat impensè expectitus, summoque cum applausu exceptus. Hunc nemini inscribendum voluit, utpote verè magno Archiepiscopo, D. *Laudo*, funesta morte perquam nefariè multato, cui, honoris, observantiæ, & gratitudinis causâ, illum, ut puto, destinaverat. Antequam verò summa hujus præclarissimi libri, in quo multa curiosa quidem, & *Europais* antea planè incognita continentur, capita in breve compendium retulero. Lectorem præmonendum duco, doctissimum *Gravium* solas tres istas celebriores Pyramidas in arenosis *Libyæ* solitudinibus ad occidentale *Nili* littus collocatas, & à Veterum *Memphi* quatuor aut quinque milliariibus distitas, quarum meminere *Herodotus*, *Diodorus Siculus*, *Strabo*, *Plinius*, *Mela*, alique, in hoc Opere describendas suscepisse. Multæ enim aliæ in ista inculta sterilique planitie hinc inde longa à se invicem intercapedine, prout, si mihi *Ægyptum* nunquam ingresso conjecturam interponere cum venia liceat, saxum, cui imminet, permittebat, (neque enim posituræ & situs alia ratio videtur) disjunctæ hodie quoque comparent: admirandi quoque operis, licet minores, si unicam ad austrum paulò occidentem versus inclinantem, magis introrsum, viginti millium passuum intervallo, conditam excipiamus, quæ maximæ harum trium meritò æquiparanda, omni memoria perquam digna videtur. Hanc vero cæterasque omnes, infra viginti, (neque enim plures oculis undiquaque vagantibus ac circumrotatis numerare potuit) à longinquo intueri contentus, tempus, ingenium, & industriam solis his tribus explorandis impendebat. De harum præcipuè aliarumque, quas vetustas absorpsit, conditoribus, ex *Græcis*, *Latinisque* vetustioris ævi, item ex *Arabicis* Scriptoribus (hi enim omnes de illis, quas in *Libyca* solitudine, qua ad austrum terminatur *Ægyptus*, hodie

die exstare dixit, si non prorsus silent, saltem parcissimè loqui videntur) primo agit: mox de tempore, quo erant conditæ, interspersis multis de Regum *Aegyptiacorum* chronologia, de *Josephi & Mosis* temporibus, de *Israelitarum* exitu ex *Aegypto*, Regumque *Judaïcorum* à jactis templi *Solomonici* primis fundamentis ad usque excidium ab *Assyriis* invecum successionem, ex Scriptorum Gentilium historiis illustrata, reliquisque cognati argumenti, ut inde plausibilioribus conjecturis ductus, sententiam suam in assignandis dynastiis, quando stupendæ istæ moles primùm erigerentur, hac de re, si non omnino certam, saltem quæ minus à vero abest, firmaret. Demum, veram causam finemque, quam in exstruendis hisce pyramidibus sibi proposuerint Reges *Aegyptiaci*, subtili ingenio rimatur. Neutiquam verò vana futilisque hæc disquisitio & cura haberi debet, imò potius perquam digna visa est, quæ à tanto Viro sedulò exerceretur. Nemo enim harum rerum paulò intelligentior facile *Plinio* concesserit, hanc *Regum pecunia otiosam ac stultam ostentationem fuisse*, multò minus illos laboriosas millies millium subditorum manus pro sapientia sua ac securiùs dominandi studio conduxisse, ne si otiantur, sibi que solis domi in urbibus oppidisque vacarent, gens utpote levis, pendula, & ad omnia famæ momenta volitans, ut de *Aegyptiis* sui temporis loquitur *Hadrianus* Imperator in epistola ad *Servianum* Consulem apud *Vopiscum* in *Saturnino*, excusso servitutis iugo, turbatisque rebus, tumultus ac seditiones cierent, quasi non aliter vi, armis, disciplina, aut legibus in ordinem fuissent cogendi. Sed commenta hæc inania, mero inter recitandum spiritu diffanda, nulla refutatione egent. Rectiùs ergo plerique omnes Scriptores, tum *Græci* tum *Arabes*, hæc esse sepulchralia Regum & Regina-
rum *Aegypti* monimenta, quæ vivi facienda curarunt, ut in illis repositi, immortale decus sibi suisque conciliarent. Sed hæc vulgaria mentis parùm attentæ inque profunda rerum haud penetrantis cogitata neutiquam placuere *Gravio*, qui ex *Aegyptiorum* Theologia ostendit, juxta hos animam non alio transituram, quamdiu corpus ossibus & carne integrum, & à mucore, vermibus, putredine intactum perduraverit, indeque, ut perpetuo & indivulso nexu sibi invicem hi duo comites adhæreant, morem istum condiendi cadavera originem duxisse videri. Hanc mortuos medicandi methodum artemque, quæ *Aegyptiorum* peculiaris erat, juxta *Herodotum* & *Diodorum* fusè explicat *Gravins*, additis doctissimis Commentariolis, in quibus quoque de idolis seu imaginibus diversæ materiæ, de istis medicaminibus, de fasciis, de pan-

niculis linteis, de characteribus sacris sive figuris hieroglyphicis, & de sandapilis suo more doctè & soterter disserit. Veruntamen nil miri est, quod *Aegyptii*, & potissimum Reges Magnatesque, hac superstitione imbuti, & ne aliqua labes, qua corporis integri compages corrumpi posset, maximè caventes, ejusmodi conditoria, quæ regi nominis gloriæ & majestati aliquatenus responderent, exstruxissent, ut in omnem posteritatem, quasi extra vim fati temporumque vicissitudines posita, permanerent; nec minor aliorum, licet gradu longè inferiorum, mentibus, tum corpora simili conditura ab omni marcore & vitio integra conservandi, tum domicilia in hypogæis sive cryptis, quas Christiani nuncupant *Mumias*, in eadem solitudine excavatis ab omni violentia muniendi insidebat parilis sollicitudo. Quod verò ad figuram Pyramidalem, quâ surgunt constantque istæ moles, spectat, de illa multæ apud *Pierium* exstant putidæ hariolationes ex illius proprietatibus desumptæ, quasi sacra quædam religionis & Philosophiæ arcana in se continuissent: quas tamen vel maximè religiosus ipsis conditoribus nunquam in mentem venisse certa fide juraverit. Hisce rejectis, *Gravius*, unam & alteram conjecturam, ingenio suo usus, substituit, hoc modo illud ab *Aegyptiacis* Regibus ordinari & fieri, vel quod ejusmodi structuras, contractis nimirum diminutisque, donec in angusto fastigio conicè desinant, lateribus, superincumbentibus saxis minus premi, minusque pluviis faciliùs inde defluentibus obnoxias fore putaverint, vel quod infanda idolomania occæcati, quædam Numina ab ipsis culta, aliarum gentium, quæ columnas & obeliscos Dis suis dedicarunt, ritu, ita repræsentari voluerint. Sed mihi longè simplicior ratio assignanda videtur, hoc figuræ genus, citra qualecunque mysterium, quod aut pro mentis solertia, aut pro fingendi libidine aliqui excogitaverint, juxta proportionem Geometricam adaptatum, cæteris omnibus ab Architectis matura deliberatione antepositum fuisse, tum ut ampliori area à quadrata base occupata, ab omni latere moles, pulchrior inde paribus angulis exsurgens, à longinquo videretur, tum præcipuè, quod, cum esset prodigiosæ altitudinis, illa non nisi lateribus sibi invicem sensim inclinatis probè sustentari potuisset. Sed judicent, prout lubet, peritiores.

Cum verò ex fide & auctoritate veterum Historicorum & rei ipsius veritate, quam oculati testes, inspectis in interiori recessu subtus dispositis conclavibus, firmarunt, has celeberrimas substructiones Regum sepulturis destinatas fuisse omnibus hætenus sit persuasissimum,

num, unicus repertus fuit (a) *Hervartus*, qui solus hac ex parte sibi lapere visus, omni antiquitate spreta, Pyramidas ad reprimendas *Nili* eluviones, ne fecundæ illius aquæ ab agris fertilibus, aliter ingens damnum passuris, in arenosum illud solum, cui inædificantur, impetu suo ferrentur, illic exstructas fuisse contendit. Sed num cuiquam credibile videbitur, Pyramidas vice aggerum exundantibus undis oppositas objectasque fuisse, & in illis exstruendis Reges *Ægyptiacos* hunc solum in finem, qui absque istis immodicis sumptibus facillè obtineri potuit, regni opes exhausisse? unde ista relinquitur inter pyramidas & alveum intercapedo? cum prope ripas continua pilarum aut tumulorum terræ saxis munitorum series faciliori opera melius successisset. Sed quo pacto præstabit, aquas unquam eo usque cucurrisse? unde fit, quod nulla aquarum in istis intermediis relictisque solitudinis *Libyæ* spatiis, ubi liber patet ingressus, huc usque fiat inundatio? Ita nimirum immodicus iste novarum opinionum amor viros doctos interdum extra se solet abripere, ut iudicio sobrio in erroribus suis, nimio calore conceptis temereque effusis, castigandis uti neque possint neque velint. Sed reprimō me, & ad *Gravium* redeo.

Præmissis hisce dissertationibus, ad distinctam harum trium Pyramidum sciographiam & descriptionem, quod erat præcipuum hujus Opusculi institutum, summa industria, ingenio, & solertia prosequitur, cujus nullam deflorationem hîc dabo: quicquid enim spectat ad singulorum laterum à base quadrata, triangulis pari intervallo mutuo propendentibus, surgentium in longum extensionem: summi fastigii altitudinem, illiusque latitudinem: (neque in puncto, Pyramidum Mathematicarum ritu, terminatur) graduum mensuras, & inter se intercapedinem non semper æqualem: crassitiem lapidum politorum, ex quibus singuli consistunt: internas maximæ Pyramidis cavitates & partitiones, de quibus aut penitus silent, aut parcissimè loquuntur veteres *Græci* & *Latini*que Scriptores, superstitione & metu impediti, ne arcana ista mortuorum conditoria, aut ingressu, aut propalatis in vulgus narrationibus, temerare viderentur: vestibulum, vias omnes quasi cuniculares, illarumque varios descensus & ascensus: porticus, puteos, camereas seu cryptas arcuatas, cum illarum pavimentis, parietum incrustationibus, & lacunaribus: & præcipuè illam maximè insignem, arcam ex in-

Ccc 3

te-

(a) *Joannes Fridericus Hervartus* in admirandis ethnicæ Theologiæ mysteriis propalatis. cap. XXI. *Jugolstadtii* 1623. 4°.

tegro marmore excavatam, in quâ Regis *Cheopis* corpus recondebatur, continentem: diversas marmoris species: cameras ex rupe excisas, juxta duo latera secundæ pyramidis parallelis lineis procurrentes, denique quibus modis, quali arte, quibus machinis ferramentisque saxa tam vastæ molis gravitatisque ad tantam altitudinem erigi potuerint: hæc omnia, inquam, aliaque curioso eruditoque Lectori perpendenda relicturus. *Gravianam* hanc descriptionem Gallicè versam primo magnæ suæ Itinerariorum & Observationum tum mari tum terra factarum Collectionis tomo, V. V. Cl. *Hacniti* & *Purchassii* nostratium industriam sapienter æmulatus, præfigendam voluit D. *Thevenotus*. Dolendum sane est, doctissimum Auctorem præclarissimum hoc Opusculum & alterum, de quo mox dicturus sum, vel auro contra æstimandum, Latine non edidisse, aut neminem saltem publicæ utilitatis studiosum operam vicariam hac ex parte hætenus præstitisse. Ne verò desideratissimo hoc Opere usque destituatur cultior *Europa*, fortasse ipse tandem aliquando curabo: neque enim quicquam certi, in re licet levicula & haud magni laboris, ausim promittere, cum per ætatem, per valetudinem, per avaritiam, & *μυροψυχίαν* Bibliopolarum, per denique funesta, quibuscum mihi confligendum est, tempora id quidem vix liceat.

Tantum in genere & summatim dicam, *Gravium* omnibus Scriptoribus, (ne Antiquis quidem exceptis) qui ipsum præcessere, & qui jam per sexaginta annos secuti sunt, palmam, quamplurimis, quæ aut neglecta aut inobservata antea latuissent, in lucem productis, novo ingenii ac solertiæ exemplo omnibus in longinquas regiones, naturæ aut artis humanæque industriæ admiranda invisendi causâ, profecturis proposito, hac ex parte præripuisse.

Non hîc celandum arbitror, Virum quendam doctissimum, quem honoris causâ non nomino, mox post editam *Pyramidographiam*, breves in illam animadversiones, in quibus observationes *Gravianas* reddere incertas, illarumque fidem, quasi aut instrumenta aliquatenus laborassent, aut circumstantiis, quas summa accuratio exegerit, omissis, non rectè fuissent applicita, in dubium vocare magno nisu contendebat, scripsisse. Has quidem cavillationes, quas apud me habeo, non quidem indoctas, sed planè injustas fuisse audacter pronunciabo: quas Animadverfori, in Amici famam hinc apud omnes meritò crescentem invide grassanti, excidere potuisse obstupescerem, nisi ex conjecturis haud incertis, ex istorum temporum historia depromendis, mihi penè confitisset, illum ex ambita dignitate, qua exciderat, & cui procurandæ opem

opem suam, in alterum animo incliniori, denegaverat *Gravius*, hanc injuriam sive gratiam malè repensam, ut putavit, ulcisci voluisse. *Gravius* verò hac censura sive provocatus sive expergefactus, librum suum seriò & accuratè denuo recognovit, & quidem limis quasi oculis & acri judicio, ipse quoque in proprios errores, si qui fortè ex festinatione irrepsissent, animadversurus: excussisque pugillaribus, comperto ex calculis sæpe in se ductis reductisque, se maximæ pyramidi altitudinem justo minorem assignasse, cæteris omnibus manentibus immutatis, tandem istam pyramidem ad quadringentos nonaginta novem pedes assurgere pro certo statuit: quod ex literis illius hac de re ad V. Cl. D. *Carolus Scarburgum*, insignem quoque Mathematicum, conscriptis, & à me postea edendis, enucleatius patebit.

II. *Syntagma de Pede Romano & Denario, ex quibus, tanquam ex duobus principiis, mensura & pondera Antiquorum deduci possint.* Londini 1647. 8o. Viro celebratissimi nominis, *Joanni Seldeno*, honoris, observantiæ, & amicitiae causâ inscriptum.

Si libellus hic solus superfuisset, ab Auctore editus, harum rerum periti idoneique judices inde sagacissimum illius ingenium mirabilemque in antiquitatibus indagandis subtilitatem ac solertiam & certò explorare & rectè æstimare potuissent. Ille verò, cùm re sapienti cura sagacique animo pensitata comperisset, certam constantemque esse inter mensuras & pondera analogiam, & justa comparatione habita, utraque simul posse patefieri & indicari, hac ratione (neque enim aliam aut certiore aut faciliorem excogitare licet) illa omnia pristinae integritati restitutus, authenticas originalesque mensuras & pondera, quotquot *Romæ* alibi-que in celebrioribus *Italiae* urbibus à *Gotthorum Vandalorumque* barbarie & ab edacitate temporis integra & inviolata mansissent, propriis oculis intueri & diligenti manu versare impendiò voluit. Nec id temerè fecit; licèt ante illum quidam insignes Mathematici & Antiquarii idem quoque fecissent, cùm levis inter illos intercesserit discordia. Ideo instrumentis accuratissimè fabrefactis instructus, pedes in monumentis, tum *Statili*, tum *Cossutii* in hortis *Colotianis*, repræsentatos; multosque alios ex ruderibus *Romæ* effossos: item antiquas structuras summa elegantia & arte olim ab optimis architecturae magistris conditas, puta *Capitolium*, *Vespasiani Amphitheatrum*, *Titi*, *Severi*, & *Constantini* magni *Arcus Triumphales*, & præcipuè *Pantheon Marci Agrippæ*: ipsissimum *Vespasiani* congium, & decempedas apud *Terracinam*, Vete-
rum

rum *Anxur*, in rupe excelsa prope mare secus viam *Appiam*, juxta feriem numerorum decupla proportionem continuatam, characteribus pene cubitalibus descriptas, sedulò examinavit. Quibus omnibus exploratis, *Colotianum* istum esse verum antiquorum *Romanorum* pedem, multis argumentis prolatis statuit. Huic Dissertationi duplicem tabellam, quæ pes, tum *Romanus* tum *Anglicanus*, cum variis aliarum Gentium mensuris comparatur, in fine addendam curavit.

In altera, omnem antiquorum ponderum rationem à Denario pari judicio exquirat, præmissis de ejusdem valore, quatenus nummus erat apud *Romanos* in commerciis instituendis usus communissimi, doctis observationibus: quapropter centenos hosce denarios argenteos, tam *Consulares*, quam *Cæsareos* in ista longa variaque seculorum successione ad usque *Justinianum* (post cujus obitum barbararum Gentium, quas *Scandinavia* cæteræque regiones Septentrionales immensis ferè copiis effudissent, colluvies universam propemodum *Europam* inundaverat) signatos, item quinaros seu victoriatos, aureorum ingentem vim, nummos *Græcorum*, præsertim *Atheniensium*, puta stateras aureas, tetradrachmas drachmas, cum suis minutioribus partibus: siclos *Ebraeorum*, uncias denique & libras æneas exactissimâ bilance, vel octogesima grani parte ad oculum deprimendâ, trutinavit, inde pretium & valorem nummorum antiquorum, quorum sola in libris, rebus ipsis publicis everfis deletisque nomenclatura superest, iuxta proportionem collecturus: addita quoque tabella, in quâ aliarum Gentium pondera, & aurea & argentea, ad modulum denarii constituuntur.

Ut verò in omnem posteritatem ipsa mensurarum, quæ hodie apud nos obtinent, veritas & certitudo absque aliquo detrimento integra & intemerata derivari possit, optimam eas cum antiquissimorum & celeberrimorum monumentorum, quæ hæcenus per tot secula perduraverint, & fortè in omne ævum, donec pereunte mundo universa rerum dissolvatur compages, sint duratura, partibus quibusdam insignioribus, (cujusmodi sunt primæ & maximæ *Egyptiacarum* Pyramidum, quæ magis ad orientem vergit, linea, post ostium quadrati descensus, ex duorum politorum lapidum junctura supra procurrens: basis columnæ ordinis *Corinthiaci*, non procul ab *Alexandria*, versus austrum: rupes illa, quam superius memoravi, ad *Terracinam*, *Tyrrheno* mari imminens; porta Panthei *Agrippæ*: & denique porta sancta basilicæ *S. Petri Romæ*) comparandi, indeque ad certissimam ponderum explorationem vas cubicæ figuræ, juxta proportionem in tabella proposita assignatas, ef-

effingendi methodum excogitavit. In extrema appendice observationes quasdam, ex longo rerum & frequenti antiquorum numismatum penfatione collectas, de statuendis hodiernorum nummorum valoribus, dum inter se, pro moribus collybistarum hujus seculi, comparantur, proponit, quæ tum Antiquariis, tum iis, qui in longinquas regiones peregrinantur, magni usus forent. Ex hoc compendio, ineleganti licet, & valde imperfecto, quod non invitus fateor, Exteris, *Anglicano* idiomati minimè assuetis, quorum præcipuè in gratiam hanc memoriam scribo, qualequale de hujus doctissimæ lucubrationis excellentia & utilitate judicium formare licebit.

III. CL. V. Joannis Bainbrigii *Canicularia: unà cum demonstratione ortus Sirii heliaci pro parallelo inferioris Ægyptii. Auctore Joanne Gravio. Oxoniæ. 1648. 8o.*

Tractatulum hunc, quem doctissimus *Bainbrigi* infandi belli furoribus eo usque impeditus, donec morte opprimeretur, præcipua sui parte imperfectum reliquerat, rogatu quoque reverendissimi *Usserii Arma-chani*, qui id prius *Bainbrigium* rogaverat, cum supplemento ad argumentum istud absolvendum perquam necessario, ut Amici sui & in Astronomiæ cathedra Decessoris famæ & memoriæ litaretur, edendum curavit: occasione justa inde arrepta Virum eruditissimum, *Georgium Entum*, M. D. postea celeberrimi Medicorum *Londinensium* Collegii Præsidentem, & dignitate equestri merito suo insignitum, prævia epistola compellendi. Eximia utriusque virtus & summa eruditio *Patavii* primum illos arctis veræ amicitiae nexibus conjunxerat, quam in *Angliam* reduces mutuis amoris & benevolentiae officiis deinde foverunt. Nemo autem, ut id obiter, nec tamen prorsus extra scopum, hîc interferam, amicitias, cum magnis Viris initas, aut religiosius coluit, aut justius & honorificentius æstimavit, quàm *Gravius* noster, qui tot præclara nomina suis libris, non ex vanæ ostentationis aut stultæ ambitionis vitio, sed religionis studio & grati memorisq; animi sensu ductus, tanquam debitum istiusmodi pro variis rerum momentis, aut venerationis, aut observantiæ, aut affectus causa, *μνημόσυνον*, sive Patronis sive familiaribus Amicis dedicatum, præfigi pro more voluit, hac pietate, hoc morum candore pariter ac doctrina posteritati non parùm commendandus.

Acceperunt *Insigniorum* aliquot stellarum longitudes & latitudes ex *Astronomicis observationibus* *Ulug Beigi*, *Tamerlanis* magni nepotis.

Illas verò, ad principium anni 841. Hegiræ accommodatas, ad calcem hujus libelli adjicere placuit, tum ut iste in paulo majorem concinnioreque molem inde exurgeret, tum ut Astronomis *Europæis* exhiberetur specimen integri operis, quod molitus est & absolvit: de quo inferius agam.

IV. *Elementa linguæ Persicæ*. Londini 1649. 40. vel potius 1648. Typographus enim, ut puto, pro more non modicam anni partem anticipavit, ut gratia novitatis ipsi libro constaret magis. Hæc, facili justaque methodo tradita, olim suasu & rogatu D. *Seldeni*, cui inscribuntur, ante susceptum in *Orientem* iter conscripsit *Gravius*, eodem, ut videtur, tempore, quo V. Cl. *Ludovicus de Dieu* ejusdem linguæ rudimenta condidisset, utrisque simul, licet consiliis hac de re non invicem communicatis, auspiciatò conspirantibus, ut studiosis prodesse, ne, cum expeditus facilisque ex ingenti Grammaticarum copia ad perfectam linguæ *Arabicæ* cognitionem pateret aditus, omnem viam, qua ad thesauros literarios in *Perside* latentes erat penetrandum, salebris objectisque scopulis vix superandis adhuc obseptam esse amplius quererentur. Ab hisce autem institutionibus non alienum, nec professioni Scientiæ Astronomicæ, quam, licet à publico illius docendæ munere abdicatus, ex scriptis *Orientalium* illustrandam susceperat, incongruum putavit, si ibi adderetur.

Anonymus Persæ de siglis Arabum & Persarum Astronomicis. Quorum in eorundem Tabulis Astronomicis frequentissimus & penè necessarius est usus. Hujus commentationem, quam *Constantinopoli* comparaverat, annotatiunculis oppidò eruditis in marginem conjectis auctam, nobilissimo & eruditissimo Viro, D. *Claudio Hardy*, qui etiam, dum *Parisiis* ageret *Gravius*, ut, quod D. *Seldenus* domi fecisset, ejusdem Linguæ institutiones adornare scriptisque mandare vellet, hortatus est, in perpetuam veteris amicitiae memoriam dicavit.

V. *Epochæ celebriores, Astronomis, Historicis, Chronologis, Chataiorum, Syro-Græcorum, Arabum, Persarum, Chorasmiarum, usitata, ex traditione Ulug Beigi, Indiæ citra extraque Gangem Principis*. Persicè & Latinè, *Londini* 1650. 40.

Liber *Europæis* hætenus incognitus, recondita *Orientalium* eruditione plurimum refertus: munusque dignum, quod serenissimæ invictissimæque *Venetorum* Reipublicæ offerretur: cujus laudes ibi post magnificam

cam Inscriptionem elegantissimo carmine celebrat *Gravius*. Ut verò istæ epochæ, quarum assiduo usu & tractatione innumeri errores, in libris nostrorum hominum Chronologicis scatentes, emendari possint, facilius intelligerentur, illas ad periodum *Julianam* & epocham *Christi* vulgarem *Dionysianam* in annis expansis sive tabulis continua serie à primo Hegiræ anno sive *Christi* sexcentesimo vicesimo secundo usque ad annum istius æræ *Mohammedanæ* millesimum quadringentesimum septuagesimum, h. e. æræ Christianæ bis millesimum quadragesimum septimum, ingenti cum labore, summaque accuratione compositis constructisque reduxit: addita tabularum praxi, lemmatibus exemplisque congruis illustrata. Sequitur

Chorasmiæ & Mawaralnahræ, hoc est, regionum extra fluvium Oxum, descriptio: ex tabulis Abulfedæ Ismaelis, Principis Hamah: quam reverendissimo Præsuli, Jacobo Usserio, Archiepiscopo Armachano, sacratam esse voluit. Hæc verò tabulas Geographicas, mira diligentia summaque fide cum quinque exemplaribus manuscriptis collatas, tanquam portionem exiguam, licet non contemnendam, imò magni faciendam, hac de causa edidit, ut regionum istarum urbes ibi descriptæ, Græcis verò Latinisque Scriptoribus, sive antiquis sive recentioribus, praeque ex parte ignotæ, melius paterent, indeque de integri operis excellentia & utilitate certiùs judicaretur.

VI. *Astronomica quadam ex traditione Shah Cholgii Persæ: una cum hypothesebus Planetarum, & cum excerptis quibusdam ex Alfergani elementis Astronomicis, & Ali Kushgii de terræ magnitudine & sphaerarum cælestium à terra distantis.* Londini. 1652. 4^o. Inscrisit Viro nobilissimo, Joanni Marshamo, tum ut hoc monumentum sinceri affectus illibatæque amicitiae, cum illo in istis calamitosis patriæque maximè funestis temporibus initæ, posteritati relinqueret, tum ut hac quoque ex parte eidem parem gratiam referret, qui *Diatribam Chronologicam* sub *Gravii*, doctissimi sui Amici, nomine in lucem prodire, ipsius consilio importunis precibus, ut id faceret, inductus, ante triennium permisit. Liber iste Astronomiæ studiosis valdè utilis, qui prima Mathematicos elementa, originesque, & significatus vocum, magni & frequentissimi in explicandis *Ptolemæi*, quas *Indi*, *Persæ*, *Arabesque* sequuntur, hypothesebus, usus, clarè pandit.

Adduntur

Bina Tabulae Geographicae, una Nassir Eddini Persæ, altera Ulug Bei-

gi Tataři: Viris doctissimis *Edwardo Pocockio*, & *Thoma Gravio*, fratri suo, dedicatæ. Hæ nimirum tabulæ civitatum, earum præsertim, quæ in remotissimis *Asia* regionibus, ubi *Græci* vix unquam penetraverint, sitæ sunt, longitudinem ab *Insulis Fortunatis*, solenni *Arabum Persarumque* ritu, numeratam, & latitudinem ab *Æquatore* repræsentant referuntque, singulis climate assignato.

Cum pridem *Constantinopoli* libellum, à *Roberto Witherfio Anglo* conscriptum, de *Palatio Imperatoris*, iisque omnibus intra septum istud *Regium conclusis*, & illorum muneribus accepisset, non indignum judicavit, qui communi luce *Londini* 1650. donaretur, utpote in quo, ut ille in nuncupatoria ad V. Cl. *Georgium Tookium* epistolâ testatur, multa arcana & argumenti perquam curiosi, quæ in libris, qualicunque lingua *Occidentali*, quantum scivisset, antè editis, frustra quæsieris, ubi vis occurrunt.

De reliquis *Graviana* eruditionis monumentis, quæ aut absolvit, aut imperfecta reliquit, (semper enim quippiam grande, inusitatum, & ingenio suo & sapientia dignum pertinaci studio molitus est) hoc in loco ut paucis agam, non inconcinnum videbitur.

VII. *Lemmata* Archimedis apud Græcos & Latinos jam pridem desiderata è vetusto codice manuscripto Arabico à Joanne Gravio traducta (a), & cum *Arabum Scholiis* publicata. Hæc edidit, & suis animadversionibus correxit & illustravit in *Miscellaneis* suis V. Cl. *Samuel Forsterus*, *Astronomiæ* in Collegio *Greshamensi* Professor, *Londini* 1659. folio.

VIII. De modo pullos ex ovis in fornacibus lento & moderato igni calescentibus apud *Kahirenses* excludendi. Schedam hanc in Actis Philosophicis pro mensibus *Januario* & *Februario* A. 1677. juxta computum *Anglicanum* excusam, Regiæ Societati, una cum figuris, impertitus est Vir doctissimus, D. *Georgius Entus*. Fortasse ad hoc peculiare *Ægyptiorum* sive institutum sive praxin (si tantam præ se ferre possit antiquitatem: neque enim id acriter contendam) alludit *Hadrianus* Imperator in epistola prælaudata ad *Servianum* Consulem, de iis ita loquens: Nihil illis opto, nisi ut suis pullis alantur: quos quemadmodum fecundant, pu-

(a) Vide epistolam Gravii ad *Jacobum Usserium Armachanum*, Epist. ccxi. in Sylloge. pag. 509.

pudet dicere. Hæc autem olim observarunt *Aristoteles* Historiæ Animalium lib. vi. capite secundo, & *Diodorus Siculus* Antiquit. lib. ii. Huc enim certissimè alludit. V. *Bellonium* in Observationum libro secundo, cap. 31.

IX. *Epistola de latitudinibus Constantinopoleos & Rhodi, ad reverendissimum Usserium Armachanum directæ:* ubi multa præclara de cælestibus cognati argumenti tum *Græcorum* tum *Arabum* observationibus habentur. Hanc olim è schedis *Usserianis* depromptam iisdem Actis promense Decembri A. 1685. inferendam curavi.

Libri, quos prælo paravit, hi sunt:

I. *Tabula integræ longitudinis & latitudinis stellarum fixarum juxta Ulug Beigi observationes:* quas cum quinque manuscriptis codicibus, ut quàm emendatissimè (sic enim planè statuebat) in publicam exirent lucem, diligenter contulerat. Cui operi nemo magis idoneus digniorve illo erat habitus aut habendus; utpote, qui præter linguarum *Arabice* & *Persicæ*, quam adeptus est, cognitionem, in rimandis *Uranie* arcanis stellisque observandis tum in *Ægypto* tum in *Anglia* assiduè versabatur. Librum hunc, tanquam sacrum pretiosumque depositum, apud D. *Usserium Armachanum* reliquit. Easdem verò observationes universas postea, D. *Thomas Hydus*, linguarum *Orientalium* callentissimus, tanquam opus novum & à nemine attentatum aggressus, omnino nescius, *Gravium* totum id absolvisse, versione sua *Latina* donatas commentariisq; illustratas, D. *Sethi Wardi*, tunc temporis *Exoniensis*, & post *Sarisberiensis* Episcopi, qui *Gravio* nostro, ob fidem erga Serenissimum Regem *Carolum* I. beatissimæ memoriæ servatam, munere isto publico, ut supra dixi, à Parlamentariis Visitatoribus exuto, successisset, rogatu & auspiciis, *Oxonii* A. 1665. edi curavit.

II. Paratam quoque habuit *Gravius* versionem *Georgii Chrysococceæ* ex manuscriptis *Persicis Græcè* factam, prout repererat in codice MS. in archivis *Baroccianis* Bibliothecæ *Bodleianæ*: tum tabellam longitudes & latitudes stellarum insignium xxv. continentem: tum alteram sive *Κανόνιον τῆς μήκους καὶ πλάτους τῶν ἐπισήμων πόλεων*. Easdem Vir optimus & magnum *Gallie* lumen, *Ismael Bullialdus*, (cujus erga me benignitatem dum ante viginti tres annos paucis septimanis *Parisiis* agerem, grata mente recolo) in appendice ad *Astronomiam Philolaicam*, *Pari-*

sis 1645. publicavit. Variantes lectiones à *Gravio* in codicis sui collati cum impresso margine adnotatas memini me olim vidisse.

III. *Descriptio Peninsula Arabica ex Abulfeda, cum descriptione maris Persici & Rubri. Arabicè & Latinè. Eiusdem Descriptio ex Ptolemaeo. Græcè & Latinè. Addit Gravius, Græca sunt e codice MS. clarissimi doctissimique Viri, D. Seldeni. Latina à Gerardo Mercatore edita sunt, & nonnullis in locis ope codicis MS. Palatini à P. Bertio castigata. Numeri Græci in editione Bertiana, quæ optima censetur, depravatissimè leguntur. Hæc edere statuebat A. 1645. sed intestina bella omninò intercesserunt. Exemplum istud propria illius manu descriptum, apudque fratrem suum doctissimum, Thomam Gravium, relictum una cum aliis hujus codicibus MSS. pecuniis suis redemit Academia Oxoniensis, inque Bibliotheca publica reponi curavit.*

IV. *Narratio Geographica de montibus terræ juxta Arabes ex Abulfeda; Anglicè: in qua de marmoribus rubri coloris, maculis candidis nigrisque intermixti, prope montem Sinam effossis, quædam præclaræ observationes. Peregrinantibus aut non satis obviæ, aut præ fastidio & imperitiâ neglectæ, inseruntur.*

V. *De Tataris seu Mogolenfibus, ex Teixeira Hispano, qui plurima ex Emircondo Persâ mutuatus est; cum ejusdem compendiaria præcipuarum in Perside regionum descriptione: Anglicè.*

VI. *Commentarii in Epochas supra memoratas, nescio quo infelici casu in ista editione omissi. Horum enim mentionem facit in titulo libri, & ad eosdem post tabulas Chronologicas Lectorem remittit de embolismo Persico & Gelaleo diligentius inquisiturum. An perierint, nec ne, penitus ignoro: neque enim illos in schedis Gravianis aut Usferianis reperire hætenus contigit.*

VII. *Versio integra tabularum Geographicarum Abulfedæ: quæ pariter latet. Hanc autem ab ipso consummatam fuisse ex præfatione Chorasmie & Mawaralnabræ descriptioni præfixâ satis constat. Cùm enim dixisset, Ramusium iis fuisse usum, & præcipuè Castaldum, insignem Geographum, illarum beneficio errores ab aliis in describendis Asia regionibus, & potissimum in signandis locorum longitudinibus & latitudi-*

dinibus admissos sustulisse, ac denique Viros doctissimos, *Thomam Erpenium* & *Guilielmum Schickardum*, de iis edendis cogitasse, mox subiungit, *Quod itaque à tantis Viris susceptum, & à doctis hodie ferè omnibus efflagitatum, tandem favente Deo Opt. Max. in hac nunquam satis deploranda Patria meæ calamitate, in maximo fortunarum naufragio, summaque animi inquietudine, consummatum est.* Non possum igitur, quin deplorem triste illud, quod illustri huic ac utilissimo istius Syri Principis libro adhuc incubat, fatum, nec facilè, ut videtur, averruncandum, ni Principum Magnatumque hisce literis patrocinantium munificentia infelix istud infaustumque avertat omen. Post enim *Gravium*, Viri clarissimi & eruditissimi, *Samuel Clericus* & *Guilielmus Guisus*, ambo *Oxonenses*, &, ut accepi, *D. Thevenotus*, *Gallus*, idem quoque opus summa cum industria moliti sunt, quos tamen in medio opere occupatos mors abripuit.

VIII. *Elementa omnium Scientiarum, præsertim Mathematicarum*, in libello, quem synopsis & compendium τῆς Ἑγκυκλοπαιδείας jure appellaverim, comprehensa. Multa quoque, quæ ad Astronomiam, Geographiam, & Chronologiam è Scriptoribus *Arabicis Persicisque* collecta, unà cum præclaris quibusdam cœlestibus observationibus à se aliisque hoc seculo factis, ibi occurrunt: quas tandem aliquando, si Deus dederit, publicabo. Libellus enim iste, propria illius manu descriptus, quem Frater ipsius *Nicolaus Gravius* Viro celeberrimo, *D. Loftusio*, dono dederat, tandem, revolutis multis annis, felici casu ad me delatus, suppellectilis meæ librariæ ingens est ornamentum.

IX. Ex tabulis *Nassiredдини*, *Abulfeda*, & *Ulug Beigi* collatis mapas quasdam chorographicas, signatis nimirum secundum debitas regulas & proportionem in plano, civitatum, juxta situm & à se invicem distantias, quas isti describunt, longitudinis & latitudinis gradibus, artificio & perpolita manu delineavit *Gravius*: quas dum continente nec prorsus incurioso oculo lustro, frequentique manu verso, *Arabum* observationes minus justas & veras esse, neque cum iis à nostris Mathematicis, hisce sequioribus seculis, sive diligentiori cura sive accuratioribus instrumentis elucubratis, comparandas, satis edoctus, in iis æri incidendis, (quod fecissem, si tanti fuissent) operam & nummos prodigere nefas penè duco. Minoris quoque *Asiæ* mappam chorographicam construxit & concinnavit rogata *D. Usserii Armachani*, qui eruditissi-

mam

nam istam Dissertationem, quæ postea sub hoc titulo prodibat, *Geographica & Historica Disquisitio de Minori Asia propriè dictâ, &c.* tum temporis molitus est.

X. Statuebat quoque (a) Lexicon linguæ *Persicæ* edere, collectâ ingenti vocabulorum, usque ad sex millia, ex *Arabicis & Persicis* Nomenclatoribus copia: ad quod complendum, iter *Leidam*, in cujus publica Bibliotheca quamplurimi codices MSS. linguarum *Orientalium* erant ex legato *Josèphi Scaligeri* & procuratione D. *Jacobi Golii* repositi, instituisse cupiebat, si per maligna tempora licuisset.

Multa quoque alia, puta *de Geographis è gente Arabum*, quos diligentissimè tractavit, quorumque sententias de terræ magnitudine sive de ambitu circuli maximi recensuit: *de ponderibus & mensuris Arabum*, de *Mumiis* sive veterum *Ægyptiorum* sepulchris, de characteribus figurisque hieroglyphicis, quarum ingentem variamque copiam in suis pugillaribus præsens ex ipsis obeliscis ac columnis adnotaverat, deque reliquis antiquitatibus illic repertis detectisque, edere proposuit. Quibus tamen omnibus minus ægrè nobis esset carendum, si *inferioris Ægypti topographiam* unà cum duorum naturalium *Nili* alveorum, qui *Deltam* ambitu suo complectuntur, descriptione, (illorum volo cursum, anfractus, oppida insigniora, quæ illorum ripis insistent imminentque, & ostia apud *Pelusium & Canopum*, recentioribus, ut videtur, *Damiatam & Rosettum*) quod nemo melius & accuratius quidem potuit, edidisset.

Sed tantùm abest, ut hoc illi cedat in opprobrium aut famæ diminutionem, ut potius omni laude sit cumulandus, quod, rerum nostrarum temporisque, post ejus reditum in *Anglia*, habita ratione, tot illustria indefessæ industriæ monimenta post se relinquere potuerit. Tunc enim, quod hîc necessariò repetendum videtur, ubique ferè erat tumultuatum: mox ingruerat funestum illud bellum, quod omnia loca rapinis, cædibus, incendiis implevit: *Oxonium* præcipua arx belli fiebat, quò serenissimus Rex Regiarumque partium sequaces confugerant, & in quam copiae militares Parlamentariæ maximè detonuerunt: per paucae horæ, aut à militaribus aut ab aulicis negotiis vacuæ, Academicis supererant, literarum studiis, nisi quas à somno subripuissent, impendendæ: (inter enim tubarum clangores, bombardarumque strepi-

tus,

(a) V. illius Epistolam ad *Usserium Armachanum* in *Sylloge*. pag. 509.

rus, quis locus quieti & otio, suavissimis literarum altricibus, esse poterit?) justitiumque Prælectionum, Disputationum, reliquorumque Scholasticorum Exercitiorum, tum in publicis Scholis, tum in Collegiis, erat invecum. Post, à suis muneribus abdicati Academici ferè omnes, nisi qui agnita Parlamenti tyrannide à fide, & Deo & Regi solenni juramento præstita, turpiter defecissent.

In hac communi *Angliæ* strage tristem sortem, si quis alius, subibat *Gravius*, cujus res privatæ inde erant afflictissimæ: utpote *Oxonio* pulsus, omnibus fortunis suis exutus, sola modica hæreditate relictâ, & quod maximè doluit, libraria supellectile spoliatus, barbaris militibus arculas cistasque effringentibus. Hinc schedæ aut disjectæ aut laceratæ, abreptique codices manuscripti: quorum partem, D. *Seldeno*, (qui multum apud Parlamentarios, qui cum perduellibus *Westmonasterii* manserat, licet alias strenuus laborantis Academiae *Oxonienfis*, cujus erat in istis Comitibus *Burgensis* sive Deputatus, contra Visitatorum insultus Advocatus & Patronus) operam suam tempestivè interponente, recuperavit: pars verò periit. Fixis jam in Urbe sedibus, uxorem duxit in solatium vitæ, interim tamen studiis forti vegetoque animo, quantum humani affectus sinunt, quàm maximè & indefinenter intentus: ut libri isthoc intervallo editi abundè testantur. Tandem, sive immodicis studiis, sive nimio mœrore, quem ex tenerrimo publicarum Patriæ calamitatum sensu contraxerat, confectus, diem suum, mense *Octobri* A. 1652. cum jam quinquagesimum ætatis annum exegisset, non sine maximo Amicorum luctu, quasi præmaturè obiit. Sepultus jacet in Ecclesia *S. Benedicti*, vulgo distinctionis causâ nuncupata, *Sheerhog*, quæ in fatali incendio *Londinensi* penitus eversa erat. Vir sane longè meliori seculo dignissimus, & inter summa Academiae *Oxonienfis*, imò & *Angliæ*, decora merito suo annumerandus. Quantus verò Vir futurus esset, imo maximis accensendus, quàm pulcherrimè & optimè de Astronomia, de literis *Orientalibus*, imo de universa re literaria meriturus, si vita longior, si fortunatior, si denique ab incommodis & ærumnis, quibus vel mentes optimorum dejici solent, omninò libera, illi contigisset!

Gravius fratrem *Nicolaum*, sibi ætate proximum, testamenti, anno ante mortem summa pietate & sapientiâ conditi, *Executorem*, ut nostri Jurisconsulti loquuntur, & bonorum omnium, sive mobilium sive immobilium, (demptis nimirum legatis, pecuniisque numeratis, quas dilectissimæ Uxori, præter prædii usum fructum, illi, dum viveret, do-

tis rependendæ vice prius assignatum, duobus aliis Fratribus, Fratris filio, & Amicis donaverat) constituit hæredem. Hic verò, sive *Joannis* consilio & voluntati, qui, ut videtur, & forte in privatis ante obitum colloquiis, pro amore erga Academiam *Oxoniensem*, erga D. *Savilium* Fundatorem, & erga publicum, quod insigni cum laude gessit, munus, post instaurandas Ecclesiam, Monarchiam, & Academiam, si quando violenta fœdaque ista tempestas, quâ omnes tunc prostratæ jacebant, Deo misericorditer favente, præterierit, id fieri cupiebat, obsecutus; sive illius immortalī famæ consulturus, totum machinarum instrumentorumque (inter quæ recensentur Telescopia, Quadrantes, Sextantes, Octantes, Astrolabium, & ejusmodi) cœlestium observationum usibus adaptatorum apparatus, tertio Fratre *Thoma* consentiente, & symbolas apud se relictas dante, in Museo *Saviliano*, tanquam loco maximè proprio, repositum, in perpetuum servari ultimis tabellis curavit. Horum index habetur in magno opere Catalogorum *Oxonii* nuper edito: parte I. pag. 302. Utinam in servandis schedis solutis, epistolisque ad D. *Gravium* scriptis, illiusque responsoriis, quarum per paucæ, tanquam ex incendio ereptæ, illic supersunt, ne dicam codicibus MSS. & selectis impressis, potissimum Auctoribus primæ classis, quos passim in margine emendavit, eruditisque illustravit annotationibus, parem curam adhibuisset *Nicolai* vidua. Hos enim, ut accepi, vili admodum pretio sibi comparavit versutus quidam Bibliopola: quorum aliqui in Museis curiosorum, qui, pecuniis abundantes, istis mercibus pretiosis in auctionibus publicis distrahi solitis coemendis inhiant, hodiè reperiuntur.

Frates tres, Viros & dignitate & eruditionis fama insignes, sibi diu superstites, habuit. Illi erant, supradictus *Nicolaus*, olim splendidissimi Collegii Omnium Animarum *Oxonii* Socius, & Academiae A. 1640. Procurator, & postea Ecclesiæ Cathedralis *Dromorensis* in *Hibernia* Decanus: *Thomas*, Collegii Corporis *Christi* ibidem Socius, & Ecclesiæ *Petriburgensis* Canonicus meritissimus: Vir linguarum *Orientalium* peritissimus, ut doctissimæ in Pentateuchum & Evangelia *Persica* annotationes, in sexto Bibliorum Polyglottorum *Londinensium* tomo editæ, clarissimè demonstrant. Ille verò longè antea ediderat Orationem de linguæ *Arabicae* utilitate & præstantia *Oxonii* habitam 19. Julii 1637. Et denique *Edwardus*, Collegii etiam Omnium Animarum, & celeberrimi Collegii Medicorum *Londinensium* Socius, Medicus serenissimi Regis *Caroli* ordinarius, & Baronetti dignitate illustris, cujus elegantif-

suma exstat oratio in Collegio *Londinensi* 25. Julii 1661. die *Harvæi* memoriæ dicato habita.

Commercium literarium cum quibusdam Viris exteris longè celeberrimis habuit, puta *Guilielmo Schickardo*, *Jacobo Golio*, *Claudio Hardy*, *Francisco Junio*, *Petro Scavenio*, & *Christiano Ravio*: quod tamen flagrante bello identidem exercere vix licebat. Domi, quos impensissimè amavit coluitque, ab iisdem redamatus, &, quantum illorum summa dignitas fivit, vicissim cultus, non sine maxima animi voluptate recensere solitus est reverendissimos Præsules, *Laudum* & *Usserium*, hunc *Hibernia*, illum verò *Angliæ* Primatem, *Joannem Seldenum*, *Guilielmum Harvæum*, *Gerardum Langbainum*, *Joannem Marsbamum*, cui omnia numismata, sive pretiosi sive ignobilioris metalli, ab ipso in *Italia* & in *Oriente* collecta, legaverat, *Edwardum Pocockium*, *Georgium Entum*, *Carolus Scarburgum*, aliosque Viros maximè egregios, quorum omnium nomina hic ingerere ostentabundi esse videretur. Omnes sanè boni, etiam ii, quibus sola fama innotuit, ipsius mortem quasi præproperum acerbumque funus veris lachrymis luxerunt: apud quos magnum sui desiderium reliquit. Æqua autem posteritas, & ab omni malo affectu præjudiciisque libera, dum istorum temporum, in quibus malè erat habitus, impietatem, perfidiam, & malignitatem execrabitur, simul illius (similiumque Συμπασχόντων) probitatem, invictam animi vim, nullis malis frangendam, sublime ingenium, & reconditam eruditionem debitis elogiis prædicabit.

ELOGIA & TESTIMONIA

Eruditissimorum Virorum

de JOANNE GRAVIO.



EDWARDUS POCOCCIUS in *Specimine Historia Arabum* Oxon. 1650. pag. 128.

Atque hæc est Urbis Meccanæ (prout Auctoris hujus ævo se habuit) descriptio, quam ut Lectori, quam potuimus, emendatam daremus, duo inter se exemplaria MSS. conferenda curavimus, quorum primum è Syria advexi, alterum ex Ægypto doctissimus Vir, Joannes Gravius, quod meo & antiquius & multò emendatius.

Pag. 158. *Quod ad characteres à Moramero effictos, ac diu apud Arabes retentos, satis rudes fuisse constat, quales scilicet Kufienses vocant, quos in librorum titulis ac lapidibus insculptos videri est: nec aliis descriptum olim Alcoranum testantur folia aliquot antiqua, literis semiancialibus in pergamento exarata, quæ doctissimus, mihiq; amicissimus, Joannes Gravius, quo nemo integro magis affectu se studique sua ac impensas suas publicæ rei literariæ utilitati dicavit, secum ex Ægypto detulit.*

EDWARDUS BERNARDUS in libro de *Mensuris & Ponderibus Antiquorum*. Oxonii 1683.

Pag. 105. Jo. Gravius V. Cl. & justitiæ Romanæ diligentissimus indagator.

Pag. 123. Joanni Gravio, antecessori nostro semper memorando.

Pag. 133. Nobis equidem pensitantibus, post Joannem Graviū, rarissimæ eruditionis apothecam, uncia Romana sustinet grana monetaria Angliæ.

Pag. 134. Joannes Gravius, Cathedræ Savilianæ honos, multo experimento exegit.

Pag. 197. Ex pede igitur Anglico Græcoque, ut decet pedes & mensuras aliorum brevi tabula æstimabimus, freti multum experimentis Jo. Gravii, viri probi & docti.

Pag. 203. Semet defendit diligentissimus Gravius monumento Cossutii, Architecti Romæ Athenisque, Pollione iudice, laudatissimi.

In Prælectionibus MSS.

In superiori prælectione, ut properanti & abiturienti licuit, mentio facta est Joannis Gravii, qui vir hujusce cathedrae ornamentum, Academiae delicia, solertissimus antiquitatis Romanae, Graecanae, Orientalis, omnino omnis, explorator, libellum de Denario & Pede Romulidum aureum, imò supra aurum omne & metallorum lucem, pretiosum, luculentum, ingratum, ingrato seculo dedit, atque ut omnibus testatum faceret & compertum se nullis convitiis, injuriis, vel etiam infortunio affectu illo integerrimo ac amore mero, quo erga hanc Academiam semper ferebatur, liberari demum & exui ullatenus potuisse, egregiam suppellectilem, Quadrantes, Octantes, Sextantes, etiam Tychonicis grandiores & distinctiores, tum Astrolabia, Dioptras, Academia huic, ut tunc res erant, moribunda, moriens legavit. Nosmet igitur quod videtur, & tanti memoriae viri atque unà justitia hodie litare decet. Pede enim Graviano hunc nostrum globum, tot imperiis, regnis, rebusque publicis aequè divisum, justissimè metiri datur. Sextante etiam Graviano amplissimas caelorum regiones, extremamque terrarum, quam post Arabum Principes mortalium quispiam accuratius aut solertiùs.

In alia Prælectione.

Diligenter quidem de Pedibus Romano & Graecanico, scripsere Agricola; L. Pætus, Villalpandus, Mersennus, vix alius: at Joannes Gravius diligentia atque doctrina in isto argumento longè antecelluit; imò plures veteres modos contulit; plura monumenta Romana, pede Anglicano replicato, dimensus est, quam unquam Italarum aliquis fecit, Pætus, Ricciolus, ceteri.

THOMAS HYDE in præfatione Tabularum longitudinis ac latitudinis stellarum fixarum ex observatione Ulugh Beighi. Oxon. 1665.

At ne tam celebre nomen neglectum temporumque ruderibus sepultum jaceret, primò consuluit Vir undequaque doctissimus, Joannes Gravius, in Academia Oxoniensi olim Astronomia Professor Savilianus. Ille enim primam partem nostri Auctoris de Epochis Orientalium Gentium, & ejus Tabulam Geographicam de situ quarundam regionum ac urbium Latinitate donavit, & in lucem publicam emisit: ipse idem quoque paulò antè longitudes ac latitudes centum plus minus stellarum ex hisce Tabulis, quas jam edimus, desumptas, unà cum D. Bainbrigii Canicularia Oxonii edidit, ubi & omnium inerrantium emendatam editionem promisit; morte autem, ah nimis præpropera! abreptus, fidem liberare non potuit.

JACOBUS GOLIUS in additamento de Cathaia ad Atlantem Sinicum M. Martini pag. II. III.

Hinc (i. e. ex Nasiroddino , patria Tusæo) ad verbum exscripta fuerunt : quæ de eadem re ex Ulug Begi traditione Cl. Joannes Gravius Anglus , auditor quondam meus , immaturâ morte Reip. literaria nunc ereptus , publicavit abhinc quadriennium , Epocharum celebriorum nomine inscripto. Quem librum allego propterea , ut cuique liceat , si libet , eorum , de quibus acturi sumus , ibidem testimonia videre.

GEORGIUS HIERONYMUS VELSCHIUS in Commentario in Tabulas Equinoctiales novi Persarum & Turcarum anni. Augustæ Vindelicorum 1676. pag. 18.

De Turcarum Epochis videre poteris tabulas Astronomicas Mogoricas sive Ulug Beigi quas V. Cl. Jacobus Golius Bibliotheca Lugduni Batavorum intulit ex Oriente adlatas , Abdarachmano Salachienfi inscriptas , Præfecto Damasci in Syria , quas Jo. Gravius Londini in Anglia emisit , eoque ipso immortalẽ sibi nominis gloriam cum Geographicis quibusdam Abulfedæ peperit.

STEPHANUS LE MOYNE in observationibus ad S. Barnabæ Epistolam pag. 798. 799.

Occurrunt in Epochis Chataiorum ipsorum , Chorasmiarum , gentium magis barbararum & remotiorum , quas maximo labore adornari curaverat Ulug Begius , Princeps Indiæ , & quas etiam maxima cura divulgavit Joannes Gravius , Anglus doctissimus , & in omnibus linguis Orientalibus egregiè versatus. Occurrunt & eadem notæ in libello Ziglarum Astronomicarum Arabum & Persarum , quem edidit idem Gravius , ubi eadem prorsus occurrunt figuræ & notæ numericae , quas modo supra representavimus. Ubi etiam Gravius rectè observat , characteres istos ab Arabibus & Indis nos tandem habuisse.

A. GALANDUS in præfatione ad Bibliothecam Orientalem D. Herbelotii.

Seldenus , Pocockius , Castet , ceux , qui ont travaillé en Angleterre , à l'edition de la Bible Polyglotte , & le Docteur Hyde Bibliothecaire d'Oxford , qui vit encore aujourd'hui , se sont tous signalez par des traductions & par d'autres Ouvrages sur la Langue Arabe , & sur la Langue Persienne , dont l'étude a aussi reçu de grands secours par les Livres de Gravius.

6

V I T A

Illustris Viri , D.

PETRI JUNII,

Equitis Aurati, Serenissimi Regis JACOBI
I. Præceptoris , & magni Scotiæ
Eleemosynarii.

Scriptore

THOMAS SMITHO,

*S. Theologiæ Doctore & Ecclesiæ Anglicanæ
Presbytero.*

V I T A

V. C. D.

P E T R I J U N I I ,

Equitis Aurati.



ETRUS JUNIUS natus est *Taoduni* in *Angusiâ*, Provincia *Scotia*, xv. die *Augusti* anno *Christi* incarnati MDXLIV. patre *Joanne Junio*, & matre *Margaritâ Scrimgerâ*, utrisque ex antiqua & nobili familia oriundis: de quorum natalibus, felici connubio, & numerosa prole nihil hîc dicere attinebit, cûm ea omnia ex *Ephemeride Junianâ* in calce hujus breviculæ narrationis reperienda melius & facilius peti possint.

Cûm verò vividum illius ingenium, quod in ipsis puerilibus annis eluxit, seduli parentes, pro laudatissimo Gentis suæ more, liberorum famæ, ac, crescentibus annis, felicitatis, non imaginibus majorum, titulisve honorum, aut amplissimis latifundiis, sed prudentiâ, fortitudine, æquitati animi, eruditione, ac pietate metiendæ studiosissimi, sub idoneis Magistris liberali & severâ educatione excolendum curassent, ex ephebis excessurus, jam sumptâ virili toga MDLXII. exteras regiones petit, non vitæ solutioris aut desidis causâ, quasi semotis arbitris ac juventutis custodibus, quippiam ex pristinâ, cui assueverat, aut virtute aut industriâ esset remittendum, non inani curiositate aut desiderio solos oculos magnificis spectaculis pascendi ductus, sed ritu & exemplo Philosophorum veteris *Græciæ*, ut, familiari cum viris optimis & eruditissimis conversatione habitâ, majorem ingenii cultum caperet, inspectisque aliarum Gentium moribus ac institutis, satisque firmo judicio, quicquid præclarum & laudabile occurrisset, edoctus, quod Patriæ ornandæ & juvandæ conducere, inde suis redditus, tanquam utilissimum suscepti itineris fructum, reportaret.

Galliâ tunc temporis intestinis motibus agitâtâ , nullibi melius studiorum causâ , quàm *Geneva* , omni tumultu bellico procul , sibi morandum esse duxit : quò etiam maximè allexit *Theodori Beza* , aliorumque , eruditione ac à corruptelis & superstitionibus *Romanensium* purgatæ Religionis zelo insignium , fama , nec stimulo majori urgeri potuisset , præsertim si V. Cl. & doctissimus , (a) *Henricus Scrimgerus* , avunculus ejus , ab *Italia* , cujus insigniores Bibliothecas , vetustis manuscriptis codicibus diligentissima manu collatis , curiosis oculis lustrarat , cum hac suppellectile literariâ redux , isthoc tempore illic sedes suas , indigena futurus , habuisset. Interdùm tamen , aut valetudinis aut animi causa ad vicinas urbes , præcipuè *Lausannam* , ubi arctam cum *Gulielmo Stuckio* contraxit amicitiam , divertit , eundem studia literarum prosequendi ardorem , quocunque iverit , præ se ferens. Quantam verò spem de se ex vitâ juxta normam virtutis exactâ , in ista labili ætate , & in vitium nimium quantum pronâ , & ex tam præclaris initiis , quando maturioribus annis judicium & experientia indefessæ industriæ essent accessura , excitaverit , quàm charus quoque omnibus , qui in istis Academicis gesserint principatum , fuerit , ex *Beza* aliorumque epistolis inde in *Scotiam* missis constare poterit. Ille enim morum summus candor , non tam ex debita humorum temperie , quàm ex bona indole & sapientia ortus , quem per totum vitæ tenorem integrum servavit , tantam vim , eamque ineluctabilem , in se habuit , ut quotquot illum vel leviusculè nossent , multòque magis , qui intimæ essent admissionis Amici , illius amore & admiratione raperentur.

Post aliquot annos in *Scotiam* reversus est , an parentum , ut senium suum aspectu tam chari filii solarentur , jussu , an negotiorum causâ , incertum , sed non nisi animo repetendi *Galliam* : nondum enim scopum istum , quem peregrinatione priùs susceptâ proposuerat , sibi visus est attigisse. Ex penitiori rerum usu & longiori in isto secessu morâ , ubi Musis & Gratiis extra importunas domesticorum disceptationes , & inutile circumcursantium amicorum commercium & strepitum , iterum erat litandum , eruditior & sapientior fieri cupiebat , antequam totum se in

(a) Hic vir doctissimus Bibliothecam suam selectam , & præcipuè ob quamplurimos Codices MSS. *Græcos* magni æstimandam , huic sororis per dilecto filio , *Junio* nostro moriens A. C. MDLXXI. legavit : quæ postea , viz. circa annum MDLXXIII. ope *Alexandri* fratris *Geneva* avecta erat in *Scotiam*. Cujus elogia vide apud *Thuanum* ad A. MDLXXI. & *Casaubon*. Epist. 106. in Appendice.

in Patriam dare vellet, ut sic quoque vel publicis negotiis non prorsus impar, ab iis, qui sub puerulo Rege rerum potiti sunt, tandem aliquando judicaretur.

Sed ecce! cùm in procinctu itineris esset, expectato navigandi post sedatas hiemis procellas tempore, necessitas, Deo ita providente, ipsi nec opinanti quidem in patriâ manendi imponitur, felicitate peculiari, & quammaximè optanda, cùm ab isthoc momento fortunarum suarum & dignitatis fundamenta jaciendi, & de *Scotiâ*, imò de universis *Britanniis*, optimè merendi commodissimam opportunitatem nactus sit. Nam anno MDLXIX. ineunte, ætatis verò suæ XXV. mandante *Jacobo* Comite *Moravia*, qui post Reginam *Mariam* horrendis calumniis oppressam, & contra omne jus humanum & divinum vi & rebellibus armis sub prætextu Religionis reformandæ deturbatam, à confœderatis Proceribus *Scotiæ* Regens constituebatur, inter domesticos Regis adscitus est, qui, (a) unâ cum *Georgio Buchanano* plusquam sexagenario balbutientem Regis, qui adhuc sub Nutricum curâ positus, nuper tertium ætatis annum explevisset, pueritiâ, linguam & vocem dirigendo, primis literarum elementis informaret: deinde, prout succrescens ætas magis magisque ferebat, bonis artibus & doctrinâ imbueret, & pietatis ac religionis sensum animo instillaret. Diplomatis, quod in arce *Sterlinensis* accepit, ad hoc præclarissimum munus obeundum, auctoramento pro more munitus, Aulæ quasi affigitur, nunquam illinc, nisi Regis aut regni causâ, deinceps avellendus. *Buchananus* sanè, cui primæ partes ob famam ingenii & eruditionis delatæ erant, *Junium* nostrum in erudiendo Rege Collegam suum semper ingenuè agnovit, nec id laudis sibi soli, hac ex parte invidia & ostentatione vacuus, arripuit, qui vix fortasse tædium istud vel per ingravescentem ætatem vel per tetricos mores tolerare poterat, & maximi erat momenti, quod ad fidem muneris impositi implendam omninò faciebat, si pro arte ista, cui ab ineunte juventute assueverat, monitis, consilio, ac auctoritate senili, tanquam inspector & Ephorus cæteris superpositus, educationi Regis iverit prospectum: sed labor iste, ut fas est credere, Regem docendi, si non unicè, saltem maximè, per omnem teneræ ætatis gradum incumbibat *Junio*: à quo tempore titulum hunc: *D. Junio, Scotorum Regi, à literarum*

Fff 2

rum

(a) De utriusque ingenio, variisque moribus, hujus tetricis, *Junii* verò lenissimis in instituendo Principe, vide *D. Jacobi Melvilli* memorialia de rebus in *Scotia*, sub *Maria* Regina *Scotorum* & *Jacobo VI.* gestis. Pag. 125. Londini 1683.

rum studiis, cæteris, quos morum comitas suggessit, amici in fronte epistolarum apponere certatim gestiebant; nec grandiori elogio illum, quasi maxima laus, nec unquam cessatura, inde derivaretur, multis post annis cohonestare noverit doctissimus *Camdenus*, non invidus aut parcus Virorum magnorum laudator; non enim quippiam ex hoc nudo elogio ipsi ad æternitatem famæ desiderandum erat; licet aliis publicis muneribus gestis non innotuisset; Serenissimus verò Rex, cujus id nosse maximè intererat, per totum vitæ curriculum, non sine benevoli animi sensu & prædicatione palam id quoque testatus est.

Quali methodo in erudiendo Rege sibi utendum esse duxerint Præceptores, charta ab ipso *Junio* relicta, clarè indicabit: quæ, si non ob se, saltem ob memoriam tanti Regis, qui omnibus sui temporis Monarchis eruditionis palmam præripuerit, Lectori curioso non displicebit.

Ordo, quem Regia Majestas sibi in literarum studiis præscripsit, ac diei partitio.

1. *Mane primò à precibus auspicabitur, quò Deus Opt. Max. conatus omnes ac studia secundet, provehatque. Absolutis precibus ac placato Numine ad Græcæ se accinget, vel ex Novo Testamento, vel Isocrate, vel ex Plutarchi Apophthegmatibus una cum praxi præceptorum Grammatices.*

2. *A jentaculo Latine aliquid leget vel ex Livio, Justino, Cicero- ne, aut ex Chronicis nostratibus vel externis.*

3. *A merenda scriptioni nonnihil temporis impendet; reliquas horas pomeridianas, quum vacabit, vel Arithmetica, vel Cosmographia, (quæ Geographiam ac doctrinam spheræ Astronomica complectitur) vel Dialectica, vel Rhetorica tribuet.*

Sed hæc singula sigillatim, non simul omnia tractabuntur.

Quantum Serenissimus Rex in bonis literis aliisque Regiis dotibus sub tali disciplinâ profecerit, vidit postea Christianus Orbis, & obtupuit.

Rex jam imperii capax, virilemque habitum ac mentem indutus, rerum administrandarum cura in se suscepta, *Junium*, non tam ex amore erga Præceptorem, quàm sagacitate mentis, quæ idoneos Ministros, quorum opera in regni rebus arduis uti posset, eligere norit, in-

ter

ter consiliarios cooptavit. Id verò meruisse videtur *Junii* ingenium, non humi repens, non iniquis Philologiæ spatiis includendum, multò minùs minutiis Grammaticorum occupatum, sed quod rebus intentum, & longâ & sedulâ meditatione & usu exercitatum, Philosophiæ & Politices, quæ ad veros vitæ communis usus, & populorum salutem faciunt, mysteria penetrabat, & quæ quid virum sapientem æquè ac eruditum reddere poterat, largo suo ambitu & neutiquam coercendo complectebatur. Ita universi Regis affectum laudantes, & judicio applaudentes, hunc honorem aliis longè majoribus præludere non vani præsagebant. Mox ergo novo titulo ac munere augendus, magnus fit regni *Scotiæ* Eleemosynarius, ne dignitas absque auctis opibus, à quibus apud plebem omnem suum splendorem mutuari illa solet evilesceret.

Quantùm verò judicio & dexteritati illius in tractandis publicis negotiis detulerit Rex & Consilarii, qui sub Rege juvene *Scotiam* administrabant, legationes illæ, quibus summa cum fide & ingenti tum suorum, tum Regum Principumque, ad quos missus erat, applausu & approbatione, functus est, clarè ostendunt.

Legationes hîc ordine recensebo.

Primò sub mensem Augusti A. Ch. MDLXXXVI. Régis mandatis instructus, *Fridericum* II. Regem *Daniæ* adiit, de *Orcadico* negotio acturus, quo feliciter gesto, post paucos menses rediit. Hinc legationum, crebris occasionibus subinde nascituris, repetendarum omen meritò capiebatur. Rex *Jacobus* jam viginti ætatis annos ferè attigerat, & de hæreditario *Scotiæ* regno sibi ab antiquissima Regum serie ad se deducto, uti etiam imperio *Angliæ* & *Hiberniæ*, post R. R. *Mariam*, matrem suam, deplorando prorsus fato in *Angliâ* captivam, & *Elisabetham* innuptam, nuptiasque, dum florenti ætate tot regalibus procis ambiebatur, averfantem, ad seros nepotes in omne ævum transmittendo maximè sollicitus, non alibi, quàm in *Daniâ*, connubium istud, quo vitæ solatium & regnorum tranquillitas stabiliri possent, & tantæ spes, quas pectore regio non sine summa ratione aluit, feliciùs & auspiciùs obtineri posse credidit, ubi olim *Jacobus* III. abavus ipsius, *Margaritam*, R. *Christiani* primi filiam primogenitam, in uxorem duxisset. Vicinitas quoque regionum, unde sibi invicem auxilia, si fortè occasio tulerit, suppeditari possent, & eorundem sacrorum, si non in omnibus, communio, saltem in abroganda Pontificis *Romani* potestate, rejiciendisque superstitioni cultus fraudibus & offuciis par zelus & cura, id ex veris civilis prudentiæ rationibus potentissimè suaserunt.

Nondum tamen hanc animi propensionem palam facere consultum videbatur, nec id erat hujus legationis negotium. Restanti momenti maturiori egebat deliberatione, & omnibus rationis politicæ momentis debebat perpendi. Præterea Regis affectus in Virginem principem, licet eam lectissimam & ornatissimam consentiens fama prædicasset, non erat cæco planè impetu abripiendus. Id curæ Junii concreditum erat, ut quasi aliud agens, omnia curiosis oculis rimaretur, & in filiarum Regis, præsertim *Elisabethæ* natu maximæ, mores, ætatem, formam, ingenium, cæterasque tum animi, tum corporis dotes sedulò inquireret, an regio thalamo non tantum digna, sed par esset futura, à cujus consortio felicitatis, tum privatæ, ut maritus, ex reciproco illius affectu, tum publicæ, ut Rex, ex superveniente novæ affinitatis contrahendæ commodo incrementum istud, quod sibi pollicitus est, impetrare jure potuerit Regi, cujus pectus blanditiis amoris accendi jam inceperat, non potuit non esse acceptissimus diligens istarum rerum post reditum explorator.

1587.

Idcirco proximo anno alia legatio in *Daniam* decernitur, nec dignior, qui illius honorem & pondus sustineat, habetur, quàm *Junius* prænobili Viro, D. *Patricio Vauccio* Equiti Aurato adjungendus, ut sociatis consiliis negotium illud, quod Rex tantopere cupiebat, facilius ad felicem exitum perduceretur. Morâ verò interposita, quod in nuptiis inter Principes paciscendis fieri consuevit, in isto tractatu lentè admodum procedebatur, & cum parùm aut nihil profecerint Legati, in *Scotiam* revertuntur: non tamen penitus ab omni commercio hac de re cessatum est, literis ultro citroque alterutrinque commeantibus. Ita moras longas ex industria videntur nexuisse *Dani* sententiâ planè suspensâ, & in neutram partem inclinante, donec tandem anno MDLXXXVIII. rescribunt, *Elisabetham* alteri promissam & desponsatam fuisse, nec de eâ amplius cogitari posse: de sorore verò ipsius *Anna*, ornatissima heroina, & omnibus, quæ Principem decent, virtutibus cumulatissimâ obtinendâ meliùs sperandum esse, modò Rex annuerit. Ille miro affectu erga familiam *Danicam*, quam sanguine attingebat, ductus, sese ab hoc proposito amplectendo non alienum ostendit. Mox *Fridericus* rex mense Aprili extremum clausit diem. Inde nova remora injecta. Ineunte anno MDLXXXIX. motus seditiosorum Procerum, rebus novis Religionis prætextu studentium, primò in Aquilonaribus, & deinceps in Australibus regni provinciis, regium animum paci, quæ periclitari tum maximè videbatur, instaurandæ intentum ab istiusmodi cogitationibus

avo-

avocarunt. Quibus sedatis, Rex non amplius cunctandum ratus, rem hæcenus nimis interruptam dilatatamque properari urget, & splendidam numerosamque legationem in *Daniam* mittit, (*Junio*, qui viam tum colloquiis antea, tum literis patefecerat, apud se retento, ut aliis negotiis domi intendat prospiciatque) ut pactum istud matrimoniale propositis articulis & conditionibus æqua lance librandis, quàm maturrimè fieri possit, ex integro stabiliatur. Omnia ex voto Legatorum benè succedunt, nihilque jam ad complendas nuptias præter Regis præsentiam desideratur. Ille ergo promptus & alacer, curâ regni Commissariis delegata, cùm jam hiems ingruere inceperit, difficillimo navigandi tempore, quo non potuit affectûs sui aut verius aut grandius indicium dari, 23. Octobris MDLXXXIX. è portu *Lethensi* solvit, cum adversis ventis insanisque fluctibus forti animo conflictaturus. Licet nobili Procerum coronâ stipatus fuerit, maximè tamen conveniebat, ut *Junius* quoque illum in hoc itinere maritimo comitaretur; hisce consiliis, cùm primò agitentur admotus, arcanorum particeps, & cujus opera, dum legatione apud *Danos* iteratâ vice fungeretur, in hisce nuptiis procurandis maximi fuisset momenti. Magnorum Virorum è Gente *Scotica* erit, quibus, post *Lesleum* & *Buchananum*, rerum *Scoticarum* historiam ex tabulariis regni aliisque Actis ac monumentis authenticis pertexendi suppetunt & facultas & voluntas, quod sanè amor erga Patriam ab iis jure meritissimo exigere videtur, harum rerum omnium, quas ipse hîc carptim delibavi, seriem in omnis ævi memoriam diducere, & consultationes, mandata, disceptationes, articulosque fœderis, & quicquid memoratu dignum, dum Rex in *Dania* ausu sanè præclarissimo, sed vix imitando, aberat, occurrisset, in amplos commentarios referre. Chartas verò, laudabili huic instituto aliquali saltem modo inservientes, ne iniquo prorsus fato supprimantur aut pereant, si commodum videbitur, postea in publicam lucem dabo.

Decimo nono Februarii A. C. MDXCIII. R. *Anna* ex felici puerperio Regem mascula prole beavit, cui nomen (quod gesserat avus paternus) *Henrici*, Regina *Elisabetha* è fonte sacro susceptrice, indebatur. Inde spes lætissima, quæ materiem gaudii & triumphorum per universam *Scotiam* diffudit, successionis ex recens nato Hærede ad seros nepotes derivandæ: inde auspiciatissimum omen de futura Regina post partum validæ fœcunditate meritò arreptum: quo læto nuncio, cùm *Christianus Danie* Rex, *Sophia*, Regina vidua, *Udalricus Megalopolitanorum*, & *Henricus Julius Brunswicensium* ac *Luneburgensium*, Duces imper-

tien-

tiendi essent, post duos menses A. C. MDXCIV. id muneris honorifici *Junio*, cujus nomen in illorum Principum aulis maximè percrebuit, erat demandatum; nec gratior quispiam, quam qui Regis optimi mores composuerit, ingeniumque sapientissimâ institutione ad virtutes tam sublimi fastigio dignas finxerit, apud Principes, tum sanguine tum affinitate junctos, eligi poterat.

Anno MDXCVI. *Christiano IV. Daniae* Rege R. *Jacobum* cum serenissima Consorte, ut ipsius coronationi velint adesse, literis invitatoriis rogante, cum publica rerum administratio Regem à *Scotia* egredi non pateretur, qui id officium, quod tam arcta necessitudo postulaverat, pro more solenni apud Principes cognatos habito, ipsius nomine & vice præstarent, virum nobilissimum D. Baronem *Ogilvium & Junium* nostrum, quem adultiori ætate amavit impensius, Legatos suos constituit. Quali autem pompâ & magnificentiâ augustus ille R. *Christianum* coronandi ritus fuerit peractus, cum virorum nobilioris genii pariter ac prosapiæ, qui cæremonialia Regum studiosè venantur, & legunt, curiositati hinc aliquali saltem modo satisfieri possit, licèt fortassè hujusmodi formulæ in Annalibus *Danicis* alicubi exstare, aut saltem ex illius inclytæ Gentis Archivis facilè, me planè inscio, peti possint, operæ tamen pretium facturus videbor, si illius historiam, uti videtur, satis accuratam à quodam Legatorum domestico descriptam in futuris collectaneis dederò legendam. Cum verò nemo sagaciori mentis solertiâ aut ingenio negotiis publicis expediendis aptiori polleteret, aut fideliori opera legationum munera obiisset, si quis hoc vindice nodus occurreret dignus, sive quid magni momenti negotium cum exteris Principibus esset transigendum, en, *Junius* ad juris Regii tuendi & utilitatis publicæ promovendæ partes advocatus, neutiquam se novis laboribus subducit, sed Regi non tam mancupio & beneficiis, quam potentissimo amoris & benevolentiae vinculo obstrictissimus, Regiis mandatis, omni excusatione, quam aliter interponere potuisset, amota, lubentissimè obsecundatur. Res ista, quam jam Rex animo agitabat, virum sapientem & exquisitis civilis prudentiæ dotibus instructum, & quasi duplicatam fidem & diligentiam postulare videbatur, nec unius curæ & fidei committenda: Virum ideò admodum reverendum, ac subacti judicii, D. *Davidem Cunninghamium*, Episcopum *Aberdonensem*, Collegam & legationis *Danica & Germanica* A. Ch. MDXCVIII. susceptæ socium nactus est. De R. *Jacobi* ad *Angliæ* coronam jure, cum id esset, tum *Anglis*, tum exteris, exploratissimum, utpote à *Margarita* R. *Henrici* VII.

VII. & *Elisabetha* R. *Edwardi* IV. filia primogenita, filia primogenita recta serie prognati, nihil certi statuere voluit *Elisabetha* R. nec unquam se passa est persuaderi, licet toties à *Jacobo*, toties à subditis rogata, ut id edicto publico in Comitibus Parliamentariis declararetur, utpote ab omni successore nominando averissima; quasi hinc tum *Scotorum* tum subditorum mentes incerta expectatione suspensas detentura, ne hi aut illi quippiam novi, se adhuc superstiti, molirentur. Idcirco R. *Jacobo*, ne jus suum, si quid vetulae Reginae, infirmitatibus, quae senectutem comitari solent, subinde laboranti, humanitatis accidisset, sedulo erat cavendum, tum contra Pontificios, qui, mortua Regina, à tali successore, cujus zelus adversum corruptelas & superstitiones Romani cultus universo Orbi dudum innotuisset, maximè metuerent, tum contra Puritanæ factionis Antesignanos, aliosque, qui commodum privatum ex turbatis rebus quaesiverint. Hinc libelli inter vulgus judicii expers, & studia in contraria Oratorum technis hinc inde abripi solitum, de jure aliorum sparsi: hinc tituli praetextusque à Leguleiis artificiosè sub veri specie excogitati. Ut verò Magnatum in *Angliâ* Rex blandis literis & pollicitationibus animos sibi benevolos clam reddiderat: ita Regem *Daniae*, & foederatos *Germaniae* Principes, quorum intererat, Religionem Reformatam contra *Romani* Pontificis, hostis acerrimi, neutrquamque, nisi agnita ipsius summâ in rebus sacris, ne dicam, temporalibus, potestate, & projecta libertate placandi, machinas, tutam inconcussamque superesse, pro sapientia sua aggrediendos esse duxit, ut inde nosset, quot militares copias, quot naves, quantam pecuniarum aut annonae vim essent collaturi, si forte, opponentibus aut civibus aut exteris, jus illud suum, quod nulli, praeter æmulos vicinos Principes, ne duo regna *Angliae* & *Scotiae*, hætenus bellis & feralibus discordiis per tot secula inter se commissa, in unum coalescerent, aut seditiosos subditos, in dubium vocaverint, vi & armis petere & tueri cogeretur.

Dum verò *Cunninghamius* & *Junius* præcipuum legationis negotium ea diligentia & fide, quâ par fuit, prosequuntur, de re paulò quidem disparis argumenti, sed ex qua familiae *Stuartidum* fama & decus alterutrinque non parum dependebat, solliciti erant. In *Germaniâ* non ita pridem vir pius & doctus, pacisque Ecclesiasticæ & veritatis in rebus gestis illius ac præcedentium seculorum fideliter enarrandi, quantum ex libris editis privatisque amicorum informationibus eam assequi licuit, studiosissimus, *David Chytraeus* Historicum quoddam Chronicon edide-

rat, in quo R. *Mariae* existimationem indignissimis modis laceravit. Quibus calumniis, ne auctoramento tanti Viri, cujus libri ob candorem mentisque integritatem, quam prae se semper tulisse visus est, per *Germaniam* circumvolitantes, omnium manibus terebantur, munitae, ut certa meritae infamiae indicia legitimaeque probationes, admitterentur, occurrere sui officii esse censuerunt; honori Regis, quem pro pietate, quam natura & religio ad parentes etiam vita functos extendendam esse docent, maternam famam vindicandi zelus & cura tetigere, hac quoque ex parte consulturi *Rostochio* aberat *Chytraeus*, cum illam urbem transirent Legati, quicum de veritate ab illo laesa coram essent expostulaturi. Veruntamen cum illinc discedendi citra omnem moram instaret necessitas, non contenti, colloquio cum ipsius Collegis habito, istam injuriam depulisse, *Chytraeum* in literis ad illustres viros D.D. *Bordingum*, & *Bassevitium Custrini* datis de hoc argumento retractando monuerunt. Facile se ab omni maledicendi studio purgavit *Chytraeus*, rejecta in *Buchananum*, quem nimis oscitanter secutus est culpa, sancteque ac ingenuè profitetur, se mendacibus illis convitiis, quibus defunctae Reginae existimationem, non quidem malitiosè aut consultò, & ex industria, sed ex nimia credulitate & reverentiâ erga celeberrimi illius Historici dignitatem, deformasset, expunctis, veriora, cum ea fuerit edocendus, apponere paratissimum. Ad *Scotiam* reversus *Junius* vitae R. *Mariae* compendium, ad *Chytraeum* misit, ut illius Historiae pagellae, quae pudendis erroribus nimium quantum scatebant, juxta normam veritatis ostensae aliqua ex parte reformarentur.

Sed cum nimis parcè, ne dicam, frigide & jejunè, aut metùs, ne quorundam Magnatum censuram iramque incurreret, aut prudentiae, ut istorum scelerum, specie Religionis obductorum, memoria hoc silentio ex mentibus hominum eximeretur, aut modestiae, quasi maximo dedecori haberetur, Reginam illorum criminum vel leviusculè suspectam fuisse, causâ, in illis falsissimis & ignominiosis criminationibus depellendis egisse videatur *Junius*, remittendus est Lector, cui veritatis & justitiae amor, & innocentiam diris calumniis oppressam & oppugnatam vindicandi cura & studium cordi sunt, ad virum optimum & sapientissimum, *Guilielmum Camdenum*, qui in *Annalibus* suis hujus Heroinae contra furores & blasphemias G. *Buchanani* patrocinium suscepit, donec vera istorum temporum historia ex Actis authenticis, epistolis, & confessionibus illorum, qui Deo, omnium scelerum & praesertim perfidiae & perjurii, acerrimo vindici, animas reddituri, res, pro-

ut revera in se erant, coram idoneis testibus sponte, & nulla vi adhibita, cum nullus jam dissimulandi locus superesset, enarrarunt, latius, si Deus dederit, deducatur.

Ita multis, iisque honorificis, legationibus perquam laudabiliter & summo cum totius Gentis *Scoticae* applausu defunctus, in Aula mansit, Regi, Reginae, Magnatibusque, tum ob elegantissimos politissimosque mores, tum ob consummatam civilem prudentiam charus; donec nova, eaque diu expetita, adeundi *Angliam* opportunitas sese obtulisset.

De jure successionis in regnum *Angliae*, nemo, ne ex plebe quidem, paulò altius sapiens, ambigebat, aut ambigere poterat: idque omnes boni, qui publicae tranquillitati, Religionisque Reformatae commodo consultum vellent, obnixè & summo quidem cum studio cupiebant. Ideo cum longævam vitam, victoriis & triumphis pariter ac annis cumulatam, explevisset feminarum gloriosissima, Regina *Elisabetha*, R. *Jacobus* à Proceribus, Clero, reliquisque civibus ad illud suum jus, quod leges divinae & humanae contulerunt, capeffendum invitatur, ut sub ejusdem felicissimis auspiciis, deletis sopitisque feralibus istis, quibus finitimi populi, sive ex invidia, sive ex metu, sive ex innato amore sui, salutisque propriae contra omnes hostiles impetus curâ, in se invicem solent exardescere, litibus discordiisque, utraque gens in unam coalesceret, & *Britannia*, non amplius à se, uti à reliquo terrarum Orbe, dividenda, aeterna pace redintegraretur. Qui olim R. *Jacobum Daniam* ad complendas, cum serenissima *Anna*, R. *Friderici* filia secundogenita, nuptias proficiscentem comitatus est *Junius*, jam in *Angliam*, inter præcipuos, quos tum in pompam dignitatemque Aulae, tum ob famam sapientiae, quorum consiliis in rebus ad universam *Britanniam* spectantibus uteretur, secum duxerat serenissimus Rex, venit novus inquilinus: qui mox gratia & elegantia sermonis, morum quasi ingenita suavitate, & sapientiae, tam in privatis colloquiis, quàm in publicis negotiis tractandis ostensae, usu, plurimorum benevolentiam & amorem adeptus est. Facile enim perspectum habuere, *Junium* gratiam illam, qua apud Regem pollebat, optimis artibus & fideli longoque ministerio, non turpi adulatione inhonestisque obsequiis meruisse. Quocirca illum frequenter adibant, illiusque amicitiam captabant Viri quidam Ecclesiastici, ob eruditionis famam insignioris notae, ut ex illius, qui erat intimae admissionis Aulicus, & mollia fandi tempora noverat, commendatione Regi innotescerent; neque enim cujusquam elogium apud Regem

magis valere, quàm *Junii*, erat compertissimum. Inter hosce eminuerunt *Franciscus Godwinus Landavensis*, postea *Herefordensis* Episcopus, *Georgius Luydus Cestriensis*, & *Georgius Sodorensis*, de quibus, cum sibi invicem firmissimo amicitiae fœdere conjungerentur, optimè mereri voluit: quod ipsi & ore & literis grati agnovere. Sed quod ad cumulum laudis *Juniane* facit, illustrissimus Princeps, *Mauritius, Hassiae Landgravius*, istius suavissimæ consuetudinis, quam cum *Junio*, dum ultima legatione *Germanica* fungeretur, habuit, memor, Rege *Jacobo* jam totius *Britanniae* Monarcha facto, illum familiaribus epistolis dignatus est, utpote quem ob præclarissimas animi dotes studiumque pietatis & eruditionis, amore, gratia, & benevolentia, quibus illum complexus fuerat, perquam dignissimum fuisse, & quo nemo inter Consiliarios res ipsius apud Regem aut majori cum successu, aut sinceriori fide procurare potuit, pro sapientia sua judicavit.

Inter hæc publica gaudia continuamque triumphorum materiem, illamque effulissimam Regis in *Scotos* suos, quibus aureum istud seculum, quod fingunt Poetæ, de novo illuxisse credebatur, liberalitatem, de revivendis patriis laribus cogitavit *Junius*, in *Angliam* subinde, prout officii ratio, debita erga Regem, clementissimum suum Dominum, reverentia, aut rerum suarum cura postulaverit, reversurus. Non enim sedes suas hîc perpetuò figendas esse voluit: maximè sollicitus, ut patrimonium, à Majoribus acceptum, ipsiusque industria novis redditibus auctum, ad seros nepotes recta serie secundum jus primogenituræ derivaretur: relictis interim in *Anglia* quinque aut sex filiis, maximæ spei juvenibus, non fidei (illa enim erat exploratissima) obsidibus, sed ad absentis vices supplendas, Regiæ munificentiae alumni. Si quispiam ex Aulicis existimari possit alienus ab ambitione, luxu, & avaritia, revera ille est *Junius*, utpote qui neutiquam affectavit aut titulos, aut delicias, aut opes, solo benefaciendi merito & conscientia contentus. Sed cum ipse sibi familiarique suæ deesse videretur, Rex, quanti modestiam animique illam moderationem æstimaverit, insigni Regii favoris indicio palam fecit. Primo enim XIX. die Februarii A. MDCIV. illum in censum Equitum Auratorum more solenni adscivit, præsentibus Regina, Principe *Henrico*, *Carolo* Duce *Eboracensi*, D. *Elisabetha*, liberis suis, *Udalrico* Duce *Holsatiae*, nobilissimæque Procerum coronâ, ut inde major collatae dignitati splendor accederet. Deinde annuam trecentarum librarum sterlingicarum pensionem, tanquam munus honorarium, per reliquum vitæ tempus assignavit, ut lautius splendidiùsque viveret.

Cum

Cum verò Rex serenissimus grata mente recoluerit, quam fidelem, quam laboriosam, quam assiduam in illius ingenii culturâ operam impendisset *Junius*, relictos, dum ille natale solum repetiverit, filios pro indole illorum & instituto vitæ sub illius tutela & auspiciis educandos pro Regia bonitate & munificentia curavit, bene merentis Famuli fidem & curam pariter repensurus.

Justo & acutissimo horum beneficiorum sensu tactus *Junius*, literas ad Regiam Majestatem, obsequii & pietatis plenissimas, è *Scotia* transmisit: quas in perpetuam tum Regiæ beneficentiæ, tum *Junianæ* gratitudinis memoriam hîc apponam.

S E R E N I S S I M O R.

J A C O B O,

P E T R U S J U N I U S.

Invictissime ac Potentissime Rex, Domine Clementissime.

Si quisquam subditus aut servus Regi aut Domino suo unquam devinctus fuit, illum ego me esse multis nominibus profiteor. Tanta enim magnitudo est tuorum erga me beneficiorum, ut tuæ Majestati Regiæ post Deum omnia debeam. Quum enim animam & vitam habeam à Deo & parentibus, certè omnia vitæ tum ornamenta, tum præsidia habere me à tuâ Majestate solâ, secundum Deum, lubens meritò agnosco & accepta fero. Neque his finibus contenta Majestas tua erga me solum hac suâ munificentia uti voluit, quin & liberos quoque meos, ô raram benignitatem! Regiis sumptibus in Regiâ alendos & tuendos ad senectutem meam sublevandam dignata est admittere: & quum jam antea ex iis quatuor aut quinque in Aulico ministerio versarentur, hunc etiam sextum adjungere placuit, uniso domi mihi relicto filio, eoque natu minimo. Quid ego pro tot ac tantis meritis rependam? Accipiam calicem salutis, & te, ô supreme Jehovah, Deum Jacob, supplex invocabo, & votis ardentibus fatigabo, ut JACOBUM Regem, unctum & vicarium suum, delicias humani generis, Dominum, ac patrem meum munificentissimum, cum conjugæ lectissimâ Heroinâ, ac sobole Regiâ ab omni periculo protegas, atque Ecclesiæ

*tua, regnis suis, ac subditis, mihi præsertim, & meis, perpetuò incolu-
mem & florentem præstes. Amen, Amen, Amen. Ex Regiâ Sancrucia-
cianâ XI. Februarii 1611. ætatis 67. servitutis meæ liberrimæ 42. inchoato.*

Tuæ Majestatis Regiæ humillimus & obse-
quentissimus subditus & servus

P E T R U S J U N I U S.

Non tamen ex hac beneficentia erga liberos officio, quod suorum
studiorum ab ipsius pueritia moderatori debuit, se prorsus defunctum
credidit Princeps piissimus, cum *Trajano*, *Antoninis*, imò cum præ-
clarissimis & optimæ famæ Decessoribus suis meritò comparandus, si
politioris literaturæ & Theologiæ, quam penitus imbiberat, studio re-
liquas artes verè imperatorias addidisset. Præceptoris sui curæ, fidei ac
disciplinæ memoria adeo altas in Regia mente radices egit, ut neuti-
quam inde ex longinquitate temporis aut qualicunque casu intervenien-
te avelli posset: quod Rex optimus, ætate maximè maturâ & ad senium
vergente, præclarissimo confirmavit testimonio. Cùm enim ipsius varia
opera in unum volumen, studio & cura *Jacobi*, Episcopi *Wintoniensis*,
collecta, Latine in publicam lucem ederentur, A. C. MDCXIX. exem-
plar *Junio* suo jam plusquam septuagenario dono dat Regius Auctor,
cum hac inscriptione, propria manu signatâ, quæ omnium aliorum e-
logiorum vicem abundè supplebit.

J A C O B U S, *Dei gratia* Magnæ Britanniæ, Franciæ, & Hiberniæ
Rex, *Fidei Defensor*, Cl. V. Petro Junio à Setoun, Equiti Aurato,
Consiliario, & Eleemosynario suo pro regno Scotiæ, hoc operum suorum
Systema L. M. Q. offert, charissimo Præceptoris grati Discipulus, memor
formata ab illo adolescentiæ suæ ad virtutis & literarum studia, quæ quan-
toperè ex eo amaverit, librum hunc, sui profectûs indicem & testem,
mittit, bonorum, ut sperat, debitorum more, qui serenâ fronte gratoque
animo sortem fœnore multiplicatam creditoribus restitunt.

Greenvici XI. Cal. Jun.
MDCXX.

Munus sanè in se magnificum , & *Junio* pariter , ut opinari fas est , gratum , ac si gemmas è Regio cimeliarchio accepisset.

Inter *Scotos* sibi habui *Junius* maximè charos & familiares , *Georgium Buchananum* , Collegam suum , quem loco Parentis reveritus est , & cujus vitam compendio descripsit , *Joannem Skenæum* , doctissimum Jurisconsultum , & D. *Adamum Newtonum* , elegantissimi ingenii virum , qui erat serenissimo Principi , *Henrico* , R. *Jacobi* I. filio primogenito , à literarum studiis , & cui politissimam *Historiæ Concilii Tridentini* , à sapientissimo viro , P. *Paulo Sarpio Veneto* adornatæ , Latinam versionem debemus. Cum Exteris etiam celeberrimæ famæ magnas coluit amicitias , quales erant *Theodorus Beza* , *Isaacus Casaubonus* , & maximus ille Astronomiæ instaurator , *Tycho Braheus* , quem plusquam semel , primo solus , deinde in comitatu serenissimi R. *Jacobi* apud *Vraniburgum* , plurimis cœlestibus observationibus , ope magnorum instrumentorum , summa ut ista ferebant tempora , arte elaboratorum , ab ipso confectis , in omne ævum celebrandum , in insula *Huena* , penè in aditu maris *Baltici* invisebat : ut à cæteris , quorum epistolas jam edo nominandis prorsus abstineam.

In sua devexâ ætate (hoc est , post annum Christi MDCXX.) sed robusta vegetaque & ab istiusmodi malis , quæ senectutem comitari solent , libera , omnibus quoque sensibus integris manentibus , jam domi conquiescere voluit D. *Junius* , nec de *Anglia* laboriosis itineribus repetenda amplius cogitavit : vir , si quis unquam mortalium , numerosâ prole , & potitissimùm filiis , quos ad amplas dignitates , aut in Aulâ aut in Ecclesiâ , evectos lætus vidit , moderatis opibus latifundiisque , quæ tamen ad decus & splendorem familiæ in posteros derivandum abundè sufficerent , omnium bonorum , etiam primariæ nobilitatis , Concivium , imo & exterorum Principum , puta *Frederici* Regis *Daniæ* , qui illum gemma magni valoris , & poculo ex argento deaurato , insignibus Regiæ familiæ illic incisus , quod adhuc apud V. Cl. *Robertum Young de Albarra* , in *Angusia* , Pronepotem servatur , honoris & benevolentiae causâ impertitus est , *Mauritii* , quem supra memoravi , *Hassiaci* , aliorumque , maximè verò Regis sui , optimi & munificentissimi Patroni , amore admodum felix. Hoc unicum residuo vitæ tempore illius animum gravissimè afflixit dolore penè inconsolabili , quod clementissimo Principi , Discipulo quondam suo , vixerit superstes. Tandem vir optimus senio planè confectus , pabuloque , quo vita fovetur , penitus absumpto , subsidiis ,
quæ

quæ religio Christiana, pietas, fidesque in Deum maximè misericordem & in *Christum* Salvatorem, ad benè beatèque moriendum, conducunt, munitus, ex hoc tempestuoso mari ad portum æternitatis placidè migravit, septimo die Januarii A. *Christi* MDCXXVIII. postquam vitæ suæ annos octoginta tres, ferè cum dimidio, explevisset. Sepultus jacet in Ecclesiâ S. *Vigentii*, ab *Aberbrothiâ* in comitatu *Angusie* mille passus distitâ: ad cujus memoriam in omne ævum transmittendam, Hæres monumentum pietatis causâ erigi curavit cum hac epigraphe:

PETRUS YOUNG à Seton, *Eques Auratus*, serenissimo ac potentissimo Jacobo VI. Britannicæ, Francicæ, & Hibernicæ Regi à Studiis, Consiliis, & Eleemosynis, propter eruditionem, prudentiam, & morum elegantiam eximiam domi Regi suo & civibus charus, foris Regibus & Principibus, apud quos variis legationibus functus est, celebris.

Hic beatorum resurrectionem expectat.

Obiit Januarii VII. A. MDCXXVIII. ætatis sue LXXXIV.

COMPENDIARIA NARRATIO

De Vita & Morte Serenissimæ Principis,

M A R I Æ

SCOTORUM REGINÆ:

Per D. PETRUM JUNIUM.

MARIA Scotiæ Regina, Jacobi V. Scotorum Regis filia unica, ac regni hæres, ex Mariâ Lotharingâ, Ducis Guisæ filiâ, (quam, defunctâ absque liberis priore conjuge Magdalena, Francisci primi Gallorum Regis primogenitâ, secundis nuptiis sibi copulaverat) anno 1542. mensis Decembris septimo in lucem edita; octo diebus ante Regis parentis, Falcolandiæ rebus humanis exempti, obitum: undè ingentes tumultus in Scotiâ exorti de Reginæ pupillæ custodiâ ac Regni administratione inter Proceres potentissimos, Matthæum Stuartum, Levinia seu Lennoxia, & Jacobum Hamiltonum Arania, Comites. Sub id tempus cùm ab Henrico VIII. Angliæ Rege, Edwardo sexto filio, Mariæ Reginæ, non ad eam ætate disparis, affinitas studiosissimè ambiretur; deinde aliquot annis post, Henrico fato functo, Somerssetensis Dux, Angliæ Prorex, à Proceribus Scoticis eandem rursus affinitatem, Gallicâ factione intercedente, frustra urfisset, ex repulsâ gravissimum bellum, & Scotiæ regno calamitosum, exarsit. Maria interim in Galliam abducta sub quintum ætatis annum, ubi ad annos pubertatis educatata Francisco secundo, Henrici primogenito, tum Delphino, mox, mortuo Parente Gallie Regi, desponsata fuit: quo fati concedente, Regina vidua in Scotiam suam, multis Principibus Gallis comitantibus, honorificentissimè reducta, quadriennium prudentissimè ac felicissimè summâ suâ cum laude & civium benevolentia regnum avitum administravit: cui ut melius consuleret, Regiamque sobolem ex se relinqueret, ad nuptias secundas animum adjecit, ac Henricum Stuartum, amitinum suum, Matthæi supra dicti Lennoxia Comititis ac Domini de Darley, filium natu maximum, staturâ ac specie

1566.

eximiâ , ac formæ dignitate præcellentem , Regiâ *Anglorum* stirpe oriundum , (nempe *Margaritâ Douglassiâ* , quam unicam ac hæredem , secundis cum *Archibaldo Douglassio* , *Angusie* Comite , nuptiis peperit *Margarita* , *Scotorum* Regina , *Jacobi* quarti conjunx , *Jacobi* quinti mater , *Henrici* septimi filia primogenita) sibi sponsum delegit , quibus ex nuptiis anno Domini 1566. Junii 19. auspiciatissimè ac bono publico natus est *Jacobus* sextus , qui jam sceptris *Scotorum* felicissimè potitur ; ejusdem *Henrici* septimi *Anglorum* Regis indubitati abnepos ; cujus regnum ut pium , felix , faustum , ac diuturnum sit , faxit Deus Opt. Max. qui pro suo divino arbitrio regna ac diademata dat adimitque. *Henricus* Rex in ætatis flore (vix enim ætatis annum vicesimum excefferat) ab *Jacobo Hepburno* , Comite *Bothuelio* , atque aliis conjuratis nefariè contrucidatus est , spondente inde sibi *Bothuelio* , immani ausu , & Reginae matrimonium , quod raptu tentavit , & sublato infante Principe , Regium diadema : brevi post conscientie furiis exagitatus Parricida , quò tam atrocium flagitiorum pœnas , quæ ipsi parabantur , evaderet , in *Daniam* profugit ; sed ne sic quidem ultrices Numinis manus effugere potuit ; ibi enim duro ac diuturno carceri mancipatus , teterrimam animam exhalavit. Insecuta est in Reginam ipsam nonnullorum Procerum conspiratio , quâ circumventa , in arcem , in Lacu *Levino* sitam , relegata fuit : unde elapsa ac tumultuariis copiis collectis , cum in perduelles animadvertere , ac prælii aleam experiri statuisset , illorum armis profligata , accedens in *Angliam* , tanquam in tutissimum salutis portum , uti sperabat , se recepit. Ibi post octodecim annorum captivitatem , cum toto hoc tempore de illâ quâvis fraude è medio tollendâ , clandestina competitorum fautores inirent consilia , neque quicquam proficerent ; quotidianis tandem calumniis apud Reginam *Elisabetham* palam premebant , tanquam ipsius vitæ insidiantem , atque , ipsâ sublata , regnum *Angliæ* affectantem : itaque corruptis antè pecuniâ domesticis ministris aliquot , ac præsertim Secretario quodam *Gallo* , ad conjunctionem illustrandam productis , insontem Principem , fictis criminibus oneratam , ream peragunt ; neque prius destiterunt , quàm damnatam paucos post menses , surrepto ad id Reginae chirographo , *Mariam* Reginam , innocentiam suam constanter asserentem , neque muliebriter mortem expavescentem , sed invicto animi robore Regum atavorum genus testantem , obtruncandam curarent ; Reginâ insciâ , atque adeò eorum sævitiam detestante. Quod ipsa & literis crebris suâ manu exaratis *Scotorum* Regi sanctè affirmavit , nec non Legatis missis di-

diligenter se purgavit. Reginæ *Maria* hæc vitæ catastrophæ fuit, quæ sanguinis cognatione aut affinitate omnes Christiani orbis Reges, omnes penè liberos Principes attingebat. *Henrici* verò septimi *Angliæ* Regis proneptis, ac proinde Reginæ *Elisabethæ* agnata proxima, ac, ipsâ decedente, Regni hæres indubitata: *Galliæ* Regina dotaria, *Scotiæ* Regina hæreditaria, utpote *Jacobi* quinti filia unica & hæres, *Jacobi* quartæ neptis, *Jacobi* tertii proneptis, *Jacobi* secundi abneptis, *Jacobi* primi adneptis, *Roberti* tertii, filii *Roberti* secundi, omnium *Scotiæ* Regum, trineptis.

Princeps meliore fortunâ digna, omnibus naturæ dotibus, omnibus regiis virtutibus, clementiâ præsertim, ornatissima, formæ venustate incomparabili, liberalitate, contenta, præcipuè animis ac prudentiâ supra sexum, vel testante olim Poëtâ politissimo hoc carmine, ac verissimo de ipsâ ad seipsam elogio.

*Nympha, Caledonia quæ nunc feliciter ora
Missa per innumeros sceptræ tueris avos:
Quæ sortem antevenis meritis, virtutibus annos,
Sexum animis, morum nobilitate genus.*

Vide reliqua apud *Buchananum* in Epigrammate, Paraphrasi in librum Psalmorum præfixo.

EX E P H E M E R I D E

Cl. V. D.

P E T R I J U N I I ,

De sui ipsius profapia, legationibus, & prole, excerpta: additis quibusdam breviculis observationibus, Italico charactere notatis, quas ex schedis manuscriptis aut aliunde collegi.

xv. **A**ugusti. Hic dies 1544. natalis fuit *Petri Junii de Setoun*, Equestris ordinis, pientissimo ac potentissimo *Jacobo sexto Magnæ Britannia*, & Regi à prima infantia, pueritia, & adolescentia

à studiis ; postea à consiliis, & variis legationibus ad externos Reges ac Principes, nec non ab Eleemosynis. Natus est *Taoduni* in *Angusia*: servivit Regi suo ac Domino clementissimo quinquaginta quatuor annos, & menses undecim, ac dies undecim, summa cum cura, fide & integritate, teste conscientia, ac testibus omnibus probis, qui eum in Aula noverint.

Dei omnipotentis Numine gubernante, famulorum omnium Regionum qui adhuc sunt superstites, facile primus, utpote qui Regi suo infervivit ab ipsis penè incunabulis, admotus per Proregem ipsius infantiae statim à trimatu. Hæc est & fuit ambitio *Juniana*. Alii aliud pro se quisque jactent. Hæc scribebat *Petrus Junius* anno Domini 1624. Decembris undecimo in *Juniano* suo, anno ætatis 81. currente, integris, sit gratia Dei, omnibus sensibus; victurus, quamdiu Deo optimo maximo visum fuerit: hoc tantillum ævi, quod superest, utinam piè ac sanctè transigat, ac sarcinas colligere incipiat, vel potius abjicere, brevi expeditior migraturus, deposita hujus corporis sarcina. En diem beatæ resurrectionis expectat, persuasum habens, mortis diem natalem esse æternæ vitæ.

Februarii 19. Hoc die serenissimus Rex ac Dominus clementissimus me dignitate equestri ornavit, unà cum nobili *Anglo*, D. *Henrico Dimock*, ipso natali die Principis nostri *Henrici*, & ipso præsentē, ac Duce *Eboracensē* *Carolo*, ac Domina *Elisabetha*, filia Regis primogenita: aderat & Dux *Holsatiæ* *Udalricus*, serenissimæ Reginæ nostræ frater germanus, qui gladium Regi præbuit, atque Consilarii Regis ex intimis complures, in penitiori Regis cubiculo, anno 1605. in palatio *Whitehall*.

Joannes Junius, pater mihi longè charissimus, in pia Filii Dei invocatione ac confessione.... lentâ febris extinctus placidè obdormivit pridie Cal. Septembr. anno ultimi temporis 1583. ætatis verò suæ 86. Elatus est postridie, ac sepultus *Taoduni* prope conjugem suavissimam, quæ annis 5. mens. 2. d. 19. eum præcesserat, nempe A.D. 1578. 5. Id. Maii, cum qua conjunctissimè vixerat annos plus minus 46. ac ex ea suscepit liberos... quorum superstites reliquerat mares, *Joannem*, præfectum Ecclesiæ *Desertanæ*, *Petrum*, Regiæ Majestati à Studiis & Eleemosynis, ac *Alexandrum*..... cubiculi Regis Ostiarium: feminas, *Isabellam* ac *Joannam*: alii in pueritia mortui sunt: præter *Henricum*, qui in *Scania* in bello..... *Sueco* militaret.

Margarita Scrimger ex antiqua & nobili *Scrimgerorum* familia,
ma-

mater mea charissima, undecimo die Maii A. 1578. vitam hanc mortalem cum æterna commutavit, ætatis suæ 68. *Taoduni*.

Alexander Junius, frater meus natus minimus, serenissimo Regi nostro *Jacobo VI.* interioris cubiculi Ostiarius: in quo munere triginta annos & amplius fideliter se gesserat, 29. Decembris obiit *Taoduni* in ædibus propriis 1603. & ultimo hujus mensis in Templo novo sepultus, meipso curante funus. Vixit annos

Januarii quarto. Admissus in clientelam Regis A. 1569. desinente, Comite de *Murray* tunc temporis Gubernatore, anno ætatis meæ vicesimo quinto: huic muneri admotus detentusque dum apud me in *Gallians* reverti animo apud me constitui, & ad idem præstandum authentico scripto auctoratus.

Vicesimo die Julii. Hoc die 1586. Legatus primùm à serenissimo Domino meo clementissimo ad invictissimum *Dania* Regem, *Fridericum* secundum, missus, navem *Taoduni* conscendi, atque secundo vento è portu solvens, *Helsingoram*, Deo propitio, 26. ejusdem mensis sub meridiem appuli: usus secundissima tempestate. Hæc fuit sex Legationum prima.

Tricesimo primo Maii. Hodie anno 1587. iterum Legatus missus in *Daniam* ad *Fridericum* secundum. Navim *Lethæ* conscendi, unà cum generoso & optimo Collega *Patricio Vausio* à *Barubarraise* Equite.

Aprilis 27. 1594. Hoc die è *Lethensi* portu solvi, Legatus in *Daniam* ad *Christianum IV.* Regem, & ad Reginam *Sophiam*, nec non ad illustrissimos Principes Imperii Romani, *Udalricum Megalipolitanorum*, & *Henricum Julium Brunswicensium* ac *Luneburgensium* Duces. A. 1594.

Vicesimo quinto die Novembris 1598. ex *Danica* & *Germanica* Legatione cum Collega Episcopo *Aberdonensi* prope *Inchekeith* in anchoris stetimus: & postridiè *Letham* appulimus: cum mense Julio præcedente è *Scotia* solvissemus.

Uxorem virginem duxi *Elisabetham Gibb*, 4. Februarii 1577.

Junii primo nata est mihi *Maria* filia primogenita ex *Elisabetha Gibb* conjugè paulò post nonam vespertinam A. 1579. in arce Regia *Sterlini*. Nomen serenissimus Rex ipse præsens charissimæ matris suæ Reginae imponi voluit, suscipiente ipsius Majestatis mandato ac nomine infantem, ac sacro lavacro admovente, illustri D. *Joanne Murria* Comite, ac *Alexandro Hayo*, Archivis Regiis præfecto: matronis nobilibus quamplurimis præsentibus ac solennitatem cohonestantibus. 21. Febr. Nup-

tiae *Mariae* primogenitæ, serenissimi Regis sumptibus in Regia *Sancru-
cianâ* celebratæ, Reginâ famulam suam ad thalamum ducente.

Decimo Junii A. 1580. Uxor *Elisabetha* mihi peperit gemellos *Ster-
lini* in arce Regia: primogenitum *Jacobum* circa horam tertiam pome-
ridianam, minorem verò natu *Henricum* hora ferè post: quorum sus-
ceptores fuerunt, dum sacro baptismo initiarentur, Regis nomine, Abbas
de *Dryburgh*, & *Cabuskynneth* die 16. ejusdem mensis *Sterlini* in eadem
arce Regia.

Jacobus & *Henricus*, gemelli; Ille autem natu maximus, cui,
quando è sacri baptismatis lavacro susciperetur, nomen suum indi jusserat
R. *Jacobus*, ab eodem etate virili Equestri dignitate insignitus, in cen-
sum Nobilium Regia privata, ut appellatur, Camera erat adsci-
tus, & postea latifundiis in Comitatu Longfordiæ in Hiberniâ, upo-
te in Regiam potestatem, profligatis rebellibus, unâ cum reliquis in Pro-
vincia Ultoniensi, pridem redacta, mille acras terre continentibus do-
natus.

Margarita filia mihi nata est 14. Novembris 1581. circa undecimam
noctis *Setoni* in *Juniano* meo, & baptizata 5. Decembris, susceptore
Jacobo Melvino, Verbi Dei Ministro.

Uxor mihi iterum gemellos enixa est primo die Julii 1583. paulò an-
te meridiem 1583. quorum susceptores fuerunt, *Roberti* Comitis *Maru-
tie* nomine, *Gulielmus Ouchterlowry*, D. à *Kelly*, & vicinus meus
Gulielmus item eodem cognomento: atque hi quidem *Roberti* minori
natu nomen imposuerunt; *Petri* verò primogeniti susceptores fuerunt
David Gardin, Dominus de *Loys* & *Patricius Zubyteleius de New-
Grange* die 16. hujus mensis.

Petrus & *Robertus* etiam gemelli.

Petrus, præcipuus inter Admissionales in Aula serenissimi Regis, *Ca-
roli I.* ab eodem A. 1628. unâ cum nobilissimo Viro, D. Barone *Spense-
ro*, ad R. *Gustavum Adolphum*, Regem Sueciæ, cum insignibus nobi-
lissimi ordinis *Periscelidis*, in quem erat solenni pompa admittendus, co-
mitante quoque *Heraldo*, mittebatur. Hic verò Rex fortissimus, *Petri*
aulicis moribus & prudentia delectatus, Equitem Auratum constituit,
& ut favoris sui perenne superesse posset monumentum, quoddam augmen-
tum gentilitiis insignibus inferendum jussit. Diem suum obiit. 6. Febr.
1631. *Robertus*, vir ingenii dotibus ornatissimus, post Galliam Italiam-
que perlustratas, itinere in Orientem suscepto, Hierosolyma aliaque loca
sacra invisebat. A. C. 1608. Obiit Westmonasterii 17. Martii 1620.

cujus prematuram acerbamque mortem agerrimè ferentes Amici illius laudes Latinis elegiis celebrarunt.

Augusti 29. 1584. Circa noctis medium uxor mihi peperit Patri-
cium, circa initium novi mensis Lunaris: qui quidem sacro baptismo
initatus est postridie in fano *Vigiano*: suscipientibus *Georgio Balfour de*
Tarry, vicino meo *Gul. Ouchterlowry*, præsente Domina de *Bonnyton*,
& mariti sui nomen infanti imponi rogante.

Hic Vir eruditissimus erat serenissimis R. R. Jacobo I. & Carolo I. à
Bibliothecis: cujus vitam amplo satis commentario illustravi.

Foannes filius meus natus sextus 25. die Junii 1585. *Setoni* nascitur cir-
ca horam septimam vespertinam, ac 7. die Julii sacro baptismo initia-
tur: susceptoribus *Foanne Carnegy à Kinnaird*, *Balfour*, Deca-
no *Glasguensi*, ac *Foanne Ramsay ab Arbeky*.

Hic tum à R. Jacobo, tum à Parente suo sacris Ecclesiasticis desti-
natus, Cantabrigiam juvenili etate mittebatur, ubi in Collegio Eïduliano
Suffexiano sedulam utilemque operam Theologia studiis impendit: in qua
Facultate & Baccalaureatum & Doctoratum postea annis maturis ingenti
cum laude adeptus est. Galliam & Germaniam fausto itinere peragravit,
nobilissimi juvenis, filii Baronis *Whartoni*, Comes & Ephorus. Tan-
dem ad Ecclesiæ Cathedralis *Wintoniensis* Decanatum à serenissimo Re-
ge Jacobo evectus erat & quidem ob pietatem, eruditionem, & sapien-
tiam planè dignus idoneusque habitus, qui ad generalem Cleri Scotici
apud *Bertham* conventum A. 161 de quinque istis articulis, ad cultum
sacrum, disciplinam, ac regimen Episcopale istius Ecclesiæ spectantibus,
condendis stabiliendisque, Regio nomine delegaretur. Quàm sapienter isto
præclaro munere functus sit, istius celeberrimi conventus historia, quam
V. C. Lindlæus in publicam edidit lucem, clarè docet. A. 1621. cum
Archiepiscopus *Spalatenfis*, literis ad R. Jacobum veniam ex Anglia dis-
cedendi petiisset, missus erat cum reverendissimis Episcopis *Londinensi* &
Wintoniensi, à Regia Majestate ad disceptandum cum illo de istarum
literarum, quæ ipsi mira videbantur, variis argumentis: cujus colloquii
plena relatio ab iisdem edita erat *Londini* A. 1624. Ut verò de patria
Musisque aliquatenus mereretur, Scholam instituendis pueris, bonarum li-
terarum rudimentis destinatam in *Academia Andreopolitana* propriis
impensis A. C. 1641. curavit extruendam: ut inscriptio supra portam of-
tendit.

Die 31. Januarii 1587. circa horam ... pomeridianam uxor mihi
tertiò gemellos peperit: marem alterum cui 11. Februarii sequentis sa-
cro

cro baptismo initiato *Friderici* nomen in gratiam optimi & serenissimi Regis *Daniae*, *Friderici*, ejus nominis secundi, inditum est: alteram feminam, *Joannam*. Susceptores fuerunt D. *Alexander Betoun*, Archidiaconus *Laundoniensis* & suo & absentis Domini de *Ogilvy* nomine, *Henricus Guthrie à Collistoun*, *Jacobus Persoun à Carny*. Interfuerunt & horum conjuges, aliique nonnulli nobiles vicini. Sed memoranda inprimis illustris Domina, *Joanna Forbes*, Domina de *Ogilvy*: quæ pro *Sophia Joannam* ex suo nomine filiam meam vocari voluit & obtinuit.

Fridericus obiit 16. Augusti 1609. sub quintam vespertinam *Setoni* ex pthisi: vixit annos 21. menses 6. & 10. dies.

Michael, filius meus octavus, ac natus minimus, nascitur circa horam noctis duodecimam 6. Novembris 1589. dum ego unà cum Rege serenissimo in *Norvegiam* profectus essem.

Elisabetha conjux 16. Febr. 1590. filiam enixa est circa horam pomeridianam *Annam* nomine, ita jubente Regina *Anna*: atque ita duodena prole me auxit Dominus, undecim reliquis superstitis.

Decimo die Maii. *Elisabetha Gibb*, primæ & suavissimæ conjugis ex hac misera ac fugaci vitâ in cælum migratio sub horam tertiam matutinam *Lethæ* 1593.

Sexto die Maii 1596. Nobilem matronam, D. *Joannam Murray de Torpichen* viduam, secundis nuptiis duxi *Edenburghi* in æde *Cuthberto* sacra.

Conjux mea tertia *Marjoria* 20. die Aprilis 1601. filiam mihi peperit, *Euphemiam* nomine, primogenitam circa horam sextam matutinam die *Lunæ*.

Marjoria conjux tertia, filiam mihi peperit *Elisabetham* 11. die Febr. circa horam undecimam antemeridianam 1603. Susceptoribus D. *Stewart de Tragnaire*, & D. *Thoma Erskin de Dirlton* & Domina de *Elphinston*, cum filiabus, & *Elisabetha Schaw* ex Regina virginibus nobilibus.

Marjoria conjux tertiam filiam peperit 5. Julii 1604. *Nicolaam* nomine circa horam secundam pomeridianam, commatre Domina de *Bonnyton*; compatres *Sandford*, *Kenneth*, & alii nobiles vicini.

Marjoria conjux mea peperit 18. Decembr. 1608. *Arbellam* sic nominatam ex D. *Arbellæ Stuaræ*, præstantissimæ heroinæ, nomine circa horam secundam matutinam die *Dominica*.

HISTORICA QUÆDAM

DE

R. JACOBO I. & R. ANNA,

Illorumque liberis ex eadem Ephemeride collecta.

Novembris decimo nono die 1566. *Jacobus* Rex *Scotia* natus est paulò ante horam decimam antemeridianam, patre *Henrico Stuardo*, filio *Matthæi Stuardi*, Comitis de *Lenox*, matre *Maria*, filia unica *Jacobi V. Regis Scotorum*, & regni hærede, quæ prius nupta fuit *Francisco secundo*, *Galliarum Regi*.

Augusti vicesimo nono. Jacobus D. G. Scotorum Rex coronatur 1567. natus annum unum & decem dies supra mensem.

Septembris 29. Le Roy partit de la ville de *Sterling*, où il avoit été nourri, & sejourna l'espace d'... ans pour s'acheminer à *Edinburg*. 1579.

Octobris vicesimo tertio 1589. Serenissimus Rex, *Jacobus sextus*, navem clanculum conscendit *Lethæ* hora undecima noctis, in *Norvegiam* navigaturus; postridie, qui fuit dies *Veneris*, ventis adversis repulsus, propè *S. Minuens* in anchoris stetit. Inde solvens sub noctem 28. *Flecroen*, *Norvegia* sinum, subiit, à *Barbario* & me introductus, ubi secundum ventum præstolans dies plusculos, die *Veneris*, qui fuit *Novembris septimus*, postquam in navi nostra pransus esset, vela facere jussit. Sequenti die sub meridiem *Langfundum* appulimus: ubi relictis navibus, *Tunsbergum* & *Afloam*, partim equis, partim trahis, partim scaphis vecti, pervenimus *Hafniam* die... *Novembris*.

Ibi Regis & Reginae congressus ac felices nuptiæ.

Maii primo 1590. *Jacobus VI. Rex Scotorum* cum *Anna Regina* conjugæ ex *Dania* rediens, *Letham* feliciter appulit.

Augusti quinto. Hoc die optimi Principis, *Jacobi VI. P. P.* σωτήρια celebrantur, ex parricidarum *Ruthrenorum* fratrum omni ævo teterri-morum manibus, non sine insigni numinis, ὡς ἐν μηχανῇς, providentia, confossis sicariis, erepti ac servati, summo piorum omnium ac Reip. Christianæ bono atque emolumento anno 1600. *Perthæ*.

Julii vicesimo quinto 1603. *Jacobus VI. Scotia* Rex serenissimus, Do-

minus meus clementissimus, hoc die coronatur *Anglia, Francia, & Hibernia* Rex, *Westmonasterii* per Archiepiscopum *Cantuariensem*.

Decembris undecimo. D. *Anna*, Regina nostra, serenissimi ac clementissimi *Friderici* secundi filia secundo genita, hoc die nata est A. 1574. *Henricus* IV. *Gallia* R. eodem die natus A. 1553.

Maii decimo septimo. *Anna* Regina coronatur in æde S. *Crucis* prope *Edinburgum* solenni pompa 1590.

Ejusdem mensis vicesimo. *Anna* Regina *Edinburgum* ingreditur magno cum applausu & celebri pompa.

Liberi Regis Jacobi & R. Annæ.

Februarii decimo nono 1593. Hora tertia matutina Princeps noster, spes *Magna Britannia*, *Henricus* nascitur, primogenitus serenissimi R. *Jacobi* sexti.

Novembris decimo nono. *Carolus* Dux *Eboraci* &c. serenissimi R. nostri *Jacobi* filius natus secundus, nascitur hora decima vespertina, A. 1600.

Januarii decimo septimo. *Robertus* Dux *Kintira* &c. serenissimi Regis nostri *Jacobi* filius natus tertius, nascitur hora undecima vespertina 1602. Obiit post brevem lucis usuram vicesimo septimo *Maii* ejusdem anni.

Augusti decimo nono 1596. *Elisabetha*, serenissimi Regis nostri *Jacobi* hodie nata est hora secunda matutina.

Decembris vigesimo quarto. *Margarita*, filia serenissimi Regis natus secunda in lucem edita est 1598. inter quartam & quintam matutinam. Obiit *Augusti* decimo octavo A. 1600.

Aprilis nono 1605. Hoc die serenissima Regina, D. *Anna*, filiam peperit *Mariam*, tertiam natu sub horam quartam matutinam *Grenovici*.

Junii vicesimo secundo. Serenissima Regina, *Anna*, quartam *Grenovici* peperit filiam circa horam quartam matutinam, eodem die sacro lavacro ablutam, *Sophiam* nomine, quæ ἡμερόβιος ἀπέθανε.

Septembris vicesimo septimo 1582. *Georgius Buchananus* hoc die extremum suum clausit *Edinburgi*: ætatis suæ anno.

Octobris duodecimo 1605. Venerandus senex, D. *Theodorus Beza*, *Genevensis* Ecclesiæ Pastor, Præceptor meus observandissimus, nullo morbo, nec dolore, sed senio tantum confectus: quippe annum ætatis agens 86. hoc die in cubiculo togatus obambulans, disertè de Deo differens, integris omnibus sensibus, uno momento, in spondam lecti sedens, piè ac placidè in Domino obdormivit *Genevæ*. Vixit annos 86. menses 3. dies 19.

TESTIMONIA & ELOGIA

Præstantissimorum Virorum

de D. P E T R O J U N I O.



CAMDENUS in descriptione *Scotie in Lothiana*, de *Mus-selborow* loquens. pag. 688.

Hoc in loco nec tacitus præterire debeo, hanc Inscriptionem, quam I. Napier, vir eruditus, in suis ad Apocalypsim commentariolis hic effossam prodidit, & clarissimus Petrus Junius Eques Auratus, Regi Jacobo VI. à Studiis, sic verius descripsit.

JACOBUS Episcopus *Wintoniensis* in præfatione R. *Jacobi* primi operibus præfixa: *Londini* 1619. fol.

--- *Rex noster serenissimus, quem Deus Opt. Max. eximiis adeo naturæ dotibus, incredibilique mentis acie beavit, (ita ut literatissimus, mihiq; longè amicissimus, D. Petrus Junius à Seaton, Eques, serenissimæ Majestati suæ olim à Studiis & legationibus, nunc verò à Consiliis & Eleemosynis in regno Scotiæ, non immeritò θεοδιδάκτωρ vocare soleat) ---.*

Memorata perquam dignum videbitur, *Scotica Etyma D. Petri Junii*, ordine Alphabetico, à Græca lingua deducta, inter manuscriptos codices *Francisci Junii*, viri celeberrimi, in hypero *Bodleiano* n. 74. hodiè superesse.

Nullus dubito, quin D. *Junius* importunis D. *Thomæ Randolphi*, qui crebris in *Scotia* legationibus functus fuerat, aliorumque precibus & postulationibus obsecutus, *Georgii Buchanani*, summi sui Amici, vitam descripserit. Sed ubi lateat, frustra adhuc quæsi. Alii in hoc cimelio reperiendo erunt fortassè, quod opto speroque, longè fortunatiores.

DISSERTATIO THOMÆ RHÆDI:

Quod Regibus & licitum & decorum sit scribere.



Amnabitur fortasse arrogantiae studium meum, quod, dicendi insolens, novae causae & prioribus seculis inauditae patrocinium susceperim; quum reus sit non de plebe aliquis, qui salvâ cæterorum dignitate posset cadere, sed qui populi Majestatem unus sustinet, & nisi per Reipub. latus, vulnerari non potest, JACOBUS *Magnæ Britanniae, Franciae, & Hiberniae* Rex, cujus vita ut præsentē Numine non semel ab insidiis asserta est, ita speramus famam, quam vita semper chariorem habuit, cœlesti vindici curæ fore, ut depulsa olim livoris nube luceat posteris sine labe, tanquam in speculo repræsentatura, quid fugere debeant, quid sequi. Hujusmodi reus oratorem poscit *Demosthenem*, qui innocentiam ipso periculo nobilitet, non hominem simplicem & inexpertum fori, qui bonam causam malè agendo infamet, quod tum magis dices, cum objecti criminis novitatem cognoveris. Nec enim Rex optimus homicidio aut sacrilegio sanctum violavit propositum, nec iis præceptis actus est, quæ ira & avaritia Principibus persuasere; sed insolitum admisit facinus quod nec ipse negare, nec præsens ætas nescire possit, nec futura oblivisci, nempe Librum scripsit, hoc est illud nefas, cui Majores nostri nomen non invenerunt, & ab accusatoribus *Monstrum* meruit appellari.

Ego nascens juravi in verba Regis, & sacramenti adhuc memor, malo hostem ferire, quàm vires excusare, si vicero, laudabitur facultas; si victus fuero, non improbabitur voluntas: nec flagitio caret silere, ubi aut Deum audieris blasphemari, vel ejus vicarium traduci: & pietatis est innocentem quemcunque à calumniâ vindicare, nedum ut Regem destituere liceat, pro quo etiam, ut pro patriâ, mori gloriosum habetur. Si natura mihi facundiam non dedit dignam reo, certè indignationem non negavit dignam accusatoribus, quibus ipsis nec conducit ignosci tantam petulantiam, ne spe impunitatis seipsis nequiores evadant. Obsecro enim, quis *Solon* aut *Lycurgus* Reges solos à scribendo jussit abstinere? Quibus

pœnis sancita est lex ista? Quibus exemplis vindicata transgressio? Audivi sæpè, Regibus multa licere, quæ cæteris nefas sunt, & hoc eorum esse privilegium: nunc audio, Regibus nefas esse, quæ cæteris licent. Inversa est igitur hoc plebiscito natura rerum, & à Regibus ad singulos translata est prærogativa, cunctis fruentibus libertate, quam illi amiserunt, quod eò invidiosius dicitur, quia non constat quo scelere amiserint. An natura novercali odio iis negavit, quod aliis maternâ benignitate indulgit? aut Ratio illis obvenit sterilis, manca & inops prudentiæ, ut interdicto cavendum fuerit ne res bonas scribendo vitiarent.

His impulsî accusatores, cùm impudentiam suam juris prætextu non possent tueri, quasi illicitum esset Regibus scribere, decorum obtendunt, negantes, utut liceat, decere tamen: & hoc est quod eruditæ nebulonibus MONSTRUM appellatur. At ego MONSTRUM duco, non Regem *Britanniae* edentem, cùm res possit, specimen ingenii, quod à sapientissimis vulgo fieri consuevit, sed *Romanam* Papam, puerperii doloribus ejulantem, & parientem in publico sine obstetrice: illic opus erat *Hetrusco* Aruspice, cùm Pontifices, qui gignere solebant, nothos parerent, non cùm Reges nihil faciunt nisi ordine naturæ, & more Majorum. O si viveres *Orbili*, scutica profectò vindicares tam rudem solæcismum, non passurus *monstri* nomen impune ab iis usurpari, qui, quid *Monstrum* esset, penitus ignorarent.

Nunc in rebus ipsis accusatorum barbariem cognosce. Prudentiam oculum esse humanæ vitæ, & cæteras virtutes dirigere in confesso est; ejus usus in stylo & vocē geminus apparet: sed vocis donum transitorium est, unius ævi locique styli beneficium ad posteros quoque pertinet, locis & temporibus interminatum: quò meliùs de humano genere mereri videntur, qui omnia secula erudiunt ad virtutem, quam quorum omnis labor cum ipsis exstinguitur. Cùm igitur ex horum sententia, turpe sit Regi & indecorum demereri sibi hoc officio ventura secula, qui nobilissimus est prudentiæ fructus; ipsa prudentia turpis in Rege & indecora judicanda est. Quo pacto enim virtus deceat, cujus usus etiam optimus dedecet, aut quo modo pulchra erit in Principe prudentiæ possessio, si exercitio ejus longè pulcherrimo infametur? Auscultate itaque, O Principes terræ, & accusatores hujusmodi unico sanè placate obsequio; prudentiam, & quicquid inde nascitur, abjicite; merum enim hoc est sceptrorum dedecus & labes: infantiamque & barbariem primas ducite virtutum & speciosissima Regii apicis ornamenta; ut nec sensa animi idoneis verbis exprimere, nec literarum

monumentis consignare possitis. Nam hæc fecisse vitio jam vertitur vobis & pudori: tum demum criminationem vitabitis, cum ab his inscitiae magistris didiceritis, nihil sapere.

Ignoscant mihi hi Regum Censores, si quod ipsi unicè dissimulant, detractâ larvâ, produxero in lucem: faciliorem consiliis aurem præbunt Reges, si, quorsum ea spectent, intellexerint. Cur enim Majestatem Principis dehonestari ajunt literis, in quibus ipsi unicum ponunt suæ Reipub. præsidium? quia nempe è re eorum est, omnes gentes obbrutescere inscitâ, & Reges nihil nosse, nisi ipsis obsequi. Seculum illud argenteum vel aureum revocatum cupiunt, quo regalis sapientiæ apex habebatur censum omnem in Apostolicos conferre fiscos, & nihil rectum putare, nisi quod Vaticani tripodis arbitrio gerebatur.

Ego vobis vitio non verto, Amici, quod literas in adversariis odistis, per quas Occidentis imperio excidistis. Postquam Orbis inscitiae jugum excussit, vester esse desit; & inciso quasi nervo tyrannidis, liber & suus factus est; itaque nunc eum execramini tanquam alienum: nec sine animi deliquio meminisse potestis accepti vulneris; quod nunquam, nisi diabolo chirurgo, cicatricem obducet, alienatis ab obsequio omnibus *Transalpinis*, avulsis à corpore vestro *Germania*, *Britannia*, *Dania*, *Suecia*, anhelante libertatem *Italia*, leges dante, non accipiente *Hispania*. Quis tam ferrens vobis hîc interdicit ad eruditionis nomen gemere? & honestissimas dicendi & scribendi artes, veras vestræ calamitatis causas verniliter insectari? Tantum abest, ut has impatientiæ voces Rex clementissimus ad vivum refecet, ut venia quoque & risu prosequatur. Solent victores in ludorum quoque certaminibus absque stomacho leviora ferre convicia: partis victæ dolori indulgetur protervia. Nec meretur sanè victoriam, qui hoc victis solatiolum invidet. At verò tanti non est Regi *Jacobo* literas abjicere, ut vobis non displiceat; aut virtutem exuere, ut vestram petulantiam vitet: nimis hoc carum putat iracundiæ vestræ hostimentum. Serum est præterea jam dediscere, quod teneris in annis hausit, & difficile prorsus mutare, quod perpetuâ consuetudine illi in naturam jam abiit. Quis nescit ejus adolescentiæ formandæ peritissimos *Europa* artifices adhibitos, quorum alter *Georgius Buchananus* politissimo suo seculo literatior; mille annis proximis neminem invenit, nisi minorem: ô utinam in eo homine cætera respondissent ingenio, haberet *Scotia* nostra,

tra, quem antiquis æquaret. Alter solis moribus Collegæ dissimilis, *Petrus Junius* plurimarum literarum vegetam memoriam ab ætatis injuria etiamnum vindicat, dignus sanè, qui senio non senesceret, nisi animi sui decus in filios propagasset. Ab his magistris concepit Rex noster honesti verique indelebiles imagines, quas accusatores isti, ut ridiculas & Principe indignas, frustra nunc cupiunt extirpatas. Iis quoque Majoribus prognatus est, qui regale otium Musis oblectare, & publicas curas hac literariâ dulcedine diluere consueverunt. Scitote quod in eo vitium arguitis, jam immedicabile esse, quia hæreditarium est.

Cætera desunt.

07
Clarissimi Viri

PATRICII JUNII,

Serenissimis R. R. JACOBO I. & CARO-
LO I. Britanniarum Monarchis à
Bibliothecis

VITA.

Scriptore

THOMAS SMITHO,

*S. Theologiæ Doctore & Ecclesiæ Anglicanæ
Presbytero.*

1873

ATLANTA

For the year ending Dec 31, 1873

1873

ATLANTA

1873

ATLANTA

For the year ending Dec 31, 1873

1873

V I T A

Viri Clarissimi

PATRICII JUNII.



ATRICIUS YOUNG (quem pro ipsius ac Patris more, habita linguæ *Latine*, quam uterque summo cum studio excoluit, ratione, ac etiam virorum eruditorum superiori præsertim seculo post bonas literas felicissimè renascentes, veterum *Romanorum* cognomina, si idem verborum sensus pateretur, affectantium exemplo & ritu, deinceps *Junium* appellabimus) natus erat XXIX. Augusti anno reparatæ salutis humanæ MDLXXXIV. ut accepi, *Seaton* in *Lothianâ*, *Scotia* Provinciâ, quæ licèt, aliis regionibus benigniore sole calentibus ubertate frugum cedat, interim suis contenta bonis, quæ ad vitæ iucunditatem citra luxuriam abundè sufficiunt, omni tempore fortes ac strenuos viros produxit, & fertilis ingeniorum parens meritò habetur: hisce nimirum prærogativis, & civium excelsæ mentis dotibus, à quibus, non ab adscititiis commodis extra nostram potestatem sitis, verus honos & laus derivatur, nullis Gentibus, quaquaversum patet orbis terrarum, postponenda.

Patrem habuit virum illustrem *Petrum Junium*, qui antiquæ & splendidæ stirpi, è quâ erat prognatus, non leve splendoris & gloriæ incrementum superfundebat, de quo, cætera ad oportuniorum locum magisque proprium reservaturus, hoc unicum in præsentem dicam, quod ob acre excelsumque ingenium consummatamque sapientiam & eruditionem, qui serenissimi *Jacobi VI. Scotorum* Regis, & post, decedente gloriosâ ac beatæ memoriæ Regina *Elisabethâ*, femina incomparabili, & regiis virtutibus ornatissimâ, primi *Britanniarum* Monarchæ, ætatem puerilem adolescentemque regeret, eumque primis literarum rudimentis, & virtutis pietatisque præceptis formaret, unâ cum *Georgio Buchanano*, Collega & socio, dignus haberetur: quod Regem per omnem vitæ ætatem grato ore agnovisse, & insigni elogio edito tes-

tatum fecisse alibi ostendam. Felix ille hoc præclarissimo munere, quo Patriam sibi devinxerat, aliisque dignitatibus, quas virtute suâ adeptus est, pariter quoque felix numerosâ prole masculâ, quæ paternam virtutem referebat: ex octo enim filiis, quos genuerat, sex tanto parente dignos, & quos virtus, quâ singuli peculiaritèr eminebant, longè illustriores reddiderat, quàm natalium splendor, regio favore & omnium bonorum applausu exceptos lætis oculis grandævus videbat: quod non exiguum divinæ benignitatis indicium fuisse omnes cordati faciliè crediderunt; potissimum verò (a) illustrissimus Princeps, *Mauritius*, *Hassiae* Comes, ita pro pietate suâ, ita pro istâ, qua erga illum ferebatur, amicitia interpretatus est.

Ex hisce verò natus quintus erat *Patricius* noster, qui paternâ institutione ac domesticis exemplis, & honestâ, quæ inter fratres oriri solet, æmulatione excitatus, docili ingenio, quod inseverat natura, industriam adjiciens, ingentem, eamque non illætabilem, bonæ frugis, cum crescentibus annis maturuerit judicium, spem in ipsâ pueritiâ dedit. Non possum hîc non laudare *Scoticæ* Gentis Nobilium tum affectum tum prudentiam, quæ præcipuè eminet in ingenua filiorum educatione, quibus si non opimas relinquant hæreditates, hoc sedulò agunt, ut liberalium artium intelligentiâ & familiari linguæ *Latinae* usu sint præditi; adeò ut quocunque aut militaris gloriæ ardor, aut peregrinandi studium eos vocaverit, in veteri *Latio* nati videantur. Non enim illos aut molli ignobilique otio, quod in vitium faciliè trahit, assuescere, aut luxuriâ diffuere, aut turpiculis famulantium, qui incautæ juventuti insidias sæpè struunt, obsequiis corrumpi patiuntur, severi morum ac studiorum exactores. Quod laudabile institutum, si illi, quibus indulgentior fors mitiusque cælum obtigit, imitari voluissent, inter *filios Heroum* tot noxas, tot ludibria, imo tot *humani generis propudia* mundus tristi suo damno hodiè non sensisset.

Penè impuber ex paternis ædibus egressus, ad Academiam *Andrea-*
nam, ubi disciplina maximè vigeat, alacri animo concessit, disciplinis Philosophicis sub vigilantissimis Præceptoribus, quibus id curæ maximè fuerit, ne discipuli aut omninò aut impunè otiarentur, instruendus: & post quadriennium expletum, laureâ magistrali non tam pro more solenni, quam pro dignitate ac merito ornabatur; anno scilicet hujus seculi tertio.

Paul-

(a) In literis ad D. *Junium* scriptis.

Paulò antè Pater ipsius , à longo tempore inter Regios Consiliarios adscitus , Regem *Jacobum* , in quem , utpote certissimum heredem , regnum istud summo jure , tam divino quàm humano , nuperrimè devolutum erat in *Angliam* comitatus est ; à cujus amplexibus non diu aberat *Patricius* , tum ut ejus ope & consilio in eligendo vitæ genere , cui se esset impendiò addicturus , uteretur , tum ut in hac alterâ *Britannia* parte fortunarum suarum fundamenta sub auspiciis clementissimi Regis & paternorum meritorum præsidio melius poneret.

At Pater gnarus , vel igneum mentis vigorem , quem *Scythica* pruinæ expugnare non poterant , Aulæ blanditiis , quæ juvenum mentibus , nisi solidissimâ virtute obfirmatis , sensim obrependo sese insinuant , tanquam pestilenti halitu obtundi solitum , tandem planè evanescere , ipsiusque bonam indolem , compositos mores , verecundiam , animumque à rixis , tumultibus , susurris , & clamoribus , quibus Aula & Urbs omni tempore solent circumstrepere , averissimum , perspectum habens , ipsum , quantum in illo erat , Deo & Ecclesiæ devovebat : interim maximè sollicitus , ut cuidam è Theologis magni nominis , ex ordine præsertim Hierarchico , primorum Ecclesiæ Christianæ temporum more , in sacris literis erudiendus traderetur ; cujus pio desiderio felix exoptatusque mox respondebat exitus.

Regi , postquam ardua negotia in ipsis novi imperii initiis ingruentia , quo publica tranquillitas firmaretur , aliquatenus expediisset , de pacificâ ad coronam *Angliæ* successione gratulatum coràm accedere suâ interesse crediderunt omnes , quos munerum , sive Civilium sive Ecclesiasticorum , quibus erant admoti , dignitas , & natalium splendor extra plebeiorum sortem paulò altiùs extulere. Advenarum quoque , qui gratiâ apud Regem pollebant , amicitiam ambire non sibi indecorum esse putarunt Indigenæ , non tam commodi inde eruendi causâ , quàm ut simultates istas , quæ olim in internecinum odium erumpentes , vicinas Gentes fatalitèr commisissent , hac beatissimâ unione penitè exstingui , perpetuumque fœdus amoris , & concordiae ab universis subditis sub uno Rege ineundum esse pro insitâ Nobilium *Anglorum* humanitate & observantiâ restarentur. Inter hosce verò novos hospites *Petrus Junius* , de cujus candore , virtutibus , mentis constantiâ , prudentiâ , & eruditione quidpiam grande & magnificum , consentiente famâ , spargebatur , Viris literarum amantibus longè erat acceptissimus. Illum adire , illius colloquiis de re literariâ gaudere & frui , illius sapientiam , longâ rerum experienciâ domi forisque acquisitam , mirari , illius hu-

manitatem & placidissimos candidosque mores tantoperè celebratos experiri, non infrequentes, non pigri, non inviti gestiebant. Ex hoc animorum consensu mutuus enascebatur amor, observantia, fides; inde quoque contracta intima quædam necessitudo, familiaritas, ac amicitia, vel ipsis naturæ vinculis potentior firmiorque: hinc consiliorum de publicis, de privatis, de rebus ipsis domesticis, amotis omni dissimulatione & metu, communicatio: hinc mutua amoris subsidia promissa, petita, &, quodocunque occasio tulerit, cum fide & sedulitate præstanda, prout viros probos, virtute & amicitia conjunctissimos, decuit.

In ejusmodi colloquiis inter ipsum & *Georgium Sodorensem* Episcopum ultro citroque habitis subindè animo intercurrerebat *Patricius*, chari parentis cura, quem studiis Theologicis jam jam addicendum, in ædibus cujuspiam venerandi Præsulis, quo sanctum illud propositum majori cum fructu prosequeretur, exceptum iri maximè cupiebat. Suggestit Episcopus, rem istam non tanti esse, quin levi operâ in effectum dari & procurari posset; neminem ferè hanc modestissimam petitionem, si proponeretur, à se amoliturum, quin faciles manus esset daturus; & speciatim admodum reverendum D. *Georgium Lloidum*, nuperrimè ad Ecclesiæ *Cestriensis* cathedram promotum, ipso rogante pro certo inducendum, ut familia, quæ inde honoratior esset evasura, tam præclaro Juvene augeretur. Nec aliter res cecidit, quàm ex condicito fuisset conventum: quod Patri sexagenario perplacuit, ingentis beneficii loco illud habenti, translata quasi omni paternâ auctoritate in Patronum, ut filium jam inter domesticos ipsius recensendum pro Anagnostâ habere, aut in curandis libris vel qualicunque in re ipsius operâ & ministerio uti vellet. Anno 1604. tempore æstivo, *Cestriam* petiit *Patricius*, ad pedes hujus *Gamalielis* educandus, tam suo quam Patris & Episcopi *Sodorensis* nomine novo Mæcenati acceptus; nec dubitandum ullatenus videtur, quin, sicut illius amorem quod ille in literis ad Parentem testatur, pauculorum dierum morâ & contubernio, ingenio felici, modestissimis moribus, & excellenti doctrinâ in istâ viridi ætate haud exspectandâ, sibi conciliavit ita hujus benevolentiam indies, quamdiu apud ipsum vixerit, magis magisque adauxerit.

Anno 1605. *Oxonium* alacer contendit, ut in istis amœnissimis recessibus, ubi Musæ Gratiæque regnant, sedesque perpetuas fixisse videntur, sacrarum literarum studiis sedulam seriamque navaret operam. Neque quicquam sanè aut menti, quæ tota literarum amore ardebat, junc-

cundius, & optatius, aut instituto vitæ, quod sibi omni nisu ac contentione sequendum proposuit, utilius magisque accommodum accidere potuit. Præsenferat enim, desiderium istud, quod cum annis creverat, literarum vix alibi terrarum melius aut facilius expleri posse, quam *Oxonii*, ubi tot Viri eodem desiderio accensi, illustri exemplo ad æternitatem famæ præibant, ac ubi tot Bibliothecæ libris omne genus editis & manuscriptis à nemine defloratis instructissimæ suppetebant. Illorum itaque, quos ab Academicorum vulgo divinior & excelsior mens disereverat, amicitias sedulò & studiosè coluit: nec quisquam, ut credere fas est, à Viris humaniores literas profitentibus humaniùs erat exceptus. Quanti autem illum fecerint Academiae Primores, hoc non levi indicio liquet, quod illum IX. Julii 1605. ad eundem gradum, quem in *Scotiâ* obtinuerat, admissum, inter suos adoptaverint. Præcipuè charus fuit *Joanni Williams*, Collegii *Jesu* Principali & Decano *Bangorensi*, *Richardo Moketo*, Collegii *omnium Animarum* socio, postea Custodi, & D. *Henrico Savilio*, Collegii *Mertonensis* Custodi, qui sapientiæ & eruditionis fastigium, si quisquam alius, licèt attigisset, peregrinum Juvenem, quem ad ornandas literas naturâ & ingenio compositum sagaci mente præviderat, sinu suo excipere, & benevolentiam ac consilio fovere non dedignatus est.

Tantis subsidiis & quasi irritamentis studiorum circumdatus, noluit tempus, cujus solius usura est honestissima, aliis deliciis impendi aut effluere; noluit ingenium aut socordiam aut laxationibus, nisi quas valetudinis curandæ ratio & amicitiae decorique leges postulaverint, deteri: non aliter à studiis, quibus perdius pernoxque invigilaverit, esset abstrahendus: cui ex sapientiæ regulis erat exploratissimum, absque industriâ, eaque non mediocri, mentem, utut capacissimam, ad summa frustra eniti & aspirare, illosque, qui per compendia sapere videntur, & non nisi per vices, cum ignaviæ suæ tædeat, libris tanquam pulvinaribus incumbunt, in unis subselliis, quæ primâ juventâ occuparunt, consenescentes stultitiam suam tandem deplorare cogi. Quanti autem stuporis, ut id citra cujusquam offensionem vel leviusculam obrectationis umbram obiter moneam, erit argumentum, quam acri censurâ, imo & scuticâ dignum, saltem qualem mens malè conscia serò pœnitentibus solet inacutere, isto nobili otio abuti; illumque munificentiae penè immensæ usum fructum, & istas studiorum commoditates, quas exteri avidè arripiunt, negligere; quasi non nobis, sed illis tot pretiosa *κειμήλια*, antiqui temporis reliquias, & *Gracia* olim florentissimæ spolium, de
Pa-

Patriâ, de Ecclesiâ pientissimi Benefactores, optimè meriti, & si per nos licuerit, optimè in perpetuum meritori, in istis sacris conditoriis reposuissent? Non desunt sanè, nec deerunt unquam, ita enim benè ominari oportet, qui thesaurum istum Codicum manuscriptorum pro sublimi ingenio dignè æstimare, & pro sedulitate laudabili sapientèr in commune humani generis emolumentum, pietatis & doctrinæ propagationem & incrementum, & Patriæ gloriam expromere norint: at nemo diffitebitur, longè plures orituros, si *Francisci Pithæi, Hottomanni, Junii, Capellorum* fratrum, *Cluverii, Holstenii, Bocharti*, ut penè innumeros alios maximi nominis Viros, qui multo sudore ac labore penè infinito opibus è gazophylaciis nostris collectis erutisque rempublicam literariam ditaverunt, taceam, industriam nostrates Alumni æmulari velint.

Hic verò, ut minori impensa aleretur, plusculumque subsidii ex quotidiana cum Academicis ad mensam & alibi conversatione habendâ studiis accederet, in numerum Sociorum, seu potius Capellanorum magnifici Collegii, quod Novum appellatur, & quod ante tria secula Vir excellæ & divinæ mentis, D. *Gulielmus Wiccamus*, Episcopus *Wintoniensis*, fundaverat, cooptatus est. Postea, nimirum A. C. MDCXI. illum in societatem Collegii *Wadhamensis* adsciscendum esse destinavit magnus ille studiorum *Junii* fautor & patronus, D. *Jacobus Montacutus*, Episcopus *Bathoniensis & Wellensis*: sed illius auspiciis & commendatione, ante absolutam istius Collegii fabricam, longè meliùs, ut postea videbimus, illi erat prospectum.

Amore *Græcarum* literarum captus, animum quidem ad eas excolendas seriò applicuit, epistolis tum ad Patrem & nostrates, puta *Andream Dononæum*, *Græcæ* linguæ in Academia *Cantabrigiensi* Professore, *Richardum Mocketum*, è Collegio omnium Animarum *Oxon.* *Edwardum Sylvestrum*, aliosque, qui *Græcè* quoque rescripserunt, tum ad *Græcos* Antistites & sacerdotes, præsertim *Metrophanem Critopulum*, de quo postea plura dicam, istâ linguâ facili & eleganti stylo subinde perscriptis, quas mollities hujus seculi non fert: non neglecto & Antiquitatis & Historiarum studio.

Licèt autem solo Diaconatu fuerit initiatus; tamen quasi pro instituto Theologiæ studiosus, sacras literas, tanquam peculiare vitæ opus, promovendi, uti non facultas, ita neque voluntas neque studium defuere: & sicut illi, qui novam regionem, aut nuper detectam, aut non benè cognitam, descripturi, omnes angulos & recessus non sine

curiosâ & exquisitâ indagine perlustrant, ne quippiam inexploratum relinquantur: ita omnes Bibliothecarum forulos excussit *Junius*, librosque manu exaratos oppidò raros industriâ planè admirandâ rimatus est, illos cum editis conferendo, aut, si nondum editi essent, exscribendo, ut eruditæ *Graciæ* opes, quas Scholasticorum barbaries per tot secula oculuerat, in medium productæ, novâque luce donatæ, in publicos orbis Christiani usus explicarentur. Hisce præclaris initiis tam benè ac sapientèr positis, hâc animi solertiâ & pertinaci studio ad solidam eruditionem sibi certam planamque viam præmuniebat.

Relicto *Oxonio*, satis ab ingenio, judicio, subsidiisque, quæ illinc reportaverat, instructus, Urbem repetivit, secundiores illic ex gratiâ & favore Regis & Episcoporum fortunas, sive pro mercede, sive pro stimulo industriæ, tandem aliquando experturus.

Anno MDCVIII. ad finem vergente Pater illum in *Galliam*, studiorum causâ, mittere decrevit, præsertim ut *Isaacum Casaubonum* conveniret. Licèt autem nobilissimus Parens filium ipsius ab illo magno Viro, cum quo non levem ab aliquot annis inierat amicitiam, ut literæ partim editæ, partim etiam edendæ, testantur, hac nudâ commendatione omni cum benignitate excipiendum esse de facili credidisset: tamen quò gratior novi hospitis adventus futurus esset, spondet, se *Strabonem*, ab *Henrico Scrimgero*, illius avunculo, ad codicum MSS. fidem diligenter admodum examinatum, & quem *Casaubonus* de nova illius & emendationi editione sollicitus, tantoperè desideraverit, identidem quoque missurum. Sed nescio quo interveniente casu destinatum illud iter impedièbatur: neque enim *Patricium* nostrum *Lutetiam Parisiorum*, nisi novennio post labente, petiisse ex illius schedis aut aliunde expiscari hæcenus licuit.

Verùm quantæ spei Juvenis fuerit *Patricius* noster, ne Regem quidem ipsum latere potuit: cui egregiæ animi dotes, non minus quàm Parentis dignitas, non solùm in Aulam, sed etiam ad Magnatum & Præsulum amicitias facilem parabant aditum. Maximè verò gavisus est patrocínio Viri admodum reverendi, D. *Jacobi Montacuti*, tunc temporis *Bathoniensis* & *Wellensis* Episcopi, cujus ope & commendatione à Rege annuam quinquaginta librarum Sterlingicarum pensionem tandem obtinuit, non sine justâ spe munus aliquod egregium, quod ipsius studiis & instituto maximè competere videretur, quo securiùs iisdem ab omni anxietate & molestiâ procul invigilaret, consequendi. Interim, cum ab ipsâ juventute styli exercendi gratiâ *Latinis* compositionibus af-

suetus, ob ornatum, facilitatem, elegantiamque *Latini* sermonis quale quale nomen adeptus fuerit, ejus in scribendis *Latinis* epistolis, & etiam in evolvendis regni archivis, operâ interdum Rex aliquique Mag-nates usi sunt.

Ex isthoc verò honorario mens non remissior, non degener, non pi-gra, potius novas vires indè hausit; licèt enim in Aulâ quotidie versa-retur, horas otiosas, museo inclusus, singulis diebus intentiori diligen-tiâ redemit, ne liberalitate Regiâ indignus haberetur, aut justâ expec-tatione, quam de lè apud omnes excitaverat, aut otiando aut nihil a-gendo, excideret. Sed & hoc & illud prohibebant tum propriæ existi-mationis, quam quisque probus sartam tectam servari cupit, cura, tum infusus ille literarum, ad quas ferebatur, amor, indefessæ diligentiae conjunctus. Quibus verò mediis huic proposito optimè satisfaceret, ani-mo volvens, singulis perspectis, prudentissimè judicavit, nihil sibi ma-gis desiderandum aut optabilius fore, quàm ut ipsius curæ celsissimi Principis *Henrici* Bibliotheca in ædibus *S. Jacobi* sita demandaretur: quod munus sibi ereptum non sine querelis & indignatione dolebat. Sed novo vigore postea animatus, cùm absque instructissimæ Bibliothecæ, cui comparandæ non suppetebat facultas, ope, se in hoc stadio, quod adeò felicibus auspiciis ingressus est, satis laudabiliter decurrentem, in medio quasi cursu sisti, & quò minus metam attingeret, impediendum esse, metueret, ad Regis Bibliothecæ præfecturam spem & animam al-tiùs & ambitiosius erexit; quam tandem, superatis difficultatibus, non sine ingenti prensatione, & potissimùm efficaci & sæpe sæpiusque repe-titâ commendatione optimi Patroni, *D. Montacuti*, adsecutus est: nec quenquam huic muneri magis aptum aut idoneum esse, aut qui me-lius thesauro isto literario uti novisset, tum amici tum æmuli agno-verunt.

Ut ea, quæ de Bibliothecâ Regiâ dicenda supersunt, meliùs intelli-gantur, pauca de Palatio *S. Jacobi* in gratiam curiosi Lectoris hîc infe-rere penè necessarium videbitur.

Superioribus seculis, ante vel circa tempora *R. Guilielmi* primi, (ne-que enim certa quæpiam memoria scripto exstat) Cives *Londinenses* mi-sericordiâ erga Leprosas Virgines admodum piè, & prout Christianos decuit, tacti, in earundem solamen, ut miseram vitam ab omni hu-mano consortio separatæ, æquiori animo tolerarent, Hospitale conden-dum curarunt, in campis extra Urbem ad Occidentem sitis. Discreve-rat enim *Londinum* à *Westmonasterio* longa agrorum planities, & inter-jec-

jectum litus, cujus ripæ accliviores, quæ undas *Tamesinas* ab alluvio coercuere, nondum magnificis ædium ordinibus superbiebant. Hoc nimirum ineunte, quod nostrum antecessit, seculo fieri inceperat: cum ambæ Urbes, novis incolis advenisque tumidæ, jam pomœriis ultrà additis, ampliarentur, tandem Avorum nostrorum memoriâ, omni vacuo intervallo novis ædificiis oppleto, conjungendæ. Adhuc tamen supersunt vetera nomina, licet nova rerum inducatur facies. Hinc *the Strand*, & campi *S. Martini*, & *S. Jacobi*; illi ab Ecclesiâ, *S. Martino* sacrâ, hic ab hoc Nosocomio in memoriam *S. Jacobi* Apostoli exstructo, nuncupati. Nullatenus hîc curiosè indagare oportet, undè teterrimus iste morbus, sive à malâ aeris temperie, sive à putridis cibis, sanguinem & vitales spiritus inquinantibus, sive ab Oriente ab hominibus istâ tabe infectis in *Angliam* invectus fuerit, qui tot miserorum corpora fœdaverat: quorum fortis maximè deplorandæ, ex insitâ *Anglorum* pietate maximè quoque misertum erat. Excipiendis enim elephantiasî laborantibus ædes publicæ destinatæ passim surgebant: in his autem *Jacobæis* quatuordecim tantum simul vixere cælibes fœminæ, quibus postea octo Fratres additi: quorum reditus, à quibus alerentur, R. *Edwardus* primus diplomate confirmavit, ut terræ istæ, quas pii Benefactores dederant, in illos legum nostrarum Municipalium vi inde derivandâ transcriptæ, ad alios ejusdem fortis omni tempore transirent: addito hoc, ut in campis prope adjacentibus nundinas singulis annis per septem dies, à festo *S. Jacobi* numerandos, indicendi privilegio, ut nonnihil lucri ab institutoribus, qui mercium vendendarum causâ illuc essent confluxuri, percipiendum, quò meliùs sustentarentur, accederet. In istâ verò universa Monasteriorum cæterarumque ædium sacrarum strage sub R. *Henrico* octavo idem triste fatum hoc Nosocomium subiit, cujus annui reditus valor, prout ex Registris auctoritate publicâ à Regiis Visitatoribus confectis patet, erat centum librarum. Jure suo cedere coactæ Sorores, ædes, terras, & quicquid illarum erat Regi xxiii. regni sui anno, tradidere, aliò, quo lubebat, amovendæ: sed ne fame cæterisque vitæ incommodis perirent, cautum erat, ut singulis ad quotidianos sumptus per integram vitam pecuniæ assignatæ suppeterent. R. *Henricus* VIII. qui ad ædes magnificas, à conditore *Thomâ Wolsæo*, Cardinale, & Archiepiscopo *Eboracensi*, *Eboracenses* nuncupatas, ab hoc tempore *candidæ Aulæ* nomine insigniendas, se receperat, hujus loci vicini amœnissimo situ delinitus, domo, quam infelices fœminæ occuparant, funditus eversâ, splendidum Palatium de novo exstrui, viridariumque præjacens

muro è latere cocto , circumambiri jussit : quod inter regias ædes ex decreto Parlamenti postea recenscebatur , utpote magni palatii appendix habitum , iisdem sacris juribus ac immunitatibus deinceps muniendum. Hic Regina *Maria*, filia R. *Henrici* VIII. natu maxima, nimio mœrore , quem sive ob expugnatum *Caletum* , sive ob longam R. *Philippi* , mariti sui , absentiam , sive ob prolis defectum contraxerat , pariter ac aquâ intercute confecta , planeque tum sui tum mundi pertæsa, diem obiit. Hic serenissimus Princeps *Henricus*, R. *Jacobi* I. filius primogenitus , Aulicis suis numerosam familiam tanto Principe dignam constituentibus stipatus , splendidissimè habitavit , ibidemque flore juventæ extinctus , efflavit animam. Hanc sedem quoque , uti quàm maximè aptam & oportunam , elegit optimus Princeps , R. *Carolus* I. in quâ fecundo partu levaretur serenissima Regina , *Henrica Maria* : hîc enim serenissimi Principes , *Carolus* II. & *Jacobus* II. nati , & sub nutricum curâ educati. Denique post instauratam monarchiam anno MDCLX. palatium hoc cedebat in ordinarias sedes serenissimi Principis , *Jacobi Ducis Eboracensis*.

Inter verò locupletissimos utriusque Aulæ apparatus diu desiderabatur Bibliotheca : neque ea cura Principes nostros , aut artibus regendi populos , aut rebus bellicis , aut religioni stabiliendæ , aut motibus componendis summoperè intentos , tangebatur , quasi thesaurus iste literarius magis ad privatos spectasset , & in Academiis potius , quàm in Palatiis esset recondendus. Satis nimirum sibi esse gloriæ duxerunt , mentem bonis literis excolere , & literatos Regiâ munificentia & patrocínio fovere : de libris congerendis , nisi qui propriæ delectationi & curiositati , suisque usibus inservituri essent , parum solliciti. Quod de Reginâ *Elisabethâ* potissimum arbitror dicendum , quæ , licet ob accuratum linguarum *Græcæ* & *Latinae* , quibus pro re nata prudenter , absque levissimâ ostentationis umbrâ , aut affectatâ gloriæ cupidine , uti norat , studium , sapientiæ civilis disciplinis felicissimè conjunctum , æternis laudibus sit cumulanda ; tamen sive negotiis majoris momenti , in quibus salus populorum vertebatur , impedita , sive id muliebri sexui parum convenisse judicaverit , hoc decus in partem suarum curarum venire haud permisit ; (neque Museum istud , libris quibusdam pretiosisque cimeliis refertum , quod in ædibus *Richmondianis* habuit , gloriosum *Bibliotheca Regalis* titulum & nomen meretur) quod successori Regi *Jacobo* , Regum doctissimo , integrum relinquebatur.

Gnarus occasionum captandarum Rex, quo novæ Bibliothecæ fundamenta auspiciùs jacerentur, libros tum impressos, tum manu exaratos, omnes optimæ notæ, quos nobilissimus D. Baro *Lumleyus* magnis sumptibus & diligentissimâ indagine congesserat, in peculium sibi comparavit, à quo, cum non alibi satis commodus pateret locus, obtinuit Vir elegantissimi ingenii, D. *Adamus Newtonus*, Equestri dignitate ornatus, & qui *Henrico* ab ipsius pueritiâ fuerat à literarum studiis, tum ipsius Principis hoc novo librorum ornatu ad intensiorem literarum amorem alliciendi, tum Sancti cognominis causâ, ut in palatio S. *Jacobi* reponerentur. Non leve postea incrementum accessit ex Bibliothecâ viri clarissimi, D. *Mauritii*, Equitis Aurati, ex *Walliâ* oriundi, qui selectissimos omne genus libros ex *Italiâ* & *Galliâ* conquissiverat: ut jam titulo & nomine digna & verè Regia haberetur.

Hanc surgentem gloriam, hanc novam felicitatem, & Reipub. literariæ & sibi quoque impensè gratulatus est *Junius*, qui in pervolutandis istis libris, quantum per morositatem Custodis, sive ex invidiâ, sive ex ignoratione bonarum literarum, erga illum paulò offensioris redditi, licuit, totus erat & assiduus. Huc omnes ingenii & industriæ contendebat nervos, ut ista librorum moles, quæ confusa jacuit, & penè abscondita, in catalogos, prout Rex jusserat, explicaretur, tandem in publicos usus depromenda. Labor autem iste tam benè collocatus Regi non parum placuit, qui illum de rebus literariis colloquio sæpè dignatus est, monuitque, ut in istâ Provinciâ, cui à naturâ & bonâ indole compositus esse videbatur, ornandâ, eadem, quam hætenus præse tulerat, mentis constantiâ perseveraret. Inde desiderium illud, quod diu aluerat, de Bibliothecâ Regiâ benè merendi indies ac fortius accendebatur, ac si id muneris jamdudum ad ipsum spectasset, cujus officiosæ curæ insigne hoc specimen mox dedit.

Cum multos libros è Regiâ Bibliothecâ reverendissimus D. *Richardus Bancroftus*, Archiepiscopus *Cantuariensis*, fortitudine & zelo Ecclesiæ *Anglicanæ* contra *Puritanorum* insultus jura tuendi celeberrimus, mutuo accepisset, ne, illo jam in cœlis recepto, in hæredes, tanquam privati peculii legitima pars, transirent, unice intercessit *Junius*, frequentiori interpellatione adhibitâ, eâque neutiquam cessaturâ, donec literas Regias ad D. Episcopum *Londinensem*, cui cura illa demandata fuerat, datas, de iis in integrum jure postliminii restituendis, sibi tradendis postulasset.

Deinde, ut res diversorum annorum ob similitudinem & cognationem

nem materiæ connectam, viro maximo, *Isaaco Casaubono*, *Londini* ex hac vitâ decedente, mense Junio A. MDCXIV. sagax vidua, cum ab amicis intellexisset, tale genus mercimonii in *Galliâ* pluris æstimari, chariusque vendi posse lucro, quod unicè spectabat, inhians, de supellectile librariâ, præsertim codicibus MSS. ipsius, quam in *Angliam* maritus advexerat, convasanda seriò cogitavit: cujus propositi gnarus *Junius*, toties in sinum, toties in Museum *Casauboni*, qui *Juvenem optimum & doctissimum*, uti appellavit, paterno amore complexus est, admissus receptusque, & cui ejusmodi gazæ erant cognitissimæ, non tam sui quàm totius Gentis causâ sibi laborandum esse ex officio ratus, ne tantum dedecus ex nobilissimæ Bibliothecæ jacturâ *Anglicano* nomini inureretur, urget, monet, obsecrat, quasi de fortunis suis & capite esset contendendum, importunisque efflagitationibus apud Episcopum *Bathoniensem & Wellensem*, favore Regio præpollentem, ne tot libros aut scriptos, aut ad manuscriptorum codicum fidem diligenter recognitos, & additis in margine eruditissimis observationibus illustratos, ex *Angliâ* exportari pateretur, sed potius Bibliothecam Regiam hoc insignissimo auctario locupletandam curaret. Nulla enim res dignior aut Regiâ munificentia, aut Episcopali, secundum religionem, dignitate, aut privati hominis literarum amantissimi curâ & studio, unquam visa est: nec in minimâ parte *Junianæ* tum laudis, quod huic negotio tantâ cum sollicitudine sese immiscuerit, tum felicitatis, quod hi conatus, hæc pia vota tam benè in commune literarum commodum cesserint, ponendum est.

Ex hujus verò supellectilis librariæ censu eximuntur Adversariorum Collectaneorumque libri, quos in filii sui *Merici*, iisdem studiis addicendi, usum reservavit mater. Ille autem, prout gratum *Academiæ Oxoniensis* alumnum decuit, ea omnia in publicum literarum commodum, ab harum literarum studiosis postea depromenda, moriens anno Ch. MDCLXXI. Bibliothecæ *Bodleianæ* legavit.

Post collatam Bibliothecæ Regiæ præfecturam, quâ omnium judicio erat dignissimus, ut eam aliquâ cum laude, eâque non modicâ ac levi, sustineret, omnibus viribus annisus est: officii ratio & de ipso sparsa fama diligentiam acuebant, nihilque jam prius & antiquius habuit, quàm ut omnes Bibliothecarii partes & numeros impleret, omnia recto ordine disponendo, abditissimosque recessus rimando, ut nemini sua domus & curta supellex notiores esse potuerint, quàm ipsi amplissimæ librorum struices, jam in oculis suis dispositæ. Dum verò olim *Oxo-*

nien-

niensem, dum alias jussu regio Ecclesiarum Cathedralium Bibliothecas, (a) dum Regiam hanc lustraret, multa inedita exscripsit, quæ in lucem producere apud se firmissimè constituebat, Historiæ nimirum *Anglicanæ*, tum civilis, tum Ecclesiasticæ. Scriptores, antiquos Auctores, *Græcos & Latinos*, ni huic præclaro incœpto avaritia Bibliopolarum, & istorum temporum infelicitas heic in *Anglia*, plerisque in studiis Polemicæ Theologiæ excolendis sese occupantibus, obstitissent. Alibi literæ humaniores majori in pretio erant habitæ, magisque cultæ: eorum cura paucos admodum, præter illustrem *Savilium*, *Montacutium*, *Boisium* &c. tangebatur. Cum ergo ejusmodi merces domi non essent extrudendæ anno MDCXII. *Francofurtum* hâc de causâ petere in animo habuit, ut voti potiretur: quod ipsis in medullis hæserat, nec facile erat admovendum: quinimo his obstaculis interjectis, & hâc morâ crescebat magis. Quadriennio enim post, (cùm frustra id ipsius nomine tentasset *Cluverius*) iter in *Hollandiam* animo molitus est, secum *Græcos* ineditos asportaturus, quorum edendi tanto desiderio flagrabat, ut nullæ difficultates, incommoda nulla, vix illum deterrere potuerint. Interim amici monent, hunc æstum animi intra debitos fines contineri oportere; auspiciatiora tempora aliquando adfutura; domesticam laudem viro probo & industrio abundè sufficere; judicium diutino studio maturius reddi, & quò quis tardior in palæstram, prodeat, eum viribus collectis firmius & majori cum solertiâ uti solitum; denique non famam, cui magis magisque instabat, cum privatæ rei incommodo conjunctam aliunde captandam esse. Voluit tamen, cum id è re literariâ fore judicaverit, *Lutetiam Parisiorum*, ubi bonæ literæ regnabant, anno MDCXVII. æstivis mensibus, quo tempore Rex valetudinis sub sereniori in Provinciis cœlo curandæ causâ, aut venandi studio pro more *Londino* abesset sese conferre, non ut splendidissimam ædium porticumque ubivis, post diutina civilis belli mala feliciter sopita, in singulis vicis surgentium, spectaculo oculos pasceret, sed ut clarissimos Viros, & virtute & doctrinâ illustres, de augendâ *Galliæ* gloriâ laudabili & honestissimâ æmulatione inter se contendentes, coràm alloqueretur, nobilesque Bibliothecas, quas Urbs ista meritò ostentabat, avidissimis & penè emissititiis oculis lustraret, tum animi, cui istæ deliciæ optimè sapiebant, tum pu-

(a) Illius diligentiae specimen hac ex parte habetur in excerptis ex chartulario *Wigorniensis* Ecclesiæ, & ejusdem compendio: quæ illius propria manu descripta exstant in Bibliothecâ *Cottoniana*. sub *Vitellio* C. IX.

publici boni ac usûs causâ, quò, collatis deinceps & conspirantibus operis, & mutuâ amicâque industriâ, sanctis Patribus, aliisque veteris Ecclesiæ Scriptoribus, qui rem Christianam purâ & integrâ mente felicissimè procurabant, procul omni partium studio, & absque omni labe & corruptelâ edendis meliùs prospiceretur. Quale institutum sanctum, & maximè Christianum, æternisque laudibus prosequendum, optimè quidem processurum licebat ominari; cùm vicinæ Gentes, angusto freto à se invicem interemptæ, hasce merces literarias à *Graciâ* aut aliundè advectas, quæ, post spoliatum ab immanissimis *Turcis* Orientem, inductamque superioribus seculis apud nos, æquè superstitione & neglecto linguarum & elegantiarum studio enatam, barbariem, salvæ, licet situ obsitæ & tenebris, quasi retrimenta, damnatæ, evaserint, essent commutaturæ. Quantum autem opis & commodi ex hoc commercio in Remp. literariam redundaverit, quivis sano judicio præditus ex optimis & accuratissimis librorum vetustioris ævi editionibus, quas hoc seculum produxit, æstimare novit, & æmula posteritas fatebitur, tot tantisque illustribus exemplis ad ejusdem industriæ gloriam exstimulanda, præsertim cùm harum aurifodinarum venæ nondum penitus exhaustæ fuerint, & novæ felici indagatorum ausu detegi possint.

Vir optimus & doctissimus, *Guilielmus Camdenus*, illum Viris magnis, amicis suis, *Petro Puteano*, *Joanni Hottomanno*, & *Theodoro Gothofredo*, literis commendavit, à quibus erat omni cum humanitate & observantiâ exceptus. Id enim mereri *Junii* modestiam & eruditionem, ex congressibus & de re literatiâ colloquiis perspectum habuere. His autem proxenetis, aut potius virtutum suarum famâ, ad Virorum, tum exquisitâ eruditione tum summis in Ecclesiâ dignitatibus præfulgentium, amicitiam facilis parabatur aditus: inter quos eminuere Cardinalis *Peronius* & *Nicolaus Coeffeteau*, *Dardaniæ* Episcopus, qui illum paterno quasi amore complexi sunt. Neutiquam enim dissensus iste in pauculis articulis controversis, quos veterum Christianorum fidei tanquam lacinias & dehonestamenta superaddi querimus, obstabat, quo minus illi, licet dogmatum suorum tenacissimi, & immodico zelo aliàs abrepti, *Junium* eximie humanitatis & tenerrimi affectus officiis auxerint: nec aliter sanè fieri potuit; cùm de communi Christianæ religionis causâ, de producendis in lucem primævæ Ecclesiæ, in quibus fœdæ hæreses, quas utraque pars damnat feritque anathemate, jacent profligatæ, monimentis; & denique de sacris & humanioribus literis, in quibus nulla lites intermiscuntur, propagandis ageretur; in cæteris cuilibet sentien-

tiendi, prout lubet, relicto arbitrio. Juvabat verò maximè cum Viris clarissimis & eruditissimis, *Frontone Ducao*, & *Jacobo Sirmondo*, præcipuis Societatis Jesu luminibus, qui in Collegio *Claromontano*, licèt illic scholam aperire non nisi anno sequente permissum fuerit, degebant, amicitiam colere ob similitudinem studiorum: potissimùm cum *Ducao*, ipsi ab hoc tempore usque ad obitum conjunctissimo, cujus laudatissima studia omni cum animi promptitudine adjuvit & in literis amantissimis fasso, se *Junii* consilio & hortatu magis magisque ad edendos *Græcos* Patres excitatum fuisse. Tam erudito & curioso exploratori, qui sola adipiscendæ penitioris rerum Sacrarum & Ecclesiasticarum cognitionis causâ, uti olim *Pythagoras*, *Plato*, alique è veteribus *Græcis Ægyptum* & *Orientis* plagas, *Galliam* adiisset, nihil erat inaccessum aut inexploratum. Bibliothecarum, tum Regiæ tum illustris *Thuani*, qui magno *Galliæ*, imò & totius *Europæ* damno, ab omnibus veri amantibus ob nimis immaturam mortem deflendo, ante paucos menses fatis concesserat, *Puteanorum* fratrum gratiâ & favore, adyta quasi domestico patebant; cui etiam quicquid in cæteris Bibliothecis erat, sive ob antiquitatem, sive ob materiam & argumentum venerabile & in pretio habendum, eâdem facilitate per harum gazarum Custodes licuit evolvere, qui hæc pretiosissimas membranas sacralque aurei seculi reliquias, ab edacissimi temporis rictu ereptas, Viro, illas pro acri judicio & assiduo rerum usu satis dignè æstimanti, & hanc humanitatem pari operâ & studio, quod ex ipsius nitidissimo ingenio & moribus verè augurari possent, repensuro, recludere certatim gestiebant. Tanti erat *Lutetiam* vidisse: majori enim literas promovendi ardore animatus, ab isto brevi itinere, quod tam auspicatò, jam annis & judicio maturior, suscepisset, reversus est ut ne quidem memoriam ejus ex animo unquam excidere passus sit.

Ex hoc tempore, licèt nondum ob penuriam, sive potius, quod dixi suprâ, ob avaritiam Typographorum, qui neglectis nobilissimi argumenti libris, si *Græcè* scriberentur, extrusisque triobolaribus ad vulgi captum chartis, suo tantum privato non Reip. literariæ commodo inhiarint, quippiam in lucem emisisset, apud externos paritèr ac nostrates inclarescere cœperat: quorum plerique, præsertim si iisdem studiis addicti, quos literarum amor & cura, & ingenii cultus, & Bibliothecas nostras lustrandi desiderium in *Angliam* adduxerant, ejus amicitiam petiere. Tam verò suavibus, niveisque moribus erat compositus, ut procul omnis fastus, *Φιλαντία*, sui que ostentatio abessent: nemoque pro-

nio ad excipiendos peregrinos, siue amicorum literis commendati, siue virtute propriâ & ingenio commendabiles, accesserint, animo, nemo propensiore ad illorum studia iuvandum voluntate præditus: quemcum, licet nonnisi tremulo gressu, saltem, ex modestiâ, parum firmo adiissent, illius pectori ipsam humanitatem, non fictam, non adulatoriiis artibus, quasi ad captandam laudem, sed gravitate & sapientiâ temperatam, & ab excelsâ mente, Diis proximâ, quæ sese quaquaversum pro viribus explicandi avidissima, benefaciendo triumphat, provenientem insedisse læti senserunt, & postea gratâ memoriâ, nullis aut locorum aut temporis intervallis delendâ, debitisque elogiis profecuti sunt.

Græci Virum *Græcè* doctissimum Genti, cujus linguam adeò efflictim deperisset, benè quoque velle non vanâ spe afflati, illum frequentes adibant, summam humanitatem, ad quam non sponte tantum, sed naturæ impulsu ferebatur, tantoperè prædicatam coràm experturi: per quos nullius nomen sonantiorè plausu in *Oriente* percrebuit, quasi *Græcorum*, si non unicus, saltem maximus fuisset Patronus. Licet enim quorundam ex illis instabilem fidem, ingenium versatile, ad oblectandum plerumque effectum, ingenitam mentiendi libidinem, inanesque, quos comminisci ad corradendam faciliori, uti opinantur, operâ à nimium credulis, molliori animo præditis pecuniam & ad ejusmodi narrationes tragicas, quas supra verum exaggerant, inhorrescentibus, prætextus, (nec ab iisdem moribus adhuc diem abhorrent nepotes) satis comperisset: si tamen fortè Præsules & Sacerdotes vel pristinæ virtutis specie aut eruditione in hâc vastitate & barbarie, quâ universam *Græciam* hodiè obvolutam jacentemque ingemiciscimus, venerabiles, si juvenes præsertim, sacris aut addicti aut addicendi, in quibus bonæ indolis & ingenii igniculi exarserint, laborantis Patriæ spes & fulcrum, advenissent, hos omnes benignè admodum fovere, colloquio & mensâ excipere, pecuniis pro facultatum modulo & ope suffulcire, & cum non aliter ipsis esset succurrendum, Regi, Proceribus, Episcopis, Academicis, & honestioris notæ Civibus, tum sermone, tum scripto commendare, & viatico, literisque salvi conductûs, quas ipse composuit, procuratis, illorum ex *Angliâ* in alias regiones exeuntium incolumitati consulere, sibi curæ oportere esse duxit, & volupe habuit: ita ut illum *Græcorum Patriarcham* inde facetè appellaverit D. *Montacutus*. Inter hos insignioris notæ erant *Anastasius Josephus Cappadox*. *Arsenius* Archimandrita, *Chariton* Metropolita *Dyrrachiensis*, *Abrahamus* Archiepiscopus *Achridarum*, *Christophorus Angelus*, *Metrophanes Critopulus Berrhaensis*,
Ec-

Ecclesiæ *Alexandrinæ* Protosyncellus, *Gregorius Argyropulus Theffalonicensis*, & *Nathaniel Conopius*, Ecclesiæ *Constantinopolitana* Protosyncellus, postea Episcopus *Smyrnenfis*, ut cæteros omittam. De *Metrophane*, quem præ aliis dilexisse, & de quo optimè merendi, tum literis *Gracæ* frequentè scriptis, tum familiari, dum *Londini* ageret, conversatione peculiare studium adhibuisse videbatur facile animo præfagiens, tantis ingenii, industriæ, & eruditionis dotibus, summos in *Gracâ* Ecclesiâ honores meritò deberi, pauca heic cum veniâ Lectoris inferere libet.

Postquam *Cyrillus Lucaris*, tunc temporis Patriarcha *Alexandrinus*, religionem Ecclesiæ *Orientalis*, superstitionibus & corruptelis mirè fœdatam, repurgari, & res *Græcorum* Ecclesiasticas in istâ tristi rerum catastrophe miserrimè collapsas instaurari non posse, nisi ex pietate, zelo, & doctrinâ Præfulum, aliorumque, qui Ecclesiæ præficiendi essent, longâ experienciâ comperisset, iisdem artibus ad illam conservandam, quibus à *Romanensibus* erat oppugnata, uti oportere pro prudentiâ suâ statuit: neque solidiori fundamento opus illud sanctissimum & verè Christianum, quod sagacissimâ mente dudum complexus est, potuit superstrui. Quapropter juvenes bonæ indolis domesticisque institutionibus ac disciplinis satis exercitatos, & de quorum in bonis literis profectu ex certis tyrocinii tam benè collocati indiciis justas spes aluerat, in *Angliâ & Germaniâ*, ubi veritatis Catholicæ studium maximè vigit, educari jussit, ut accuratâ linguæ *Latinae* & purioris Theologiæ cognitione instructi, post reditum laboranti Patriæ succurrerent, mentesque, contribulium ignorantia obductas, suo lumine illustrarent. Ex horum numero (a) *Metrophanes Londinum* circa vicesimum hujus seculi annum appulit, favori & patrocinio D. *Georgii Abbotti*, Archiepiscopi *Cantuariensis*, commendatus, qui benè gnarus, nusquam, quàm in *Academiis* nostris, aut melius aut fructuosius studiis literarum quenquam vacare posse, illum (b) ad Collegium *Balliolense Oxonii* illicò transmisit, ipsius impendiis alendum. Dum verò *Oxonii* & postea in *Urbe* vixit, (moram enim quinquennii in *Angliâ* fecit) neminem aut benigniorem amicum, aut fidiorem monitorem, aut sui magis amantem, *Junio*

M m m 2

no-

(a) Vide epistolam *Cyrilli* anno 1616. scriptam in *Ægypto*, ad D. *Georgium Abbottum*, Archiepiscopum *Cantuariensem*, in sylloge epistolarum à P. *Colomesio* editarum: *Londini* 1687. pag. 346.

(b) V. pag. 353.

nostro expertus est; quod epistolis sæpenuerò agnovit & semper agniturum, fide interposità professus est hisce verborum formulis, ὁ σὸς περὶ πολλῶν ὀφειλέτης, ὁ τῆς εὐνοίας καὶ Φιλίας, ἐξηρτημένος, ὁ μηδέποτε τῷ ἀγαπᾶν σε παυσάμενος μηδὲ παυσόμενος. Nec fidem hâc in re fefellit: postquam enim Patriarcha *Alexandrinus* fuisset constitutus, non istâ eminentissimâ dignitate elatus, neutiquamque præ fastu pristinæ conditionis, dum in Christiano orbe peregrinaretur, oblitus, ad ista tempora summo animi gaudio & pio divinæ benignitatis sensu retrospiciens, *Junium* literis, quas observantia, quas gratitudo, quas generosæ mentis sublimitas suggererat, salutare dignatus est.

Circa
A. Ch.
MDCXXV.

Angliâ relictâ *Hamburgum* adnavigavit, celebriores *Germaniæ* Academiæ invisurus. Dum in *Juliacensi* Academiâ moraretur, cùm nemo Ecclesiæ *Græcæ* dogmata meliùs & accuratiùs intellexerit, rogatus, compendiarium *Confessionem Ecclesiæ Orientalis Græcæ* scripsit, quam V. Cl. *Joannes Hornejus* ferè post XL. annos edidit *Helmestadi*; viz. A. MDCLXI. in quâ se genuinum verumque *Cyrelli* discipulum, ac dogmatum rituumque, qui in istâ Ecclesiâ per multa secula obtinuerant, nondum introductis *Romanensium* καινοδοξίαις, strenuum defensorem ostendit. Hoc τοῖς ἐν τῆς ἐναντίας Zelotis etiamnum dolet displicetque, qui illum fautoremque suum spurcissimis convitiis proscindunt, & tanquam *Calvinianos* & ἑτεροδόξους criminantur, quasi penes solos Monachos, qui *Italiam* adeunt, dediscere & ejurare, quod antiqua *Græcia* docuerat, sæpè sæpiùs aut persuasi aut coacti, Catholicæ doctrinæ studium fuisset, ipsisque fides unicè constitisset. Sed utriusque confessionis, tum *Cyrellianæ* tum *Metrophanianæ*, auctoritas illæsa manebit apud omnes, qui meminisse volunt, quantæ labes, quâ violentiâ, quibus versutiis technisque inhonestis parumque ingenuis, ab isthoc tempore *Græcæ* Ecclesiæ adhæserint: neque suæ *Confessionis* fidem postea derogasse putandus est *Metrophanes*, cujus in censurâ *Cyrellio*, (modò vera sit) à *Cyrellio Berrhæensi*, sacrilego sedis *Constantinopolitanæ* invasore & ἐπιβάτῃ, aliisque ipsius symmistis intentatâ, nomen reperitur, quasi mutasset sententiam tantâ cum deliberatione ac studio perscriptam; cùm id potius ex vitio humanæ fragilitatis, affectibus, quibus, furentibus in *Græciâ* tumultibus, à potenti λατινοζόντων factione invectis, abreptus fuerat, imputandum jure videatur. Sed ad *Junium* nostrum revertamur.

Cùm Serenissimus Rex *Jacobus I.* subcesivas horas ab ineunte adolescentiâ literarum studiis, animo pacifico & ab armorum & belli strepitu, nisi summa necessitate id exigente, averssimo continenter impen-

pendisset, & sibi & aliis, quos arcanorum illius conscios familiari sermone dignatus est, facile constabat, nihil magis honori regiae Majestatis, aut ipso vivente, aut apud universam posteritatem, quæ omni malo affectu, invidia, injustisque præjudiciis vacua, bonos Principes, quos pietas, quos amor justitiæ & æquitatis, quos cura populorum sibi commissorum, ne ex illorum delirio & inani ambitione, plecterentur, magis ornare, quàm diademata, trabes, aliaque summæ dignitatis insignia, æterno maximèque debito prosequetur plausu, conducere potuisse, quàm si omnia ea opera, quæ aut seriò elucubraverat, aut ingeniosè luserat, severiori lima ultimisque curis denuò adhibitis, iteratâ editione simul, linguâ quidem *Latina*, ab omnibus cultioris literaturæ amantibus legenda, imprimerentur. Compertissimum erat, Regem ipsum *Latine* & elegantè scribere, & expeditè loqui novisse: in opusculis autem *Anglicano* sermone conscriptis *Latine* vertendis, ope & opera V. V. Cl. *Thomæ Rhedi*, & *Patricii Junii* utendum censuit, illius præcipuè, cujus partes in hoc labore subeundo longè potiores erant, qui *Junii* consilio & auxilio fretus, admirabili facundia, & styli facilitate Regis mentem & sensum fideliter reddidit, & explicavit.

Rhædo verò ultimum naturæ debitum solvente, *Joannes Gulielmides*, Episcopus *Lincolniensis*, & magni sigilli *Angliæ* tunc temporis Custos in (a) literis, Maii 24. A. MDCXXIV. ad Ducem *Buckinghamiæ*, maxima apud Regem & Principem gratia pollentem, & qui omnia in Aula potuit, scriptis, *Junium* nostrum uti maximè idoneum per universam *Angliam*, qui isti muneri, nempe ut esset Principi à *Latinis* Epistolis, succederet, enixè commendavit.

Opus illud præstantissimum & verè regium, quod in omnem æternitatem doctissimi regum famam propagabit, tandem prodit A. Ch. MDCXIX. cum elegantissima epistola ad Serenissimum *Carolus* Principem *Walliæ*, & præfatione *Jacobi Montacuti*, Episcopi *Wintoniensis*. Ut verò augustissimus Auctor benevolentiam ipsius, affectum, & amorem ad Academicos suos, pulvere scholastico & umbra innutritos, pariter ac ad bonas literas, quas impendio magis, quàm quisquam hominum privatorum, colebat, & religionem, quàm adeo potenti calamo rueri gestiebat, monstraret, utramque Academiam hoc munere pretiosissimo, mense Maio, A. MDCXX. placuit impertiri, ut in Archivis literariis tanquam in sede propriâ, & Musis ita spondentibus, æternâ

M m m 3

re-

(a) Scrinia sacra *Londini* 1663. folio. pag. 203.

reponeretur. Non aptior quisquam videbatur, qui hac quasi splendidâ ad *Cantabrigienses* legatione fungeretur, quàm *Junius* noster, Bibliothecarius Regius, qui illum in frequenti Senatu Academico, præmissâ breviori oratione, cum literis Regiis obtulit, quas additis quoque orationibus *Oxonii* habitis, & istius celeberrimæ Academiæ literis gratulatoriis, in testimonium obsequii, gaudii, & admirationis, quâ ex contemplatione tantæ ac tam divinæ benignitatis erat abrepta, ad Regem transmissis, (libentissimè illas alterius celeberrimæ Academiæ evulgaturus, si modo nancisci licuisset) in appendice apponam.

Hoc anno Virginem lectissimam *Elisabetham* sibi in Uxorem duxit *Junius*; hâc consorte suavissimis moribus & placidissimo ingenio præditâ felix. Illam verò unius lustri circuitu, postquam quatuor liberos peperisset, statim ab ultimo puerperio in flore juventutis xxv. ætatis anno mors eripuit. Quanto verò luctu & qualibus elogiis defunctam prosecutus fuerit mœstissimus conjux, è monumento, quod in perpetuam ipsius memoriam curavit erigendum, satis innotescere potest.

Pensionem istam, amplam licet, quam ob Regiæ Bibliothecæ custodiam singulis annis perceperat, tantis meritis ac industriæ non satis respondere Amici crediderunt. Ideò cum pro istorum temporum statu, & jure, quod tunc obtinuit, nuper ob dignitatem Ordinis Sacerdotalis post restitutam sub R. *Carolo II.* Ecclesiam justissimis de causis abrogato, dignitatum & beneficiorum Ecclesiasticorum capaces fuerint Diaconi, illius Sacri patrimonii non mediocrem portionem, ipsis intercedentibus, facile obtinuit: duarum Ecclesiarum, tum de *Heighes*, tum de *Llaninnye* in Comitatu *Denbighensi* Rectoratu, & opimâ Præbendâ, ad Thesaurarium peculiaritè spectante, in Ecclesiâ Cathedrali S. *Pauli Londini* donatus. Quâ cum *Ludovicus Bailius*, ad sedem Episcopalem *Bangoriensem* promotus, cessisset, disponendi potestas, jure Regiæ prærogativæ, ad Regem devolvitur, qui literis patentibus, *Westmonasterii* ultimo Augusti die, anno regni sui *Angliæ, Franciæ, & Hiberniæ* decimo nono, & *Scotiæ* quinquagesimo quinto datis, *Junium* nostrum Ecclesiæ *Paulinæ* Thesaurarium constituerebat: ad quam dignitatem à Decano & Capitulo proximo mense admittebatur. Sed ad studia literarum, quod in illius vitâ pertexendâ, cæteris leviusculè tactis, maxime proposui, quibus magis magisque intentus vacavit, redeundum est.

Nondum quicquam publicavit *Junius*, aliorum culpâ, uti supra dixi, impeditus: nemo enim id aut ardentius desideravit, aut laboriosius conatus est, merito suo, tum apud nostrates, tum apud externos, eru-
di-

ditionis famâ celeberrimus: nihil tamen inde de studio & lectione veterum librorum remisit; non animum, quasi literarum pertæsus, despondit; conscientiam industriæ & temporis benè impensæ satis contentus, nomen suum circulis eruditorum plausu excipi & circumferri vix sibi curæ habuit; interim aliorum famæ parum invidens: cum enim nihil suo nomine hætenus in lucem exiisset, aliis idem studiorum genus, pari industriâ, at longè felicioribus auspiciis excolentibus, suppetias ferre, ipsorum gratiâ, aut editos cum manuscriptis codicibus conferendo, aut ineditos exscribendo, sibi magis ad laborandum esse, quasi ex officio & ex publici commodi intuitu, credebat. Audacter dico, nec temerè tamen, neminem ejusdem gradûs & instituti, isthoc tempore per universam *Europam* reperiendum fuisse, qui majorem hæc in re laudem fuerit meritus. Hinc à Viris eruditissimis toties consultus operam lubens præstabat: quod sequentes epistolæ, quod elogia in illorum scriptis ubivis exstantia, satis testabuntur. Ex his paucorum nuda tantum nomina in antecessum recensebo; cætera Lectoris in his studiis aliquantulum versati, & hæc Epistolas vel stringente oculo aut leviuscule inspecturi, industriæ relicturus. Erant autem *Fronto Ducaus*, *Jacobus Sirmondus*, *Dionysius Petavius*, *Lucas Holstenius*, *Joannes Seldenus*, *Joannes Meursius*, *Daniel Heinsius*, *Joannes Albertus*, *Jacobus Gothofredus*, *Hugo Grotius*, *Henricus Valesius*, *Claudius Salmasius*, *Jacobus Usserius Armachanus*, *Isaacus Vossius*, *Joannes Fridericus Gronovius*, *Joannes de Laet*, *Mericus Casaubonus*, *Nicolaus Heinsius*, ut alios taceam, qui Scriptis immortalibus de omnigenâ re literaria præclarissimè meriti sunt. Rogantibus opem operamque non denegavit *Junius*, neque se difficilem præbuit: id enim per totum vitæ curriculum vetuere aut illorum merita, aut innata ipsius comitas, aut publici commodi studium, cui magis quàm privatis suis rebus, vacavit.

Cum Vir illustrissimus, *Thomas Comes Arundellia*, ingens familiæ *Howardianæ* decus, & majoribus suis, nobilitate animi, vitæ splendore & magnificentia, erga bonas literas artesque amore, heroicisque mentis excelsæ dotibus par, ne dicam præferendus, ex *Oriente* magnis sumptibus, præter codices manuscriptos, statuas, gemmas, aliaque quantivis pretii cimelia, ex barbarorum manibus felicissimo V. Cl. *Guillemi Pettai* ausu & curâ erepta, in *Angliam* advehi curasset, ex hisce admirandæ antiquitatis monumentis novam lucem rebus obscuris, & vetustate temporum obductis, affusum iri, id quidem omnes, qui ejusmodi *Inscriptionum* usum & valorem in vetustissimorum seculorum his-

toriis illustrandis novissent, primo aspectu facile credidère. Hasce verò antiquitates eruendi laborem importuno Viri nobilissimi, Historiæ patriæ studiosissimi, & bonis literis promovendis nati, D. *Roberti Cottoni* rogatu suscepit V. Cl. *Joannes Seldenus*, eâ tamen conditione, ut V.V.C.C. *Patricium Junium & Richardum Jamesum Oxoniensem*, (quem lauto stipendio suis ædibus excepit, cujusque sagaci industriâ in codicum suorum manuscriptorum catalogo pertexendo tunc temporis usus est idem D. *Cottonus*) adjutores & socios in apicibus characterum detritis exesisque, & oculorum aciem penè fugientibus revocandis, lacunisque fragminum supplendis, haberet, quorum mutuas collatasque operas ingenuè agnovit: non ita tamen se officio, quod amicitia, quod gratitudo, quod fas jusque exigere videbantur, benè defungi potuisse sentiebat *Seldenus*; quin imò neglecto Magnatum patrocinio, in sinceri affectûs, quem longa amicitia eorundemque studiorum communicatio conciliaverat, perpetuæque observantiæ testimonium, librum *Junio* nuncupare gestiebat, quasi vix aliud nomen occurrisset, cui aut aptius, aut justius, aut majori cum decore esset inscribendus. Quousque igitur marmora ista, quæ immortali istoc opere *Seldeniano* extra potestatem fati ponuntur, utpote non nisi pereunte mundo peritura, vigeant, vigeat quoque *Junianum* nomen, si propriis scriptis ipse non inclaruisset. Veruntamen non diu post felix obtingebat occasio, hætenus toties incassum expetita, quâ se eruditionemque suam, quam *Seldenus* tantoperè deprædicaverat, mundo palam ostendere liceret.

* Circa A. MDCXXVIII. Reversus à legatione *Constantinopolitanâ**, quam summâ cum laude obierat, Vir præstantissimus, D. *Thomas Rowens*, codicem venerandæ antiquitatis, *Græcam* sacrorum Bibliorum versionem à Septuaginta Interpretibus, ex recensione *Hesychii*, & quâ Christiani per universam *Ægyptum* usi sunt, adornatam, & integrum N. Testamentum continentem, à Viro maximo, D. *Cyrillo Lucari*, Patriarchâ *Constantinopolitano*, qui istud pretiosissimum cimelium ex *Ægypto*, relictâ sede *Alexandrinâ*, asportaverat, acceptum, illius nomine Serenissimo Regi *Carolo* primo, beatissimæ memoriæ Martyri, obtulit; munus sanè religiosissimo Principi longè acceptissimum, quod ille in Bibliothecâ suâ, si non tanquam unicum, saltem maximum decus & ornamentum reponi curavit. Quantæ verò futurus esset auctoritatis, quantique in rebus sacris divinisque elucidandis momenti, id *Junio*, qui illo optimè utitur, accuratius & cum otio singulas periodos perpendenti, mox facile innotescebat; dum verò diligenti manu sacras tractaret membranas,

avidisque oculis, singulos apices, ingenti gaudio perfusus, timaretur, ex insperato thesaurus, quasi thesauro superadditus, ad calcem libri *Epistola prima S. Clementis ad Corinthios* penè integra (deficit enim folium unum & alterum) cum alterius fragmento, quæ per tot secula latuerat, iisdem characteribus uncialibus, eademque manu exarata, sese prodit. Ad hanc edendam non tam jussu Regio ac Præsulum hortatibus & consiliis, licet vim pondusque maximum, cui neutiquam erat refragandum, in se habuerint, quàm flagrantissimo de universo orbe Christiano bene merendi desiderio animatus, sese accingens *Junius*, totam literis quadratis, prout in Authentico erat, accuratissimè exscribendam esse pro prudentiâ suâ judicavit, relictis nimirum lacunis & dimidiatis vocibus, quarum reliquæ partes evanescente atramento aut uvido aere adeò sunt detritæ, ut vix apiculi restent conspiciendi, aut earum loco saltem foraminula sive cavitates, quas corrodens gummi fecerat, alicubi interspersæ; deinde formâ, quâ hodiè exstat, ut veram lectionem melius expiscaretur, lacunasque, omnibus ritè perpensis, exquisitiori judicio expleret. Additamenta verò, non tantum, quæ solâ conjecturâ nituntur, sed quæ erant certissimæ & exploratissimæ veritatis, ne quicquam temerè mutasse videretur, & ad amoliendam cujuspiam invidi Censoris obtrecitationem, quasi sanctissimi Auctoris verba pervertisset, ingenioso planè artificio, ut res ipsa omnibus, vel maximè incuriosis, fieret testatior, minio signari voluit. Longâ tamen deliberatione opus erat; nec præcipiti festinatione, (quâ judicium præpeditum, nec sibi satis constans, sæpenumero solet impingere) liber ille, Editoris cujuscunque, licet eruditissimi, summâ curâ vigiliisque dignissimus, in publicam lucem erat extrudendus. Interea, licet operi huic, quod pro munere Bibliothecarii incumbibat præstandum, omnium judicio par habitus, aliorum opem, quam studiosè non captavit, suis viribus, ingenio, & exquisitissimâ linguæ Græcæ cognitione, & subsidiis ex assiduâ veterum Patrum lectione pro ratione ac methodo studiorum antea congestis fretus, pro sapientiâ tamen & modestiâ duxit non sibi esse, si benevolâ mente offerretur, recusandam. Exemplar manuscriptum ad Virum doctissimum, *Joannem Boisium*, *Eliensis* Ecclesiæ Canonicum, transmisit supra memoratus *Joannes Gulielmiades*, Episcopus *Lincolniensis*, qui multas conjecturas & emendationes pro criticâ suâ, quâ pollebat, facultate, rogatus adjecit. Quanti verò hanc venerandi senis amicam operam fecerit *Junius*, non parcus illius judicii & εὐστοχίας in aliquibus vocibus restituendis laudator, in scholiis suis sæpe sæpius ostendit. Tandem ne

longiori morâ virorum harum rerum studiosorum, ubi per *Europam* sparsi erant, quorum aures tam sacri thesauri, nuperrimè è laceris membranarum *Aegyptiacis* eruti, fama penetraverat, flagrantissimis votis eum efflagitantium, expectationem fraudare censeretur, *Oxonium* se contulit, typis à Viro summo, D. *Henrico Savilio*, Academiae dono datis illic usus. Prodiit denique exoptatissimus liber ex typographico illius Academiae celeberrimæ anno *Christi* MDCXXXIII. pientissimi Regis *Caroli* nomine ornatus munitusque. Omnes genuinum hoc S. *Clementis*, *Romæ* Episcopi, scriptum, antiquitate, & auctoritate Apostolorum Epistolis proximum, (neque enim isthoc tempore aut S. *Barnabæ* Epistola, aut septem illæ S. *Ignatii Antiocheni* epistolæ à fœdis Interpolatorum corruptelis puræ comparuerant) debito plausu, admiratione, honore, ac gaudio certatim amplexi sunt, ejusque *αὐθεντίαν* non tam ex sermonis, qui totus pietatem spirat, caractere, omni affectatione vacuo, ex piissimo Auctoris affectu, & zelo ob Christianorum Urbis *Corinthi*, quorum saluti iverit consultum, pacem & concordiam, (quod præcipuum est Epistolæ argumentum ut lites istæ, quæ nuper eruperant, sopirentur) qui ubivis elucet, aut ex dogmatum religionis Christianæ, juxta mentem Apostolorum illic traditorum, simplicitate & puritate, (licet hæc omnia fidem aliquatenus inducere possint) quàm ex Patrum, multa, quæ illic *αὐτολεξεῖ* reperiuntur, citantium testimoniis uno ore prædicaverunt. Gratulati sunt omnes *Junio* hanc penè invidendam felicitatem, cujus diligentia & eruditioni novam debuit vitam & nitorem aureum hoc scriptum, quod hætenus pro deperdito & deplorato habebatur.

Hoc præclarissimo opere optimè defunctus *Junius*, de aliis vetustis Scriptoribus in lucem producendis, prout sui muneris & studiorum ratio postulaverit, seriò cogitavit, justâque venerandæ antiquitatis reverentiâ abreptus, maluit Scriptorum, quos prisca ætas celebravit, felicem piamque industriam, sanctosque labores in memoriam & usum hujus ac sequentium seculorum ex pulvere & situ revocare, quàm ingentibus compilationibus aliundè corrasis congestisque sub nomine suo edendis inclarescere. Quo studio, omni malâ ambitione & inanis gloriæ cupidine amotâ, nihil prius & antiquius habuit, quod licèt minorem pompam & laudem post se apud quosdam insulsos homines, quibus *Interpretis*, *Editoris*, aut *Annotatoris* nomen quippiam mediocre sonat, trahere videatur; omnes tamen qui norunt, quàm spissa ignorantia caligo ac barbaries ante redaccensum *Græcæ* linguæ, politioris literaturæ,

ac Ecclesiasticæ antiquitatis lumen , hisce terris incubuerit , illud Ecclesiæ Christianæ longè utilissimum esse , nec de religione & veritate Evangelicâ divinisque literis melius consuli posse , ultro fatebuntur.

Neminem perpetuò jucundæ ac prosperæ fortunæ tenore accursu gaudere , ex quotidianis vitæ humanæ , malis ineluctabilibus non rarò undeque circumseptæ , vicissitudinibus , & ex mutabili rerum sublunarium conditque , quasi fatalitèr indictâ , cuivis satis constat. Hoc quoque non sine summâ mentis ægritudine expertus est *Junius* , cujus ædes , igni ex ædibus vicini sui erumpente , 7. die Decembris A. MDCXXXVI. dum ille fortè ab Urbe aberat totæ deflagrarunt. Eò tamen minus infelicitèr accidebat , quod absumptâ pleraque ex parte reliquâ supellectile , schedæ codicesque rariores , tanquam tot titiones ex flammis eriperentur. Sed ut ad lætiora , quorum narrationem infelix iste casus paulò interruptit , revertamur.

Circa id temporis , quod commodum accidebat , reverendissimus in Christo Pater , D. *Guilielmus Laudus* , cujus ingentia merita erga Academiam *Oxoniensem* & Ecclesiam *Anglicanam* , (quicquid hodiè calumniantur filii Presbyteranorum , qui fanaticâ rabie efferati illum , cruentâ morte impiissimè multarunt , quorumque seditiosas sacrilegasque molitiones in Rege optimo pessundando , inque evertendâ Hierarchiâ , nulla tacebit ætas nullumque obliterabit tempus) propensissimâ promovendi & ornandi bonas literas voluntate & studio , postquam ingentem Codicum omne genus manu exaratorum molem pecuniis largissimè effusis , ubi ubi merx ista literaria erat reperienda , conquisivisset , elegantissimos typos , omnium ferè linguarum , quæ hodiè obtinent , efformari procuravit ; hoc consilio , ut optimâ fide & curâ recogniti Patres Scriptoresque antiqui , præsertim è *Græcis* , nitidiùs ederentur. Hujus auspiciis mox prodire , tanquam amplæ secuturæ messis , nisi infanda & in æternum lugenda mala universas *Britannias* occupassent , primitiæ , *Theophylacti* , Archiepiscopi *Bulgariæ* , *Commentarius in Epistolas* , diligentia & studio *Augustini Lyndsellii* Episcopi *Herefordensis* , publici juris factus , A. C. MDCXXXVI. & *Catena Græcorum Patrum in Jobum* , collectore *Nicetâ* , *Heracleæ Metropolitâ* , quam ex duobus MSS. Bibliothecæ *Bodleianæ* codicibus *Græcè* primum *Junius* edidit , cum *Latinâ* versione , ex Typographeio Regio A. C. MDCXXXVII. ac *Lando* , virtutibus ac magnitudine animi , quam Archiepiscopali pallio , longè eminentiori , qui illum cæterosque de literis benè merentes omni cum humanitate amplecti , illorumque studia aut munificentia

propriâ aut procuratis à benignissimo Rege, apud quem omnia, quæ exspectari par & fas erat, potuit, annuis pensionibus, aut dignitatibus beneficiisque Ecclesiasticis, fovere solitus est, non tam ad ambiendam gratiam, quâ antea gavissus est, quàm ex debito grati animi sensu inscripsit. Quàm multum tum illorum tum nostrâ intersit, ut *Græcorum* Patrum scripta & commentarii suâ linguâ legantur, non opus est, ut hîc ostendam; cùm illud sit cuivis compertissimum: præterquam quod exemplar illud, quo in *Latinâ* suâ versione usus est *Paulus Comitulus, Perusinus*, S. J. neutiquam industriæ & ingenii laude fraudandus, in aliquibus locis mancum fuerit, multique errores & παρερμηνεῖαι, sensum *Tractatorum* istius divinissimi libri sæpenumerò intervertentes, ex festinatione & oscitantia irreperunt, ut novæ quoque versionis labor necessariò esset subeundus.

Ad calcem hujus *Catena* textum *Jobi*, ut continuâ serie sine aliquâ oculi interruptione légeretur, συληρῶς, eodem prorsus modo, quo, uti ac cæteri libri, qui dicuntur *Poëtici*, in codice manuscripto *Alexandrino* exstat, propriâ manu descriptum apponi curavit *Junius*, cum hoc quidem magnifico elogio, *juxta veram & germanam Septuaginta Seniorum Interpretationem*. Sed hanc non esse puram putam τῶν ὁ versionem, sed mutationes quasdam, sive ab *Hesychio* Presbytero, sive ab alio, collatis, inter se mirè isthoc tempore interpolatorum sive exscriptorum vitio dissentientibus, codicibus, factas passam fuisse, & κοινὴν sive communem esse, ab *Origene* obelis & asteriscis distinctam, epistolâ suâ ad *Junium*, Vir maximus, & hisce studiis accuratissimè versatus, *Jacobus Usserius Armachanus* certissimis argumentis demonstravit: quod pariter quoque in suis ostendit Vir eruditissimus *Henricus Valesius*.

Anno sequente, nempe MDCXXXVIII. cùm id levioris tum operæ tum impensæ fuerit, *Gilberti Folioti*, Episcopi *Londinensis*, *Expositionem in Canticum Canticorum unâ cum Alcuini in idem Canticum compendio*, è Bibliothecâ Regiâ ex eodem typographeio Regio edidit. Cùm multa verò loca Librarii aut imperitiâ aut festinatione mendis inquinarentur, quas ille pro judicio ac sagacitate suâ conjecturis justis, saltem probabilibus, sustulisset, dum liber iste feriis autumnalibus, quibus animi relaxandi & sanitatis firmandæ causâ pro more procul ab Urbe aberat, imprimeretur, emendationes illæ, quarum ope restitui poterat vera lectio, ab operis Typographicis omittuntur; sed ne harum beneficio Lector curiosus omninò fraudaretur, omnes simul ad finem quasi per saturationem ingerere cogebatur, quæ si suis locis ad oram libri fuissent appositæ,

tæ, longè ornatior commodiorque prodiisset. Hoc autem pium nec inelegans, si istius sæculi, quo vixit, quod erat sub temporibus R. *Henrici* II. ferè ante quingentos annos, mores contemplemur, scriptum unius ex Antecessoribus ejus reverendissimo Patri, D. *Guilielmo Fuxono*, Episcopo *Londinensi*, & summo *Angliæ* Thesaurario; (qui ferali pegmate R. *Carolo* I. adstabat, quando ex impiissimâ scelestissimorum Parricidarum sententiâ capite plecteretur, & post tot tantasque cædes felicissimè superstes, instauratâ Monarchiâ & Ecclesiâ, ad thronum *Cantuariensem* evectus, sacro illo ungendi & coronandi R. *Carolus* II. 23. Aprilis MDCLXI. in Basilicâ *Westmonasteriensi* munere functus est) tum gratitudinis tum observantiæ ergo dedicavit.

Postquam verò *Catenam Græcam in Jobum* pulchrè & accuratè editam sacrarum literarum amantibus placuisse, & labores hosce Ecclesiæ Christianæ commodo, sacræ Scripturæ, (cujus studium cæteris omnibus præstabilius haberi debet, quanto divina humanis, æterna caducis, sancta profanis, & solida maximèque necessaria frivolis & merè curiosis antecellunt) omni partium studio posthabito, sanæ explicationi, & veræ religionis pietatisque profectui, quod optimum sanè tum probi, tum eruditi hominis officium est, non parum conducere, ex benevolâ Virorum cordatorum approbatione & applausu intellexerit, eâdem formâ iisdemque characteribus *Euthymii Zigabeni* (uti olim *Theodoreti*) in *Psalms Commentarium*, qui ex *Philippi Sauli*, Episcopi *Brugnatensis*, versione *Lugduni* MDLXXIII. Latine tantum exstabat, Græcè, manuscriptis codicibus inspectis collatisque, cum novâ interpretatione edere apud se constituit. Sed motibus *Scoticanis*, quibus internecinum istud bellum quo *Anglia* paulò post ardebat, & dein trium florentissimorum regnorum everio, horrendaque innumerorum civium strages suam in solidum debent originem, mox erumpentibus, & reverendissimo D. *Laudo*, hujus similiumque operum strenuo promotore, calumniis, odiis, & machinationibus Schismaticorum, jam in sacram Ecclesiæ *Anglicanæ* Hierarchiam apertâ armatâque vi grassari incipientium exagitato, propositum istud mœrens abjecit, illo codice manuscripto ad prelum destinato inter reliquam supellectilem relicto, quem Vir præstantissimus, D. *Isaacus Vossius*, harum mercium optimus æstimator, unâ cum multis aliis *Junii* codicibus manu exaratis, ad augendam incomparabilem Bibliothecam heu! nobis malo prorsus fato, (ut nil gravius, ne aliquibus convitari videar, dicam) pecuniis suis comparavit. Nec à quoquam in dubium vocari possit, quin *Catena* quoque *Græca in Psal-*

mos, *Nicetâ* collectore, quam in peculio habuit *Junius*, multique alii *Græci* Scriptores tunc temporis inediti, Archiepiscopi *Laudi* auspiciis, & illius labore & curâ è tenebris, quibus erant sepulti, in publicam lucem emerissent, si per istorum temporum infelicitatem licuisset. Nemo enim, quam ille, has literas aut benigniori patrocinio aut effusiori munificentia adjuvit: nemo, quam hic, aut feliciori industria aut impensiore studio elaboravit. Vix tanti erit referre illius conjecturas in quædam dubia epistolarum S. *Ignatii* loca, & notas criticas in epistolam S. *Polycarpi* ad *Philippenses*, quas in sua editione protulit D. *Jacobus Usserius Armachanus*: uti & *Photii* libellum de Episcopis, Metropolitibus, &c. cum suâ ipsius versione in Bibliothecâ *Vossianâ* reperiendum, cod. 192. & Epistolam *Origenis* ad *Africanum* de *Historiâ Susanna*, Exemplari *Hæscheliano* longè auctiorem in Archivis splendidissimi Collegii S. & individuae Trinitatis *Cantabrigiæ*, cui suas conjecturas addidere idem *Junius*, & Vir doctissimus *Herbertus Thorndicius*, & D. *Gale*: ut hîc quoque nonnisi ὡς ἐν παρόδῳ recenseam, illum *Anselmi Roberti* Episcopi *Londinensis*, aliorumque epistolas, uti & *Philostorgii* historiæ Ecclesiasticæ synopsis, *Nicephori* Chronologiam auctiorem & emendatiorem, & *Libanii* Rhetoris τὰ παραλειπόμενα, & *Stratonis* epigrammata edere sibi proposuisse.

At non publica mala, non res domesticæ, non difficultates, quibus erat ingruente bello colluctandum, non ætas ingravescens illum à proposito editionem *Græcorum* Biblicorum è codice *Alexandrino* publicandi amovere poterant. Hoc enim à longo tempore animo infederat, ne solus ille thesauri incomparabilis aspectu oculos mentemque pascere censeretur, ac si orbi Christiano, cujus intererat, ut omnium manibus versaretur, ipsius usum ac commune illud beneficium invidisset. Quippe hoc erat quorumcunque eruditorum votum & desiderium: quod ipse ante multos annos in stricturis ad S. *Clementis* epistolam excitaverat. Interim Vir maximus, *Hugo Grotius*, sagaci mente prævidens, variantes lectiones hujus antiquissimi codicis sibi, commentarios in sacros N. T. libros molienti, utilissimas fore, moræ impatiens, amicis suis in *Angliâ* importunis literis instabat, ut ad ipsum mitterentur. Tanto viro in re tanti momenti, pro literarum sacrarum ac nominis *Grotiani* amore, prompto animo obsecutus *Junius*, eas benevolè admodum communicavit, publici commodi, quàm propriæ famæ, longè studiosior: uti ante plures annos miserat variantes lectiones ex antiquissimo codice Evangeliorum, quem superiore seculo Biblio-

the-

thecæ Academiæ Cantabrigiænsis Theodorus Beza, collectas, ad Petrum Puteanum, qui illas (a) J. Morino communicavit. Has quanti fecerit Grotius, quantumque lumen ad eruendum verum quamplurimorum locorum sensum ex his scintillis accenderetur, cuius commentarios istos leviusculè inspicienti facilè patebit. V. V. Cl. Claudium Salmasium & Danielelem Heinsium, quibus erat compertissimum, ingens subsidium ad S. Scripturarum intelligentiam ex vetustissimis istis membranis suppeditari posse, idem quoque incessebat desiderium, quod si non in totum impleverit, saltem aliquantisper sedare, missis excerptis, annisus est. Decennium ferè effluxerat, ex quo hic labor priùs in mentem venisset, qui usque & usque interpositâ Catena in Jobum editione, aliisque, quæ se objecerant impedimentis erat differendus; his autem defunctus, hoc sanctum opus, quod plurium annorum industriam desiderabat, quantum per publica mala licuit, seriò aggressus est, omnes tum industriæ, tum ingenii nervos contendens, ut, faventè Deo, faventibus bonis eruditisque Viris, ipso vivente, ad felicem exitum perduceretur. Collectâ undique ex antiquis Patribus, prioribus editionibus, aliisque libris impressis ad hanc rem quoquomodo spectantibus, variarum lectionum, quibus sacer textus aut firmari aut illustrari queat, mole, de membranis ac chartis, scripturarum sive integros libros sive fragmenta complectentibus, quas edax tempus, aut Christianorum inscitia, aut Turcarum barbaries intactas reliquerat, hætenus ineditis, maximè erat sollicitus, ut cum hoc exemplari, quod commentariorum suorum ἑδαφος fore statuebat, diligentissimè collatæ, mutuam sibi invicem lucem aspergerent. Quicquid alicubi in Bibliothecis per Angliam & præcipuè in Academiâ Oxoniensi, latebat, ipsi erat reclusum: nec huic redintegrato labori malè respondebatur. En novum prorsus & inusitatum industriæ hac ex parte specimen & exemplum. Exstat in Bibliothecâ Bodleianâ ex dono D. Gulielmi Landi Exemplar Pentateuchi Arabicum Lemniscis, asteriscis, obelis, cæterisque notis ab Origene excogitatis, ornatum, quod (b) D. Pocockius cum Junio nostro percurrit, ut ille quæ ad Græcam τῶν LXX. editionem adornandam facerent, exciperet. Tam benè usuro quisque

è

(a) Vide Morini exercitationes Ecclesiasticas & biblicas de Græci Hebraique textûs sinceritate. lib. I. exercit. II. cap. 3. pag. 47. Fol. Paris. 1669. & Epistolam Puteani ad Camdenum: pag. 202. 2011.

(b) V. præfat. D. Pocockii ad variantes lectiones Pentateuchi Arabici in sexto tomo Bibliorum Polyglottorum.

è Nostratibus ejusmodi gazas concedere gestiebat. Inter alia verò *νεμύ-
λια* integras *Isaia* & *Jeremia* prophetias asteriscis notatas auspicatò nac-
tus est. De aliis aliunde conquirendis par quoque erat sollicitudo. *Holf-
tenium*, imprimis sibi longo amicitiae usu conjunctissimum, cui Biblio-
thecæ *Vaticana* & *Barberina* adyta reſerata fuerant, crebris literis rogat,
ut quicquid inibi elici possit, quod editioni suæ ornandæ conducatur, ac
præſertim lectiones admodum vetusti codicis in Bibliothecâ *Barberinâ*,
XII. *Prophetas*, unâ cum veterum Interpretum versionibus ad oram ap-
positis, continentis, illico transmittantur, quod itidem ex alio codice
Prophetarum, qui olim erat Cardinalis *Rupifucaldii*, in sui gratiam fie-
ri à *Joanne Auberto*, Collegii *Laundunensis* Præfecto, obnixè obtesta-
tur. Potuit sanè ex (a) *Frontonis Ducai*, S. J. qui idem opus magno a-
nimò olim molitus est, schedis multum profecisse; sed illæ post ipsius
mortem, jussu Pontificis & Cardinalium malè metuentium, ne scrupu-
lis Christianorum mentibus ex tanto variantium lectionum, quas con-
gesserat, cumulo forsan injectis, auctoritati vulgatæ *Latinae* editionis
quicquam decederet, *Romam*, ne Jesuitis quidem invitis, trans mitte-
bantur, flammis, neque enim mītiùs fatum à tam severis Censoribus
exspectare poterant, absumendæ. Utcunque futuri operis specimen,
quod jam præ oculis meis habeo, primum nimirum caput libri *Gene-
seos*, unâ cum doctissimis Scholiis, edere placuit. Omnes illud certa-
tim arripiunt, avidisque oculis legunt perleguntque, ac optimâ spe de
promissâ editione, quam cum maximo & vix continendo affectu ex-
spectant efflagitantque, conceptâ, quasi moram pertæsi, Orbem Chris-
tianum hoc eximio thesauro, quod dudum fuisset locupletandus, ni-
mium diu hætenus caruisse amicè queruntur. Aliquanto ante hoc spe-
cimen editum tempore, conventus iste (partim è Ministris, partim è
Laicis conflatus) *Presbyteranorum Westminsterii* derebus religionis post
eversam Ecclesiam *Anglicanam* ad fœderis *Scotici* normam componen-
dis consultantium, procurante D. *Seldeno*, *Junium* ad susceptum hoc
opus perficiendum stimularat: ne qui sanctimoniae prætextu Hierarchiam
sacrique cultûs officia & ritus evertissent, sacrarum literarum ac piæ an-
ti-

(a) Vide epistolam ipsius ad nobilissimum Virum D. *Robertum Cottonum*, in
appendice ad Syllogen epistol. *Camdeni* p. 374. & *Sarravii* epistolam ad *Jacobum*
Usserium Armachanum in Sylloge epistolarum *Arausioni* 1654. p. 245. & etiam e-
pistolam responsoriam D. *Usserii* in Sylloge epistolarum *Usserianarum Londini* 1686.
p. 527. & ejusdem aliam ad *Arnoldum Bootium* p. 621.

tiquitatis oſores quoque haberentur. Sed deerat Vir ſummus, D. *Laudus*, ante biennio martyrio coronatus; deerant auſpicatora tempora: omnia quippe erant ſeditionum ac tumultum plena.

Independentes cæterarumque Sectarum colluvies, enthuſiaſtico furore perciti, ac excuſſo Presbyteranorum jugo, rerum potiti, in ſacras literas, tanquam religioni maximè inimicas, debacchantur, ut in tantâ rerum confuſione grande illud opus, quod tantis ſumptibus conſtaret, edendum in ſe ſuſcipere vix quiſpiam Typographus auſus ſit. Tandem anno MDCLII. ſuperatis difficultatibus, pactiſque inter D. *Junium* & *Cornelium Baum*, inſignioris notæ apud *Londinenſes* Bibliopolam, conditionibus, exortæ ſunt lites, quæ hoſ conatus, jamjam quàm maturimè fieri licuit, ad umbilicum perducendos, retardarunt. Nam intellecto, quod *Junius* à codice *Alexandrino* in multis, ubi Librarius, ipſo judice, errâſſet, aut ſenſus minus integer aut dictio dubia videretur, ſibi diſcedendum eſſe ſtatuert, puram putam verſionem Septuagintaviralem, ex (a) editionibus *Complutenſi*, *Venetâ*, *Romanâ*, intermiſſis ſuis quoque, ſi fas ſit credere, conjecturis, conflata, quaſi exhibiturus, interceſſère Viri eruditi, qui textum Codicis *Alexandrini* ab omni ſive mutatione ſive mutilatione integrum, retentis vel ipſis nævis, (ſi qui fuerint qualicunque modo admiſſi) manifeſtis licèt, dari cupiebant, præſertim D. *Seldenus*, qui, uti olim à Viro reverendo & eruditiffimo, D. *Thomâ Mareshallo*, amico meo integerrimo, τῷ νῦν ἐν αἰίοις, accepi, *Baum* ipſum in illius ædibus pro more adeuntem verbis irarum plenis perſtringens, ita profatus eſt, *Si hæc in re D. Junio morem geſſeris, ſpero me eoſque victurum, donec te cum libro tuo* (ſic peſſimè habito) *in flammas apud* (b) *Smithfield conjectum videro.*

Nullus autem dubito, quin *Junius* tantorum Virorum judicio & auctoritate motus, novam editionis fideliffimè, juxta ſeriem venerandi codicis, ne erroribus quidem, ſive in verbis, ſive in peculiari ſcribendi modo, qui, cùm conſtans ferè & perpetuus ſit, non caſu contigiffè videri poteſt, omiſſis, rationem, abjectâ alterâ, quæ tantoperè diſplicuerat, ſi vixiſſet, eſſet initurus. Nam paulò poſt immodicis ſtudiis, ſenio, aliifque vitæ incommodis fractus, magno literarum damno mortî ſuccubuit, relictis Scholiis doctiffimis uſque ad xv. caput libri *Nume-*

O o o

ro-

(a) V. D. *Waltoni* Prolegom. ix. Sect. 33.

(b) Area vicina eſt, quâ olim ſub temporibus Reginæ *Mariæ* Proteſtantes erant uſtulati.

rorum, non enim ultrâ inconditam notarum struem digesserat, (textu nimirum codicis *Alexandrini* in illis Scholiis cum codice *Ebræo*, cum *Aquila*, *Symmachi*, & *Theodotionis* fragmentis, cum editionibus hactenus impressis, cum Patribus, præsertim vetustioris ævi, in Commentariis, Homiliis, aliisque scriptis versionem *Græcam* citantibus, cum denique vetustissimis MSS. heic apud nos & alibi repertis, diligentissimè collato) quæ Vir præstantissimus, *Brianus Waltonus*, in sexto tomo Bibliorum Polyglottorum in immortale nominis *Juniani* decus edenda curavit. Ab illo tempore codex ille venerandæ antiquitatis jacet neglectus, cujus licet variantes lectiones aliquomodo collectæ in Bibliis *Waltonianis* exstent, dignissimus tamen est, qui per se integer & dignitate suâ conspicuus in lucem publicam exeat: & forsan dudum exiisset, favente, imo jubente, Serenissimo Rege *Carolo II.* ni istud consilium dirissimæ quorundam hominum, sub quæsitissimo legum & religionis tuendæ prætextu, novis rebus studentium, molitiones intervertissent.

Exercitu Rebellium jam victoriarum, post copias Regias profligatas, successu elato, inque Urbem socordiâ ac perfidiâ Civium admissa, *Cromwellus* aliique Antesignani, earundem partium sequaces, perpetratâ inmani R. *Caroli* cæde, exclusisque, non sine irrisione, suis Dominis, *falsi Senatus* Adessoribus, omnia vi planè tyrannicâ occuparunt. Aedes Regiæ scelestis his latronibus, ut splendidiori apparatu viverent, in præmium quasi bellicæ virtutis assignatæ. Eò usque Bibliotheca Regia raptorum manus evaserat, pene indemnis; sed mox amoto *Junio* A. MDCXLIX. libri, numismata, annuli, & gemmæ sculptiles, quas olim cum integrâ *Gorlæi* dactyliothea, pecuniis suis acquisivit *Henricus*, Princeps *Walliæ*, facile in prædam cedebant: quod maxime ipsi doluit, qui de hoc commisso sacrilegio infamem istum Nebulonem, & communis incendii facem, *Hugonem Petrum*, cui Bibliothecæ claves à Barone *Greio*, quo nemo in Regem capitalius odium exercuit, concreditæ erant, suspectum habuit. Suspiciones hasce veras iustasque fuisse, casu quodam inopinato, qui rem extra omnem dubitationem posuit, postea compertum habuit *Junius*. Dum enim à *Thoma Bowesio* Equite, quem D. *Simondsius Derwesius*, in hisce gazis literariis satis gnarus, amansque, ultimarum tabellarum Curatorem moriens constituerat, ut iisdem debitum pretium, pro peritia sua, quâ maxime inclaruit, statuere vellet, invitaretur, statim sine laboriosâ indagine, multa ex istis numismatibus, tum aureis, tum argenteis, sibi notissima, ut-

utpote è cimeliarchio Regio surrepta, reperit. Cùm verò jam liqueret, *Derwesum* illa furto sublata, à scelesto illo *Hugone* pecuniis numeratis emisse, Arbitr ille testamentarius pudore suffusus, & quasi attonitus, annulos gemmasque mirabili arte incisas, in reliquis loculamentis dispositas coram viro oculatissimo in medium producere volebat. Non minor mitiorve codicum erat peculatus & expilatio, cujus quoque manifestus à *Junio* idem *Hugo* postulatur: qui aliquanto post tempore chartis declaratoriis & literis ad *Junium* datis, hoc crimen sibi ma'è intentari questus, quasi esset omnium mortalium hæc in re innocentissimus, fidem, quam tories ejuraverat, interponit, nullos libros, se conscio, inde fuisse ablatos, exceptis duobus aut tribus, quos *Pavio Amstelodamensi*, Ordinum *Belgii* confœderati Legato, tradendos jusserint Commissarii, clavibus post aliquot septimanas *Iretono*, *Cromwelli* scero, redditis. Hoc tamen responso *Junius* sibi, cui homuncionis nequitia & fraudes erant cognitissimæ, parum satisfieri palam professus est.

Ne verò isti peculatui favere, aut omnem supellectilis librariæ curam penitus abjecisse viderentur, *Consilarii Statûs*, in istâ novâ Republicâ ita nuncupati, *Joannem Duræum*, non incelebris nominis, ob suum unionis inter Ecclesias Reformatas transmarinas inducendæ studium, Bibliothecæ *Jacobæ* Custodem constituébant, ordinatione de libris & numismatibus recensendis additâ, quo tempore duodecim ferè numismatum millia, ut charta recensiois, quam vidi, indicat, in pixidibus reperiiebantur. Sed de his gazis conservandis, quas avari homines, publicum commodum suo postponentes, postea surripuerunt, non satis cautum erat, vix quater mille relictis, quæ Serenissimus Rex *Carolus II.* ab exilio redux, in Cimeliarchio suo reposuit. Idem quoque triste fatum codicibus, præsertim manu exaratis, quos augustissimi Reges, *Jacobus I.* & *Carolus I.* pari curâ & munificentia congefferant, incubabat; ita tamen, ut omnes ex fanaticorum militum lasciviente ingenio & improbitate non simul periissent, prodigio non absimile videatur, pariterque de tantarum ruinarum reliquiis patriæ & Reip. literariæ gratulari debeamus. Non celabo Lectorem id, apud multos dudum percrebuisse, quod *Junius* sagaci mente præsentiens, huic optimæ prædæ homines sacrilegos ac literarum osores inhiare, antequam à munere abdicaretur, plurimos inde codices, cum animo restituendi, in suas privatas ædes transfulisset, qui post ipsius mortem publicè quasi sub hasta venderentur. Sed in re incertâ quicquam pronunciare mihi nec libet nec licet. Constat sanè *Junium* à *Gracis* Episcopis & Presbyteris, quos omni officiorum

28. Octob.

MDCL.

7. April.

MDCLII.

genere sibi devinxisset, & aliunde, suo ære grandem librorum MSS. quorum Catalogum ipsius manu descriptum vidi, cumulum comparavisse; quibus si Regios quosque immiscuisset, malo prorsus fato accidebat, si, quod aliqui criminantur, illi quoque, qui seponi debuissent, tanquam *Juniana* hæreditatis pars, alienarentur. Sed quod fortasse hanc impactam criminationem eluere videbitur, vix hoc candidis & sanctis *Junii* moribus competere posse credo, ut nisi rem habuisset compertissimam, in aliorum peculatum, adhibitis querelis, iisque palam intentalis, adeò tragicè inveheretur. Interea verò *Junii*, fama manente integra, mecum sanè lugebunt omnes, qui Patriæ honori consulunt, hoc triste damnum Bibliothecam Regiam passam fuisse, quod vix seculum reparabit.

Ex nostratibus sibi maximè familiares, & in rebus suis strenuos adjuutores, habuit *Junius*, D. *Robertum Cottonum* Equitem Auratum & Baronettum, *Jacobum Usserium*, Archiepiscopum *Armachanum*, *Joannem Seldenum*, *Joannem Rousæum*, Bibliothecæ *Bodleianæ* Præfectum, *Gerardum Langbainum*, Collegii *Reginensis* Præpositum, & Archivorum *Academiæ Oxoniensis* Custodem, D. *Franciscum Kinastonum* Equitem Auratum, & unum è Regii corporis Satellitibus, sive *Armigeris*, ut loquuntur, qui illi elegantissimum *Chanceri*, vatum nostrorum veteris ævi principis, duorum primorum librorum poematis de *Troili* & *Crescidæ* amoribus versionem, versibus rhythmicis, in quibus *Latini* sermonis puritas servatur, contextam, inscripsit, præter plures alios non infimæ sortis, quos comitate suâ (hanc enim artem ipse per tot annorum lustra in Aulâ Regia versatus optimè calluit) sibi æterno benevolentiaæ mutuique amoris nexu devinxit. De exteris verò maximi ob eruditionis famam nominis, quibuscum arcta necessitudo & familiaritas intercesserat, omninò superfluum erit hîc dislerere. Id sequentes epistolæ & elogia satis testabuntur. Non invitus dixerim, nimiam istam comitatem, qua illos cumulavit, penè in crimen degenerasse, utpote Bibliothecæ Regiæ damnosam: dum ex effusissimo de aliorum studiis bene merendi desiderio codices MSS. quantivis pretii ab *Anglia*, aliquando per decennium exulare pateretur.

In illo fatali dissidio inter Serenissimum Regem *Carolus* I. beatæ memoriæ & subditos, qui rebellionem maximè infamem Imperitissimo Ecclesiæ reformandæ zelo & auctoritatis Parlamentariæ, quod planè nullum erat, jure & titulo prætexebant, constat, *Junium*, ab ipsa pueritiâ quietis & umbræ amantissimum, militaribusque studiis omninò inassuetum, summisque be-

beneficiis acceptis, optimis Regibus, *Jacobo I. & Carolo I.* obstrictissimum ex innata pietate & indole, si fidei & conscientiae rationes non impediissent, quod tamen maximè impediabant, ne quisquam subditus contra legitimum Regem insurgeret, non procaciter, non perfidè, non impiè se gessisse, sed domi in museo manentem, illorum temporum calamitates lachrymis non fictis, gemitibus, ac vero luctu deplorasse. Quod verò Rhapsodus quidam, (cujus tamen, ut id obiter addam, censuræ vel potius convitia, quæ non à judicio aut amore Veritatis, sed ab innatâ feritate, & animo ad maledicendum nimium proclivi pleraque ex parte profiscuntur, parvi sunt æstimanda) criminetur *Junium* Presbyteranorum partibus favisse, utinam maculam hanc pari facilitate eluere liceret. Excusationis, si non justæ, saltem cujuspiam vel leviusculi ad istam censuram minuendam momenti, loco obtendi potest, illum non nisi post eliminatam Ecclesiæ *Anglicanæ* Hierarchiam cum factiosis istis & schismaticis hominibus in gratiam rediisse; ab iisdem captatâ quavis occasione novis beneficiis auctum, & dum rerum potirentur, Bibliothecarii munere adhuc fungentem: novam Independentium factionem protervè grassari cœpisse; hæresesque fœdissimas, quæ Religionis Christianæ fundamenta convulsum ivere, plebis incautæ animis subdolè inspersas, jam palam sese ostentantes, scriptis, disputationibus, concionibusque propugnari: (abruptis enim sacri regiminis Episcopalis disciplinæque Ecclesiasticæ repagulis, mala hæc, *novæ Reformationis genuini fructus*, tanquam tetra eluvies, impetu quodam ineluctabili obvia quæque prosterrens, universam *Angliam* inundaverant) in hisce denique turbulentissimis temporibus *Junium* operam suam non in defensionem illorum à Rege legitimo aut ab Ecclesiâ apostasiæ, sed bonarum literarum propagandarum studio Presbyteranis Proceribus & Ministrellis addixisse: sed arc tam cum D. *Usserio*, *Waltono*, *Thorndicio*, *Hammondo*, *Pearsono*, qui omnes erant strenui Hierarchiæ Ecclesiasticæ pugiles, & Presbyteranæ paritatis, quæ est mera ἀταξία & confusio, osiores, aliisque ὁμοψύχοις, amicitiam coluisse, quosque omni debita cum veneratione, summoque honore, quem illorum pietas, dignitas, eruditio, & perpeffiones pro causâ Dei, Ecclesiæ, & Regis vendicaverint, prosecutus est. Quicquid fuerit, (neque enim illum ἀναμάρτητον præfractè contendero) quilibet veri amans, aut in hisce literis paulò exercitatus, nullo partium studio & amore abreptus, nisi omnem candorem & humanitatem, nisi vim mentis, quæ de rebus sapienter judicare novit, penitus exuat, mihi sponte & faciliè dabit, *Junium* ob summam eruditionem, & flagrantis-

finum illud, quod per integrum vitæ curriculum præ se tulerat, & re ipsa mille modis præstiterat, sacras bonasque literas promovendi studium inter præcipua *Britanniæ* decora recenseri debere.

Sed ad exitum hujus breviculæ narrationis cum vita *Junii* finiendæ propero.

Cum jam vis militaris, conculcatis legibus, ubique per universam *Angliam* grassaretur, omnemque tranquillitati publicæ frustra expetitæ aditum interclusisset; *Junius* ad ædes generi sui *J. Atwoodi* I. C. qui *Elisabetham* filiam natu maximam duxerat, *Bromfeldam* in provinciâ *Essexiensi*, ineunte autumno repetit, illic familiari apud suos convictu mentis malorum publicorum sensu graviter sauciæ & afflictæ, dulce remedium quæsiturus, spe saltem paulò longiùs producendæ vitæ: quod ab hisce domesticis subsidiis potuit exspectari. Sed divinam voluntatem de illo aliter statuisse, tristis eventus docuit. Nam mox præcipiti, eoque gravissimo, morbo correptus, ademptâ ultimæ testamenti tabellas condendi opportunitate, septimo die Septembris A. C. MDCLII. piè in *Christo* obdormivit, postquam ante octiduum sexagesimum octavum ætatis suæ annum explevisset. Corpus elatum sine funebri pompâ (neque enim ea tempora ferebant) in superiori vicinæ Ecclesiæ intra cancellos parte, mœrentibus amicis, reconditur, largâ nigri marmoris laminâ sepulchro superimpositâ, cum hâc inscriptione, ab omni fastu alienissimâ, Anglicè conceptâ, quam hîc ad verbum *Latine* dabo.

Subtùs jacet reconditum corpus Patricii Junii, Armigeri, filii Domini Petri Junii, Equitis, qui reliquit duas filias & cohæredes, Elisabetham, Joanni Atwoodo, Armigero, & Saram, D. Samueli Bosæ Equiti nuptam. Obiit 7. die Septembris 1652.

Frustra quis augustius monumentum, elegantioremve Epigraphen defuncti laudibus turgentem desideraverit. Istis quasi instabilis & citò perituræ famæ subsidiis non eget *Junius*, cujus memoriam libri, quos edidit longè perenniori elogio, quàm quodvis Mausoleum, ad seram posteritatem prorogabunt.

ELOGIA & TESTIMONIA

Clarissimorum & doctissimorum Virorum

de D. PATRICIO JUNIO.

ISAACUS CASAUBONUS in epistolâ ad D. Petrum Junium XV. Kal. Septembr. 1613. p. 985.

Quæsi vi sâpè à filio tuo Patricio, optimo & doctissimo juvene, quid didicisset de tuo itinere. Is mihi paucis diebus, antequam iret Oxonium, confirmavit, & te & uxorem tuam ἀνόσως καὶ ἀπηπάντως in patriam rediisse.

PETRUS PUTEANUS in epistolâ ad G. Camdenum, Paris. 3. Kal. Septembr. 1617. pag. 193. 194.

Patricius Junius, Vir eruditus, utriusque nostrûm amicissimus, has tibi tradit: postea, Patricium Junium vidi libentissime, & quantum in me fuit, illi favi: patuit illi Bibliotheca Ill. Thuani, ut & talibus Philologis eruditis & doctis.

Idem ad eundem 5. Id. Novembr. 1617. pag. 202.

Velle aurem, quæso, Patricio Junio, eruditissimo Viro, de collatione antiquissimi Codicis MS. Evangeliorum, & ut stet promissis, urge. Nam conjicio ex Epistolis D. Pauli planè antiquis, quæ penes me sunt, Theodorum Bezam negligenter librum veneranda antiquitatis vidisse; non vanus erit ejus labor, nec industria nostra.

THEODORUS GOTHOFREDUS ad G. Camdenum, Paris. 30. Augusti 1617. pag. 194.

Les vôtres m'ont été rendues par Mr. Patricius Junius, homme de mérite, & pour tel reconnu par ceux, qui l'ont vû de deçà, & comme vous l'avez décrit.

JOANNES HOTMANNUS ad G. Camdenum, Paris. 2. Septemb. 1617. pag. 196.

J'ai été très-aise, que par cette occasion j'ai pris connoissance avec Mr. Junius, Gentilhomme d'une rare vertu & erudition. C'est une obligation, que je vous ai avec toutes les précédentes.

FRONTO DUCÆUS in notis ad Orationem Gregorii Nysseni contra Fornicarios.

Gre-

Græcus textus nuper editus est, ex Apographo Cæsareæ Bibliotheca cum altero Patricii Junii, oblato, nunc & emendato.

DIONYSIUS PETAVIUS in notis ad *Themistii* XIX. orat. p. 728. *Paris.* 1618. loquens de oratione *Juliani* Imp. nondum editâ, quam S. P. Q. *Atheniensium* scripsit.

Eam nos orationem, cum aliquot aliis, accepimus ab humanissimo eruditissimoque Viro, Patricio Junio Londinensi, Regiæ Bibliothecæ Præfectoro, quas propediem favente Deo, cum reliquis Juliani operibus, publicare decrevimus.

Et in præfatione ad editionem operum *Juliani* τῆ παραβάντῃ *Parisii* 1630. 4°. loquens de iisdem orationibus & epistolis antea ineditis:

Hæc omnia Londinensi ex Bibliotheca misit ad nos Patricius Junius.

Ita nomen illius, quasi prioris humanitatis & grati officii illum pœnituiſſet, nudè absque omni elogio & præfatione laudis profertur, pro absurdissimo more, qui apud plures, sese pro solis Catholicis venditantes (exclusis aliis diversæ communionis, isthoc titulo longè meliori jure ornandis) obtinuit, ac si morum urbanitas ac ejusmodi commendationes famæ zeli, quem præ se ferunt, & veritati religionis Catholicæ, quam falsò sibi arrogant, quippiam essent detracturæ. Imò *Petavius* ingrati animi postulandus est, qui tractatum *Petri Alexandrini* de novissimo *Christi* Paschate in *Uranalogio* suo editum se à *Junio* nostro accepisse reticet.

JOANNES AUBERTUS in præfatione ad I. tomum Operum S. *Cyrilli*, Archiepiscopi *Alexandria*: *Paris.* 1638.

Certè prætermitti non debet eximium V. V. Cl. Junii & D. Rouse in editione nostrâ paranda adornandaque studium, qui Homilias aliquot & variantes in eas lectiones ex instructissimâ Oxon. Academiæ Bibliothecâ, tanta mihi cum celeritate miserunt, ut prævertisse quodam modo viderentur petitionem meam.

HUGO GROTIUS in epistolâ ad *Franciscum Junium*: *Parisii* 31. Maii 1638. pag. 434.

Quod si pateris & hoc adjici, meo ut nomine comiter salutes Viros egregios, Seldenum, Patricium ὀμώνορον tuum, Pettæum, & si qui his similes sunt alii, ad multa merita tua, quibus obstrictum me habes, novum hoc adjeceris.

Idem ad eundem 23. Septembr. 1638. pag. 465.

Beasti me, quod D. Seldeno, & D. Patricio Junio memoriam mei renovasti. Plurimum ipsis debeo, & publico nomine, ob labores istorum, qui-

quibus humanum genus sunt demeriti, & privato, quod multis argumentis comperi eos mihi optimè velle. Beneficium, quod ultrò offert D. Patricius Junius, faciendi mihi copiam lectionum variantium, quas è Græcis codicibus misit Cyrillus, maximi facio, ut debeo; neque tantùm gratissimum erit id munus, sed & operam dabo, ut id quamplurimis profit.

Idem ad eundem $\frac{12}{22}$ Januarii 1639. p. 498.

D. Patricius Junius ita est de literis meritis, ut ab amantibus literas omnibus amari debeat. Accedet ad communem causam privata, ex qua me debitorem habeat, si ipsius beneficio, quod & ipsius nomine D. Goffius obtulit, nancisci possim codicis Cyrilliani novi Fœderis excerpta.

Idem ad Samsonum Johnson: Lutetiae Septembr. 1638. pag. 466.

Patricium Junium amavi semper, amo nunc etiam, quod postcatenam in Jobum, & Theophylacti quædam, etiam Euthymium, boni judicii serâ etate Scriptorem, publici juris facit.

Idem ad eundem 9. Febr. 1639. p. 508.

Plurimum Junius duobus Patricio Franciscoque, debeo pro datis liberalitèr, transmissisque diligentèr lectionum discrepantiis. Sunt in illis observationibus digna non pauca, quibus suus erit usus. Sed nunc maxime Evangelia me occupant: quare si cumulare beneficium beneficio velitis, & me earum lectionum, quæ ad Marcum, Lucam, & Joannem pertinent, compotem facere, felicem me tanto munere judicabo. Rogo autem, ut tua comitate & gratia agantur D. Patricio, quod hæc mihi præstiterit, & D. Seldeno, quod Vir meo judicio maximus mei vivat memor.

CLAUDIUS SALMASIUS in præfatione ad Achillem Tatium: Lugduni Batav. 1640.

--- ubi intellexi exemplar manuscriptum ejusdem Auctoris exstare in Londinensi Regiâ Bibliotheca, à Viro clarissimo præstantissimoque, Bibliothecæ istius Curatore, pro ea, quâ est humanitate & comitate, & pro no ad literas juvandas affectu; facile usum ejus mihi impetravi. Hoc exemplar Casauboni olim fuisse, manus ejus ad oram passim adscripta mihi significavit. Agnovi in eo passim & Henrici Stephani, ejus Soceri, manum, ut ab eo habuisse manifesta sit fides.

Postea; Vir etiam doctissimus & clarissimus Lucas Holstenius --- Româ suum codicem transmisit, quem ipse contulerat cum Anglicano illo ex Bibliotheca Regia, cui Patricius Junius V. Cl. præest.

Idem in præf. ad libr. de primatu Papæ: Lugd. Bat. 1645.

Clarissimus vir & celeberrimus, Patricius Junius, *nuper mihi significavit Βερλαὰμ Μοναχὸς πρὸς Νικόλαου Ἀρχιεπίσκοπον περὶ ἀρχῆς Πάπας in Bibliotheca Regia Londinensi exstare, qui non potest esse alius ab eo, quem hic edidimus.*

CLAUDIUS SARRAVIUS ad Jac. Usserium Armachanum: Paris. 9. Novembr. 1648. in Sylloge epistolarum Arausioni 1654. pag. 245.

Εὐφράνθη ἡ καρδία μὲ καὶ ἡγαλλιάσατο ἡ γλῶσσα, *viso specimine Alexandrini exemplaris, quod isthic excudi cœptum est. Sed quare trahitur nobilissimi operis editio? festinato sanè opus esset, & qualemcunque moram omnes docti & probi impatienter ferunt. Magna quippe in Ecclesiam utilitas inde redundabit, uti & in summum Virum, Patricium Junium, gloria non vulgaris. Cujus tu quoque particeps eris, pro ea, quam impendis, opera, cum in prolegomenis adornandis, tum in urgendo laudabili hoc proposito.*

GERARDUS JOANNES VOSSIUS, de origine & progressu idololatriæ, lib. III. c. XCIX.

Sed verè hujus avis (Phœnicis) meminit Apostolorum σύγχρονος, Clemens Romanus, epistola ad Corinthios priori: quæ pauculos ante annos prodiit in lucem egregiâ V. Cl. Patricii Junii curâ.

ISAACUS VOSSIUS in notis ad epistolam S. Barnabæ pag. 308.

Nunquid in epistola Clementis, quam nobis dedit Vir maximus, Patricius Junius Bibliothecarius Regius, (cui ego tantum debeo, ut plura ei debere non possim) similia occurrunt?

Idem in literis ad Jacobum Usserium Armachanum v. Octobr. 1650. Holmiæ scriptis: in collectione literarum Usserianarum. Londini 1688. pag. 556.

Diu est, quod de Seldeno & Patricio Junio nulli omninò huc perlati sunt nuntii. Eorum Virorum studiis ex animo favet Regina. In Patricium verò, si quid Regina nostræ esset juris, non tam diu textus ille Bibliorum Græcus in tenebris delitesceret. Sed non cuique contingit doctis parere Dominis.

ANDREAS RIVETUS, Critici Sacri lib. I. c. 8.

In eâ (S. Clementis epistolâ) reperiuntur, quæ à nonnullis Veteribus citantur, ut in suis notis ex collatione ostendit eruditissimus Editor, qui veram ac genuinam esse Clementis epistolam existimat, non obstante fabulâ de Phœnice, quam ad illustrationem doctrinæ de resurrectione adducit.

Quod

Quod postea fecerunt alii plures ex Veteribus. Argumenta Viri doctissimi expendere poterit Lector eruditus.

DANIEL HEINSIUS in Exercitat. Sacris ad S. *Matthæi* cap. VII. lib. I. cap. 5. p. 33. editionis *Cantabrigiensis*, locum ex epistola S. *Clementis* citans, addit,

Quam stylo scriptam Apostolico, aut qui ad eum proximè accedit, Patricio Junio, summa eruditionis Viro, debemus.

Idem in *Aristarcho* sacro ad calcem sacrarum exercitationum ad N. T. *Lugd. Bat.* 1639. c. 13. p. 819.

--- Ut & de iis, in quos *Septuaginta Interpretes Poëticos* distinxerant *Scriptores*: cujus luculentum nobis nuper specimen à clarissimo & eximio *Patricio Junio* editus exhibuit *Jobus*.

Idem in parte alterâ cap. 2. pag. 857.

Ad quem locum Olympiodorus, quem in præclarâ illâ in Jobum Catenâ Viro eximio summoque amico nostro, Patricio Junio, Serenissimi Magnæ Britanniae Regis Bibliothecario, debemus.

JOACHIMUS JOANNES MADERUS in præfatione ante editionem epistolæ S. *Clementis* ad *Corinthios*, *Helmeſtadii* 1654.

Luci illam non ita pridem donavit rursus Vir clarissimus Patricius Junius, Serenissimi, heu quondam! Britanniarum Regis Bibliothecarius, cui propterea maximas certè gratias debemus. Mox --- Non erat, quo te amplius morarer; quandoquidem nunquam satis laudatus Patricius, sua ad Lectorem præfatione, Veterum testimonia supra subnexa, in reliquis tibi poterat satisfacere.

CHRISTIANUS RAVIUS in epistolâ ad *Reyherum* ante libros *Conicarum Sectionum Apollonii Pergæi* in *Graciâ* deperditos. *Kilomii* 1669. 8o.

Scriptum ejus codicis Goliani erat Mauritanicæ scriptura; quod non credo Cl. Virum inde attulisse; cum ejus jam olim in Belgio & Anglia fuisset indicia, renunciatum sepè sit à nobilissimo illo Bibliothecæ Regiæ Præfecto, Patricio Junio, qui addebat, mirari se, quomodo jam Cl. Snelii, Mathematici insignis, tempore exstiterit, quod certò sciat, Leidæ Apollonius integer, & tamen nil ejus tam longo spatio ævi prodierit.

CORNELIUS TOLLIUS in epistola ad *Christianum Ravium Rhe-nis*. *Augusto* 1647.

Mitto literas celeberrimo Viro, Patricio Junio, quod & tu monueras, atque illum facio plurimi. Non dubito, quin per te consequar varias il-

las lectiones Palæphatiorum codicum, quas impetratas multum cupio: Jam quippe festino editionem illius libri; neque subsidium illud habeo, nisi quod nuper suppeditavit magnus Salmasius MS. Londinensis ἀπόγραφοι. Tibi autem acceptum feram, quicquid ulterius hac in re gratificatum mihi fuerit à Cl. Junio.

Auctor vitæ Joannis Morini, Londini 1682. pag. 71.

In Anglia Comberi præsertim & Junii, Virorum doctissimorum, amicitiam coluit, & ad utrumque liberè scripsit, quid de vetusto illo codice Græco LXX. Interpretum Versionis sentiret, qui ab Ægypto in Angliam deportatus fuerat: maxime in epistola ad Patricium Junium, cujus operâ liber Jobi Londini editus fuerat, de codicis illius, quo usus fuerat Junius, vetustate & bonitate fusiùs differit.

JACOBUS USSERIUS Armachanus in Syntagmate de Græca LXX. Interpretum versione Londini 1655. p. 105.

Geneleos quoque, Levitici, Numerorum, Deuteronomii, Josuæ, & Judicum fragmenta quadam Græca vetustissima, obelis & asteriscis signata, Claudius Sarravius in Parlamento Parisiensi Consiliarius Regius: integram verò Esaiæ & Jeremiæ Prophetiam, asteriscis insignitam, communicavit Patricius Junius, Regius apud nos Bibliothecarius: quorum alterum per literas tantum nobis notum, alterum amicum intimum & integerrimum, morte nobis ereptum, luctu serio prosequenti sumus.

Idem in præfatione ad Epistolam S. Barnabæ.

Quæ quidem in Barnabâ frustra quesita, in priore Clementis epistola, (à doctissimo Patricio Junio non ita pridem editâ) totidem verbis expressa invenimus.

Idem in Dissertatione de Symbolis: Oxonii 1660. p. 25.

Quò spectat Photii Constantinopolitani Patriarchæ locus, in Dissertatione de Spiritus sancti processione contra Latinos: quam XII. Panopliæ suæ dogmaticæ Euthymius Zygabenus inseruit, sed à Francisco Lino in Latinâ versione consultò omissam, ex codice nuper è Græcia allato communicavit mihi amicissimus Patricius Junius.

Pag. 26. Dicit, se Symbolum Athanasianum à Græcis interpolatum dare ex apographo V. Cl. Patricii Junii.

Pag. 38. Ex veteribus membranis Cottonianis (à quibus Auctoris nomen aberat) Rythmos istos elegantissimos (nempe Hildeberti Cenomanensis) descripsimus; & ex altero Bibliothecæ Regiæ codice, ab amicissimo Junio accepto, alicubi emendavimus.

Idem in notis in S. Polycarpi epistolam ad Philippenses pag. 1.

Cum

Cam θυσιαστικῇ à Clemente, in epistola ad Corinthios, (quam in hac alias etiam non semel Polycarpus est secutus) μωμοσινοθεν τὸ προσφερόμενον conjunctum cernimus, ubi μωμοσινόπων officium fuisse pluribus nos docuit doctissimus Junius, ne quid vitii aut labis sacrificio, priusquam altari imponeretur, subesset, diligentèr dispicere.

Idem in literis ad Cl. Sarravium Parisiensis Curiae Senatorem $\frac{13}{23}$ Febr. 1647. Londini scriptis in Sylloge epistolarum Londini 1686. pag. 527.

Alexandrini verò exemplaris (quod post Basilii M. tempora descriptum fuisse, præfatio illius, quæ ibi habetur, in Psalmos satis indicat) editionem) quæ à te tantoperè postulatur, vel flagitatur potius) irgere non cesso. Id oneris in se suscepit Vir doctissimus, Patricius Junius; cuius primum specimen simul cum hisce mitto. Mihi enim præter ἐργαδιώτης officium, aliud nihil hîc incumbit, nisi, ut de ipsa LXX. Interpretibus adscripta versione, quid sit sentiendum, quædam adnectam prolegomena.

Idem in literis ad Ludovicum Capellum 27. Octobr. 1653. Londini scriptis p. 596.

Codicem τῶν ὁ Alexandria à Cyrillo Patriarchâ in Angliam transmissum (quem Theclæ vocant) edere cœpit eruditissimus Junius. Sed eo ad meliorem vitam translato, nulla illius editionis spes nobis est relicta. Circumdantur tamen apud nos Biblia Polyglotta, in quibus veteres sacri contextus editiones uno conspectu representatæ exhibentur. In his Alexandrini illius codicis cum editione Gracæ Vaticanæ collatio instituitur.

Vide quoque epistolam illius Anglicè scriptam ad Arnoldum Bootium. pag. 621.

JACOBUS MONTACUTUS, Episcopus Wintoniensis, in præfatione ad opera R. Jacobi I. Latine, Londini 1619.

Edwardus sextus, in tanta vitæ brevitate, quâ eximias animi dotes mundo explicare non potuit, historiam tamen sui temporis scripsit, & tres linguâ Gallicâ, de fide, de idololatria, seu imaginum cultu, & de Papæ primatu, quos Duci Sommersettenfi, avunculo suo, inscripsit. Epistolas etiam & Orationes Græcas Latinasque varias conscripsit in Bibliotheca Regiâ superstites, quas eruditus fidusque Bibliothecæ Regiæ Curator, Patricius Junius, regia Auctoris manu conscriptas, mihi monstravit.

JOANNES SELDENUS ad Auctariolum Marmorum Arundellianorum p. 182. Londini 1628.

Orationem Juliani, unde hoc descripsimus, MS. mecum pridem communicavit, uti solet id genus alia, pro sua humanitate Vir doctrina, &

morum suavitatem insignis, Patricius Junius, Bibliothecarius Regius, & de hoc loco me monuit. Integræ orationem cum duabus aliis Apostat, nondum in lucem editis, ante sexennium transmisit ad V. Cl. doctissimumque, Dionysium Petavium, qui eas publici juris facere pollicitus est.

Idem in libro de dominio maris lib. 2. c. 6.

--- *Uti etiam binis in Bibliothecâ ad D. Jacobi Regiâ, quod adnotavit mihi vir doctissimus amicissimusque, Patricius Junius.*

Idem de Synedriis lib. I. p. 220.

Locum descripsit Vir eximius, Patricius Junius.

Vir optimus & doctissimus HENRICUS HAMMONDUS in Dissertationibus de juribus Episcopatus. Dissertat. V. c. 3. p. 264. ubi malam cujusdam periochæ in epistola S. Clementis ad Corinthios interpunctionem & interpretationem rectissime emendat:

Quod doctissimo Clementis Interpreti, quomodocunque exciderit, certe non placet.

Editor epistolarum Photii (quas Vir admodum reverendus & doctissimus, D. Richardus Montacutus, Episcopus Norwicensis Latine vertit, & prelo paravit) sub nomine Typographi:

--- *Quibus accesserunt epistolæ aliæ quinque de rebus in jure canonico Orientalium dubiis: has inter alia plurimæ ex Oriente secum in Angliam advexit Christianus Ravius, easque cum Cl. Viro, Patricio Junio, communicavit, qui pro summo suo in Remp. literariam studio earum mihi liberam fecit potestatem, eo nimirum animo, ut publici juris fierent.*

Vir eruditissimus, GERARDUS LANGBAINUS, in notis ad Longinum περί ὕψους pag. 115.

Robortelli alteram (editionem Longini) benigne nobis communicavit in Reip. literaria bonum natus, clarissimus Vir, Patricius Junius, Bibliothecæ Regiæ Curator dignissimus: transmisit item & codicem manuscriptum, ipsissimâ πολυμαθεστάτῃ Stephani manu exaratum.

MERICUS CASAUBONUS in Prolegomenis ad Marcum Antoninum: Londini 1643.

Magna tum memini spes animum pertentabat, si fortè exemplar Antonini, quo B. M. parens usus fuerat, adipiscerer, hand pauca in eo reperiendum me ad oras (quæ in plerisque veteribus legendis ejus sedulitas & diligentia) notata, quæ magno futura essent auxilio. Sed eum, cum humanissimi juxta ac eruditissimi Viri, Patricii Junii, Bibliothecæ Regiæ Præfecti dignissimi, operâ consequutus essem, quàm spe meâ frustratus sim,
ip-

ipsum illum testor, optima fidei, nec minoris in his judicii, testem omni exceptione majorem.

Idem in notis pag. 8.

Id eò verisimilius mihi sit, quod ante mensem unum aut alterum, quàm hæc scriberem, indicio V. Cl. de literis & literarum amantibus omnibus indefessa industriâ meritissimi, Patricii Junii &c.

JOANNES PRIGÆUS in notis ad Apologiam Apuleii. pag. 147. Paris. 1635.

Imaginem delineationemque ejus (i. e. marmoris in ædibus D. Marroceni Venetiis) (ut & aliorum quoque) debemus nunquam laudato satis Petæo nostro; applicationem ad Historici narrationem Patricio Junio, Serenissimi Regis nostri Bibliothecario, homini ad literaturæ omnis, duntaxat Græcæ, beneficium nato.

Idem in præfatione ad Apuleii Metamorphoseos libros. 1650.

Sequentes libros contulimus cum uno tantum MS. codice, quem à nobis acceptum Gulielmus, nuperus Cantuariæ Archiepiscopus (Vir literis ornandis attentissimus) donavit Oxoniensi Bibliotheca. Ex eo penu instructissimo, interventu Cl. longèque doctissimi Viri, Patricii Junii, illius ad nos fluxit temporaria usura. Ejusdem Amici beneficio inspeximus Colvianam editionem.

ABRAHAMUS WHELOCUS in præfat. ad Bedæ Historiam Ecclesiasticam gentis Anglorum. Cantabr. 1644.

D. Patricius Junius Serenissimæ Regiæ Majestati fidelis Bibliothecarius, Vir inclytus, alter inter nos Casaubonus, ut Latinas, sic & patrias literas cum Græcis conjunxisset.

JOANNES FELLUS Episcopus Oxoniensis in præfat. ad epistolam S. Clementis. Oxonia 1677. loquens de codice Alexandrino in Bibliotheca Regiâ.

Biblia sacra ad exemplaris istius venerandi fidem se luci daturum spondebat Vir eruditissimus, Patricius Junius, Regiæ Majestatis Bibliothecarius; Clementis autem editionem re ipsa præstitit, quam nos hîc denuò representamus.

--- *Siquidem ea habetur de eruditione, industria, & fide D. Junii apud omnes existimatio, ut eandem suspitione aliquâ labefactare, non incivile modo, sed iniquum prorsus videatur.*

--- *Demum in editione ista versionem Latinam recensuimus, parcè tamen, & cum debita erga doctissimum Junium ejusque manes reverentiâ.*

D. FRANCISCUS KINASTONUS, in epistola dedicatoria ad
Ju-

Junium, præfixâ suæ versioni primi libri lepidissimi poematis *Galfredi Chauceri* de amoribus *Troili & Cresseida*. Oxonia 1635.

Quare cum ita se res habeat, eroticum hoc poema, cujus frontem tuo amicissimo nomine decoramus, avi injuria oblitteratum ferè, & inter perditum recensendum, ad te & tuum patrociniū inter alia priscorum opera & pegmata non immeritò confugere videtur: cujus duo nomina sunt totidem bona omina, quæ Auctori Chaucero & mihi aliquid fausti portentunt. Nam cum tu ob stirpis & stemmatis tui claritatem ex verè nobili & Patricio ordine sis ortus, cum tu ipse propter morum tuorum suavitatem, gestus modestiam vita integritatem, doctrinam variam, & in priscorum scriptis & monumentis insignem perspicaciam, in Rep. literariâ meritò inter Patres conscriptos habearis: tu identidem pari jure nomen Junii mereris, cum neoterici omnes tibi noti & familiares sint, & plurima indies mediteris, quæ apud posteros nominis tui celebritatem augebant; cum tu Regiæ Bibliotheca non solum Custos, sed ambulans Bibliotheca sis. Sed ut modestiæ tue faveam, singula non recensebo: fas tamen sit hoc unum dicere, quod me tacente postera ætas loquetur, non solum S. Clementis epistolam, verè Apostolicam, oblivione diu immersam, per te & tuâ operâ è tenebris erutam fuisse & in lucem datam: verum etiam LXX. Seniorum Græcam versionem ex codice totius orbis vetustissimo, literis majusculis exarato, sed ita à tineis & temporis invidia exeso & oblitterato, ut in omni pagina plurima elementa & verba integra desiderentur, tuis indefessis lucubrationibus indies emendari, & prelo in bonum publicum adornari. Cætera exscribere non vacat.

Idem in epistola ad Joannem Rouse, Bibliothecarium Oxoniensem, præfixâ libro 2.

--- Cum appareant rari nantes in gurgite vasto, & inter regia & primi honoris sydera, vix ullus in nostro horizonte beneficus asterismus reperiatur, qui Musis sit propitius: felicem me existimo, & illis etiam gratulor, quod Castora & Pollucem adspiciam: nempe lucidos & literatos vos fratres, Patricium Junium atque temet ipsum, lucubrationum mearum censores, non minus doctos & eruditos, quàm benevolos & candidos nactus sim.

V I T A
J O A N N I S D E E,

Mathematici Angli:

Scriptore

THOMA SMITHO,

*S. Theologiæ Doctore & Ecclesiæ
Anglicanæ Presbytero.*

V. T. V.

JOHN B. B.

W. T. V.

THOMAS SMITH

W. T. V.

V I T A

J O A N N I S D E E.

Mathematici Angli.

O A N N I S D E E, (quem in secutura ipsius Vitæ & Studiorum historia ad omnem homonymiam amoliendam vocabulo Linguæ Latinæ genio magis conformi, *Devum* appellabo) primos vitæ halitus *Londini* decimo tertio die mensis Julii, hora IV. & minutis XI. P. M. A. æterni Verbi incarnati millesimo quingentesimo vicesimo septimo, excepit. Patrem habuit *Rolandum Devum*, Virum probum, & re domestica satis lauta gaudentem, cujus cura pro affectu erga filium suum à natura indito, utpote puerum egregiæ spei bonæque indolis, in illius mente literis *Græcis Latinisque* informanda maximè impendebatur. Studiorum verò, quibus pueri imbui solent, curriculum, partim *Londini*, partim *Chelmesfordiæ* in Provincia *Essexiensi*, feliciter emensus, decimo sexto ineunte ætatis anno *Cantabrigiam* in Collegio, D. *Joannis* Evangelistæ memoriæ dicato, altioribus disciplinis erudiendus, ab amantissimo Patre, exeunte nimirum anno 1542. mittebatur.

Togam Academicam indutus, sive consiliis & documentis Amicorum, sive propria sponte & virtute, & ardentissimo literarum amore accensus, in ista lubrica ætate, desidii & luxui nimium quantum obnoxia & dedita, satis gnarus, non nisi magna industria magnam eruditionis famam acquirendam esse, pertinacissimo & quidem propemodum incredibili labore, quasi sacro voto obligatus, & à quo nullis voluptatibus, blanditiis nullis, aut quorumpiam importunis invitationibus se abripi siverit, evolvendis Libris, juxta methodum, in ista Academia juventutem instituendi præscriptam, sub seduli *Tutoris* cura, moderato quatuor horarum singulis noctibus somno contentus, duabusque horis, prandii & cœnæ tempore, aliisque laxamentis ad vitam sanitatemque tuendam ne-

cessariis, tantummodo impensis, reliquas octodecim, demptis publicarum precum in Sacello habitarum, quibus interesse oportuit, intervallis, inviolabili pertinacia, alacer devovit & consecravit

Post susceptum Baccalaureatus in Artibus gradum, idem literarum amor pertinaxque studium mansere, & jam maturescere cum anni judicio, qualem Scientiam ex encyclopædia, quam totam accuratè complecti, humanas vires longè supergredi compertum habuerat, pressius excolere pro vitæ suæ rationibus commodum videretur, animo perpendens, ex vehementis insitæ indolis propensione, quam sapientia, libratæ omnium rerum momentis, magis magisque firmavit, Mathematicas Disciplinas cæteris longè anteponendas esse facillè sentiebat. Ad hunc scopum meliùs feliciùsque attingendum, cum pauci è nostratibus illo tempore ista laude emerent, utpote in exercitationibus Theologicis, aut in Juribus coronæ contra Curie Romanæ usurpationes defendendis maximè occupati, mense Maio A. 1547. ex *Anglia* in *Belgium* navigavit, amicitiam cum magnis quibusdam viris, puta *Gemma Frisio*, *Gerardo Mercatore*, *Gaspare à Mirica*, *Antonio Gogava*, aliisque harumce Scientiarum Mystis, initurus, ut illorum consiliis adjutus, quid sibi in isthoc stadio juxta decursuro faciendum esset, auspiciatius intelligeret. Quid enim à talibus Magistris discipulo excelsa indole & ingenio pollenti sperare non licuit? Nec expectationi defuit successus: imò omnia supra votum cessere. Post aliquot menses *Cantabrigiam* redux, secum *Gemma Frisii* radium & annulum Astronomicum, utrumque æreum, ab illo recens fabricatum, duosque ingentes *Mercatoris* globos attulit, quos postea Bibliothecæ Collegii S. Trinitatis in Sociorum Alumnorumque usum donavit. Ille autem orbium cœlestium contemplationi per multos annos addictus, aliquot millenas observationes, horis minutisque pleraque ex parte notatis, factas, in Ephemeridas & Adversaria congeffit, tam in siderum motibus distantiisque indagandis, quàm in viribus & influentiis in mundum hunc elementarem, moresque & fortunas hominum inde derivatis, fallaci & penitus incerta conjectura erundis, maximè, ut videtur, occupatus, puriorisque Astronomiæ studio assanias, quas deperibat, Astrologorum, pro lascivia ingenii adjunxit.

Cum autem Rex *Henricus VIII.* magnificum Collegium Sanctæ & individue Trinitatis honori dedicatum in ista Academia condidisset, dignus habitus erat *Deus* noster, qui inter primos socios accenseretur, & mox ibidem Græcæ linguæ secundarius Prælector constitutus. Non multo post *Aristophanis* Comœdiam, cui titulus *Eupvri*, exhibendam cura-

vit, in qua scarabæi ad *Jovis* Palatium evolantis, cum homine corbe onusto, fiebat repræsentatio: quo viso, obstupuerunt omnes, qui aderant, multique, virium artis Mechanicæ penitus ignari, rumusculos sparsere, quasi *Devus* magicis artibus jam initiatus, ope Dæmonum rem istam mirabilem effecisset. Ita ab ipsius juventute infamiam veneficii & magiæ, sive jure, sive injuria, in se contraxit: cujus suspicio plurimorum animis adeò altum infidebat, ut nulla illius excusatione & apologia, nulla, ut ut sacra, obtestatione inde elui potuerit.

A. 1548. laureâ *Magistri* insignitus, mox iterum *Angliam* reliquit, *Cantabrigiæ* æternum valedicturus, sive se majores in Scientiis abstrusis, quas impigrè venatus est progressus in exteris Regionibus facturum crediderat, sive ut ab amicorum censuris & criminationibus, quasi illicitis artibus operam dedisset, liber, quicquid animo adlibuerit, majori otio minorique incommodo daret in effectum, sibi soli, remotis arbitris consciisque, vacans, sive aliis de causis, prorsus incertum. Ab hoc enim tempore mihi perquam verisimile videtur, *Devum* spes vanas in animo aluisse, licet sub specioso *puram veritatem, & Thesaurus cælestis sapientiæ investigandi* prætextu, se tandem aliquando, quod mortalibus vix datur assequi, atteciturum, & inde ex studio Mathematicarum Scientiarum, Physicæ, & Chymicæ, in arcana naturæ, & rerum tum naturalium tum divinarum profundiora penetrandi, & novam, eamque planè mysticam, Philosophiam, quasi vilesceret & omnino repudianda esset, quæ tunc usu communi obtinuerat, introducendi, & denique sibi ipsi ex indulgentia vanissimæ & prorsus damnandæ curiositatis insignem apud omnes formam adsciscendi ardorem crevisse: cujus propositi impietatem sub plausibili Scientiarum Mathematicarum prætextu, tanquam sub speciosis involucris, à quorumvis conspectu occulere voluit. Nemo sanè harum rerum peritus negaverit, *Devum* insignis Geometræ, uti opera edita testantur, elogium meruisse: interim mihi, de illo sæpè sæpius, & quidem mente seria, perpendenti, penè constat, conjecturam istam tanquam clavem ad abditos illius mentis sensus, quos subdolè intus fovebat, recludendos, admitti oportere, quod postea luculentiùs patebit.

Hoc animo eodem anno, relictâ patriâ, testimonialibus Universitatis *Cantabrigiæ* literis munitus, *Lovaniensem* Academiam, viris omni
1548.
Scientiarum genere excultissimis florentem, profectus est, ubi pro tempore fixis sedibus, opes dotisque ingenii versuta modestia expandens, magnam eruditionis famam sibi comparavit, tum coram magno in honore habitus, tum crebris literis, tanquam oraculum, novusque reconditoris sapientiæ Magister, undiquaque, quò fama de illius admirandis

elogiis spargeretur, consultus. Huc enim illius invisendi gratia viri Nobiles, *Hispani, Itali*, alique ex aula Imperatoris *Caroli* quinti, tum temporis *Bruxellis* splendidissimo Principum & Magnatum comitatu stipati, certatim, & quidem non modico numero, confluxerunt, an fama, avidissimis attonitisque auribus quotidie ingesta, non hac ex parte deliquisset, & an ex præsentia esset minuenda, experturi: inter quos eminere Dux *Mantuanus*, & D. *Ludovicus de la Cerda*, postea titulo Ducis *Medinæ Cali* insignitus: ut ab aliorum ædes *Devi* adire solitorum nominibus, quos aut Cæsarea Majestas ex *Bohemia, Dania*, & alibi, aut Artium excolendarum cura in istas regiones pertraxisset, recensendis abstineam. Ita apud quosvis exteros ipsius fama percrebuit. Nec minorem tamen à suis *Anglis*, in *Belgio* quoque commorantibus, inibat gratiam; è quibus *Gulielmus Pickeringus*, juvenis ornatissimus, nobili stirpe oriundus, & postea equestri dignitate ornatus, & legationibus *Gallica & Germanica* insignis, in ipsius ædibus recipiebatur, utpote hospes redditus, ut radii, annuli Astronomici, Astrolabii, & globorum usum majori commodo edoceretur.

Cùm verò ingenium versatile, & quarumvis disciplinarum capax habuerit, animi causâ, paulisper interruptis studiis Mathematicis, methodum & regulas Juris Civilis explorare voluit, tanto quidem cum successu, ut in quibusdam *Antinomiis* solvendis, & multis obscuris intricatisque legibus enodandis, & novo lumine perfundendis feliciter versari perhiberetur: quod Academia *Lovaniensis* publico testimonio agnovit.

Exacto *Lovanii* biennio, rectâ mense Julio, 1550. celeri quatuor dierum itinere, se *Lutetiam Parisiorum* proripuit, ubi bonæ literæ omne genus, auspiciis, patrocinio, & munificentia *Francisci* primi, Regis *Galliae*, non ita pridem introductæ, maximè florebant. Sed in ista confertissima Studiosorum ex omnibus ferè Orbis Christiani plagis illuc venientium turba, diu celari non potuit, sive per se ex vano ostentandæ arcanorum naturæ & penitioris Philosophiæ, hætenus incognitæ, quam sibi arrogaverat, Scientiæ pruritu, sive per gentiles, ut major inde in communem patriam derivaretur honos, illorum importunis precibus facilè expugnatus, *Euclidis* Geometriæ Elementa gratis publicè explicare & interpretari in se suscepit: sed nova planè methodo & à nemine prius tentata, h. e. *Mathematicè, Physicè & Pythagoricè*. Quàm primùm verò innotuit, ejusmodi Prælectiones in *Rhemensi* Collegio protenus habendas esse, tantus erat Auditorum concursus, ut schola illis capiendis non suffecerit; cæteris ob angustiam loci exclusis ad fenestras usque in
atrio

atrio scandentibus , ne istis acroamatibus fraudarentur. Hi rerum , quas ore rotundo , faciliq̃ue verborum profluentia , & quidem summa , ut videtur , confidentia , proferebat , sive magnitudine , sive mira novitate perculsi , ab hisce laudatissimis initiis (nondum enim vicesimum quartum ætatis annum explevisset) maxima quæque , ab aliis , veteris Philosophiæ jamjam obsolescentis placitis pro more addictis , neutiquam attingenda , bona firmaque spe freti , unanimes ominabantur. Etenim in explicandis *Euclidæis* definitionibus , oculis quod solo intellectu & imaginatione exquisitè & accuratè percipi poterat , repræsentans , majorem , quam olim *Cantabrigiensibus* suis artificio volantis scarabæi , illorum menti incussit stuporem. Hinc multi , eruditione & ingenio præstantes , cùm ex publicis hisce dictatis , privatisque colloquiis crebrò habitis , abundè ipsis satiffieret , ipsius amicitiam sollicitè ac sollerter captarunt , quam postea omni cum obsequio & affectu , literarum commercio conluerunt : quales erant *Orontius Miraldus* , *Petrus Montaureus* , *Ranconetus* , *Danefius* , *Jacobus Sylvius* , *Jacobus Goupylus* , *Turnebus* , *Straselius* , *Vicomercatus* , *Paschasius Hamelius* , *Petrus Ramus* , *Gulielmus Pastellus* , *Fernelius* , *Joannes Magnienus* , *Joannes à Pena* & *Petrus Nonius* , quorum plerique omnes scriptis editis inclaruerunt. Nec cum his solis , quorum familiari consuetudine , dum in *Gallia* esset , usus & sed cum aliis doctissimis viris , *Aureliani* , *Coloniæ Agrippinensis* , *Heidelbergæ* , *Strasburgi* , *Verona* , *Padua* , *Urbini* , *Roma* , aliisque præcipuis Orbis Christiani Academiis & Urbibus , Mathesin & Philosophiam publicè docentibus , idem literarium commercium frequentibus epistolis amœbæis deinceps exercuit , quæ , si exstitissent , non modicam illiusmodi Scientiis lucem foenerarentur.

Potuit quidem inter Regios Professores Mathematicos numerari , annuo ducentorum coronatorum salario , urpote muneri proximè vacaturo substituendus , modo præstolari , moramque illic facere vellet : sed planè nolebat indigeua *Gallus* fieri , ne aut revertendi in patriam , aut aliò , quò mens potenter inclinaverit , peregrinandi libertas sibi adimeretur. Alias quoque lautas condiciones , ab illustrissimis viris , *Rohanio* & *Monlucio* , legationem apud Imperatorem *Turcarum* propediem obituro , oblatas , ne à naturali sui jure cessisse videretur , si in alienam clientelam transisset , pari mentis constantia præfractè respuebat. Interim quivis ingenuus hoc , tum excelsi animi , istiusmodi angustis spatiis neutiquam includendi , tum magnæ , quam apud *Gallos* , acquisiverit , existimationis & famæ manifestum esse indicium facile concesserit.

Anno sequente ad finem vergente , in *Angliam* reversus , non ista studio-

studiorum præmia, non istos utiles, quos expectarat, fructus sibi collatum iri percepit, sive ope & commendatione Magnatum destitutus, sive ineluctabilibus præjudiciis oppressus: (vix enim honorarium istud centum coronatorum per annum indulgentia R. *Edwardi* sexti concessum memorari merebitur.) Non tamen quicquam de assiduo labore & industria remisit studiis perditus & pernox maximè intentus. Postea verò ad levandas molestias vitamque curis domesticis distractam aliquo modo leniendam, rectoriis *Uptonæ*, non procul à *Sabrina* ripis sitæ & *Long-Lednamæ* augebatur.

1553.

Post mortem R. *Edwardi* VI. *Maria*, soror illius natu maxima, & filia R. *Henrici* VIII. primogenita, capeffivit solium. In ista verò rerum apud nos fatali conversione, quæ proximè secuta est, mutata per universam *Angliam* Religione, *Deus* aliquantisper mala passus est, tum ob fictum hæreseos crimen, quod mactandis bonis orthodoxisque Christianis, portentosum transsubstantiationis dogma amplecti recusantibus, prætexebatur, tum maximè propter longè atrocius flagitium ipsi impactum. Aiebant enim, illum veneficio & magicis quibusdam incantamentis Reginæ vitam tollere molitum fuisse: scelus equidem tortricibus ungulis ultricibusque flammis expiandum, si quicquam in istis apud plebem sparsis fabulis adfuisset veri. Hujus enim impii facinoris à duobus delatoribus postulatus, apud *Hamptoniensem* Curiam severum subiit examen, propositis primò quatuor articulis à D. *Joanne Bourne*, Secretario, deinde aliis octodecim à Consiliariis simul coactis, super quibus erat respondendum: aliquandiu sub custodia Lictorum ibi detentus, hinc *Londinum* raptus, sistitur coram D. *Brookio*, Communium Placitorum Justitiario, denuò examinandus. Tandem post aliquot septimanas cum integra res in stellata Camera *Westmonasteriensi*, istiusmodi criminationibus dijudicandis proprio Tribunale, ita strenuè & dilucidè innocentiam suam tutatus est, ut ab omni suspicione læsæ majestatis ab ipsis Adfessoribus absolveretur. Sed cum in aliquibus Religionis capitulis non admodum Catholicè sensisse habitus esset, à seculari judicio dimissus, ad *Bonnerum*, Episcopum *Londinensem*, sive *Inquisitorem*, quem nostrates ex continuæ istius sævitæ in Protestantes exercitæ, à *Marianis* temporibus deducta traditione, sanguinolentum *Bonnerum* usque nuncupant, relegatur, in illius ædibus custodiendus, quo tempore *Bartlettum Green*, postea ob hæresin, uti appellant, ustulatum, habuit contubernalem. Tandem ex speciali gratia R. R. *Philippi* & *Mariæ* (cum aliqui illum ergastulo per omnem vitam addicendum esse consulissent) literis Consiliariorum 29. die Augusti 1553. datis, fidejussione, ut requisitus compa-

reret, & interim se bene gereret, interposita, è diuturno carcere egreditur.

Ante exortam hanc sævam tempestatem, quæ illum penè prostravisset ad fortunatum, libertatis, & vitæ naufragium, à Primoribus Academiae *Oxonienſis* ad Scientias Mathematicas ibi docendum invitatus, surdas obvertit aures, nullis efflagitationibus, promissis nullis, ad istam præclaram honorificamque professionem suscipiendam inducendus: quibus de causis incertum, nisi fortè, quod intra angustias unius loci tanquam servituti & glebæ adscriptus, coerceri nollet, aut quod vereretur, ne quispiam versuti ingenii, ex inita arcta consuetudine ad familiares congressus omnibus horis admissus, artium illicitarum, quibus indagandis impensissimè incubuit, arcana, quasi aliud agens, irrepando in Musei adyta, emissititiis oculis exploraret.

In medio harum cogitationum æstu, *Devus* rei literariæ, & præsertim Historiæ & Antiquitatum *Angliæ*, curam non neglexit, sed in veteribus codicibus manuscriptis, publicisque instrumentis procurandis & conservandis maximè laudabilem impendit operam. Viderat enim, Monasteriis sub R. *Henrico* octavo everſis expilatisque, supellectilem literariam, aut miserè discerptam, aut flammis ex lascivia indoctorum superstitiosorumque hominum absumptam, aut in privatorum manibus quaquaversum distractam fuisse, aut cistis intus tegendis, aut excitando, vice aliorum fomitum, foco, aut spurcis usibus inservituram: paucas tamen reliquias, tanquam pretiosas tabulas ex isthoc naufragio adhuc enatantes nondumque penitus demerſas, ex illa horrenda religiosarum ædium strage superesse (non ritè & pro debito suo pretio, regnante R. *Edwardo* sexto, æstimatas, nec aliquo honore, sed potius contemptim & pessimè habitas) gavisus est. Ille rei indignitate acerrimè permotus, quò huic malo magis magisque gliscenti meliùs obviam iretur, ne ex possessorum ignorantia & vesania, aut ex alienigenarum in transmarinas regiones pro more, merces hæc librarias avehere cupientium fraude, totæ interirent, aut hîc apud nos tali jactura disperderentur, supplicem libellum (a) Reginae *Mariæ* vicesimo die Januarii A. 1556. porrexit in manus, ut auctoritate regiâ constituti Commissarii, qui per universam *Angliam* diligenti inquisitione facta, spolia hæc, cum iis, quorum peculium, sive ex rapina, sive ex mercatu, sive ex donatione & legato, sive qualicunque jure acquisitum erat, ex æquo pacturi, simul colligerent, ut in Bibliotheca Regia, quam mox condendam suadet, in omne ævum ab omni damno, injuria, & raptorum violentia, in isthoc sacrario reposita, in publicos tum Regni, tum totius Reip.

Bbbb

literariæ

(a) Reperitur in Bibliotheca *Cottoniana*: sub vitellio. C. VII.

literariæ usus, servarentur. Licet autem negotium istud sacrum, (sic enim appellandum censeo) sive non diù post *Maria* è vivis excedente, sive nescio quo tristi obstaculo interveniente, in nihilum planè abierit; nec quicquam hac ex parte, quantum scio, statueretur: nullus tamen dubito, quin omnes boni, quibus hæc studia arriserint, *Devi* in hac *Supplicatione*, quam ex ipsius schedis exscriptam apud me habeo, validissimis argumentis ex Religionis politicæque sapientiæ rationibus communita, sine fūco pietatem, insignem erga hæc reconditas literas amorem, fortem ac constantem animum, & denique honestum pro honore & communi patriæ bono zelum, mecum sint laudaturi.

Mense Novembre A. 1558. ex hac vita emigrante R. *Maria*, magnis ob excelsas animi dotes elogiis cumulanda, nisi in Protestantes subditos, de se optimè meritos, ex cæco immodicoque superstitionis *Romane* more, immanem in modum & capitaliter sævisset, Regale Majorum suorum filia solum ascendit *Elisabetha*, augustissima virgo, R. *Henrici* octavi secundogenita, in cujus solennem inaugurationem dum omnia prisco ritu parata haberentur, *Devus* hac in re, à D. *Roberto Duddleio*, postea Comite *Leicestriensi*, consultus, atque ad id audendum rogatus jussusque, de die auspiciatissimo & maximè proprio, quo illa fausto & amico fidere perageretur, eligendo, schedam, juxta Astrologiæ Judiciariæ, qua dudum inclaruerit, regulas elaboratam, corrasis insignium istius vanissimæ Scientiæ Magistrorum effatis, exhibuit. Hujus deridendæ stultitiæ veniam ex bona voluntate & obsequio, quibus ad id inductus erat, meruisse visus est. Hoc tamen commodi ipsi inde accrevit quod Reginæ, illius Administris, reliquisque præcipuæ dignitatis & notæ Aulicis, innotescere cœpisset. Sed cum post longam expectationem, se omni bona spe stipendium annuum, sive in præmium, sive in suppetias studiorum, obtinendi tandem destitutum vidisset, nec ultra blanda verba incertasque Aulicorum promissiones, quibus neutiquam erat fidendum, procederetur, sive ex tædio, sive ex indignatione, tertio navigavit in *Belgium*, sibi iterum blanditus, in exteris Regionibus fortunas meliùs augeri, secundioresque rerum eventus enasci aut studia meliùs promoveri posse, quàm domi, ubi de præcipitibus illius novam philosophiam, & eam quidem, ut dixi, mysticam, instituendi consiliis sinistrae admodum malæque suspensiones indies magis magisque gliscebant. Nec diu hîc sibi consistendum esse, pro vehementi animi ardore & desiderio ultra peregrinandi, apud se statuit. Nemo enim eruditorum virorum, ubi ubi degentium, qui consentiente fama in disciplinis Philosophicis, Mathematicis, Chymicisque præ cæteris eminuisse perhiberentur, amicis

tias sollicitiùs quæsit: nemo curiosæ doctrinæ arcana, qualiacunque essent, in profundis tenebris hætenus demersa, & quæ vulgares oculos latuere, pari versutia & diligentia, investigavit. Hic præcipuus videtur tum itinerum tum studiorum finis, reliquis vice περιέργων habendis, ne famæ suæ in laudatissima & utilissima ad humanæ vitæ usus & delectationem Matheseos parte deesse censetur.

A. 1563. Hac de causa, peragrata *Germania*, *Posonium* principem post *Budam* à *Turcis* captam, *Hungariæ* urbem, mense Septembre, profectus est, ubi *Maximilianus* Secundus, *Romanorum*, *Bohemiæ* & *Hungariæ* Rex, nuper istius diademate redimitus, tunc temporis splendidissimam tenuit aulam. Post reditum, proximo anno ineunte, primum laborantis & iufeliciter fœcundi ingenii partum, *Londini* non ita pridem conceptum formatumque, in dias luminis auras A. 1564. *Antuerpiæ* protrudit, (*Francofurti* denuò A. 1591. recusum) eidem Imperatori inscriptum, quem *Monadis Hieroglyphicæ*, *Mathematicæ*, *Magicæ*, *Cabbalisticæ* & *Anagogicæque explicatæ titulo insignivit*: in quo delirus nugator utpote *Judaicorum* Cabbalistarum præstigiis nugisque *Pythagoreorum*, & arcanis adhuc latentibus, numeris variè conjunctis, *Hermetis* sigillo, hieroglyphicisque characteribus eruendis addictissimus, animo stiloque inflatis, mira que cum confidentia enunciat, se *virtutum supercælestium Metaphysicarumque influentiarum comprehensionem & speculationem*: item *mysteria ex alphabetaria literatura*, trium nempe linguarum eruditarum, eruta, & denique rara & excellentissima arcana revelasse: Nullamque lucubrationem huic similem & parem unquam antea exstitisse: & planè fanatico furore correptus, & totus entheus, jactabundus fingit, *Deum sibi & voluntatem & potestatem divinum hoc mysterium omnibus patefaciendi dedisse*. Ad amoliendam qualemcunque censuram adversus hæc vesanas ineptasque affanias, quas quilibet sobriæ mentis vel leviuscule inspectione aspernaretur & damnaret, in fronte libelli schema quoddam ovale, sub figuris quatuor sibi invicem perpendiculariter connexis comprehensum, una cum Elementorum ad quatuor quadriangulos appositis symbolis, præfigendum curavit; cum hoc lemmate, *Qui non intelligit, aut discat, aut taceat*. Illicò in *Angliam* reversus, opusculum hoc, quasi esset munus à Regia manu excipi & tractari perquam dignissimum, Reginæ *Elisabethæ* in Palatio suo *Grenovicano* prope *Londinum*, ad evitandos æstivos calores tunc degenti obtulit; quod obiter percurrere, illo præsentē, dignata est, dicens, se

jamjam ipsius discipulam fore, & si istius libelli arcana recludere vellet, & discere & facere se quoque velle. Interim, ne tristis & æger animi dimitteretur miser *Devus*, se studia illius fovere pro bonitate indolis suæ benevolè & gratiosè promisit. Quidquid autem postea à doctissimis utriusque Academiae viris objectum fuerit, hoc solo responso, tanquam clypeo impenetrabili, retundere solitus erat, illos librum istum ideò redarguisse & culpasse, eo quod *non omnino intellexerint.* Tanta nimirum obstinatio menti inerat, ut nullis expugnari potuerit argumentis.

Ut mysticus hic liber meliùs intelligeretur, *Devus* suarum partium esse duxit libellum inemendatè ex Typothetarum oscitantia priùs editum, viz A. 1558. jam denuo correctiùs & accuratiùs, *Londini* 1568, 4o. recudere; viz. *Propædeumata Aphoristica de præstantioribus quibusdam Naturæ virtutibus.* Hunc Librum inscripsit veteri amico, *Gerardo Mercatori* in gratitudinis & observantiæ *μνημόσυνον*. In hoc autem opusculo ita sibi mirè placuit, ut illius copiam, tum Proceribus maximæ dignitatis, tum etiam ipsi Reginae, animo præfidenti communicare ausus sit.

Mense Febuario istius anni ad præsentiam Reginae in Palatio *Westmonasteriensi* admissus, privata cum illa Colloquia de magno Chymicorum arcano habuit, quod *Nicolaus Grudius*, olim unus è Secretariis *Caroli* quinti Imperatoris, in solius *Devi* gratiam, involucris perplexisque difficultatibus nudum, retegere in se sulcepisset. Quibus autem conditionibus, id celare consultiùs duxit *Devus*, in genere contentus testari, *quæ aut cujusmodi impedimenta huic rei perficiendæ intercesserint, Deum optimè nosse*: quasi quod in ista colloquutione fuerit transactum, aut præ metu aut præ modestia, in scriptis proferre omnino puduisset. Ex futura vitæ *Devianæ* serie, illum diu antea ad famosum istum pulverem rubrum, *Lapidem Philosophorum* vulgò nuncupatum, investigandum animum & operam applicuisse constabit.

A. MDLXX. D. *Henricus Billingsfleius* in nostratium usum integros elementorum *Euclidis* Libros Anglicè *Londini* edidit, quibus à *Devo* præfigebatur longa quidem, sed & doctissima, præfatio, tum de Universo pene omnium Scientiarum Mathematicarum circulo, quæ qualesque sint, tum de illarum utilitate & beneficio, quatenus ad rerum visibilium intelligentiam, & communes vitæ humanæ usus extendi possint subtili ingenio & mira sagacitate amplum in modum differit, præclaris documentis Mechanicisque inventis subinde interspersis, nec non variis theorematibus, corollariis, & explicationibus decimo tertio libro insuper ad-

additis. Hac verò occasione famam suam ab illicitarum infamiumque artium suspicionibus vindicandi captata, fremit, indignatur, exclamat contra convitatores, qui illum, præ imperitia aut malevolentia & animi malignitate, uti contendit, Magiæ accusassent. Inter verò hujusce execrandi sceleris conscios referri, hoc ipsum illius animum quàm maximè urebat, inque gravissimum & vix ferendum cordolium cedebat. Sed frustra id quidem; ut ab aliis apologiis, contra ejusmodi repetitas criminationes ab illo editis, postea videbimus. Dum domesticæ illius res adhuc incertæ & incompolitæ essent, nec quicquam aliunde, quo futuris suis fortunis securus esse posset, obtinuisset, animi magis magisque tædere incipiens, & mente irrequieta agitatus, sive ad levandum inde contractum mœrorem, sive ad percipiendos uberiores ex Peregrinatione arcanorum sapientiæ fructus, A. 1571. Regio commeatu reliquoque, 1571. prout nobilem decuit virum, apparatu instructus, literisque commendatitiis Legatorum in Aula publicis suorum Principum negotiis fungentium, si forte illorum ditiones terrasque peragrarè liberet, ob majorem itineris commoditatem & securitatem munitus, comitantibus duobus famulis, equester reliquit patriam. Dum verò in *Lotharingia* moratus est, ægritudine longa, eaque periculosa, laboravit, ut de eo penè fuerit conclamatum. Quod cum certò constaret R. *Elizabetha*, de illius vitæ longiori usura non parum sollicita, duos Medicos, & quendam nobilem Aulicum, illos ut valetudini illius, consiliis & remediis adhibitis, prospicerent, hunc verò, ut ægrum animum blandis alloquiis solaretur, protenus ex Curia *Hamptoniensi* illò properare jussit. Tanti videbatur *Devum* ex isthoc morbo liberandum esse & superstitem fore. In causam hujusce sollicitudinis inquirere temerarium videbitur: quicquam verò hac de re statuere, illud pro deplorata vecordia habendum planè arbitror.

Reversus, quo tempore incertum, ad ædes suas in oppido *Mortlake* nuncupato, in provincia *Surreiensi* in ripis *Thamesinis* bellè sito, *Londino* octo circiter milliaribus, tribus verò *Richmondiâ*, palatio regali inclyta, ubi Regina ruris & purioris cœli delicias æstivis mensibus haurire interdum consueverat, dissito, se recepit, ut à strepitu & tumultu urbis & visitantium copia in hoc amœno secessu liber, sibi soli musisque, quas continente studio indefessisque vigiliis usque percoluit, procul omni sollicito & importuno inspectore (quod enim maximè cupiebat & impensissimè venatus est, illud clam in pectore tanquam horribile secretum repositum hætenus celavit) opportunius commodiusque vacaret. Postea verò, paterna hæreditate bonisque, tam in itineribus, quam in

(a) Bibliotheca, libris omne genus, præsertim manuscriptis; quantivis pretii refertissima, ubilibet comparanda, in instrumentis Mathematicis elaborandis, inque Chymia & occultæ Philosophiæ praxi multum diminutis, quò se verteret, planè dubius, Aulicorumque promissis, in longum frustra productis, jam diffusus, de nuptiis cogitare cœperat, majora subsidia certiusque delinimentum vitæ, quodalibi reperire non potuit, in matrimonio contrahendo quæsiturus, ambita nimirum generosæ indolis, magnæque dotis femina. Cujus voti ut tandem compos fieret, re cum amicis communicata, literas in illius favorem & gratiam ad futuram sponsam scriptas, à Regina, Comite *Leicestria*, & D. *Christophoro Hattono*, postea Cancellario *Angliæ*, utrisque florentissimæ existimationis in Aula Proceribus, impetravit.

Anno 1572. apparuit in cœlo in constellatione Cassiopeiæ sidus novum fulgidumque, quod omnium oculos ad se convertebat. Dum verò plerique ex inveterato errore, ab ignorantia & superstitione orto, terrifico de tristissimis ex hoc ostento mox emerfuris eventibus metu percellerentur, cœlestis sopheriæ cultores in admirationem infinitæ sapientiæ & potentiæ conditoris universitatis rerum abrepti, in variis hujus Phænomeni motibus investigandis maxima cum laude erant occupati. Ut summi viri *Tychonis Brahe*, aliorumque labores lucubrationesque reticeam, quia ista res non jam hîc agitur, aderant in *Angliâ*, qui ingenium, industriam, mentemque excelsam ad cœlestium contemplationem strenuè erexerint: inter quos jure merito recensendi sunt (b) *Thomas Digge*, *sus*, *Cantianus*, nobili prosapia oriundus, & *Deus* noster. Quorum ambo falsissimum istud dogma, quasi Cometæ instar metereologicorum vaporum, infra orbem Lunæ subsisterent, hac occasione ex demonstra-

tio-

(a) *J. Seldenus* de Diis Syris: *Lugd. Batav.* 1629. p. 88. Codex ille Valentis quo utor, est MS. & Christophori Longolii sumptibus olim exaratus, quem ex instructissima, quæ V. Cl. Joannis Dee Londinensis scilicet fuerat, Bibliotheca, mihi communicavit olim hæres ejus, vir amicissimus, Joannes Pontesius, civis Londinensis, bonarum artium amantissimus, & de me optimè meritus.

(b) *G. Camdenus* in Historiarum R. *Elisabethæ* parte secunda ad A. 1572.

Nescio an operæ pretium sit memorare, quod Historici omnes nostri temporis memorarunt, mense Novembri, novam stellam, aut si mavis, Phænomenum, conspectum fuisse in cathedra asterismi Cassiopeiæ, quæ Jovem etiam in Perigæo eccentrici & epicycli fulgore superavit, ut ipse observavi: eodemque loco diurno cœli motu circumlata, totos sedecim menses hæsit. In cœlesti, non elementari, regione exsistisse, ex Parallaxica doctrina Thomas Digseius & Joannes Deus nobiles apud nos Mathematici, eruditè demonstrarunt, sensimque ascendendo disparere opinati sunt. Per octavum sanè mensem paulatim extenuari omnes senserunt.

tionibus, à situ, distantis, & magnitudinibus novorum siderum & Cometarum petitis debellarunt. Quod ut fieret manifestius, doctrinam Parallaxeos, ex qua istæ demonstrationes pendent, elucidandam primò separatim, nemine conscio aut arbitro, deinde communicatis consiliis susceperunt: ille in *Alis seu Scalis Mathematicis quibus visibilium remotissima cælorum theatra conscendi, & Planetarum omnium itinera novis & inauditis methodis explorari, tum hujus portentosi sideris, in mundi Boreali plaga insolito fulgore coruscantis, distantia & magnitudo immensa, situsque protenus tremendus indagari. Deique stupendum ostentum terricolis expositum, cognosci liquidissimè possit.* Hic verò in *Parallactica commentationis praxeosque nucleo*: quem dum Operæ in lucubrationibus *Diggesianis* è prelo excludendis distinerentur, transmissum istis annectendum permisit, simulque *Londini* A. 1573. prodire. In utrisque methodus inveniendi Parallaxes Planetarum & siderum brevi quidem compendio, absque aliquo Logisticæ usu, clarè explicatur, & paucis quibusdam defectibus *Purbachii* suppletis, quod perplexum intricatumque in *Joanne Regiomontano* occurrit, ibi illustratur & redditur intellectu facile, non tamen absque honorifica & justissima laudum hisce duobus primis Astronomiæ instauratoribus debitarum celebratione. Præmisso hoc quasi longè majoris operis prodromo, *Devus* argumentum fusè tractavit eodemque anno absolvit tribus libris, hunc titulum præferentibus, *De stella admiranda in Cassiopeiæ asterismo cælitus demissa ad orbem usque Veneris, iterumque in cæli penetralia perpendiculariter retracta*: quibus tractatulum, *Hipparchus redivivus*, inscriptum, tanquam appendicem necessariam, adjecit. De hoc autem illius præclarissimo proposito, prælaudato *Diggesio* omnes ingenuos Astronomiæ scrutatores, tum ex publicæ utilitatis intuitu, tum gratitudinis & observantiæ erga suum Præceptorem & Amicum ergo, monere, tam in præfatione, quam in procæmio, visum fuit; cujus verba, licet fortassè nimium proluxa videbuntur, cum liber iste post centum triginta annos jam sit inventu rarissimus, cum venia, uti spero, eruditi & curiosi Lectoris, hîc referre non gravabor.

In Præfatione.

Sed plura de hujus stellæ historia scribere non decrevi: quia eximius vir, Joannis Dee (quum in reliqua Philosophia admirandus, tum harum Scientiarum peritissimus, quem tanquam mihi parentem alterum Mathematicum veneror, quippe qui tenerrima mea ætate harum suavissimarum semina menti meæ inseruerit, alia à Patre meo prius sata amicissimè fidelissimèque nutriverit atque auxerit,) hanc sibi tractandam assumpserit
mate

materiam, quam ita absoluturum esse, ut in Dei Optimi, Maximi gloriam, & Mathematicarum Artium studiosorum delectationem, utilitatem, & admirationem summam, brevi prodeat, nihil dubito.

In procæmio.

Et licet hoc opusculum, fortassis non vulgare, penitus absolverim absque ullo auxilio humano, tamen ut nulli fiat injuria, paucis, quæ sequuntur, publicè testificari libuit. Postquam ista mea de Parallaxibus inventa, ordine digesta, & omnibus numeris absoluta in hanc libelli formam redegissem, eruditissimo meo amico, D. Joanni Dee, communicavi, qui protenus mihi etiam de Phenomeni Parallaxibus demonstrationem luculentam, facilem, summaque laude dignissimam, à se nuper inventam, ostendit, retulitque mihi præterea sese in animo proposuisse methodis aliis quoque antea inusitatis hujus rarissimi Phenomeni subtilissimas eruere parallaxeis, atque ut id ipsum verissimè expediret, plurima paravit instrumenta, nova & inusitata, nullis parcens sumptibus, nec laboris corporis aut animi, mira industria & incredibili solertia, à prima sua apparitione, noctes diesque, cum videri poterat, Phenomeni locum, motum, altitudinesque varias, miris ingeniis subtilissimoque artificio observavit: quibus parallaxium omnium varietates, quæ hætenus contingere, exactissimè dare poterit: prout oculatus testis verè testificari poterò. At cum tanta rei absoluta Historia parvo temporis intervallo perfici non possit, adeo ut libellus iste jam typis paratus, in lucem primò prodire destinatus esset, ne suæ etiam inventionis debita laus hujus mei opusculi maturiore editione paululum fortassis offuscaretur, hæc subjungere poscebat, tum nostra animorum & studiorum similitudine, nec non temporis diuturnitate inveterata amicitia, tum lex ipsa naturæ, quæ suum cuique tribui in maximis & minimis etiam arctissimè requirit. Dum igitur rem ipsam digitis, ut ita dicam, ex ejus vigiliis contrectare poteritis, his scalis Aethera conscendere, & horum mysteriorum oculati esse testes vos ipsi, quibus mens est sublimior, poteritis, quibus si paululum ad rei veritatem eruendam, contendere volueritis, perspicaciores & idonei magis judices ad ejus labores verè Herculeos in hoc Olympico certamine perpendendos eritis.

Cum admodum favorabilis fama de illius Bibliotheca instructissima, deque admirandis illis curiosarum rerum tum naturæ, quas inter peregrinandum collegerat, tum artis, quas ingenio suo fabricaverat, collectaneis spargeretur, Regina illam videndi desiderio non leviter tacta, magno 1575. *Aulicorum satellitio stipata, A. 1575. illius ædes adibat: ac mox gnara, funus uxoris ante paucas horas elatum fuisse, nolebat ingredi, nec*
re-

redire quidem re prorsus infecta placuit, antequam *Devum* ad se vocasset, jubens, coram jamjam produci artificiale illud vitrum, sive orbem, sive speculum concavum, sive dioptram, (neque enim nomine speciali designat, neque illius formam figuramve describit Inventor) mirasque istas proprietates, quas inibi esse prædicaverit, aliquatenus repræsentari, si non oculis, saltem ita explicari, ut præ se quandam veri speciem ad fidem faciendam ferre possent. Refert *Devus*, ex cujus schedis autographis hæc scribo, illo monstratore, Regina hac ex parte abundè satisfactum fuisse, illamque non modica voluptate perfusam, gratiis actis, jucundam discessisse. Mihi quidem videtur, hæc θαυματουργήματα, quæliacunque aut quantacunque essent, non ab artis circulatoriæ lusu & præstigiis, neque à Dæmonum energia, sed à summa sive versutia sive peritiapRACTICÆ Matheseos provenisse. Nec hac unica vice illius ædes adire contenta, iterum tertiumque pro summa, qua illum dignata est, benevolentia, sequentibus annis, dum pro more ad captandas refrigerantes auras, vesperi, aut equo, aut curru, rectà illac transire solita erat, illum, cujus alloquio non parum delectabatur, accersiri jussit, penè infra dignitatem regiam nisi eximiæ animi illius dotes, summaque eruditio, hanc insignem gratiam meruissent, & ut crebriùs, quàm pro modestia ausus fuerit, Aulam accederet, penè invitando benignissimè hortata est. De hac Bibliotheca pauca hîc interponere libet.

Bibliothecam aut numerosiorem, si librorum copiam, aut instructiorem, si materiem & argumenta de omni re scibili, præsertim Philosophica, Mathematica, & spagyrica, spectemus, vix quempiam privatiæ fortis, etiam inter Nobilissimos quidem, in universa *Anglia*, tunc temporis habuisse fortasse jure dixerim. Constabat enim ex quater millenis codicibus, quos incredibili industria sumptibusque pro facultatum suarum modulo, maximis per quadraginta annos hîc & alibi terrarum conquisitos collegerat. Ex iis septingenti manu variis linguis exarati erant. Accessere ingentes veterum Chartarum & Instrumentorum ad familias Principum & Magnatum, tum *Walliæ*, tum *Hiberniæ*, cum authenticis submissionum, quibus se in clientelam & obsequium nostrorum Regum dediderunt, formulis, appensis sigillis: item ad Antiquitates *Anglicanas* & Monasteriorum foundationes & reditus spectantium strues, & aliorum veterum sigillorum in cistâ separatim positorum acervus. Quanta & quàm dives libraria supellex, vel Principibus invidenda! Horum pretium insignemque usum optimè æstimare norant nostrates Heraldî, Regionumque Archivorum in Turre *Londinensi* repositorum Custodes, qui in iis explorandis & exscribendis integros dies in ædibus *Devianis* terere soliti erant.

Hæc omnia publicis Regni archivis, tandem aliquando ingerenda, ut inibi in omne ævum inque perpetuum Antiquariorum usum servarentur, pro amore erga patrias antiquitates magno animo destinavit. Sed generoso pioque huic proposito intercessit triste fatum, quod postea suo loco memorabo.

Ad nobilem Bibliothecæ apparatus pertinebat non modica Instrumentorum Mathematicorum & machinarum congeries: tum ea, quæ vulgati usus, non ita pridem adinventæ fuerant, tum quæ ingenio suo re-ficta & reformata in meliorem ordinem redegerat, inter quæ, ut cætera omittam, erant quadrans & radius, illius semidiameter quinque pedum, hujus verò decem, divisionibus accuratè notatis, globi *Mercatoris*, novarum observationum ope emendati auctique, quibus inseruerat loca motusque Cometarum, qui suo tempore apparuere, sphaerarum octavæ, nonæ & decimæ juxta hypothesein *Purbachianam* Theoricæ, horizonte & meridiano æreo ornata; pyxides nauticæ, varii generis, & ad invenien-dam variationem fabricatæ; & denique horologium, quod isthoc ævo penè pro miraculo artis habendum erat, ad metiendæ secundæ horæ minuta adaptatum. De Laboratoriis sive officina Chymica postea dicendum erit.

1577. Anno 1577. in cœlo fulsit Cometa, in quo observando impigram *Devus* impendebat operam: sed observationes istæ omnino periire, fortasse absque aliquo Scientiæ Astronomicæ damno, nullatenus post *Brahenas* desiderandæ. De illius verò peritia in doctrina cœlesti, adeò altum in pectoribus Amicorum insedit opinio, ut neminem hujus ostenti præsignificationes illo melius interpretari posse putaverint, & de quo differentem R. *Elisabetha* non sine ingenti voluptate sæpè audivit: cum panicus terror ferè omnium animos occupasset, quasi, si non certa pernici-es humano generi, saltem exitialia *Angliæ* reliquisque regionibus illius malignis influentiis propiùs subjacentibus mala tristissimique rerum even-tus inde portenderentur.

1578. Anno sequente viz. 1578. Cùm Regina acerrimis doloribus ex immo-dico humorum fluxu ortis laboraret, & vix quicquam levaminis à Me-dicis suis percepisset, *Devus* ad quosdam celeberrimos Medicinæ Profes-sores, tum in vicinis, tum in extremis *Germaniæ* provinciis degentes, ut cum illis de Reginæ salute redintegrandæ verba & consilia haberet, viatico & regiis literis munitus, mittebatur, centum diebus itineri com-plendo præcisè assignatis. Quo autem successu, cùm *Devus* id sibi ce-landum esse, pro prudentia sua judicaverit, facile inducor, ut credam, Reginam ante illius reditum ex integro convaluisse. Qualitercunque se

res habuerit promptus *Devi* animus ad jussionibus Reginæ obsequendum non potuit non esse gratissimus.

Deus omni modo studioque, prout res quaquaversum circumspicienti sagax ingenium suggerebat, Reginæ favorem & benevolentiam sibi magis magisque conciliare & augere satagens, duos amplos rotulos, pulchrè in membrana descriptos, Hydrographicam & Geographicam quarundam transmarinarum Regionum chartam continentes, Reginæ in manus in Palatio *Richmundano* mense Octobre A. 1580. exhibuit: quarum possidendi jus ex scriptis testimoniisque in medium productis, atque argumentis inde deductis ibat assertum. Negotium istud, cum quippiam magni momenti in se complecti videretur, sapientissimo & illustrissimo viro, Baroni *Burleio*, Thesaurario *Angliæ*, tunc præsentì, explorandum & examinandum demandabatur. Ille verò ut primo intuitu isti proposito parum favisse aut benevolè indulsisse coram visus est, ita maturius strictiusque examen illius sententiam prius prolatam, judiciumque haud præceps & temerarium postea firmavit. Rotulos igitur post paucos dies *Devo* reddi curavit: non tamen sine ingenti illius industriæ & zeli laude & commendatione, quam sanè optimè promeritus est Inventor. Tanti autem aliis, maritimas *Africa* & *Americæ* oras exploratissimas habere, quantum Nautarum & Mathematicorum experientia & peritia suppeditare poterant, cupientibus videbatur, ut istius chartæ graphicam delineationem, oblato centum librarum sterlingicarum munere, redimere vellent: quod tamen ille generosè recusavit. Hanc ipsam autem chartam post mortem *Devi* acquisivit vir maximus, D. *Robertus Cottonus*, Eques auratus & Baronettus, diligentissimus, si quis unquam, *Britanicarum* Antiquitatum, aliorumque quantivis pretii cimeliorum indagator & promus condus, in sua incomparabili Bibliotheca reponendam; ubi jam exstat sub Augusto I. quam hoc titulo in Catalogo, *Oxonii* A. 1696. edito prænotavi: *Tabula Geographica Americæ, Africæ, & Regionum intra polum Arcticum sitarum: per Joannem Dee, anno 1580.*

Stabilita, conjunctis *Lilii* aliorumque Mathematicorum operis consiliisque ex auctoritate & jussu *Gregorii* decimi tertii, Pontificis *Romani*, A. 1582. Kalendarii emendatione, cum certò constaret ex præcessionibus *Æquinoctiorum*, quas Patres *Nicæni* & *Alexandrini* penitus ignorarunt, & lunationum in singulis cyclis decem novennialibus recurrentium, & cum veris annis solaribus collatarum disparitate, novilunia & plenilunia, ex quibus solenne Paschatis festum unice pendet, coelestibus apparentiis in omnium oculos incurrentibus non respondere, *Deus* ean-

dem computi Ecclesiastici rationem, &, si fieri posset, subductis accuratius calculis iniui oportere ratus, ut illa in *Angliam* admissa in communem publicumque usum adhiberetur, & flagrantissimè cupiit & intentissimo studio conatus est. Qua de causâ Regio jussu auctoratus, ille brevem librum, sanè perquam eruditum Anglicano idiomate scriptum, è certis Astronomiæ principiis deductum, (cujus exemplar integrum, una cum Schematismis & tabulis, apud me habeo) *de vulgaris Kalendarii* 1583. (a) *reformatione in anno civili & Juliano Reginae Elisabethæ A. 1583.* exhibendum curavit methodo proposita ut undecem isti dies à tempore Epochæ Christianæ, quibus versus anteriora anni prægressum anticipabat æquinoctium vernum, non simul omnes eximerentur, sed ad evitandam confusionem, nimiumque hiatum, qui non sine gravi incommodo contingere potuit, ut istorum dierum imminutio sensim fieret quinque mensibus decurtatis hoc modo, ut Maius tantum viginti octo dies contineret, Junius viginti novem, Julius viginti octo, totidem Augustus, September denique viginti novem, absque aliqua dierum festorum, sive mobilium, aut fastorum, in quibus forenses causæ in *termino*, uti appellatur, *S. Trinitatis* proximè sequente, è suis sedibus mutatione. Propositum hoc, sive documentum, sive consilium, cum Regii Consilarii neque ex præcipiti festinatione admitti, neque prorsus rejici debere pro prudentia sua statuissent, illud tribus præclaris Mathematicis, viz. *Thomæ Diggesio, Henrico Savilio, & Joanni Chambero*, discutien-

(a) Titulus ita se habet.

A plain discourse and humble Address, for our gracious Queen Elisabeth, her most excellent Majesty to peruse and consider, as concerning the needfull reformation of the vulgar Kalendar, for the civil yeares and dayes accompting of verifysing according to the time truly spent. Inscriptus est nudè sine aliqua Epistola dicatoria, honoratissimo Baroni *Burleio*, *Angliæ Thesaurario*. In fine adduntur supplices libelli ad Reginam *Elisabetham*; in quibus humillimè petit, ut reformatio ista, edito ex auctoritate publica edicto, stabiliretur. Deinde exstat separatim typus anni reformationis, incipientis à Majo 1583. appositis κατὰ πλάτ singulis diebus, & festis, unà cum locis Solis & Lunæ in Zodiaco, & utriusque ad invicem aspectibus & syzygiis. Olim erat peculium *Thomæ Alleni*, Mathematici *Oxonienfis* *Devi* familiaris Amici, qui illum celeberrimo Equiti D. *Kenelmo Digbeo*, Equiti aurato, unà cum reliquis codicibus Manuscriptis, quorum non modica erat copia, ultimis tabellis moriens legavit. Horum verò magnam partem D. *Digbeus* Bibliothecæ *Bodleianæ* in publicum literarum usum postea dono dedit: aliquibus sibi in proprios usus reservatis: inter quos librum hunc *Joanni Barhero* A. 1635. benevolè elargitus est. Jam verò in magna præclarissimorum Collectaneorum mole *Elie Ashmolii* Armigeri, qui *Devianas* lucubrationes, quæ reperiri poterant, aut pecuniis redemit, aut exscribi curavit, in Musei, suo nomine jure merito nuncupati, Archivis reponitur.

tiendum commisere. Hi verò longè meliùs fuissè, si æquinoctium vernum ad tempus & statum, quo circa natalem Christi annum consistebat, reductum fuisset, præfati, unanimes censuere, dies tantùm decem ex reverentia Synodi *Nicænæ* (quæ hanc Paschalem solemnitatem statuto tempore observandam sacra sua auctoritate sancivit, & ne, dempto ex mense Septembri superfluo die isto undecimo, communis ratio Kalendarii in reliquis Orbis Christiani regionibus recepti turbaretur) demeritè statui, & cum cœlestium motuum ab Astronomis supputatorum veritate congruere, & formam typumque Kalendarii pro isto anno viz. 1583. exceptis excipiendis, à D. *Devo* compilatum, admodum verè admitti posse, sine aliquo manifesto in futurum errore, modò regulæ quædam de annis bissextilibus in quibusdam integris centenarius, ne æquinoctium jam ad pristinam sedem restitutum, in longa annorum serie iterum inde dimoveatur, omittendis, certa supputatione sancirentur. Cætera, quæ hujus loci non sunt, exscribere supersedeo. Quorum (a) censuram & judicium D. *Burleius* sociis Consiliariis retulit, qui frequentî consultatione habita, politicis rationibus inducti, malebant inveterato errori adhærescere, ubi tamen nihil, ut puto, incommodi aut periculi metuendum erat, quam cum *Romana* Ecclesia in re innocentissima rectè (sic enim salva omni reverentia erga viros hosce sapientissimos, quasi quicquam in favorem arrogatæ in universam Ecclesiam Christianam Papæ potestatis inde accederet, dicendum arbitror) sapere. Ita erant decretis & placitis ejusdem, pariter ac superstitionibus, corruptis, quibus Religionis Christianæ veritas fidesque immanem in modum læduntur, dogmatibus, & denique tyrannidi & usurpationibus in Principum & Episcoporum jura maximè infesti, & planè irreconciliabiles.

De hoc autem opusculo ita magnificè sentiebat Auctor, ut postea neglectum sui Episcopis exprobrare ausus sit, quasi munus istud, quod erat ipsis ex veteri Ecclesiæ instituto proprium, & quibus ex officio incumberebat, res quoquo modo ad eandem spectantes curare, expendere & moderari, vicaria opera explevisset.

Cùm verò *Devus* in curiosis Artibus & secretioribus Philosophiæ naturalis arcanis venandis, præcipuè in elixire conficiendo, inque mysterioris cœlestis sapientiæ, supraquam mortalibus aspirare licuit, investigandis hætenus solus occuparetur, ineunte superiori anno aut circiter, ut

Cccc 3

ex

(a) Hanc relationem, unà cum viri doctissimi, *Joannis Gravii*, Astronomiæ in Academia *Oxonienfi* Professoris *Saviliani*, in illam animadversionibus, in Actis Philosophicis *Londinensibus* pro mense Octobri A. 1699. curavi inferendam.

ex collatis temporum circumstantiis conjecturam facere par est, (neque enim tempus præcisè definire possum) *Edwardus Kellaus*, Juvenis viginti quinque aut sex annorum, *Devi* fama accitus, illius amicitiam ambiebat, ad quam ex similitudine studiorum, hujus novi advenæ fide, industria, & peritia, præsertim in Chymicis operationibus & experimentis, quam supra vulgus Philosophorum magna cum ostentatione quem spiritus artificem sive operatorem naturæ, inspectis terræ conclavibus, fore postea prædixerunt, præ se tulerat, prius exploratâ, hospes, quasi de coelo dilapsus, brevi admittebatur. Jam ergo *Devus* socium, genio & vitæ instituto, quod per tot vitæ retro actæ annos continenter sectatus est, maximè conformem & opportunum auspicatò nactus, nihil inaccessum, impervium nihil conjunctis operis consiliisque fore, gratissimo mentis errore, & noxiæ impiæque curiositatis præstigiis irretitus, somniavit. De *Kellaus* autem, qui in hoc dramate planè obstupefciendo non minimam egit partem, quædam, quasi per saturam hîc necessario interponenda sunt. Reliqua autem, quæ ad illum spectant, ad calcem hujus narrationis reservabuntur.

1555. *Edwardus Kellaus* natus erat *Wigornia* primo Augusti A. 1555. Hunc aliqui Pharmacopolam in urbe natali, alii verò quod mihi minus verisimile videtur, professione scribam ordinarium esse volunt. Ad scribas verò syngraphas, obligationes, & testamenta describendi facultas pertinet. Hic ingenio suo malè usus, & manifestæ fraudis reus, præcisarum aurium poenam *Lancastria* luebat: quâ præ dedecore relicta, aliò divertens, se ad studium Chymia, ex qua immensas opes accumulandas esse sibi blanditus est, utpote artis Chrysopoeticæ studiosus, applicuit. Nec intra fines honesti & recti substitit illius curiositas. Constat enim illum (a) cadavere cujusdam recens mortui è sepulchro suscitato, spiritum infernalem immissum de rebus, quæ proponerentur, an essent eventuræ, consuluisse, ut de pacto cum dæmone inito nihil dubii reliquum sit. Ab hoc autem tempore, ex quo se in *Devi* amicitiam insinuaverat, crebræ apparitiones malignorum spirituum, utrisque præsentibus factæ erant, quos *Devus* horrendum in modum delusus, pro fatuitate summa, per totam deinceps vitam duravit, bonos esse *Dei Angelos*, ad mentem illius clarioribus divinæ sapientiæ radiis & futurorum eventuum cognitione illuminandam, coelitus dimissos credidit. Deum enim ferventissimis orationibus repetitis deprecari solebat, ut *sapientia donatus*

ar-

(a) Vide præclarum clarissimi Viri *Joannis Weaveri* librum, cui titulus, *Ancient funerall Monuments*, Londini A. 1631. editum pag. 45. 46. ubi ad fidem, eamque indubiam huic rei faciendam multæ probationes & documenta exstant.

arcana naturæ, hominibus nondum revelata, intelligendi facultatem acciperet; nec palam profiteri abſiſtebat, Deum ipſius veritatis zelum & inſatiabile deſiderium ab illius juventute cordi indidiſſe; hunc eſſe ſuorum ſtudiorum ſcopum & finem, ut tandem, Deo inſpirante, veram Philoſophiam edoctrus, cœleſtis ſapientiæ theſaurum, puræque veritatis ſcientiam attingeret. Hinc ſe divinæ voluntatis hominibus de novo revelandæ fore nuncium & adminiſtrum, ſuis indefeſſis vigiliis, ingenio, ſtudiis Philoſophicis, & Mathematicis, imò & pietati, aſſiduifque precibus, non Dei gloria, uti clamoſè, & inſtanter obtendebat, ſed potius ſui ipſius quæſita, nimium quàm conſiſus, facile ſibi intolerabili arrogantia perſuadens, juſto Dei judicio, cùm intra modum, juxta rectæ Rationis & ſacrarum ſcripturarum dictamina ſapere noluiſſet, ſed humanæ mentis vires ſupergredi illicita & impia ambitione expetiſſet, ſibi relictus, & in arbitrio voluntatis propriæ poſitus, dæmonum fiebat luſus, ludibrium, & præda, quorum præſtigiis & illuſionibus, ſine aliqua diffidentia, imò avidiſſimè amplectendis, ſe prorſus aptum & facilem tanta preſſatione reddidiſſet.

Actiões iſtæ, (quo nomine collationes cum malis ſpiritibus habitæ nuncupantur) vicesimo ſecundo die Decembris A. 1581. incipiebant, quinque libris *myſteriorum* adhuc ineditis, in quibus *Devus* modum ſacræ menſæ fabricandi & accuratè efformandi à Spiritibus didiciſſet, delineandi *Sigillum*, ut appellatur, *Dei*, & quibus præviis ritibus & præparationibus viſitationes & colloquia obtinere poſſent exertim & ſingillatim deſcribit, comprehenſæ, unà cum appendice, quæ vicesimo tertio die Maii A. 1583. deſinit. Schedas hæſce in ſecreto cujuſdam ciſtæ, quæ à fatali illo urbis incendio ſalva evaſerat, ut mihi, D. *Elias Ahſmole*, ejuſmodi rerum avidiſſimus investigator, olim retulit, loculo abditas, nescio quo caſu, ille adeptus; ſtudioſè conſervavit: quæ jam in Muſeo *Oxonienſi* ſervantur. In hiſce verò, ut in reliquis ſchedis, quæ in Bibliotheca *Cottoniana* reperiuntur, & quas Vir reverendus & doctiſſimus, D. *Mericus Caſaubonus*, *Iſaaci* filius, *Londini* 1659. edidit, iſtorum annorum hiftoriam, ſingulis accuratè pro more adnotatis tum rerum, tum temporis circumſtantiis, *Devus*, propria manu deſcripſit: *Cottonianæ* autem ſchedæ, quibus præfigitur hic titulus, *Liber ſextus Myſteriorum & ſancti parallelus novaliſque*, initium à vicesimo octavo Maii A. 1583. ſumunt, quintiduo poſt ultimam actionem, vicesimo tertio die ejuſdem menſis, appendicem paulò ſuprà memortum recto ordine ſequentes. Hæ autem, non ſimul in unum volumen compactæ, ſed in varias partes diverſæ pro ratione materiæ ibi tractatæ &

& excussæ, seorsim consuuntur, situ & madore sparsim deturpatæ, utpote sub terra in cistula diu prius reconditæ, & vix legibiles futuræ, nisi eas nescio quis casus opportunus in aprium protulisset.

In harum præcedentium Actionum una, (a) quæ vicesimo primo die Novembris A. 1582. contingebat, lapidem lucidum & diaphanum orbicularis formæ, ut sæpè appellat, sive crystallum, in quo apparitiones in futurum faciendæ, & voces, pro oraculis venditæ, proferendæ erant, ab Angelo hisce mystis traditum fuisse pertinacissimè contendebat *Devus*. Idem *Pragæ* A. 1584. sanctissimum Numen sub horrendo anathemate obtestatus, summa cum fiducia, coram *Rodolpho* Imperatore, adseveravit: addens, *Crystallum istud tanti valoris & virtutis fuisse, ut nullius terrestri regni opes cum illo aequiparari & pro dignitate conferri possent.* Quod postea D. *Gulielmo de sancto Clemente* Legato Regis *Hispaniarum*, producto quoque libro quarto manuscripto, in quo quibus modis, donante Angelo, in illius potestatem devenisset, fuscè & singillatim pro more literis mansuris consignarat, itemque librum sextum mysticum: uti & *Jacobo Curtzio*, Consiliario *Cæsareo*, ostendit. Qualem ambitum habuerit, non describit *Devus*, sed largiusculè se habere, in quo tot & tam variæ figuræ, variis motibus agitæ, tantaque spectacula interdum simul repræsentarentur, à verisimilitudine non abludit. Si verò non prorsus idem esset, saltem illi par & geminum, iisdemque diabolicis, (sic enim tunc præsens credidi) usibus destinatum videbatur, quod cum multiplice supellectile magica librisque magicis in auctione publica *Londini* Novembre 1694. habita expositum venditumque, me vidisse memini, forsan ejusdem cum vasculo vitreo, in sua cavitate dimidium gallonæ, si ita loqui liceat, continente, intumescentiæ & rotunditatis solis ritè initiatis, non omnibus promiscuè, si quid intus apparuerit, intuendi facultatem dari posse, horum horribilium mysteriorum Magistri pertendunt: cui muneri apprimè idoneus *Kellæus* videbatur, à *Devo*, jam insulsißima credulitate & deliratione inde menti inducta correpto, in conjunctissimum comitem sociumque assiduum, monente *Uriele*, mutua sponsione inita, & annua pensione quinquaginta librarum assignata, adscitus est, ministerium & officium *Inspectoris*, Anglicè *Seeror Skryer*, in actionibus futuris obiturus.

Æsta-

(a) Ad finem quarti libri mysteriorum. Dicit ibi se isto die Angelum, magnitudine pueri, versus occidentalem Musei fenestram, manu Lapidem istum tinentem vidisse: à quo, ut illic eundo acciperet, jussus, illum *frigidum & durum, sed splendidum, clarum, & gloriosum* esse sentiebat.

1583.

Æstate A. 1583. in *Angliam* venit *Albertus à Lasco*, *Polonus*, *Palatinus Siradiensis*, ex antiqua & illustri stirpe prognatus, & egregiis animi dotibus literarumque studiis excultissimus, R. *Elisabetham*, cujus summæ sapientiæ laudes consentiens fama per universam *Europam* propagaverat, visurus, & illius admirandas virtutes submississimis obsequiis propè & coram veneraturus. Ab illa omni honore comitate & gratia, quam aut jura hospitalitatis erga nobiles Peregrinos exhiberi solita, aut leges decori moresque Principum vendicaverint, erat exceptus: cujus sive exemplum sive jussionem, secuti *Oxonenses*, illum eruditis elegantibusque colloquiis, & orationibus, exercitationibusque Scholasticis, thesauris ingenii & eruditionis, in bibliothecis reconditæ, in tanti Hospitis gratiam, itidem promptissimè referatis, pro illius dignitate & merito, ne dicam, supra meritum, cumularunt. At ex omnibus doctrinæ famæ tunc in *Anglia* inclarescentibus, neminem pluris, quam *Devum*, æstimavit, aut cujus amicitiam impensiori opera excoluit, si-ve illius blanditiis, si-ve immodico arcanorum naturæ, quæ *Devus*, idoneum Auditorem jam nactus, sibi comperta esse jactaverat, amore irretitus. Dum verò *Devus* in Aula duodecimo die Julii fortè adesset, illum adortus Comes *Leicestriensis*, se post biduum, unà cum D. *A Lasco* apud ipsum pransurum dixit; *Devus* illicò non sibi pecunias, quibus epulum tantis convivis dignum erat apparandum, nisi argentea suppellectile prius oppignerata aut vendita, suppetere ingenuè falsus est. Quod quàm primùm Regina rescivisset, illa citra omnem moram quadraginta aureos, vulgò *Angelos*, ob effigiem Angeli olim in aversa parte impressam, nuncupatos, quò lauti prandii expensas melius sustineret, pro regia sua liberalitate elargita est. Ab hoc tempore *Lasco* *Devi* blanditiis, ut dixi, irretitus, vel potius præstigiis dementatus se totum in illius potestatem dedit, qui inde mox venia à Spiritibus prius impetrata, in hanc mysticam impiamque Societatem admissus, actionibus *Mortlakiensibus* interfuit. Adeo verò præ credulo errore jam factus sui impos, & mente captus, ut Dæmones, quo arctiùs horrendis hisce Sacris adhæresceret illius ambitioni vana summæ potestatis in Patria adipiscendæ spe & exspectatione lenocinantes illum non solius *Poloniæ* sed alterius quoque regni, id est primò *Poloniæ*, deinde alterius, viz. *Moldaviæ Regem* fore, & sub quo magna universi mundi mutationes incepturas esse, *Judeos convertendos*, & ab illo *Saracenos* & *Ethnicos vexillo crucis superandos*, facile ludificarentur.

p. 17.

Postquam Devo ex metu, ne, sicut illi à seductoribus spiritibus persuasum fuerat, structis à D D. Cecilio & Walsinghamo, quem adversus illum

D d d d

illum

illum uti & adversus *Lascovium*, capitali odio ferri fingunt, insidiis, morti adjudicaretur, de itinere in *Poloniam* simul instituendo cum supra dicto Palatino convenisset, ille clam sine veniâ exeundi è regno prius impetrata, *Mortlaco* Septembris 21. 1583. discessit, unâ cum uxore altera, *Jana Fromonda*, femina generosæ indolis & profapiæ, quam secundis nuptiis Februarii quinto 1578. duxerat, filio (a) *Ariburo* puero quadrienni, aliisque liberis, *Kellæo* symmysta illiusque uxore, quam *Mortlaci* isthoc anno duxerat, famulisque; D. *Lascovio* ejusque affectis in medio *Thamesi*, prout conditum erat, (b) ad fugam melius celandam, in cymbas unam & alteram receptis, *Londinum*, mox intempesta nocte *Grenovicum* petit, deinde septem aut octo milliaribus ultra *Gravesendam*, ubi naves ex *Anglia* illinc soluturæ sistuntur, à Portitoribus pro more explorandæ, navim *Danicam* (altera famulis, sarcinis, equisque majori cum commodo recipiendis destinata, comitante quam etiam conduxerat) ascendit, in *Hollandiam* illicò trajecturus. Navibus verò adversis ventis in Syrtes penè impactis, naufragium, quod imminebat, non sine summo nautarum labore evaserunt. Illinc in Ostio Sinus *Queensburgensis* in oris *Cantii* maritimi siti, scaphis piscatoriis vecti, cum à latere navis essent discessuri, velis illius, in qua confederant *Devus*, *Lascovius*, & *Kellæus*, ex agitatione utriusque antennæ alteri in nexis, mutuoque implexis, parum aberat, quin omnes simul demersi fuissent; scapha aquis ad illorum genua surgentibus, quas *Kellæus* vase quodam exhaurire & effundere conatus est, oppleta: tandem verò magna cum difficultate nec minori cum periculo, oppidum, in quo, donec desævierit tempestas, erat conquiescendum, salvi lætique appulere: Post quinque dies *Brielam* in *Hollandiâ*, peragrato freto, attigerunt.

Non longè post *Devi* discessum, incolæ & vicini, quibus de veneficio & Magia magis magisque suspectus reddebatur, in illius ædes irruebant; quorum aliqui Bibliothecam, ereptis quamplurimis codicibus, typo exclusis & manu exaratis; aliqui Laboratorium ejusdemque conclavia, effractis fornacibus vasisque coctilibus, vitreis, & metallicis, expilarunt. Gravissimum hoc damnum, ex ista barbara spoliatione illatum, nunquam

(a) Natus erat *Mortlaci* Julii 13. 1559. hora 4. 36.

(b) *Cambdenus* in *Annalibus* regnante *Elisabetha* ad A. 1583. E *Polonia* *Rusæ* vicina hac æstate venit in *Angliam*, ut *Reginam* inviseret. *Albertus* à *Lasco*, *Palatinus* *Siradiensis* vir eruditus, corporis lineamentis, barba promississima, vestitu decore & pervenusto, qui perbenignè ab ipsa *Nobilibusque* magno honore & lautitiis, & ab *Academia Oxoniensi* eruditis oblectationibus atque variis spectaculis exceptus, post quatuor menses ære alieno oppressus, clam recessit.

nunquam non amarissimè deplorabat ille, qui immodicis sumptibus, & improbo labore per tot annos bellum istum collegerat apparatus: dolebat verò maximè, utrem continentem quandam dulcem substantiam quadrilibrem, instar gummi, subfusci coloris, ibi tunc periisse: an Medicamentum, aliosve in usus paratam, penitus tacet. Tanta indignatione in illum præexecrandi sceleris, sub cujus infamia laborabat, odio exarserunt, ut vix ipse præsens salvus vivusque evasisset. Ita nimirum effrata plebis furori in primo æstu frustra obstititur. Interim ille sibi temerariæ ex patria fugæ malè conscius, quid Regina & Consilarii de illa statuissent, nosse maximè sollicitus, oraculum crySTALLINUM, quod secum tulerat, jam in alienæ ditionis regionem transvectus, *Briela* consulere gestiebat.

Non hîc totius itineris à *Briela* ad *Cracoviam* continuandi rationem exscribam, neque urbes locosque, per quos necessariò transeundum esset, referam aut adnotabo: cùm ea omnia ex propria ipsius *Devi Relatione* edita quivis petere possit: ex qua tantum, quæ sunt præcipuæ notæ, & quæ ad illius vitæ historiam illustrandam non parum conducunt, brevi compendio recensere & memorare proposui: hoc unicum præmonere contentus, festinatum istud iter, modo alicubi duos tresve dies, prout res tulere, erat consistendum, quo minus hæ facerrimæ actiones à *Devo* sociisque peragerentur, neutiquam obstitisse.

Tandem post quatuor menses, magnis difficultatibus periculisque, quibuscum in aspera hieme erat necessariò conflictandum, defunctus, *Devus* castellum de *Lasco*, sedem hæreditariam *Lascovii* Feb. 3. 1584. apulit, ubi cùm per quinque septimanas non sine ingenti tædio & incommodo, pecuniis à *Lascovio*, ære alieno oppresso, qui nondum prædia oppignerata redemerat, parcè admodum suppeditatis, substitisset, *Cracoviam*, urbem Regiam, Martii 9^o. petit, ibi majora vitæ commoda novasque revelationes præstolaturus. Heic quoque, ut alibi, frequentantur actiones, in quibus dæmones illum vocibus barbaris prolatis, deinde consuetis altissimi sensus ambiguis, omnemque intellectum exsuperantibus, oraculis, miserrimè delusere, multa de universi Orbis terrarum distributione sub ductu & regimine duodecim Angelorum, & præsertim de variis, qui aeris triginta regiones incolunt, Angelis, illorumque numero & de ejusmodi fictis mysteriis è quibus cuncta naturæ arcana erant eruenda, referentes: & quò illum præstigiis hucusque irretitum magis magisque captarent, quicquid olim in *Enochi* libro exstabat, denuò exponere & explicare in se suscipiunt. Ne verò *Lascovius* sive exerta Rationis vi, & interiori mentis sensu ab hoc veterno expergefactus, ab illo-

rum laqueis se expediret, promissum istud de illius futura regia dignitate in *Anglia* prius factum, iterum iterumque repetivere. Interim licet hæc horrenda sacra, illo & *Kellao* solis præsentibus in secretissimo conclavi peragerentur, ex illusione apparente, quasi quispiam è malignis spiritibus crystallum exerto brachio erepturus esset, valdè metuebat *Devus* ne illo indicante Regi *Poloniae*, qui tum in urbe aderat, hæc omnia patefierent; sed hunc metum ex mente ipsius protenus exegit personatus *Gabriel*, quicquid ab ipsis in hisce apparitionibus & colloquiis actum fuerat eundem penitus latere spondens. Cùm autem nihil hîc profecissent Diaboli præstigiatores, nec quicquam in hac urbe & aula quod illorum consiliis promovendis conducere, aut sperandum aut expectandum erat, ut *Pragam*, ubi *Rodolphus*, Imperator *Germaniae*, cum splendissimo Aulicorum comitatu stipatus tunc temporis commorabatur, propere contenderet, jubetur *Devus*, qui pecunias reliquumque commeatum sibi itineri isti apparando, non suppetere, nec illò sine *Lascovio*, juxta prioris mandati formam ire aut posse aut debere caussatus, moram aliquamdiu traxit, donec ille & *Kellaus*, sæpe repetitis jussibus non sine opprobrio, quasi stultè & perversè egissent tamdiu cunctando, propemodum inviti protruderentur.

1584.

Relicta igitur *Cracovia*, *Pragam* nono Augusti 1584. appellunt, in qua tanquam in nova scena, res planè miras, versutia dæmonum transactas fuisse proximo in loco videbimus.

Quò *Devus* malignorum spirituum jussibus de adeundo *Rodolpho* II. Imperatore citius & commodius obsequi posset, non longè post adventum in urbem *Gulielmo de Sancto Clemente*, Regis *Hispaniarum* Legato, cujus amicitiam captaverat, postquam horribile illud arcanum de apparitionibus Angelorum in crystallo, una cum colloquiis & dictatis in Acta propria ipsius manu relatis, retexisset, *Rodolpho* literas obsequiosas, unà cum libello de Monade Hieroglyphica, *Maximiliano* illius patri inscripto, in manus tradendas commisit; ejusdem nimirum, qui illius de harum revelationum veritate obtestationibus, mira cum confidentia repetitis, nimium faciles aures pro imbecillitate judicii adhibuisset, ope, patrocinio, & consiliis fretus. Utrasque, tum ad Imperatorem, tum ad Legatum in Appendice exhibebo. Imperator literis *Devi* delinutus, ne dicam suasionibus Legati expugnatus, illum ad Aulam accersiri jussit, ad audiendum id quod pro sua utilitate esset, ut *Devi* nomine præ se tulerat Legatus, indicto tempore, paratus. *Devus* igitur ab *Octavio Spinola* Cubiculario in privatam cameram introductus, seclusis omnibus, admissus, primoque accessu ab Imperatore benevolè exceptus, ora-

orationem suam exorsus est, cujus summam hîc dabo: nimirum se, licet tum domi, tum foris, quadraginta annos in sapientiæ doctrinaeque studiis multo labore impendisset, veritatem quasitam & investigatam, neque ex libris, neque ex familiari cum viris eruditis colloquio, ubi ubi peregrinatus fuerit, expiscari potuisse, inde totum ad Deum, omnis sapientiæ scaturiginem, conversum, continuis intensissimisque precibus exoravisse, ut illum divino lumine ad naturas rerum certius intelligendum, in ipsius gloriam impertiri dignaretur. Deum flagrantissimis votis tandem annuisse, Angelosque suos biennio, abhinc ultra dimidium, ad illius mentem cœlestium mysteriorum scientia & documentis, quæ chartis perpetuò duraturis illo ipso eodemque tempore mandaverat, illuminandam, de cœlo misisse: quod effectum erat beneficio lapidis crystallini, nimirum tantæ virtutis & pretii, quod omnes totius mundi gazas longè exsuperet, utpote in quo istæ apparitiones fierent, & ex quo divina oracula ederentur. Deinde, rem ita se verè habere, invocato sanctissimo Numine, obtestatus est, cujus jussu in præsentia illius tunc comparuit, sacra legatione functurus: monendo, Angelum Domini illum ob peccata admissa objurgare; illum, si huic cœlesti nuncio credat, triumphaturum; sin aliter, Dei pede in illius pectus impacto, à solio præcipitandum: ex inito fœdere, Deum hac omnia certissimè præstiturum: si delictis abrenunciare, & ad Deum converti vellet Imperator, sedem ipsius omnium, quotquot unquam fuere, maximam & gloriosissimam fore; & diabolum, hoc est, ut Deus interpretatus est, magnum Turcam, pro captivo tradendum se hac omnia speciali Dei mandato protulisse, nihil comminisci, non hypocritam agere, nulla ambitione aut opum cupiditate afflari, non vanis insomniis illudi, non delirare: denique, si quippiam dixisset secus quàm oportuit, se omnem spem æternæ salutis, illo ipso momento repudiaturum. Finita hac verbosa & impia oratione, ad quam æquo & miti animo, nulla interruptione isti verborum profluvio opposita, attendisset, sine aliquo vel minimæ displicentiæ indicio, replicavit Imperator, se illi non diffidere; opinari quoque Deum sibi benè velle, nec tantis tamque crebris, quibus inter perorandum ad pedes procubuisse, genuflexionibus opus esse. Quo lenissimo responso animatus Deus, superaddebat, se Imperatori omnem ab ipsis initiis Angelicarum actionum seriem, integramque historiam, prout in mandatis habuisset, imò & sanctam visionem, si interesse cuperet, ostensurum. Respondebat Imperator, se alio tempore plura de hisce rebus auditurum & intellecturum, & illum de ipsius gratia & benevolentia securum esse jussit. Et sic post longam horam, ex hac illustri scena exiit famosus iste Dæmonum Legatus.

Vix dubitandum est, quin *Devus* hac mira Imperatoris comitate & indulgentia hinc discesserit elatus lætusque, illum novæ Religionis in mundum sub divinarum revelationum prætextu; sicut olim *Mohammedes* deliria sua introduxerat mox introducendæ strenuum patronum & fautorem, tandem aliquando fore, sibi blanditus. Sed eventus expectationi & votis planè contrarius hanc gratissimam mentis insaniam repres-
sit & castigavit.

Interim per Aulam & urbem percrebuere rûmores, *Anglum* quendam *Alchymisticum decoctorem*, *Magum*, & *Necromanticum*, ad reparandas fortunas & Imperatoris oculos pecuniis emungendos illò nuperrimè venisse. Quod convitium *Devus* concoquere non poterat, imo & iniquissimè & summa cum indignatione tulit, qui famam ipsius ab omni scelere illæsam hætenus apud omnes tum in *Germania*, tum alibi terrarum, integram mansisse acerrimè contendebat, quasi vel quippam mali de illo suspicari piaculum fuisset. Cùm verò per biduum nullam ab Imperatore adfuturas colloquutiones invitationem factam fuisset, animi valdè anxius, sensisset, longioris moræ prorsus impatiens, *Spinola* literas dedit, obnixè orans, ut modum, quo Imperator iterum esset facilius adeundus, excogitare, & suggerere vellet: sed excessit ex urbe Imperator venandi causâ, unaque cum illo aberat *Spinola*: literæ verò prius scriptæ, mutatis mutandis, post septimanam illi tradebantur, qui *Devus* nuncio postero die retulit, *Imperatorem*, tum quod linguam Latinam (hac enim inter colloquendum usi fuerant) non probè calleret, tum quod per multiplices maximi momenti occupationes, quovis tempore audientiam concedere non liceret, ideo totum istud negotium, *Doctori* *Jacobo Curtzio*, qui erat ab illius consiliis, (viro quidem ob sapientiam penitiorumque Scientiarum Mathematicarum peritiam celeberrimo) quocum *Devus* apertissimè & omni cum libertate agere posset, transigendum commisisse, si illi ita videretur: sin aliter, *Imperatorem*, quo modo illius desiderio satisfaceret, provisurum. Ad editam *Relationem*, ubi hæc aliaque quamplurima, quæ censeo omittenda, speciatim recensentur, curiosum Lectorem remitto, summa rerum capita, in hac brevicula narratione, quæ in magnam molem excresceret, si idagerem, delibare contentus. Ad ædes *Curtzii* protenus Septembris decimo quinto se recepit *Devus*, quò crystallum librosque octodecim manu propria exaratos deferendos curavit, repetere gestiens, se per misericordiam Dei, à *Michael*e, *Gabriele*, *Raphael*e, *Uriele*, aliisque bonis Angelis, quicquid in istis libris jam coram expositis comprehenderetur, edoctum fuisse; quibus leviusculè evolutis, & accuratiùs quidem postremò, qui ad *Rodolphum* pro-

piùs spectabat, post sex horas domum redibat, pollicente *Curtzio*, se ea omnia Imperatori nudè, sincerè, & fideliter nunciaturum. Proxima conversatione, quæ ad vicesimum septimum diem dilata erat accessit ædes *Devianas Curtzius*, Imperatorem illa, de quibus differuisset, omnem fidem exsuperare, & nequiquam fieri posse planè dijudicasse, relaturus: ideoque ut actiones Latinè versas, & præsertim illam, quæ paraphrasim in Symbolum Apostolorum complectitur, coram illo, ut de illis maturius rectiusque judicium, quantum per otium licebat, fieret, producere vellet: replicavit *Devus*, se originales libros, de manibus suis tollendos nequiquam passurum; istarum verò actionum apographum, quod petebatur, describi curaturum. Deinde querelis de tam longæ moræ tædio ingestis, caussatas, se alteras ad Imperatorem literas dare in animo proposuisse fatetur, quas quidem, instigantibus spiritualibus suis Magistris & Directoribus, ante aliquot dies conscripserat. Has verò postea amico suo, Legato *Hispanico*, tradendas concedere consultius judicabat: In hisce autem, quò *Rodolphum* chymicis experimentis, si ita loqui fas sit, quam pro dignitate decuit, addictiorem, ad partes suas potentiùs protraheret, Dei nomine asseverabat, sibi *lapidis illius benedicti*, vulgo nuncupati *Lapidis Philosophorum*, conficiendi artem modumque infallibilem innotescere, opusque illud Philosophicum ore & corde pollicetur, sanctèque coram Deo omnipotente vovet, se illicò communicaturum, sola hac mercede proposita, ut *Cæsarei Philosophi & Mathematici* titulo insigniretur. Veruntamen huic grandiloquentiæ & pompæ verborum, aut hisce speciosissimis, blandissimisque promissionibus de immensis opibus, usu, & vi pulveris chrysopoetici accumulandis, nequiquam cedebat Imperator, de quo tamen postea præstigiis suis expugnando, *Devus*, ut videtur, licèt vix aliqua spes in præsens affulserit, non prorsus desperavit.

Octobre hujus anni, *Devus Cracoviam* ad uxorem, familiam, suppellectilemque inde deducendam excucurrit, ubi post duorum præter propter mensium rebus componendis impensorum moram, *Pragam* reversus est, *Lascoyii* ad Legatum *Hispanicum* ad amicitiam prius initam arctiùs confœderandam literis auctoratus. Dum verò post reditum ab Imperatore & *Curtzio*, omni commercio de arcanis, sive Philosophicis, sive cœlestibus, cum illo penitus abjecto, nullaquæ illius jam ratione habita, magis magisque negligenteretur, admonitus quoque à spiritibus seductoribus de imminente carceris periculo, ni clam præcipiti fuga sibi consuleret, equis conscensis, *Praga* relicta, *Kellao* ac famulo comitatus, iter versus *Vratislaviam* capeffivit. Cum autem *Limburgum*,

27. Feb.
1585.

sex

sex milliaribus Germanicis ventum esset, proximo mane, consulto oraculo, (hoc enim quocunque se verteret, ad quod quavis occasione data confugere consueverat, semper secum tulit) à personato fictoque *Michael*e jussus est reverti: cum nihil jam ab ira pravisque consiliis *Rodolphi*, quem post annum miserrimè periturum, inque illius solium *Stephanum* Regem *Polonia* brevi substituendum esse pronunciat, ultra metuendum esset; simulque omni metu excusso post reditum palam per urbem prodire. Ita nimirum spiritibus, huc illuc ire pro lascivia & protervia, jubentibus, cæco impetu promptissimè morem gessit. Versutè quidem tum reconditæ eruditionis ostentatione, tum placidissimis moribus, in quorundam Procerum magni nominis & præcipuè in Aula auctoritatis gratiam antea sese insinuassee, ex hoc manifesto indicio constat, quod cum infans, recens natus, sacro baptismo tingendus esset susceptores comparuere, *Gulielmus de Sancto Clemente*, *Hispaniarum* Regis apud Cæsarem Legatus, *D. Romfius* summus Cæsareæ Majestatis Cubicularius & Consiliarius, & nobilissima femina, Domina de *Dittrechstein*, *D. de Dittrechstein*, Palatii Seneschalli *, uxor, ritus sacros in arcis *Pragensis* majori templo, Martii decimo quarto administrante Imperatoris Capellano, ut vix quicquam publicè, quod magis *Devo* in honorem cederet, præstari potuisse videretur. Nomen verò infanti, illo rogante, *Michaelis* Archangeli in gratum observantiæ erga ipsius benefici Directoris & Defensoris, uti delirabat, *μνημόσυνον* impositum erat.

* Mayor-Domo.

Ne fidei violatæ crimen Spiritibus grande illud auri conficiendi arcum toties promissum hætenus non revelantibus exprobraret *Deus*, tandem ludicram cujusdam chymicæ præparationis, ex qua *benedictum istum, rubrum, gloriosumque pulverem* extrahere, formulam tanta vocum barbararum perplexitate involutam, quam neque ille neque Symmista intellexerint, dictavit *Levaniel*, quæ licet ab omnibus aliis sub ejusmodi involucris celanda, illis saltem explicari debuit: Sed totus processus ad obtufofaciendam distrahendamque, quam ad informandam mentem compositus videtur. Dum verò in summa ista rerum omnium egestate, ad quam deficiente pecunia redigebatur, animum languentem latrantemque stomachum hisce aureis insomniis sustinuerit, materfamilias, non aliter de rebus quotidiani usus ad vitam necessariis, nisi vendita suppellectile, aut oppigneratis vestimentis, providendum esse, conscia, jam penè impositi sui, miserrimum in modum excruciat. Pudit quidem maritum, utpote Philosophum, domestica hæc mala fateri, aut Magnatibus aliisque, quorum studiosè captaverat amicitiam, pauperiem, qua laboravit, retegere. Hoc nimirum cum Philosophicæ professionis & instituti digni-

gnitate parum conveniebat. Emori & fame enecari, quàm hoc turpi modo, quasi emendicando, duræ necessitati subvenire maluit. Uxor autem, imbellis femina, summaque erga parvulos suos, ne esuritione contabescerent, miseratione tacta, tanta duritie & obstinatione pectus obfirmare non potuit. Quid ergo? Illa pro ingenio & solertia, ad misericordiam exorandam, affectumque Angelorum, quos prorsus immites fore nefas duxit suspicari, concitandum, supplices libellos nomine suo signatos conscripsit, in proxima actione legendos, ut illorum consiliis, quo pacto & à quibus istiusmodi subsidia, quorum isthoc tempore erant egentissimi peti possent, edocerentur. Illa vero ob temeritatem & audaciam se coram *testimonio voluntatis Dei* sistendi objurgatâ, quaestionibus propositis, inter alia, responderunt, *necessitati parendum esse, adiumque apparatus & ornatum, corporisque cooperimenta ad averte-* dam famem, *pecuniis commutari debere*; hoc solamine addito, *se illi liberisque bene velle, & tandem prospecturos*: deinde maritum illinc versus *Poloniam ad Stephanum & Lascovium* properare monent. At cum ille per septimanam destinatum istud iter ingredi, negotiis domesticis occupatus, distulisset, post impetratam breviculæ moræ indulgentiam, unâ cum *Kellao*, perpetuo comite duobusque famulis, relicta *Praga, Cracoviam* Aprilis duodecimo profectus est,

Post paucos dies, *Lascovio* intercedente, & facilem aditum procurante *Devus* ab eodem ad R. *Stephani* præsentiam introductus, illum Aprilis 17. brevi compellavit, dicendo, se *divina accepta admonitione*, ipsissima illius verba sunt, *de iis, quæ ipsi divinitus injuncta essent, cum omni fidelitate & sinceritate cum Regia sua Majestate tractare, & deinde, mysteriorum historias de ordine in ordinem referre, prout occasio dabitur, paratissimum*, isthuc venisse: cui Rex, de ipsius gratia, favore & patrocinio præmissa sponcione, replicavit, quod tempore de illis rebus differendi magis opportuno, nimirum post festos dies (tunc enim instabant solennia Paschatis) accersendum curaret. Jam exactis viginti diebus, quibus crystallo cortina intus obducto, ex arbitrio spirituum, dum *Praga* aderant, oraculum obmutuit, actiones intermissæ redintegrantur.

Vicesimo tertio Maio *Lascovio* & *Devo* coram R. *Stephano* in interiori Aulæ camera comparentibus, hic *Devum* in primis hujus congressus initiis ita affatus est, *egisse mecum D. Palatinum, ut vos audirem, de rebus istis magnis & raris; quod libenter feci: & tamen hoc considerari debet, quod Prophetæ omnes & revelationes jam diu & in tempore Christi cessaverunt: attamen si nihil in istis contra Dei sit honorem, eò lubentius audienda, & ego quidem haud dubito, quin Deus nunc*

possit multis modis secreta quædam hominibus detegere, ad hac usque tempora inauditis & inusitatis. Ad omnem scrupulum è Regis animo eximendum, singulis articulis propositis, vafri ingenii vires, hac pulchra occasione data, explicaturus, respondere, longa oratione habita, conatus est: quam in Appendice curiosus Lector inveniet, illam enim in compendium redigere omninò tædet. Cujus tamen ex ore & pectore illius mirabili promptitudine & fervore, quem argumenti gravitas zelusque falsus concitaverat, profluentis lenociniis dèrepentè capiebatur, ut actioni proximæ, in illius gratiam Latina lingua instituendæ, interesse neutiquam recusaverit. Illa autem, quam producto crystallo, aliisque ritibus adhibitis, ac oratione ad Deum pro re nata, verbis prius conceptis seriò fusa, inchoavit *Devus*, vicesimo septimo ejusdem mensis die, peragebatur: Sed hisce diabolicis incantamentis non se amplius illudi, adjuvante divina gratia, passus est *Stephanus*, nec unquam posthac horrendis istis mysteriis interesse voluit. De illo tamen expugnando non prorsum desperavit *Devus*; illum ergo, prout maligni spiritus mandaverant, proposito arcano conficiendi Lapidis Philosophici, ipsi, ut nuperrimè *Rodolpho*, communicando, denuò aggressus est. Sed jam prudentior factus *Stephanus*, obfirmato animo, fallaces ejusmodi promissiones constantissimè repudiavit. Itaque cum nihil in propagandis blasphemis impiisque suis opinionibus apud *Stephanum* profecisset, desinente Julio, *Pragam* redire festinavit.

Non multò post, in mysticam hanc Societatem *Franciscus Puccius Florentinus*, Vir subtilis ingenii, literarum studiis innutritus, Artibusque curiosis deditissimus, admissus est, quem malæ fidei suspectum, & pro exploratore habitum, ab hac facerrima communione, sequente anno penitus rejecit & abdicavit *Devus*, nullis, ut ut blandis adulatoriisque epistolis, nullis renovati foederis & sinceræ amicitiae professionibus coram factis, illi postmodum conciliandus.

Interea temporis censuris, dicteriis, contumeliisque susque deque habitis, *Devus*, licèt penè vulgi fabula habitus, *Pragæ* usque morari, domiciliumque fixum ibi habere constituit, animo, si non, læto, saltem non despondente, novos amicos, fautores, & patronos sedulò (nemo enim hominum mores melius novit, aut subtilioribus strophis insidiisque incautos aggredi & expugnare solebat) quæsiturus. Inter hos eminebat nobilissimus vir, *Gulielmus Ursinus*, Dominus *Rosenburgi* Eques aurei velleris, supremus regni *Bohemiæ*, Burgravius, hujus planè illecebris irretitus, se totum in illius, quasi arcanorum Dei particeps, & Angelorum familiaris amicus fuisset, disciplinam dedit, cujus auspiciis & pa-

trocinio, quod hactenus in irritum cecidisset, & *Devus* pro insanabili mentis infania & obstinatione, & Magistri tandem effici posse sperabant. De hoc novo Alumno inter Mystras mox adscribendo, maligni Spiritus quasi jam jam triumphos acturi, quo illum mundanæ gloriæ cupiditate & effræni ambitione afflatum magis magisque dementarent, & inexplicabilibus illigarent nodis, in longè majores honoris quàm per nascendi sortem, ut ut valdè illustrem sperare licuerit, gradus efferendum, illum nimirum fore *Poloniae* Regem postea annuntiarunt. Interim cum *Rosenbergius* nuptiis contrahendis animum advertisset, animi tamen dubius, qualis femina ducenda esset, illi *agnam*, i. e. virginem, neutiquam spolians vicini pauperis grege, (nam, ut videtur, solutioribus moribus & luxui antea nimium indusserat) assumendam esse in uxorem monent. Post hanc actionem 30 Aprilis 1586. factam, iisdem ita volentibus, *visitationes* per sex menses futuros intermittendæ erant & cessaturæ.

Justitio hoc ac feriatiōe concessis, *Devus* de rebus suis in *Anglia* impendiō sollicitus, post paucos dies *Lipsiam* contendit, ab *Anglis* pro more ad Nundinas ibi celebrari solitas, mercaturæ gratia illò euntibus, quid domi, quod ad illum peculiariter spectabat, accidisset, ab illorum ore edocendus.

Hac occasione arrepta, fidum nactus *Γραμματοφύρον*, in *Angliam* citò rediturum, longam ad D. *Walsinghamum* Secretarium decimo quarto Maii datam scripsit epistolam (sicut anno superiori ad ipsam Reginam de eodem argumento scripserat) in qua multa de rerum suarum statu congestit, viz. Imperatorem aliosque præcipuos ex Romani Pontificis clientela, sensu doloris de injuriis illatis tactos, de malis erroneisque opinionibus, adversus ipsum prius conceptis, multum remisisse: illos quibuscunque modis, tum vi tum metu incusso, ut in partes, quas alterutri secuti sunt pertraheretur, niti: se ab ineunda cum Nuncio Apostolico, *Mala-spina*, per annum oblata & quasi palpo obtrusa, amicitia penitus abhorruisse; hisce novis rebus turbata & territa Roma, mortem violentam ipsi infligendam esse, inde minis additis denunciari: sibi de ædibus, bibliotheca, & supellectile post ipsius discessum spoliatis, redditibusque interceptis ex æquo satisfaciendum esse; Thomam Diggesium, utpote virum idoneum, veteri amicitia conjunctissimum, quocum de arcanis maximi momenti Regina communicandis apertissime ageret, in Germaniam mitti oportere; & denique illam longè melius rationibus suis consuluisse, si decies centena millia auri, sive in eleemosynis, sive qualitercunque profudisset, quàm non consiliis ipsius auscultando, quasdam opportunitates elabivisse: Non tamen spem, quod Deus misericorditer faciendum statuisset,

re dimendi, omnino decollasse. Ita ille confidentissimè, quasi hæc omnia à spiritu sancto fuissent pectori & calamo immissa. Interim dum ille aberat, Episcopus *Placentinus* nuperrimè *Roma* missus ut alteri Nuncio succederet, calidissimo Pontificis ad hæc novitates ubique propalatas, planè attoniti, jussu auctoratus, Imperatori libellum supplicem exhibuit, in quo *Devum* Magiæ Artiumque necromanticarum postulavit, interpositis consiliis ne ex indulgentia hac tamdiu concessa, aut Religio Christiana aut publica tranquillitas læderetur; petens quoque, ut ad *Romam* amandaretur. *Devus* autem mali, quod capiti imminerebat, ignarus, cum *Pragam* reversus, quid sibi metuendum esset, non sine horrore & summa tristitia didicisset, literas tum ad D. *Rosenbergium*, tum ad Imperatorem, ad grande illud periculum quod jamjam instabat, avertendum, protenus dedit: sed omninò frustra. Neque enim hujus interpositæ preces & intercessio quicquam valere, nec illius pietas & prudentia diutiùs expugnari potuit; cum cuivis ejusmodi præstigias, nisi obice tempori posito, latius evagaturas, & funestum exitum habituras, facile constaret. Decretum enim erat 29. Maii in secretiori Imperatoris consilio, ut post sex dies extra Imperatoriæ Majestatis ditiones *Devus* & *Kellaus*, cum tota familia, discederent sub summi discriminis subeundi periculo, si contra venissent. Convasatis ergo omnibus rebus, ille se summa cum festinatione extra proripuit, tutiori loco nova, quid jam hîc importuno & molesto tempore præstari oportuerit, consilia initurus.

Erphurdiam, *Thuringiæ* urbem, profectus, cum in ista urbe ædes conducturus esset, à Senatoribus, ad quos exilii fama pervenerat à tali hospite metuentibus, licèt illis à D. *Rosenbergio* commendatus, repulsam tulit, illic tamen venia, donec aliò commodiùs eundum foret, commorandi concessa. Huc autem *Puccius*, habitis priùs cum Nuncio colloquiis, & à quo Syngrapham, in qua *Devum* sociumque individuum, si *Romam* ire vellent, ibi omni cum humanitate ac charitate tractandos esse, fide data, suscepit, accepisset, post mensem aut circiter appellens, multa de istius Nuncii erga illos benevolentia præfatus de itinere *Romam* ineundo, multis argumentis in medium productis & præsertim hoc palmario, quod *Deus in actione quadam illos Romam ituros pronunciasset*, persuasum volebat. Sed *Devus* non ita desipiebat, ut sese in insidias ab hoc exploratore structas daret præcipitem. Altercationes alterutrinque agitas hîc immiscere planè piget. Cum verò *Devo* perfidia *Puccii* magis magisque ex hisce alloquiis innotescere cœpisset, illum, tum ob hanc, tum ob alias causas, putà ob acrem disputandi impetum contentiosumque prurimum, ob futilitatem & imprudentiam in arcanis, nulla venia impe-

trata, retegendis temerè admissam, ob indebitum in res neutiquam ad illum pertinentes penetrandi desiderium & curiositatem, & denique ob mores, uxoribus illorum neutiquam gratos, prorsus indignum, qui in ista sancta societate diutius maneret, & meritò, juxta monitum prius ab Angelis acceptum, excindendum esse judicavit. Ne verò illum malo animo à se prorsus alienum redderet, literas Nuncio tradendas ipsius curæ commisit. *Cassellis* postmodum divertens, ignominiosam hanc proscriptionem, *Rosenbergii* tum literis refocillatus, tum pecuniis adjutus, æquo animo tulit, & talem nactus Patronum & Advocatum, plurimaque apud Imperatorem gratia pollentem, de futuro in *Bohemiâ* reditu bonam in animo spem alere perrexit. Quod tandem ejusdem repetitis intercessionibus ex parte effectum erat, decreto eousque revocato, ut *Devo* reverti liceret, modò intra fines ambitumque terrarum D. Burgravii deinceps continendus, non aliorum & ultra vagaretur. Benignissimè igitur ad arcem *Trebonæ*, hæreditariam *Rosenbergii* sedem, uti ad tutissimum asylum, invitatus, mense Septembre, lætus properat ibi, Dæmonum consortio, jam longum intermisso, summa cum libertate gavisurus.

1586.

Finitis sex, in quibus ex jussu Magistrorum nullæ apparitiones factæ fuerant, mensibus, actiones consuetæ denuò renovari cœperant, in quibus dæmones ludos & delicias facientes, *Rosenbergium*, horrendis hisce sacris admotum, & præ nimia mentis facilitate non ampliùs sui compotem, vanis promissionibus effascinarunt, foedus nimirum cum illo ab isthoc die quo primùm aderat, ineundum, & cœleste mysterium illi quoque revelandum esse. Sed cum munus istud, quod apud Imperatorem cui erat à secretioribus consiliis, gessit, aliaque publica negotia illum inde avocarint, & in Aula Cæsarea protenus adesse jusserint, si qua difficultas, si quod dubium, è quo sibi non esset facilè expediendum, putà de successione *Polonica*, & mediis, quibus illud regnum faciliùs obtineri posset, de chrysopoetico, quo donatus erat, pulvere & an quippiam istius thesauri Cæsari esset communicandum, aliisque rebus gravissimi momenti occurrisset, hæc oracula sciscitari consultissimum duxit, ut quomodo se gerere deberet, certissimè informaretur. Has quæstiones aliasque de usu & multiplicatione istius pulveris, *divinitus*, ut credidit, *concessi*, deque illo *ex methodo Dunstani* conficiendo, item de quibusdam privatis domesticisque rebus è charta coram oraculo prælectas proposuit *Deus*: vafra autem & ambigua responsa, solutiones, consilia, quibus illius vesaniæ illusum erat, hîc referre planè piget. Ita pro more mendaciis diabolicis fasciatus in erroribus insomniisque suis amplexandis & reti-

nendis obduruit *Devus*. Non negaverim, illum hæcenus à turpi scelere purum, probitati studuisse, orationibus ad Deum intentum, ingentem sanctimoniam, & Christianæ religionis reverentiam in mediis hisce, quibus circumveniebatur, illusionibus, præ se tulisse. Sed en obstupescendum deploratissimi ingenii & diabolicæ tyrannidis in illum exercitæ specimen & exemplum! Apparuit in crystallo columna candida, super cuius scapo *Devi*, *Kellai*, uxorumque capita sub eadem corona imminente adunabantur, corporibus intus inclusis, in signum arctissimæ unionis inter illos hoc emblemate fanciendæ, quam Christiano & pio sensu intelligendam esse voluit *Devus*, contra verò mentem pseudo-angelorum, qui ista de re consulti, non de solo spirituali amore & unitate animorum, sed de carnali quoque & promiscua conjunctione & concubitu interpretati sunt, &, ut id fieret, expressissimè mandarunt. Exhorruit *Devus*, dicendo, illam manifestam divinæ legis & Evangelii violationem fore: sed reprehensus, quod de hoc novo mandato, an à Deo esset, dubitare ausus esset, tandem post longam disceptationem cessit. Uxor, hujus propositi particeps facta, lacrymabunda contremuit, in istud flagitiosum facinus nunquam consensura: sed strophis mariti expugnata, *arcanis Dei consiliis*, sic delusa sensit, obsequi penè invita statuebat. Interim cum reluctarentur, nec animo quieto esse possent, repetitis jussibus à suis Præceptoribus, & præsertim à personato *Raphaele* nomine Dei, imò & ab ipso *Christo*, quæ horrendum est dictu, consilium istud Angelorum illis dictatum & traditum in illorum fidei probationem, ab illo prodiisse asserente, neutiquam verò doctrinam, quæ ad illos solos spectabat, aliis mortalibus, publicari oportere; & istud, quod illi *ἀνομιαν*, sive *iniquitatem* nuncupant, *cum latitia persequendum & faciendum esse*, pro summa auctoritate mandante, ita enim impiissimè blasphemavit, incitati, quatuor hi solenne cum Deo, subscriptis nominibus tertio Maii 1587. inibant foedus, iram offensi Numinis deprecantes se, non ex lascivia carnisque stimulis, sed ex solo divini mandati intuitu; ex fide & obedientia, prout *Abrahamus* in proposita filii mactatione olim fecerat, consensisse. O deplorandam stupiditatem! O execrandam insaniam! Incredibile videretur, hominem Religionis Christianæ institutionibus instructum, imò aut levi moralium virtutum sensu imbutum, adeò cæcutiisse, & ad extremam hanc fatuitatis & vecordiae lineam pervenire potuisse, nisi id *Devus* amplo commentario explicatum mirisque elucidatum circumstantiis literis mandasset. Tantum verò puduit hujus promiscuæ conjunctionis, ut, quò certius & firmitus, ne cuiquam mortalium unquam pateret, caveretur, omnes in hoc eodem foedere impiè ineundo, dira impre-

catione coram Deo solenniter habita cuicunque ex istis quatuor revelanti, & singulis quoque aliis quibus hoc horribile secretum revelabitur, subitanam mortem in illo ipso momento infligendam esse obtestati sint.

Hactenus ex itineris & actionum Diario, publici juris facto: schedæ, quæ sequi debuerant, rerum post *Trebonæ* vicinisque locis (ibi enim *Devus* ultra per sesquiannum moratus est) gestarum narrationem complexæ, intercederunt.

Regina *Elisabetha* miserta *Devi*, qui aut præ pudore aut præ metu, patriam, à qua se clam subduxerat, repetere non ausus est, nolensque labem Genti *Anglicanæ* ex facinoribus unius aut plurium transfugarum ulterius inuri, illum in *Angliam* reverti, nulla interposita excusatione aut mora, literis per nuncium missis, jussit. Ille verò natale solum domesticosque lares ex favore & indulgentia Principis revisendi cupidissimus, lætus capessit iter, & magnis periculis & expensis defunctus, anno 1589. desinente, post sex annorum absentiam ædes suas *Mortlakianas* feliciter attigit.

Cum verò *Devus* post reditum, non sine mœrore expertus vidisset, ex una parte memoriam rerum antea actarum ex animis eorum, quibus prius innotuisset, non exolevisse, suspiciones, parum, dum aberat, sopitas, jam denuò erumpere & redaccendi; atroces censuras & criminationes sibi in Aula impactas; dicteria in triviis à vulgo in ipsum jactata; à quo, si forte occurrisset, pueri in plateis ludentes, tanquam à Mago, quem Anglicè appellamus *as conjurer*, quasi territi, aufugere solebant: Præsules autem aliosque Ecclesiasticos ob illicitas, quibus se à juvenilibus annis devoverat, artes, maximè infensos; ex altera parte, reditus imminutos; nullam damni, à tumultuante plebe inveci, reparationem adhuc factam; rem domesticam in pejus ire: se primo accessu à Regina placido vultu exceptum, nondum aut pensionis annuæ aut cujuspiam opimæ dignitatis compotem; denique omni ad alendam familiam subsidio mox destituendum, & fame periturum, ni Regina, & amicorum benevolentia, submissis pecuniis, subinde subvenisset; quò hisce malis ingruentibus commodiùs obviam iretur, supplicibus libellis 9^o. Novembris 1592. utpote tædiosa per triennium exspectatione fatigatus, & ad incitas redactus, Regina exhibitis obnixissimè petiit, ut duos tresve Commisarios, qui de rebus illius ipsi ex æquo repræsentandis, summa exploratione & rigido examine habito, cognoscerent, delegare dignaretur. Annuente illa & jubente, duo clarissimi viri, D. *Joannes Wolleius* Secretarius ab Epistolis Latinis, & D. *Thomas Gorgius* à Vestiario Regina, post septimanam unam aut alteram in ædibus *Devi* comparuere, qui

quibus vitæ & studiorum per quinquaginta annos transactorum compendium, (a) à se antea elaboratum, inque capita methodicè digestum, documentis, probationibus & testimoniis ad rerum fidem, quando opus erat, faciendam è libris, literis, schedisque in mensa præjacentibus, in medium productis, prælegebat. In quo, passim de meritis erga patriam, bonas literas, ipsamque Reginam, de frustratis violatisque promissis toties repetitis, de damno, quod ex ædium & Bibliothecæ direptione sustinuerit, & de præsentis rerum ferè omnium inopia, amplum in modum disserens, tandem nomine ipsius, Uxoris, septemque Liberorum humillimè & obnixissimè exorat, ut apud Reginam vellent intercedere, ut pro clementia, benignitate, & misericordia ipsius par remedium huic intolerabili malo adhiberetur.

Sed neque Regina, neque Consilarii, neque Præsules ex præjudiciis, alta mente repositis, hisce importunis precibus quicquam concessere. Perspectum igitur habens *Deus*, unde durities ista originem duxerit, quo se ab omni Magiæ, qua laboravit, criminatione, & suspicione purgaret, literas Apologeticas ad D. Archiepiscopum *Cantuariensem* ineunte anno 1595. scriptas edi curavit, in quibus coram Deo & coram illo Archipræsule solennem in modum, *periculo damnationis animæ se sola bona, licita, honesta, Christiana, & divinitus præscripta ratione & methodo in studiis Philosophiæ* (hoc enim nomine impiam suam curiositatem obtegere usque placuit, uti longè antea se *pro bono Christiano Philosopho* venditare solitus fuerat) prosequendis hætenus usum fuisse, & etiamnum uti: se hac Apologia agere, *non tam ut ore oblatrantium obturato, stultis, impiis, falsisque rumoribus, calumniis, & fabulis ubique per Angliam sparsis, iretur obviam, quam ut bonis probisque viris, ex longo studiorum curriculo, & ex serie, numero, & argumentis librorum, quos per quadraginta annos conscriptos ibi recenset, inde satisfaceret.* Interim ne unicum quidem verbum de commercio cum *spiritibus*, sive in *Anglia*, sive extra *Angliam*, habito proferti; librosque sua manu exaratos de *doctrinis & revelationibus Angelorum* vafre celat. Aliter suam ipsius tum stultitiam & vecordiam, qui sibi adeò crasse imponi passus est, tum impietatem, qui horrenda ista arcana, in illis libris comprehensa,

(a) Exstat MS. in Bibliotheca Cottoniana, sub Vitellio. C. VII. quod, dum in conficiendo istius celeberrimæ Bibliothecæ Catalogo occupatus reperissem, illico ab Amanuense meo exscribendum curavi: hinc hujus vitæ describendæ prima occasione derivata: utpote tunc temporis penitus nescius, aliud hujus autographi exemplar alibi extitisse.

sa, Deo bonisque Angelis adscribere ausus fuit, apertè prodidisset. Unde nemini mirum subesse debet, si ex hac persuasione, licet falsissima ineptissimaque, in imis medullis defixa, in istam vecordiam prolapsus, ad tremendam istam adjurationem, qua æternam animæ suæ perniciem devovet, nisi verum dixerit, adhibendam, in læsæ famæ defensionem impelleretur.

Regina verò, sive speciosa hac apologia emollita, sive potius, summa erga senem penè septuagenarium (quem *Philosophum suum* appellare facetè solebat) jam ad incitas redactum, & numerosam familiam, miseratione tacta, illum isthoc anno literis patentibus vicesimo die Maii 1595. datis, sigilloque Regio munitis, ad præfecturam Collegii *Mancestriensis* in provincia *Lancastriensi*, *Hugone Beloto*, illius Decessore, paulo antè Episcopo *Cestriensi* constituto, provexit.

Hic non tantum commodè, sed lautè jam per septennium vixit, magna quidem famâ, sed non æque bona, utpote atris censuris, infamibusque suspicionibus, ex arcanæ Philosophiæ, quod continenter præ se ferebat, studio exagitatus: muneri obeundo, tanta cum industria, prudentia, & manifesta religionis professione, ut nullus inde de scandalo dato criminandi pateret locus, intentus. Non enim in hunc censum rixæ, quas cum sociis, sive de pecuniis, ex annuis redditibus succrescentibus, inter se partiendis, sive de regimine, non ex solo ipsius arbitrio, sed mutuis consiliis moderando habuit, quod sæpe inter optimos quosque usu venire solet, referri debent. Municipales autem & agricolæ de illo adeo insulsè, dicam, an altum, præter morem sentiebant, ut si quos crederent in ista regione obsessos aut sagarum fascino tortos, ad illum tanquam ad potentissimum Exorcistam, salutari ope implorata, confugerent, donec hoc credulæ plebis elogio in probrum versò, hanc potestatem in Dæmonas sibi adscriptam procul à se eliminaverit; interim benignè monens, ut de providendis tantorum malorum, junctis precibus & jejuniis expugnandorum, remediis *Ministros* Sacrorum irent consultum. Ne verò suspensiones istæ ubique creditæ, nulla versutia, obtestationibus nullis hætenus obterendæ, fidem quoque apud novum Regem adipiscerentur, quod ipsi in magnum tum dedecus tum damnum cessurum *Devus* non potuit non arbitrari, libellos supplices, simul cum Apogeticis literis, jam denuò recusis, 5^o. die Junii 1604. R. *Jacobo* in manu exhibendos curavit, in quibus se ab omni magiæ crimine purum & integrum esse iterum maximo studio obtestatur: sese coram ipso, Consiliariis, ordinibusque regni tum coactis examinandum offerens de illis rumoribus & suspicionibus, quibus per universam *Angliam*

gliam usque laborabat, ac, si aliquid cum Dæmonibus commercium habuisset, sub pœna mortis aut vivicomburio, aut lapidatione, aut vivi corporis sepelitione immisericorditer infligenda, si magiæ objectæ reus calculis Adfessorum & Judicum deprehenderetur. Ita in falsissimâ impiaque sui opinione, de familiaribus suis Amicis, quos bonos esse Angelos à Deo missos credidit, non isthoc infami Dæmonum titulo dehonestandos, pertinacissimus delirusque perstabat. Sed serenissimus Rex, quo nemo artes Diabolicas, qualicunque velo obtectas, aut solidiori iudicio, vel acriori zelo, execratus est de illo ejusque vitæ instituto & studiis à D. *Roberto Cecilio*, Comite *Salisburia*, & *Anglia* Thesaurario, cujus sapientissimis consiliis, in arduis regni negotiis innitebatur, informatus, hominem, ut videtur, despexit, planèque indignum Regali gratia & favore, pro pietate & eruditione sua judicavit.

Tandem igitur, sive ex tædio, sive confectæ ætatis malis fractus, sive potius impropriis dictis & ingestis, ipsi petulanter ingestis, obrutus, *Mancestriam* mense Novembre A. 1604. reliquit, reservatis sibi, licet absenti, solvendo, Præfecturæ proventu & salario, ædes proprias *Mortlaci* sitas repetiturus.

Mense Martio A. 1607 *Devo* calculo aliisque ægritudinibus laborante, extrema paupertate oppresso, perplexisque faucibus mentis angoribus agitato, qui novum horumce oraculorum interpretem & *Inspectorem*, *Bartholomæum Hickmannum*, jam nactus fuerat, (in cujus locum, si fortè abesse, aut in *Anglia* non morari contigerit, intimus *Devo* amicus, *Joannes Pontesius*, nuper ex *Polonia* redux, chymicis experimentis, curiosisque artibus addictus, substitui obnixè rogavit) personatus *Raphael*, solus, uti in sequentibus actionibus, comparens, illum bono esse animo, & de recuperanda valetudine securum fore jussit, & mox promissionibus de certa Lapidis Philosophici & libri S. *Dunstani* cognitione & intelligentia renovatis, item de miraculis ab ipso edendis, ut de aliis divinæ sapientiæ mysteriis & arcanis ipsi revelandis; neminem mortalium aut unquam præter *Enochum*, habuisse, aut habiturum, tales tantosque cœlestium rerum scientiæ gradus, quos de futuro spondet, iteratis actionibus, ut Patriâ relicta, exteras regiones, rebus compositis, quàm primùm potuerit, peteret Dei nomine mandavit se in ipsius perpetuum comitem, sicut olim fuerat *Tobie*, destinari; *Sarisberiensem* Comitem à Diabolis, quos nominat, exagitatum in illum pro Mago habitum, implacabili odio ferri, insidiasque ad illius certam perniciem struere; ideo ex *Anglia* festinandum esse, si salvus esse vellet. Interim *Devus* multa dubia solvenda proponit, puta de alienis pecuniis, deque suis

fuis vasis argenteis furto sublati, de thesauro abscondito inveniend, de commeatu comparando, de sociis itineris, & præsertim de regione & urbe, qua eundem, & maximo commodo consistendum esset: cui inter cætera, quæ planè omittenda censeo, responsum erat, totum illud, siue *Germaniam*, siue quamcunque aliam regionem elegerit, soli ipsius arbitrio referendum esse: ubicunque esset, sibi provisum & prospectum fore, & quicquid faciendum maximè conveniret, ibi edocendum esse. Harum actionum, quæ Martio præcedente coeperant, ultima septimo Septembris peragebatur. Sed non longè post, dum omnia itineri instituyendo necessaria pararet, miserrimus *Devus*, adhuc propriis ædibus adfixus, morbo magis magisque recrudescente, vitæ cursum, octogesimo primo ætatis anno, explevit. Ita quidem fatalibus istis illusionibus, quibus animum per quinquaginta annos innexuisset, absque aliquo deploratissimæ fatuitatis sensu, immortalis videtur, & intra cancellos Ecclesiæ parochialis, de cujus fabrica & reparanda & ornanda benè meruerat sepultus jacet. Cujus nomen, apud omnes posteros mansurum, alii ob summam in Mathematicis peritiam cum honore legent; alii ex intuitu humanæ infirmitatis, & ex nimie credulitatis excusatione miserabuntur; alii verò ob impium novæ religionis in mundum invehendæ, zelum studiumque odio, horrore & execrationi habebunt.

Hactenus historiam vitæ & studiorum *Joannis Devi* strictim quidem & pressè descripsi. Cum verò multa, quæ utrisque illustrandis suppetant, ne series narrationis, iis passim insertis, interromperetur, prudens & de industria omiserim, ea in hac appendice, uti in commodiori loco, brevi quoque compendio, recensebo.

Quod ad genus paternum attinet, de nobili & antiqua stirpe, originem è *Wallia* ducente, cum excusatione, imo & jure merito, prout moris est, gloriari potuit *Devus*, si *Rodericum* magnum, & *Hoelem Dha*, i. e. *bonum*, *Wallia* Principes utrosque celebratissimæ apud Gentem suam famæ, & immortalis memoriæ, deinde *Rhesum*, aliosque magni nominis viros, longa serie, (si schemati genealogico ab ipso producto fides sit adhibenda) ad usque *Davidem*, *Joannis* nostri proavum, continuatos, inter majores ritè numeraverit. Hic verò cognomentum *Dey*, quod Britannicè significat *Niger*, in familiam primus transtulit: quod mox molliori sono prolatum *Dee*, ad filium *Bedonem* signiferum, nepotem *Rolandum*, & pronepotem *Joannem* transibat. Sed cum supervacanei esset laboris, & à re prorsus alienum, in horum omnium studiis, gestis, vitæque accidentibus, si justa suppeteret materia, indagandis recensendisque diutiùs immorari, unicum tantùm è seris nepotibus me-

morabo. Is est *Franciscus Dee*, *Bedonis* abnepos, olim Collegii *S. Joannis Evangelistæ* in *Academia Cantabrigiensi* socius, qui per aliquos Ecclesiasticarum dignitatum gradus, factus Decanus Ecclesiæ *Cicestriensis*, tandem ad sedem Episcopalem *Petroburgensem* regnante R. *Carolo* primo, promovebatur. Vir quidem verè venerabilis, de sede sua, & de Collegio, quo educatus fuerat, præclarè meritis, piam efflavit animam A. 1638. De *Arthuro*, filio nostri *Joannis* natu maximo, postea dicendum erit.

Licet *Devus* à quibusdam in libris editis & à nostratibus in familiaribus colloquiis de illo habitis communissimè appellatus sit *Doctor*, sive *Medicinæ*, sive, ut aliqui somniant, *Theologiæ*: certò tamen constat, illum laurea, quam olim in *Academia Cantabrigiensi* consecutus fuerat, Magistri contentum, superiorem gradum & titulum in *Academiis*, sive nostris, sive exteris, neque ambiisse, neque capeffivisse. In instrumentis de prædiorum ad Collegium, cui præfuit, attinentium elocutionibus, ut ex Registro patet, semper nuncupatur *Magister Artium*: nec obstat, quod in rotulo membranaceo in quo omnium Custodum istius Ecclesiæ Collegiatæ, à D. *Thoma LaWarc* Sacerdote, & postea Fratre natu seniore absque prole mascula ex vita decedente, Barone Parlamentario sub R. *Henrico* quinto, fundatore, usque ad *Joannem Devum*, nomina & insignia gentilitia coloribus depicta longa serie continentur, supra propria ipsius familiæ Anglicè inscriptum sit, *M. Joannes Dee, Doctor in Mathematicis*, ex altera parte: *Ille est hoc tempore Custos, uti per aliquot antecedentes annos: Ille est Mathematicus Regius*: cùm hic titulus, honoris causa, ob summam illius in scientiis Mathematicis peritiam delatus, nunquam publica auctoritate, qua aliarum facultatum Professores Doctoratu insigniuntur, illi cesserit.

Cùm *Devus* orbiculum istum crystallinum, quem interdum *Anglicè the Shew-stone, or Skry-sone*, interdum *Lapidem Manifestationis, Lapidem Sacrum; & mysticum*, ac denique *receptaculum* nuncupat, post finitas actiones intus sæpissimè in adversa parte aurea cortina, interdum etiam albo velo dæmonum præstigiis obductum, sibi ab Angelo in manus traditum fuisse insulsè credidisset, nemini mirandum videbitur, illum coeleste hoc munus, *gemma suam*, uti paulò ante mortem appellavit, summo honore & reverentia habuisse: ne igitur temerè & quasi impuris manibus, dum huc illuc pro re nata transferri oportuerit, tangeretur, aut in pavementum ex rotunditate materiæ, aut ex lævore vitri fortè caderet, machinulis ex auro compactis, quibus sedi suæ infixum manebat, affabrè adaptatis, maximè cavebat. Fide verò priùs data & quidem concep-

ceptis verbis, *Neminem ex malis spiritibus*, quorum fraudibus & illusionibus aliter obnoxii esse potuissent, illum *ingressurum esse*, quando *Kellaus* cum Angelis extra crystallum in liquido aëre quasi fluitantibus seseque librantibus sermones conferere maluisset, hac de causa, ne ipsis fraus inde fieret, intercessit *Deus*, qui tamen postea fassus est, quendam dæmonem forma magni molossinigri coloris, se pro bono Angelo ostentantem, intus apparuisse: quem ideo ingestis convitiis *canem inferni* nuncupavit. Sed hisce dubitationibus subinde in animo admissis, & toties fraude dæmonum evanescentibus, promissione à ficto *Michael*, nullam rem immundam vas istud unquam in futurum subituram, renovata, *Deus* in pristinam relabitur vesaniam, licet mox quidam Dæmon filii, in quo populi terræ erunt maledicti, i. e. *Antichristi*, ut ipse interpretatur, parens se in eodem crystallo visendum exhibuisset.

Proximo loco memoranda venit *mensa Fæderis*, Anglicè *League Table*, or *Table of Covenant*, cujus totam fabricam, quoad formam & dimensiones, unà cum variis lineis, figuris, & characteribus, in plana superficie inscribendis, prout ab Angelis directoribus, præsertim à *Gabriele* edoctus fuerat, fusè describit. Figura autem ista, quæ centrum mensæ occupat; ex quadris oblongis, in quarum singulis decussatis ignoti characteres signantur, constans, appellatur *sigillum Dei*, nunquam nisi cum ingenti reverentia inspiciendum, cui in omnibus actionibus *Lapis mysticus* erat superimponendus. Illa ipsa mensa, quam *Magicam* verè appellare poterimus, in Bibliotheca *Cottoniana* etiamnum exstat: nec ulteriori illius descriptione opus erit, cujus icon æri incisa ante harum actionum historiam, à D. *Causabono* editam habetur.

Ad hanc mensam spectabat peculiaris *sacer*, uti appellatur, *apparatus*, putà stragulum, candidum linteamen instratum, pluteus, candelabrum, cereus, in tempore actionis ardens, pulvinaria, quibus rubræ cruces intextæ, quæ omnia Oratorio hisce horrendis sacris devoto pro more reposita erant: quod nemini præter mystas impunè ingredi licuit, si illorum fabulis aures faciles adhibeamus. Cùm enim in *Devi* facellum in ædibus *Mortlakianis* hisce usibus destinatum quidam *Lascovi* famulus temerè irrupisset, ob hanc impiam *Sanctuarii* prophanationem, illum post paucos menses submergendum esse horum rituum violatorum irati vindices denunciarunt.

Præter famosum istud crystallum supra memoratum, quod *primo sanctificatum & præcipuum* appellatur, verisimile videtur, alios etiam vitreos orbes minoris formæ, quorum frequens usus apud Magos, uti fertur, obtinet, *Devo* suppetiisse: an verò arte facti, aut unde allati

fuerint, non quicquam, quantum sciam, in opere edito indicavit.

Si mores exterioremque vitæ cultum contemplemur, non quicquam ipsi in probrum & ignominiam verti possit: utpote sobrius, probus, affectibus sedatis, compositisque moribus, ab omni luxu & gula liber, iusti & æqui studiosissimus, erga pauperes beneficus, vicinis facilis & benignus, quorum lites, utrisque partibus contendentium ad illum tanquam ad sapientem arbitrum appellantibus, moderari & decidere solebat: in publicis sacris cœtibus & in orationibus frequens, articulorum Christianæ fidei, in quibus omnes Orthodoxi conveniunt, strenuus assertor, zelo in hæreses, à primitiva Ecclesia damnatas, flagrans, inque *Puccium*, qui virginitatem B. *Mariæ* ante partum *Christi* in dubium vocavit, acerrimè invectus: licet de controversiis inter Romanenses & Reformatos circa reliqua doctrinæ capita non adeo scrupulosè sollicitus, quin sibi in *Polonia* & *Bohemia*, ubi religio ista dominatur & viget, Missæ interesse & communicare licere putaverit; in *Anglia*, uti antea, ita post reditum, omnibus Ecclesiæ *Anglicanæ* ritibus conformis. Omnes igitur non sine causa mirabuntur, virum ejusmodi dotibus moribusque præditum in tantam, quam insanivit, insaniam prolabi potuisse. Sed quod supra dixi, & hîc iterum necessariò repetendum videtur, immodicum sapientiæ studium, indebitusque scientiæ arcanorum Dei & naturæ amor illum hisce malignorum Spirituum illusionibus maximè obnoxium reddere. Hos pro suis *Magistris* & *Institutoribus* agnovit: Deo solenne ob ipsius *ad hunc beatum statum* & conditionem, ipsi peculiarem, *vocationem* & *electionem* gratias agit: oratque Deum, ut *tam sanctis hospitibus dignus sit*. Tam altum nimirum in ipsius medullis infederat, hæc impia fallaxque opinio, quod essent boni Angeli, ut nullis rationibus, argumentis nullis, evelli unquam potuerit. *Kellæus* hac ex parte sapientior, qui interdum disertim asseruit, illos esse dæmonas, & sæpè quidem dubius animi, quicquam commercii cum iis habere volebat; imo & omni futuræ interpellationi obsignatis tabellis renunciavit: sed toties à *Devo* reprehensus, quod hisce cœlestibus revelationibus diffidisset, & ejusdem animâ in pignus & vadimonium oblata, importunis precibus & obtestationibus, ægrè & penè invitus, ad impium istud, quod obibat, ministerium retractus. Non diffidendum est, *Devum* istiusmodi malas suspiciones in animo subinde aluisse. Norat enim, Pseudo-Angelos, virum illustrissimum, D. *Henricum Sidneium*, R. *Elisabethæ* à secretioribus consiliis, qui *Hiberniæ* regnum, illius nomine & auctoritate, prudentissimè & felicissimè gubernaverat, fatis concessisse, cùm adhuc in vivis esset, & per multos annos postea superstes, tanquam ex certissimo

& infallibili oraculo proferentes, turpiter mentitos: quod crimen falsi cum illis objecisset, hac excusatione, aut *Kellaum* illorum verba malè intellexisse, aut quendam malignum spiritum, dum illi aberant, vitream sphaeram occupantem, hanc fabulam & mendacium dictasse, in legitimam illorum innoxiae veritatis probationem & argumentum acceptâ, facilè cum hisce impostoribus redibat in gratiam. Noverat miserrimus *Devus*, & quamplurimis exemplis convictus, falsus est, malos spiritus, in aliis, quibus miris offuciis horrendum in modum illuderetur, operari solere: horumque quoque apparitiones in crystallo suo, contra quam ab initio promissum fuerat, antea factas fuisse: in quibus miros jocularisque ludos, instar circulatorum & agyrtarum, egere: quorum unum pro per ridiculo & stolido dæmone habitum, *mendacem* ipse appellavit: quem prolato in opprobrium proverbio, *mendacem oportet esse memorem*, illinc abire jussit: & tamen hæc omnia fraude dæmonum menti de veritate actionum scrupulos subtili artificio injicere cupientium, ipsis objecta fuisse insulsissimè statuit; nec quicquam mali, de *Amicis suis spiritualibus*, uti appellat, suspicari voluit. Hi verò, ne qualicunque modo ab hac fatuitate liberaretur *Devus*, magnoperè sibi laborandum esse censuere; sæpenumerò enim, ingestis asseverationibus, ad omnem dubitationem eximendam, inculcant, *se esse bonos Angelos & nuncios Dei ministros*, in quorum societatem ille & *Kellæus* admissi erant, & demum hæc illuminationes à vocibus & præsentia sanctorum Angelorum fluere: imo Pseudo-Uriel ad fidem certiùs faciendam, invocato Dei nomine, per cælum & terram jurat, *se esse verum Urielem, lumen & servum Dei*: de hisce divinis revelationibus, ipsi & *Kellæo*, quos *Prophetas & in adventum Domini sanctificatos esse dicit, traditis, certissima fide constare*; quodcunque ab ipsis communicatum fuerit, *certò eventurum*: nec unam libri hujus prophetiae literulam perituram: itemque, ex hisce libris veram Apostolorum & Prophetarum doctrinam colligendam esse. Identidem dixere & Pseudo-Raphael, *quamdiu cælum & terra durabunt, harum actionum memoriam nunquam abolendam*; & Pseudo-Gabriel, *doctrinam hanc ipsis traditam & tradendam, in universarum Gentium usum ad usque finem mundi conscribendam esse*.

Hæc falsissima persuasione inductus *Devus*, non oscitanter, non temerè, subitove aut præcipiti impetu, actionibus se ingessit, sed pio, ut videtur, & sedato affectu, ac mente sobria paratus accessit, & si quando actio quæpiam insignis peragenda esset, qualis illa erat, cui interfuit *Stephanus Rex Poloniae*, confessione, ut pacatam mundamque conscientiam haberet, & cœlestibus hisce mysteriis capiendis aptior redderetur,

deretur, prius facta, ter feriis Paschalibus communicavit : oratione ad Deum semper præmissa, interpositis piis ejaculationibus, & sententiis, & post finem solenni doxologia & gratiarum actione trinuni Deo red-dita.

Quibus autem versutiis strophisque illum dæmones deluserint, quod antea innuebam, hîc diductiùs indicabo.

Ut *Devo* divinæ Sapientiæ arcanis avidissimè inhianti, majori certiorique cum successu palpum obtruderent impostores Angeli, obtendunt, res ejusmodi, *qua justos & sanctos hactenus latuere, ipsi resectas fuisse & retegendas*; barbaras quasdam voces ex varia literarum connexionе conflatas, ex lingua, cujus familiarem usum & notitiam in suo innocentia statu habuit *Adamus*; qua post lapsum deperdita, & ex memoria ipsius penitus deleta, Protoplastes ille ex Paradiso depulsus, planè obmutescens, linguam Ebræam discere coactus fuerit, nulli mortalium, præterquam illi & *Kellao*, antea cognita, haustas esse, triginta regiones, situ discreto dispositas, inter spiritus, qui aërem ab elemento ignis ad terram usque expansum incolunt, dispertitas, & universum mundum duodecim Angelorum, qui totidem tribubus præsunt, ministerio regi inde tabulas tum literarum, tum numerorum, quas *claves apothecarum Dei* esse fingunt, componi mandant, numero XLIX. in quibus mysticæ voces Angelorum continentur: unde quoque *perfecta creaturarum Dei cognitio & Cabbala natura* erant addiscendæ: quibus recludendis adaptatas *claves Angelicas* tradendas esse: *Enochi librum*, mysticis figuris coopertum, inque tenebras ex humano visu subductum, *verum creaturarum Dei & universæ terræ usum complectentem*, in quo componendo, Angelo dirigente & instituyente, per integros quinquaginta dies laboravit, *Devo* per *Urielem* replicandum multa quoque alia arcana coelestia posthac revelanda, & præsertim librum continentem *varias nominum Dei invocationes*, lingua sancta conceptas, describendum esse pollicentur: ita ut *Deus* præstigiis hisce planè & omninò dementatus, sibi que revelationes à Deo factas fuisse insulsissimè persuadens, quasdam tum Veteris tum Novi Testamenti periochas ad istas visiones & diabolicas enarrationes, sicut olim divinitus S. *Joanni* Apocalyp-tæ & *Esdræ* contigisset, comprobandas impiè detorserit.

Cùm verò *Deus* prænoscenti futura, quorum certæ cognitioni assequendæ humani ingenii & sagacissimæ mentis vires planè deficiunt, desiderio incenderetur, huic vanissimæ curiositati aliqua ex parte blandiri moremque gerere, aut divinando, aut mentiendo, voluere idem impostores. Prædictionum enim in actionibus ubivis sparsarum ingens pro-
stat

stat copia, ex qua numero paucas, nullo servato ordine temporis, excerpam: nempe, *Rodolphum* Imperatorem anni revolventis ambitu violenta morte interiturum: *Ernestum*, illius fratrem in imperatoria dignitate successorem fore, familiamque istam non nisi ad tertiæ generationis prolem mansuram: *Stephanum* Regem *Poloniae* prælio inito occidendum mense Septembre A. 1585. Imperium *Turcicum* prorsus evertendum, & vexillum in media *Constantinopoli* erigendum, A. 88. centenario quidem omisso; solem motum in contrarium cœli punctum deinceps mutaturum, quasdamque stellas de cœlo casuras: Antichristum ante tres annos evolutos venturum, (*Devo* interim subdubitante, an vaticinium illud de naturalibus annis, an verò de mysticis, ex quadraginta duobus mensibus consistentibus, intelligendum esset) *Romamque* penitus evertendam, ne altero quidem lapide supra alterum superstiti & relicto: Papam in solennibus Missæ vitâ exuendum, illumque qui substituendus fuerit, decimum quintum nominis assumendi futurum: Regem *Hispaniæ*, duobus annis nondum finitis, è vita excessurum: & circa idem tempus *Elisabetham* Reginam ictu coelitus immisso perimendam: *Curtzium*, qui de *Devo* malas suspiciones aluerat, miserè periturum: & *Emericum Sontagium*, Secretarium *Lascovi*, ob fidem læsam, seipsum propria manu interempturum: denique (piget enim plura ex hisce portentis referre) ipsum quoque *Devum* & *Kellaum* è medio tollendos, sed statim à mortuis resurrecturos. Hæc omnia splendida mendacia fuisse, nec cuiquam ex istis prophetiis pareri eventum, præstituto tempore, vitæque sequentis curriculo respondisse cum manifestissima experientia edoctus comperisset *Devus*, quis non expectaverit, illum ab ista absurda & impia credulitate, qua tamdiu occæcatus fuerat, jamjam revocandum, tandem istiusmodi demonstrationibus convictum, à diaboli strophis laqueisque, quibus per tot annos ad illius voluntatem & arbitrium detineretur captivus, resipuisse? Sed proh deplorandam hominis cæcitatem & vecordiam! Ille planè obbrutescens, omnique vero rerum divinarum sensu & intelligentia vacuus, in suis fatalibus erroribus usque & usque obduruit.

Cùm supra dictum fuerit, *Devum* sanum rectumque de præcipuis fidei Christianæ articulis iudicium servasse, nemo mirabitur, Impostores in asserendis sanctissimæ Trinitatis & divinitatis *Jesu-Christi* mysteriis, occasione data, & frequentes & impigros fuisse: aliter enim illum repulissent, seque ipsos reddidissent valdè suspectos. In reliquis verò dogmatibus Theologicis, puta de transsubstantiatione, confessione, poenitentia, inter Pontificios & Reformatos controversis, doctrinam Ecclesiæ

Romanæ propugnant, in *Lutherum*, *Calvinum*, aliosque in genere *defectores*, ut statuunt, animadvertentes, monentque illi adhærendum esse, scripturas etiam legendas, sed non mala interpretatione pervertendas, aut privato sensu intelligendas. Quod *Devo* non displicuit, qui se *bonum Romanum Catholicum*, utpote in solennibus sacri cultus officiis, dum hac longâ commoratione procul à patria abesset, seque & socium *obedientissimos & humillimos sacrosanctæ Ecclesiæ filios & summi Pontificis Romani observantissimos*, in epistola ad Episcopum *Placentinum* obtestatus est.

In aliis rebus Theologicis varii argumenti facile est intueri in singulis actionibus, quotiescunque de mysteriis revelandis agitur, multa impia & falsa verbis turgidis conceptibusque, à veritate tam naturæ, quàm religionis maximè alienis, obiecta, ne mystas suos faciliùs securiùsque fallerent, intermiscuisse. Interim in Geographia naturalisque Philosophiæ scientia parum versati, & Linguarum *Græcæ & Latinæ*, qua in actionibus frequenter uti consueverint, saltem earundem proprietatis & elegantix rudes, ut *face* pro *fac*, *Angele mee*. Et tamen illi, illi sunt, quos *Deus*, tanquam omnium Scientiarum, tam naturalium, quàm divinarum, promos condos summo cum affectu & obsequio coluit, & pro infallibilibus Magistris pro fatuitate sua habuit.

Huic obstinationi fortiùs inducendæ duo memorandi casus non parum conducere videntur.

Actione decimo die Aprilis A. 1586. *Pragæ* habita, jussus est *Deus*, ut libros omnes, numero viginti octo, in quibus, ut supra memoravi, revelationum, ipsi ab initio ad istud tempus factarum, historiam accuratè propria manu descripserat, afferret, & deinde simul congestos in ardentem fornacem prope positum conjiceret, flammis penitus absumendos. Huic mandato contra ire neutiquam ausus, quod imperatum fuerat, animo licèt maximè reluctante, citra moram præstabat, & quidem perquam diligenter, ne aliter violatæ divinæ voluntatis reus perageretur. Ita omnis iste labor per tot annos in colligendis hisce arcanis impensus, paucis momentis coram ipsius oculis periisse visus est. Procul dubio irreparabile hoc damnum luctu, gemitibus, lachrymisque deploravit *Deus*, tanquam manifestum irati Numinis indicium: omni spe aut easdem revelationes redipiscendi, aut novas obtinendi, evanescente & excisa. Verumtamen decimo nono ejusdem mensis die, monitus à spiritu, habitum formamque hortulani, qui vineam ædibus vicinam coluit, induto ut illuc cum *Kellæo* descenderet, postquam loco commodo aliquantulum simul confedissent, *Deus* philyram candidæ papyri huc
illuc

illuc vento agitatam juxta videns, properoque pede illò contendens, tres è libris combustis, ibi sub amygdala humi stratos, non sine ingenti stupore & lætitia reperit, viz. *Enochi librum, quadraginta claves Angelicas*, utpote lingua Angelica conscriptas, & Anglicè versas, & librum *collectionis triginta aerum, cui titulus, Liber scientiæ terrestris auxilii & victoriae*. Kellæo statim accedente, ambo flexis genibus summas Deo, ob hoc *miraculum & factum*, uti appellant, *memorandum in perpetuum*, gratias agunt, planè obstupefacti, quod absque omni coloris aut odoris inducti mutatione ab igne intacti, illæsi & integri servarentur.

Paulò post, *Kellæus*, præeunte eodem spirituali hortulano, ad ædes primùm, januis camerarum, ut obtenditur, ultro apertis, & deinde ad fornacem ductus, ab illo, facie versus illius ostium obversa, reliquos omnes libros, præter unum & alterum mox restituendos, ipsi à tergo porrectos acceptosque *Devo*, hujus apparitionis eventum præstolanti, reportavit. Hæc omnia in commentarios suos, omnibus circumstantiis accuratissimè adnotatis, extemplò retulit *Devus* illiusque rei præcipua capita & summam postea in literis sequente Julio ad supra memoratum Nuncium Apostolicum transmisit.

Alterum ostentum, vel quocunque nomine appellandum est, quod *Devo Trebonæ A. 1587.* commoranti contingebat, ita se habet.

Dum ille vicesimo quarto Aprilis die in Oratorio actioni interfuit, *principale illud Crystallum*, de quo tanquam de cœlesti munere gloriari consuevit; una cum aureo sustentaculo, à quodam spiritu paulò ante in sublime elevatum, extra abripiébatur. At post mensem, *Devo & Kellæo* in horto ambulantibus, hic duos juxta ripas fluvii vidit gladiis pugnantes, quorum alter alterum objurgat ob neglectum ipsi de restituendo Lapide injunctum munus, jubetque, ut eundem subter cervical lecti uxoris *Devi* quàm citissimè reponeret. Dictum factum, quo intellecto, *Devus* ad cubiculum suum sese proripuit, explorato lecto, quo uxor ægra tunc temporis decubuit, sublatoque cervicali, *pretiosum suum Lapidem* lætissimis oculis vidit reperitque. Ita hisce Dæmonum fraudibus & præstigiis sibi crassè imponi passus est.

Vix quidem dubitandum videtur, aliquam famosi pulveris chrysopoe-tici portionem *Devo & Kellæo* suppetiisse: unde verò habuerint, non adeò clarè liquet: neque enim artem hanc mirificam aut hic aut ille, licèt ambo chymix studiosissimi, grande istud arcanum aut propria industria, aut à seductoribus spiritibus fallacibus processibus instructi, per multos annos investigare conarentur, unquam adepti sunt. Ferunt, nec quidem ab omni similitudine & specie veri, vasculum quoddam, in quo

pulvis iste inclusus erat, in effodiendis *Abbatia Glasconiensis* in agro *Sommerferten*si rudibus olim repertum fuisse; juxta opposito libro figuris hieroglyphicis oppleto: in quibus interpretandis & explicandis *Devus* frustra defudavit industria. Ad fidem verò faciendam ille sincerè & coram Deo, respectu ad thesauri istius sive quantitatem sive pretium & valorem habito, *omnes Regum Christianorum opes simul collectas congestasque non decima istius parti equiparandas* esse obtestatur. At postea Aprile 1587. *cacodæmon*, nomine *Ben*, pulveris in manus *Kellai* tradendi honorem sibi assumit.

Quicquid fuerit, D. *Rosenbergium*, quandam hujusce pulveris portionem, (circiter duas uncias) ab iisdem accepisse, ex illius quæsitis in Appendice reperiendis constat. Comitem etiam *Averspergenssem*, elixiris, ut videtur, iis communicantibus, compotem, discis argenteis, ex vasis stanneis inde transmutatis, pro more luisse refert *Devus* filius, de quo mox dicam, qui ultra in familiari cum celeberrimo & eruditissimo viro, D. *Thoma Bruno*, *Norwici*, ubi utrique longo usu & amicitia conjunctissimi, artem Medicam professi sunt, conversatione olim habitata, sæpè asseruit, idque quidem interposito juramento, se hanc *projectionem bis factam vidisse*: ut alia sive *τερατωδεύματα*, sive commenta, à nostratibus, pyrotechniam ad insaniam usque excolentibus, in medium produci solita, hîc omittam. Nolo in rem facti rigidè nimis inquirere: solummodo repositurus, filium tunc temporis nonum ætatis annum haud attigisse, & prorsus ab omni ratione & fide abhorrere videri, Patrem, si istiusmodi ingentem thesaurum secum ex *Anglia* detulisset, ad summam inopiam & incitas redigi potuisse, aut adeo improvidum fuisse, ut non sibi aliquantulam partem ad necessitatibus, quibus postea premebatur & laborabat, angustisque rebus domesticis commodè subveniendum, in patriam redux reservaverit.

Kellaum Necromanticum, & à longo tempore artibus Magicis initiatum fuisse, ex supra dictis constat; quod hoc duplici argumento ulterius confirmari potest: tum quod, *Lascovio* præsentem, dæmonas visibili forma apparituros, sive illius curiositati gratificaturos, sive ex vanissimo potestatis, quam habuit, in illos exercendæ pruritu, suscitare in se susciperet. Sed *Devus* intercessit, neque horrendum istud scelus perpetrari sivit: tum quod reprehensus à *Devianis* spiritibus, quod cum dæmonibus commercium habuisset, tantum abfuit, ut id aut excusaverit, aut negaverit, ut id sibi omnino licere quasi gloriabundus acriter contendere. Moribus erat solutis, ingenio effero, turbulento, & ad rixandum maximè proclivi: si vel leviusculè provocatus, sive si res contra votum &

& expectationem accidissent, in furorem & rabiem actus: vino indulgens, technis dolisque malis oculos incautorum, quos verbis fallacibus tefellerat pecuniis & gemmis emungens, de cudenda adulterandaque publica moneta suspectus, adeo ut scitum de illo deprehendendo è foro judiciali fuerit emissum: denique omni vero probitatis & religionis sensu vacuus. Hæc omnia tristis vidit & exploratissima habuit *Devus*, animo consternatus, tum ne in ipsius dehonestamentum & dedecus cederet, quod hominem, ejusmodi moribus spurcis in compositisque infamem, sibi in socium adscivisset, tum ne *sanctum illud opus*, cui, ita ille apertis oculis somniavit, *ambo simul & conjunctim destinati erant*, abrumperetur, abiretque in nihilum. Hac de causa, licet perpetuis contentionibus rixisque vexatus, & flagitiis in oculos incurrentibus gravissimè offensus, illum blandis sermonibus lenissimisque consiliis & hortatibus ad sanam sobriamque mentem reducere sæpè, & quidem maximo opere, annisus est. Ita de *Kellæi* ad Deum conversione & pœnitentia, & de proposito vitæ juxta virtutis & religionis normam instituendæ suscepto, & de dæmonibus ex corpore illius ejectis plusquam semel triumphare videtur *Devus*: sed falsum esse animi repetita experientia comprobavit. *Kellæus* enim, habitu & longo usu quasi in naturam mutatis, in pristinos mores relabitur. Interim lucidis intervallis, quod hîc repeti oportet, sæpe numero de visionibus in crystallo factis, an bonorum Angelorum essent, dubitat: imo omnia ista portenta Dæmonum præstigiis fieri asseverat, *Devo* contra cum majori acritate asserente: tandemque abdicato *Inspectoris* munere, nihil cum illis deinceps acturum, seria deliberatione habita, apud se firmissimè statuit, ob id, cùm muneris tamdiu administrati primo tæderet, voce cœlitus emissa, objurgatus. Quo audito *Devus* totus mœstitia & horrore oppletus, quasi jam actionibus futuris finis esset imponendus, spiritualibus suis Magistris de novo *Inspectore* consultis, illorum consiliis & jussu, ad istud munus obeundum, *Kellæi*que vices supplendas filium *Arthurum* Puerum, anno ætatis octavo nondum exacto, Septembre MDLXXXVII. substituit, utpote prius, *Kellæo* juxta assistente, initiandum, & per tres dies continuos, iteratis vicibus, oratione ad Deum, quâ novus Symmysta *in exercitiis suis mysticis uti debuit*, præmissa, huic sacro ministerio consecravit. Sed omninò frustra: spiritus enim illi, quos *fideles servos Dei* appellat *Devus*, licet invitati, neutiquam comparuere. Tandem tertio die *mirabili fortuna sive fato divino*, verba *Dei* sunt, accessit *Kellæus* ad illos, nondum aliqua apparitione puero facta, & ad abdicatum munus reversus est. Inde mox secuta est execranda ista actio de communi & promiscuo uxorum concubitu admittendo, quam supra retuli.

Devum jamjam in patriam reversurum *Kellæus* comitari noluit, sive criminum suorum conscius, sive spe longiori mora reparandi fortunas concepta. Ideo *Pragam* se citò proripuit, *Rodolphi* gratiam quoquam modo conciliaturus: quam & facilè obtinuit, sive ex pulvere aurifico, quem à *Devo* surreptum clam apud se retinuisse perhibetur. Imperatori, chymicis experimentis addictissimo, in manus tradito, sive ex exquisita artis Chymicæ, & ex ignobilioribus metallicis fossilibus, quibus *Hungaria* & *Bohemia* abundant, aurum & argentum faciliori methodo extrahendi peritia. Hinc ipsius Chymicus constitutus, titulo & dignitate Baronis in regno *Bohemico* A. MDXC. augebatur. Sed felici hæc prosperaque rerum conditione ac vice benè uti nesciebat: quippe qui animo elatus, magnas opes, ut quibusdam placet, Elixiris beneficio acquisitas & congestas, luxu & vanissima magnificentiæ & pompæ affectatione prodegit. Postea autem fraudis, qua Imperatorem, benignissimum Patronum & Fautorem ludificari pro versutia sua voluit, manifestus, in arcem conjicitur, ibi perpetui carceris poenam luiturus. Tandem à Regina *Elisabetha* in *Angliam* invitatus, aliis elabendi modis frustra quæsitis, ex alto ope funis secus muros descendere dum aggressus fuerit, in terram decidit & fractis ossibus contusisque lumbis A. M D XCV. post paucos dies miserè periit.

Superest, ut de *Arthuro Joannis* nostri primogenito, pauca dicam, de reliqua numerosa illius prole parum sollicitus.

Ille nuptiis cum lectissima femina è nobili familia oriunda, *Mances-triæ*, durante Patris præfectura, feliciter initis, maturescente cum annis judicio, Medicinæ & Chymicæ studiis, nunquam deinceps intermittendis, se totum devovit. Aliquanto post tempore ingenio & eruditione pollens, peregrinandi avidus, *Cæsari Moscovitico*, qui Medicum *Anglum* eò mittendum expetiverat, à serenissimo Rege, *Jacobo* primo *Britanniarum* Monarcha, commendatus, in ista Aula per octodecim annos summa cum laude moratus est. Post reditum inter Medicos juratos serenissimi Regis *Caroli* I. recensitus, fixas sedes sequioribus vitæ annis in civitate *Norwicensi* habuit, ibique confecta ætate septuagenario major, diem suum ultimum circa A. 1650. obiit, & in Ecclesia S. *Georgii* sepultus jacet. Dum *Moscuæ* vixit, libellum, in quo collectanea præcipui momenti è scriptis S. *Dunstani*, *Artephii*, *Raymundi Lullii*, *Arnoldi de Villanova*, *Riplei*, *Dastini*, *Bernardi Comitis Trevisani*, aliorumque selectorum acutissimorumque Hermeticæ Philosophiæ Magistrorum, quos perfectam grandis istius naturæ arcani cognitionem sublimi ingenio, & indefessa industria, afflatu divino adjutis, adeptos fuisse adhuc-

dum

dum crepant illorum filii & discipuli, ordinata & distincta methodo digesto, corollariis singulis capitibus explicationis causa annexis, continentur, lingua Latina A. 1629. composuit, eo fini, ut hujus *divinae artis*, uti appellat, studiosi in perscrutandis naturæ arcanis, ut ut sub parabolarum, ænigmatum, æquivocarumque phrasium involucris, pro more, obtectis, & in investigando & conficiendo desideratissimo lapide meliùs & faciliùs dirigerentur. Ita sibi in formandis & per universam vitam fovendis istis conceptibus mirè placuit indulgitque, ut famolissimum quendam Chymicum, gente *Hungarum*, relictà *Anglia*, adiisse duobus ante mortem annis, animo planè haberet, nì senectis incommoda intercessissent, hac sola de causa, ut *solennem hujus magni operis processum*, ut ille loqui amavit, aggredieretur. *Fasciculum* hunc Chymicum V. C. *Elias Ashmolius* sub anagrammatismo celans nomen, assumptoque etiam *Mercuriophili Anglici* titulo, vernaculo nostro sermone A. 1650. edendum curavit, accumulatis in præfatione sua in Auctorem magnificis elogiiis, quasi, edito hoc egregio ingenii & industriæ foetu, omnes artis Spagyricæ cultores & alumnos sibi in æternum obstrinxisset. Interim non possum satis mirari, *Devum* patrem filio tantæ spei & in illius pueritia horrendis sacris initiato, quando in virilem ætatem adoleverit & idoneus videretur istorum mysteriorum auditor, schedas, *actiones*, & *consultationes cum spiritibus habitas* complectentes, non ostendisse, aut legendas permisisse; neque enim quicquam ex istis sibi compertum fuisse, præfente D. *Bruno* supra memorato, professus est) nisi forte dici possit, illum *Relationes* istas mox post reditum ex *Bohemia* subtusterram aut alibi abscondisse, nunquam se vivo in lucem producendas, ne si quoquam casu comparuissent, isthoc prætextu & ex istiusmodi claris indiciis, in illum tanquam Magum & diabolicæ doctrinæ propagatorem, capitali pœna; juxta legum rigorem exigendâ animadvertetur.

*Index librorum , quos partim Latine , partim
Anglicè , scripsit Joannes Devus.*

Impressi.

1. **P**ROPÆDEUMATA Aphoristica , de præstantioribus quibusdam naturæ virtutibus Aphorismi 120. *Londini* anno 1558.
2. Monas Hieroglyphica ad Regem Romanorum Maximilianum , *Antuerpiæ* 1564.
3. Epistola ad eximium Ducis Urbini Mathematicum , Fredericum Commandinum , præfixa libello Machometi Bagdedini de superficierum divisionibus , edito opera Devi & ejusdem Commandini Urbinatis *Pisauri* 1570. Exstat MS. in Bibliotheca Cottoniana sub Tiberio B. IX. Post præfationem hæc habet D. Usserius Archiepiscopus Armachanus. *Notandum est autem , Auctorem hunc Euclide usum in Arabicam linguam converso , quem postea Campanus Latinum fecit. Auctor igitur propositionum videtur fuisse Euclides : demonstrationum , in quibus Euclides in Arabico codice citatur , Machometus Bagded sive Babylonius.*
4. The British Monarchy , othewise called the petty-Navy Royal. A. 1576. Reperitur MS. in museo Ashmoliano.
5. Preface Mathematical to the English Euclide published by Sir Henry Billingsleg Knight : where he sayes many more arts are wholly invented by name , definition , property , and use , than either the Grecian or Roman Mathematicians have left to our knowledge. A. 1570.
6. Divers and many Annotations and Inventions , dispersed and added after the tenth book of English Euclide. A. 1570.
7. Epistola præfixa Ephemeridibus Joannis Feldi. A. 1557. cui rationem declaraverat Ephemerides conscribendi.
8. Parallaticæ commentationis praxeosque Nucleus quidam. *Londini* 1573.

Inediti , quorum aliquot reliquit imperfectos.

1. The great volume of famous and rich discoveries : wherein also is the history of King Solomon , every three years his Ophirian voyage : the originals of Presbyter Joannes , and of the first great Cham and his suc-

successors for many years following : the description of divers wonderfull isles in the Northern, Scythian, Tartarian, and the other most Northern seas, and neere under the North-Pole; by record written 1200 yeares since, with divers other rarities. A. 1576. Exstat in bibliotheca Cottoniana sub Vitellio: C. VII.

2. The British Complement of the perfect art of Navigation. A great volume, in which are contained our Queen Elisabeth her tables gubernautick for navigation by the paradoxall compass (invented by him A. 1557.) and Navigation by great circles: and for longitudes and latitudes, and the variation of the compass finding most easily and speedily, yea if need be, in one minute of time, and some time without sight of sun, moone, or starres: with many other neu and needfull inventions gubernautic. 1576.

3. Her Majesties title royal to many forraigne countryes, kingdoms, and Provinces, by Good testimony and sufficient prooffe recorded, and in twelve volume skinns of parchment fair written for her Majesties use, and at her Majesties commandment. A. 1578.

4. De Imperatoris nomine, auctoritate, & potentia: dedicated to her Majesty: in English A. 1579.

5. Prolegomena & Dictata Parisiensia in Euclidis Elementorum Geometricorum librum primum & secundum, in Collegio Rhemenfi. A. 1550. Vide præfationem ad R. Maximilianum Monadi Hieroglyphicæ præfixam. pag. 20.

6. De usu globi cœlestis ad R. Edwardum sextum. A. 1550.

7. The Art of Logic in English. A. 1547.

8. The thirteen Sophisticall fallacies, with their discoveryes, written in English meeter. A. 1548.

9. Mercurius cœlestis. Libri 24. written at Louvaine. A. 1549.

10. De nubium, Solis, Lunæ, ac reliquorum Planetarum, imo ipsius stelliferi cœli ab infimo terræ centro, distantis, mutuisque intervallis, & eorundem omnium magnitudine liber ἀποδεικτικὸς ad Edwardum sextum, Angliæ Regem. A. 1551.

11. Aphorismi Astrologici 300. A. 1553.

12. The true cause and account (not vulgar) of floods and ebbes: written at the request of the right honourable Lady, Lady Jane, Duchesse of Northumberland. A. 1553.

13. The Philosophical and Poetical Original occasions of the configurations and names of the heavenly asterismes: written at the request of the same Duchesse. A. 1553.

14. The Astronomical and Logistical rules and canons, to calculate the Ephemerides by, and other necessary accounts of heavenly motions: written at the request, and for the use of that excellent Mechanicien, Master Richard Chancellor, at his last voyage into Moscovia. A. 1553.

15. De acribologia Mathematica volumen magnum, sexdecim continens libros. A. 1555.

16. Inventum Mechanicum, paradoxum, de nova ratione delineandi circumferentiam circularem; unde valdè rara alia excogitari perficique poterunt problemata. A. 1556.

17. De speculis comburentibus libri 6. A. 1557. Aliquantilla pars exstat in bibliotheca Cottoniana sub Vitellio C. VII.

18. De Perspectiva illa, qua peritissimi utuntur Pictores. A. 1557. Idem fortasse libellus cum illo, qui adhuc superest in Bibliotheca Cottoniana sub Vitellio. C. VII. sub hoc titulo: *Perspectiva, sive elegans & utilis libellus de arte mensurandi cum circino & regula.*

19. Speculum unitatis, sive Apologia pro Fratre Rogerio Bacone Anglo: in quo docetur, nihil illum per dæmoniorum fecisse auxilia, sed Philosophum fuisse maximum, naturaliterque & modis homini Christiano licitis, maximas fecisse res, quas indoctum solet vulgus in dæmoniorum referre facinora. A. 1557. (a)

20. De Annuli Astronomici multiplici usu. A. 1557.

21. Trochilica inventa. Lib. 2. A. 1558.

22. Περὶ ἀναβιβασμῶν θεολογικῶν. lib. 3. A. 1558.

23. De tertia & præcipua Perspectivæ parte, quæ de radiorum fractione tractat. lib. 3. A. 1559.

24. De itinere subterraneo. lib. 2. A. 1560.

25. De triangulorum rectilineorum areis lib. 3. demonstrati ad excellentissimum Mathematicum, Petrum Nonium, conscripti A. 1560.

26. Cabbalæ Hebraicæ compendiosa tabella. A. 1562.

27. Reipublicæ Britannicæ Synopsis: in English. A. 1565.

28. De trigono circinoque analogico opusculum Mathematicum & Mechanicum: lib. 4. A. 1565. Exstat in Bibliotheca Cottoniana sub Vitellio C. VII.

29. De Stella admiranda in Cassiopeiæ asterismo, cœlitus demissa ad orbem usque Veneris: iterumque in cœli penetralia perpendiculariter retracta post decimum sextum suæ apparitionis mensem. A. 1573.

30. Hipparchus redivivus: Tractatulus. A. 1573.

31. De

(a) Meminerat longè antea *Devus* in præfatione ad Regem *Maximilianum*, Monadi Hieroglyphicæ præfixa. pag. 11.

31. De unico Mago & triplice Herode, eoque Antichristiano A. 1570.

32. Ten sundry and very rare Heraldical blasonings of one crest or cognisance, lawfully confirmed to certain ancient armes. lib. 1. A. 1574.

33. Atlantidis, vulgariter Indiæ Occidentalis nuncupatæ, emendatio descriptio Hydrographica, quàm ulla alia adhuc evulgata. A. 1580.

34. De modo Evangelii Jesu Christi publicandi, propagandi, stabiliendique inter infideles Atlanticos: volumen magnum libris distinctum quatuor; quorum primus ad serenissimam nostram potentissimamque Reginam Elisabetham inscribitur: secundus ad summos privati suæ sacre Majestatis Consilii Senatores: tertius ad Hispaniarum Regem Philippum: quartus ad Pontificem Romanum, A. 1581.

35. Navigationis ad Cathayam per septentrionalia Scythiæ & Tartariæ litora delineatio Hydrographica, Arthuro Pett & Carolo Jackmanno Anglis, versus illas partes navigaturis, in manus tradita, cum admirandarum quarundam insularum annotatione in illis subpolaribus partibus jacentium. A. 1580.

36. Hemisphærii Borealis Geographica atque Hydrographica descriptio, longè à vulgatis chartis diversa: Anglis quibusdam versus Atlantidis Septentrionalis litora, navigationem instituentibus dono data. A. 1583.

37. The originals and chief points of our ancient British histories discoursed upon and examined. A. 1583.

38. An advise and Discourse about the reformation of the vulgar Julian yeare, written by her Majesties commandment, and the Lords of the privie Councill. A. 1582.

39. Certain considerations and conferrings together of these three sentences, antiently accounted as oracles: *Nosce te ipsum: Homo homini Deus: homo homini lupus.* A. 1592.

40. De hominis corpore, spiritu, & anima: sive microcosmicum totius naturalis Philosophiæ compendium. lib. 1.

41. The compendious Rehearsal of John Dee his dutifull declaration and prooffe of the course and race of his studious life for the space of halfe an hundred yeares, &c. A. 1592. Exstat MS. in Bibliotheca Cottoniana sub Vitellio C. VIII.

42. De horizonte æternitatis. 3. libr. 1. de horizonte: liber Mathematicus & Physicus. 2. de æternitate: Liber Theologicus, Metaphysicus, & Mathematicus. 3. de horizonte æternitatis: liber Theologicus, Mathematicus, & Hierotechnicus.

43. Thalattocratia Britannica, sive de Britannico maris imperio Collecta-

lectanea extemporanea, quatuor dierum spatio, celeri conscripta calamo. A. 1597. Septembr. 20. Mancestriæ.

Haftenus librorum *Devi* titulos ex ipsius indicibus propria manu exaratis, quos etiam ipse in Epistola apologetica ad reverendissimum D. *Joannem Whitgiftum*, Archiepiscopum *Cantuariensem*. A. 1595. edidit, recensui. Exstant autem in Bibliotheca Cottoniana ii, qui sequuntur.

Correctiones & supplementa Sigeberti ex MSS. Codicibus per Joannem Dee sub Vitellio. C. IX.

De coni recti atque trianguli sectione illa, quæ *Parabola* ab antiquis Geometris vocabatur sub Vitellio. C. VII.

Several letters and papers between John *Dee* and Roger Edwards of a Theological argument. Sub Vitellio. ibid.

His bookes and papers concerning his conversation and actions with spirits: with the original letters of several Princes and great men to him. In a box. These printed by Dr. Meric Casaubon. A. 1559.

Vix operæ pretium videbitur heic addere, versus quosdam nullo ingenii sale aut grato sapore resperfos, interdum à *Devo* Anglicano sermone compositos fuisse, & ab ipso subinde, ætate pene delira, editos. Ne verò *Nortono*, *Riplao*, reliquisque artis Chrysopoeticæ celebratissimis Magistris, qui istiusmodi arcana sub parabolis involuta rythmicè publicarunt prorsus dissimilis haberetur: ille quoque *Testamentum* (sic enim improprie appellatur) sive potius breve consilium quatuordecim versibus comprehensum, ad *Joannem Guynue* A. 1568. transmitti voluit: quod in Theatro Chymico Britannico servari curavit *Elias Ashmolius*: ubi quoque exstant duo *Edwardi Kellai* Opuscula Rhythmica de lapide Philosophorum.

In museo Ashmoliano reponuntur tria volumina varii argumenti.

In Primo Volumine.

1. **C**ompendious rehearsal of John Dee, his dutifull declaration and race of his studious life for the space of fifty yeares.
2. Præfatio Latina in actionem primam ex septem habitam X. Aprilis Pragæ, & jam in Latinam conversa sermonem. A. 1586.
3. Epistola ad Gulielmum Camdenum, data Mortlaci, VII. Augusti 1574.

4. The

4. The Contents of the Chapters of Dr. Dees booke, entitled, *Of famous and rich discoveries.*
5. A supplication to Q. Mary for the recovery and preservation of antient Writers and Monuments.
6. A letter from Dr. Aubrey, one of the Masters of Requests to Q. Elisabeth, to Dr. Dee, upon his perusal of his booke of *the British Monarchy.*
7. Bartholomæi de Rekingen, dicti Caricter, Medici Cæsarei Epistola ad D. Joannem Dee Londinensem de cancro curando, data Viennæ pridie natalis Domini 1564.
8. A letter from John Dee then Warden of Manchester College, to Sir Robert Cecil, Secretary of State, about some disorders and injuries done to that College, dated at Manchester 18. June.
9. Duplex schema nativitatis Joannis Dee: unum ex ephemeridibus Tubingæ, alterum ex J. Streçti tabulis calculatum: Londini ab E. Ashmolio, in privatum, ut puto, sui & amicorum usum, editum.
10. Schema natalitium *Edwardi Kellai* à Devo formatum erectumque (ab Elia Ashmolio in Theatro Chymico pag. 479. Londini editum, & illius observationibus illustratum) una cum aliis schematibus ejusdem generis.
- II. Several letters and papers concerning some notes of the life of Dr. Dee.

Vol. II.

1. A plain discourse and humbl advise for Q. Elisabeth to peruse and consider: as concerning the needfull reformation of the vulgar Calendar for the civil yeares and dayes accompting or verifying according to the time fully spent.
2. A letter of Dr. Aubrey to John Dee about his booke of the British Monarchy, written 1577.
3. General and rare memorials pertaining to the perfect art of Navigation: annexed to the paradoxall compals in plaine. This written A. Ch. 1577. sola pagina (si in pugillaribus rectè annotavi) titulo tenus hîc reperitur.
4. An advertisement to the Reader concerning an Apology for and the praises of Dr. Dee written in the yeare 1577.
5. A discourse about the British Monarchy: where there is a project about a petty navy royall and the benefits of it: with severall remarks

Out of Records of the sovereignty of the British seas in the time of K. Edgar. This book inscribed to Mr. Christopher Hatton, Captaine of her Majestyes guard, and Gentleman of her privy Chamber. Written in 1576. and printed in the following yeare.

Vol. III.

Several miscellaneous papers, relating to *John Dee* and *Edward Kelly*, collected by Mr. *Ashmole*, with several charmes and magical papers, and oddcures of diseases, with several prayers.

Præter hæc in eodem Museo quidam alii tractatuli & Epistolæ tum *Devi*, tum *Kellæi*, reperiri possunt, variis libris sparæ, quas in censum referre vix operæ pretium videbitur.

ELOGIA DE JOANNE DEVO.

THOMAS DIGGESIUS in Epistola ad Lectorem præfixa *Joannis Dee Nucleo*. De *Devo* loquens,

Vix in omni doctrinarum genere celeberrimus, tum in abditissimis Philosophiæ mysteriis admirandus.

G. CAMDENUS in *Britannia Londini* 1607. in descriptione Comitatus *Lancastriensis*, pag. 6II.

Hanc alteram (Inscriptionem) *mihi descripsit, qui vidit, Cl. Mathematicus, J. Dee, Collegii Mancestriensis Custos.*

NAUDÆUS in the History of Magie by way of Apology translated out of French, London 1657. pag. 38.

* *Dee.* To him add *John Denys* *, an excellent Mathematician an of our time, who printed an Apology for him self in the year 1570. and pleaded his own cause in London.

Pag. 229.

Had wee the book, rohich John Dee, Citizen of London a very great Philosopher and Mathematician, sayes he had written in defence of Roger Bacon, where he thewes, that whalever was said of his miraculous operations, is rather to be attributed to the knowledge of nature and the Mathematicks, than to ac ny commerce or conversation, hee ever had with Demons. I should have as little to say of him, as of Apuleius, who cleard himsefe from the like accusationes in two Apologies.

APPENDIX,

A D

JOANNIS DEE VITAM

*Serenissimo ac potentissimo Principi ac Domino, Domino
RUDOLPHO, Dei gratia Romanorum Imperatori
semper Augusto, ac Germaniæ, Hungariæ, Bohemiæ,
&c. Regi, Archiduci Austriæ, Duci Burgundiæ, Sti-
riæ, Carinthiæ, &c. Comiti Tyrolis, &c. Domino
meo Clementissimo.*

OMNIPOTENTIS nostri Creatoris, Christianorum omnium Impe-
ratorum Felicissime, O RUDOLPHE, tam est hominibus incog-
nita illa, quæ cuncta disponit perficitque, Providentia, rataque ipsa re-
rum series, & coordinatio, à primo ad ultimum, quod à plerisque te-
merè, fortuitò, vel casu, hoc illo evenire modo, existimentur omnia,
quæ extra præterve suorum consiliorum designationes fieri conspiciant.
Verùm, quibus est mens divinæ veritatis lumine collustrata, & ad mul-
tiplices longisque intervallis distinctas rerum consecutiones considerandas
attentior, evidentissimè deprehendent illi quidem, quæ, quibus præcur-
risse, tanquam causas occasionisque necessarias, alio priori, & interdum
longè diversissimo, tempore, oportuerat. Atque ut varietatem nunc
omittam exemplorum, quæ ex aliorum hominum inter se collatis vitis,
conditionibus, factisque adferre possim, exemplum satis conspicuum hoc
unicum fieri possit: Nimirum illa, incredibilis ferè, quæ inter Sacram
Cæsaream Majestatem vestram & humillimum in Deo mancipium me
vestrum, ex multiplicibus utrinque præcurrentibus occasionibus, jam
quasi instare videtur, in unum idemque admirandum quid combinatio
divinaque conspiratio. Ambiverunt me (Juvenem) illustrissimi Impe-
ratores duo: victoriosissimus ille CAROLUS QUINTUS, & ejusdem
frater, FERDINANDUS, vestræ Cæsareæ Majestatis Magnificentissi-
mus

Ne di-
cas coram
Angelo
non est
Providen-
tia. Eccle-
sastes
cap. 5.

mus Avus. Hic, *Posonii, Hungaria*: ille verò, *Bruxella, Brabantia*. Hic, Anno 1563. Ille autem, Anno 1549. At clementissimum Imperatorem MAXIMILIANUM, Cæsareæ vestræ Majestatis patrem, immortalī gloriā dignum, jam tum *Hungaria* coronatum Regem, invictissimo quidem ipso Tyranno *Turcico*, eodem in *Posonio*, eodemque Anno 63. in deliciis habere cœpi: illiusque rarissimas virtutes, cum fideliter colere, tum posteritati easdem reddere commendatissimas, opere quodam conabar Hieroglyphico.

* Libelli *Mona-*
dis Hiero-
glyphica
Theore-
mate 20.
jam ante
20. annos
editi.

Quo etiam in labore exantlando, animus mihi præfagiebat, Austriacæ * familiæ alium fore aliquando aliquem, in quo maxima mea spes, & publico Christianorum Statui, res confirmaretur, vel confirmari poterit, optima, maximaque. Vestræ igitur Cæsareæ Majestati, Imperatorum *Romanorum*, ex *Austriacorum* Principum nobilissimā familiā, meā ætate florentium, QUARTO, adsum, & ego, Triplicis Alphabeti, Litera † Quarta. Atque ita adsum, ut meipsum ad pedes Cæsareæ Majestatis vestræ demissè osculandos offeram: plurimùm gavisurus, si quā in re Christianæ Reipublicæ, Imperatori tanto talique gratus utilisve esse poterō.

† D
Δ
7

Vestræ Sacræ Cæsareæ Majestati soli si hæc aliquandiu constare patiēmini, neminique detegere velitis, rem facietis valdè necessariam.

CÆSAREÆ MAJESTATIS VESTRÆ.

Humillimus & Fidelissimus Clientulus

JOANNES DEE.

Pragæ, Anno. 1584.

Augusti 17.

Illustrissimo Domino, Domino Don GULIELMO DE SANCTO CLEMENTE, Serenissimi atque Catholici Hispaniarum Regis Negotiorum apud Sacram Cæsaream Majestatem, &c. Præfecto, Domino meo observandissimo.

EA est hominum in terris conditio, Nobilissime vir, ut sibi soli nullus natus esse videatur: immo neque sibi ullus omnia sponte nascentia, vel ultro ab aliis oblata, quæ sibi maximè sunt necessaria, recipiat. Mutuæ inde hominum emerferunt Societates, mutuæ amicitia, mutuæ operæ, mutua dona, rerum commutatio, & emptionis, rerumque venditionis contractus: alique diversi hominum existunt Status, unde hominum inter homines, & cum hominibus, multiplicita procurantur officia commerciaque. Neque omnium istorum sola est utilitas, vel, quæ peribit, voluptas, scopus ille, vel finis, quem attingere conantur & student: sed aliud aliquibus est propositum, quod divinius quidem est, quod virtutem vel honestatem nominare possumus; quæ coelitus demissa, hominum informet mentes & ornet, sibi que coaptet: adeo ut sedibus illas reddat coelestibus dignas. Illud, illud ergo est, illustrissime vir, quod Excellentiam vestram tam mihi pridie reddidit attentam, benignam, & perhumanam. Illud est, quod vestram refricabit memoriam, & vestrum insigniter acuet ingenium, in causâ meâ suæ Cæsareæ Majestati tam proponendâ, quàm commendanda: eoque tractanda modo, quo illa tractari arcana debeant, quæ à paucis credantur, & à paucioribus intelligantur: verissima licet sint, & ex sese utilissima. Quò citiùs Cæsarea sua Majestas mirabilem hanc & maximam Dei, non providentiam solum, sed bonitatem etiam amplexus fuerit, eò citiùs & abundantius meæ ad illum legationis constabit sinceritas, bonitas, & utilitas.

Voluissem equidem hunc inclusum libellum, litrasque inclusas vestræ excellentiæ ipsemet attulisse. Sed (cum veniâ sit dictum) ex digiti pedis mei, offensâ cuticulâ, non tam commodè possum hodie pedes venire: proinde amico meo hoc onus imposui, ut cum vestræ Excellentiae manuum deosculatione omnia mea vobis offerat servitia: hocque quicquid est, pro sua Cæsareâ Majestate, tradere munusculi.

Pragæ 24. Augusti 1584.

JOANNES DEE.

Iiii

Il.

Illustri & Magnifico Domino, Domino OCTAVIO SPINOLÆ, Sacræ Cæsareæ Majestatis à Stabulis & Cubiculis, Domino suo observandissimo.

ILLUSTRIS ac Magnifice Domine, Non possum fatis condignas vestræ Magnificentiae agere gratias, pro singulari illâ, quâ me heri amplexi estis, humanitate & benevolentia: hominem quidem vobis incognitum, sed tamen Virtutis & Veritatis studiosissimum: quique omne reliquum meæ vitæ curriculum (Deo sic volente) in hoc eo consumere decrevi, ut sacra sua Cæsareæ Majestas clarè percipiat, sibi, incredibiliter ferè propitiam fore Dei omnipotentis tremendam Majestatem. Atque quamvis videam, multiplicibus multarum regionum negotiis suam sacram Cæsaream Majestatem occupatissimam teneri, neque aliis, illisque à me suæ sacre Cæsareæ Majestati proponendis, causis, commodè vacare, vel posse, vel evidenti aliquâ ratione debere: tamen, si aliquis excogitari possit modus, pro loci, temporis & rerum occasione, quo sua sacra Cæsareæ Majestas, ea penès me videre, vel ex me intelligere dignaretur, quâ illi forent grata: ea in re vestræ illustrissimæ Magnificentiae libentissimè audirem vel reciperem informationem atque judicium. Nam in hoc totus ero, ut tempore debito appareat, omnipotentis Dei & suæ sacre Cæsareæ Majestatis servitio, maximè autem pro sacrosanctæ, orthodoxæ, catholicæ, & Apostolicæ fidei illustratione, ac Reipublicæ Christianæ defensione amplificationeque addictissimum, fidelissimumque me esse, ac fore sacre suæ Cæsareæ Majestatis Servitorem.

Illustrissimæ Magnificentiae vestræ
paratissimus,

JOANNES DEE.

Opportunitatis flos maturè colligi debet:
citò enim fiet marcidus.

4. Septembris.

1584.

Episto-

*Epistola altera JOANNIS DEE ad RUDOLPHUM
Imperatorem.*

MULTIS, ô serenissime Cæsar, & permagnis ferè omnium creaturarum Dei, immò ipsius Dei, & cœlestibus haud paucis Mysteriis arcanisque vestræ Cæsareæ Majestatis jussu, per me (jam, ante quatuordecim dies) fideliter, sincerè, & diligenter, quantum sex horarum fieri poterat spatio, declaratis ac manifestatis eidem, cui, eadem penès me videnda, audienda, intelligendaque esse voluistis: inde nunc, quæ sit vestræ Cæsareæ Majestati simplex, tanquam ab æquo rerum Æstimatore, facta relatio; vel quod cum relatione adjunctum Judicium: vel, qualis totius processus excogitata censura: vel qualis mecum procedendi vobis persuasa cautio; vel quale pro Cæsarei vestri responsi formâ, initumque captumque consilium, non sum tam immodestè curiosus, ut expiscar; neque aliter vel aliâ ratione de sacræ vestræ Majestatis Cæsareæ prudenti & gratiosâ in præmissis resolutione sum sollicitus, quàm, me fidelem, sincerum, & devotum Dei omnipotentis, & in Deo, propterque Deum vestræ sacræ Cæsareæ Majestatis Servitorem deceat. Video tamen, me (dum nullum adhuc ad præmissa receperim responsum) per tam alti silentii (quasi) stimulum aliquantulum impelli, ut secundo vestram Cæsaream Majestatem admoneam, ne divinam hanc, & divinitus oblatam misericordiam, tam inexpectatam, tam magnam, tam inauditam, tam admirandam, tam multiplicem, tam Statui Imperatorio Christianæque Reipublicæ necessariam, tam certam, tam paratam, eamque per Dei omnipotentis Cæsareæque Majestatis vestræ fidelem servitorem re ipsâ vobis confirmandam & administrandam, (si sacra vestra Cæsarea Majestas voluisset) parvi momenti negotium, vel inventum aliquod humanum, aut fraudem Diabolicam, esse, fuisse, vel fore, ullo modo suspicemini, vel credatis. Tali enim & tam gravi vestræ Cæsareæ Majestatis errore omnipotentis Dei incendi posse furorem vehementer vereor: & ne hanc Dei misericordiam respuentes, ejusdem indignantem provocetis vindictam, valde metuo. Quapropter, cùm videam, Cœlum ipsum, & cœlestia talia mysteria, non tali tantæque curæ vestræ sacræ Majestati Cæsareæ adhuc esse, quali quantæque optassem equidem: ego potius, quàm ut vel Deus hujus suæ prius inauditæ misericordiæ, ultroque vestræ Cæsareæ Majestati oblatae, prorsus nullum penès homines haberet conspiciuum Judicium, argumentum, testimonium vel experimentum: & po-
tius

tius quàm mea sæpe nominata fidelitas, sinceritas, & devotio, five votum erga Deum & vestram Cæsaream Majestatem, omni apud posteros nostros careret fide, & veritatis manifestæ robore: in Dei nomine, & ad ejus laudem, honorem, & gloriam, & ut vestræ serenissimæ Cæsareæ Majestatis satisfaciam desiderio heroico, de lapide illo benedicto: (*Philosophorum* vocato *Lapide*) infallibiliter videndo, possidendo, & utendo: assero vestræ sacræ Cæsareæ Majestati, lapidem eundem me auxilio favoreque divino conficere posse. Et propterea, si vestra Cæsarea Majestas, me velit interim sibi intimè charum habere, & si pro dignitate tanti mysterii & beneficii, sibi à me liberalissimè & humillimè exhibendi, gratiosè me tractare dignabitur, (non tamen alio quidem vel altiori me insigniens titulo, quàm qui vestræ Cæsareæ Majestatis Philosopho & Mathematico conveniat, his literis ore & corde polliceor, sancteque coram Deo omnipotenti voveo: opus illud Philosophicum, omnibus suis numeris perfectum, in manus vestras Cæsareas, & sine sumptibus vestris ad illud opus perficiendum requirendis, ac brevissimo, quo fieri poterit, tempore, nutu Dei, me daturum. De aliis præterea arcanis, adhuc mihi silendum esse video. Nunc autem sacræ Cæsareæ Majestatis vestræ gratiosam, liberam, constantemque voluntatem in præmissis, non aliter, nisi ex vestro proprio gratioso ore, vel ex vestris Cæsareis Literis propriis, intelligere cupio. Nullum enim jam nosco dignum & aptum, qui in istis aliisque naturæ & artis Secretis meus penes vestram Cæsaream Majestatem fieri deberet *Mercurius*.

Illustrissimo Domino, Domino Don GULIELMO DE SANCTO CLEMENTE, Serenissimi atque Catholici Hispaniarum Regis apud sacram Cæsaream Majestatem, &c. Legato, Domino suo observandissimo.

ILLUSTRIS & Magnifice Heros, multis hoc probari potest testimoniis & exemplis, quòd illa, quæ præter vulgarium artium & Scientiarum decreta, nova, & supra vulgariè studiosorum expectationem, hominibus, licèt piis & candidis quidem, divinitus revelantur mysteria, cum summâ difficultate vel intelliguntur à paucissimis, vel vix sine suspitione admittuntur, aut creduntur à pluribus. Ast qualis in nostris, (si rectæ pièque informatæ nostris adhibeatur Judicium) esse potest sus-

picio? Nam à Deo omnipotente, per multos jam annos, fideliter, ardentè, & constanter per preces requisita Sapiëntia, una, scilicet, quæ penès nos quidem, videtur esse radix & occasio tanti istius doni obtinendi. At in cœlesti suo Palatio, ante conditum mundum, determinata & assignata erga nos misericordia & gratia omnipotentis Dei, præcipuum, solidum, immobileque hujus tanti Mysterii est censendum fundamentum: in quo Mysterio talis relucet per potentes fidelesque Angelos isagogica informatio de arcanis Dei consiliis, tam in mundi creatione, creaturarumque naturis & vero usu, quàm in mundi præsentis, moxque futuri, Statu: & præterea, de unius Catholicæ Ecclesiæ, charissimæ *Jesu-Christi* sponsæ, nostræque piæ matris, sanctitate, dignitate, & auctoritate, veluti in quâ etiam est Sanctorum communio, & peccatorum remissio, & de multis nondum per nos revelandis Dei arcanis, magnalibus, & determinationibus: quod tantum abest, ut aliquis sanæ mentis Christianus, actiones nostras mysticas diabolicas esse fraudes, contendere, immò ne suspicari quidem conetur aut possit: ut potiùs tale Arcanum Dei propositum incredibiliter admirari, Rationem humanam in eisdem examinandis subjugare, & Dei erga electos suos admirandam misericordiam in istis esse manifestam, humillimè & cum summo tremore fateri velit. Ego quidem hætenus in istis aliud ferè nihil me esse invenio, nisi calamum Scribæ, velociter per me scribentis. Nam visa auditaque in meâ præsentia, fidelissimè, de literâ interdum ad literam, interdum verbatim, interdum pluribus simul receptis verbis, ipso eodem temporis momento, quo traduntur, annotare sum solitus. At jam in quàm multa excrevit noster talis labor volumina? Ex quibus omnibus illum fructum successumque exspectamus, qualem præfixit ille, cujus nutui cuncta obediunt. Istas autem ad suam sacram Cæsaream Majestatem literas meas, cum vestra Magnificentiâ opportunitatem inveniet primam, si meo nomine humillimè eidem exhibere dignabitur, tum magno mihi divinitus, injuncto levatus ero onere, tum magno à vestrâ Magnificentiâ affectus beneficio. Interim verò, dum suæ sacræ Majestatis Cæsareæ ad istas responsum dabitur, (nimirum si ad 14. vel 16. dies priùs exspectandum esset) vel, statim post acceptum responsum, si tam expedite illud recipere possum, quàm quod recepi ultimò, ad iter me accingere debeo, propter familiam, libros, & aliquam meam Supellectilem, huc ante hyemis asperitatem transferendam. Ubi, cum Cæsareæ Majestatis gratiofo favore, & sub ipsius protectione Imperatoriâ, voluntatem omnipotentis Dei implere pro viribus, & suæ sacræ Cæsareæ Majest-

tati inservire, tanquam ejusdem *Philosophus* & *Mathematicus* fidelissimè, de tempore in tempus, paratus esse poterò.

Illustri vestræ Magnificentiæ addictissimus,

J O A N N E S D E E.

POST-SCRIPTUM.

M Earum esse partium & consultum esse dixi vestræ Magnificentiæ paucissimis verbis significare, quòd heri, manè, horâ nonâ, vir egregius & suæ Majestatis Cæsareæ fidus Consiliarius D. Doctor *Curtzius*, me humanissimè invisebat in meo ergastulo & hypocaulsto, juxta *Bethlehem*, ubi videre poterat Bibliothecam præsentem meam, nullam ferè aliam esse, præter sancta Dei Evangelia & Biblia sacra, ipsosque nostrorum mysteriorum libros. Ego autem quodam humili modo, in cæteras querelas meas, de tam longâ interpositâ morâ conquerebar, inter ejusdem de meis rebus factam relationem & Cæsareum de eisdem recipiendum responsum. Ille verò se simplicissimè Cæsareæ Majestati visa auditaque penès me retulisse asseruit, nullo suo de eisdem adhibito judicio. Verum, Cæsari dixit, quasi impossibilia vel incredibilia fuisse visa. Et de responso mihi in hac parte dando secum adhuc suam deliberare velle Majestatem Cæsaream. Unde ego de literis meis istis, suæ Majestati mittendis, mentionem feci, & summatim earundem tenorem eidem enarravi. Ille easdem statim habere voluit, ipsi Cæsareæ Majestati à meridie mittendas, ego quidem Cæsaris me velle ad pauculos dies expectare adventum dixi. Deinde de rebus Mathematicis brevissimè inter nos habito sermone, illique ad pervidendum dato libello quodam Geometrico, per me & *Federicum Commandinum Urbinatem* in lucem olim dato, & mutuis, post utrinque promissis officiis humanitatis & benevolentiae, abiit.

1584. Sept. 28.

Episto-

*Epistola tertia JOANNIS DEE, ad Legatum Regis
Hispaniæ.*

ILLUSTRISSE & magnifice Heros, Licet mea nondum privata curaverim negotia, pro quibus ordinandis multos interim, dum hinc abfuerim, & labores pertulerim, & sumptus fecerim: tamen nolui literas, ad vestram Magnificentiam à Nobilissimo illo Domino *Palatino Syriadenfi*, missas, in multas horas à reditu meo retinere penès me: ne aliquà ex parte officio viderer deesse meo, tam erga vestram Magnificentiam, quàm ipsum Dominum *Palatinum*. Quantum verò ad mysteriorum incredibilium progressum, habeo & quæ dicam, & sunt, quæ audiam, multa ad veritatis causam, invitissimis ejusdem adversariis quibuscunque elucidandam. De quibus quando oportunum erit, paratissimus ero, cum audire, tum audiri: eo quidem modo, quo sinceritati & fidelitati meæ erga Cæsaream suam Majestatem erit convenientissimum. Interim aliquot dierum intervallum liberum requiro, ut tam ædes mihi meisque conducam, si fieri possit, accommodas, quàm ut alia ad rem familiarem spectantia disponam. Deus optim. Max. Magnificentiam vestram ornare beareque dignetur.

Illustrissimæ Magnificentiæ Vestræ
Obsequentissimus,

J O A N N E S D E E.

Pragæ Ultimâ Decembris. 1584.

*Illustri & magnifico viro, D. JACOBO CURTZIO
Sacrae Cæsareæ Majestatis ab arcanis Consiliis, Domino
meo plurimum colendo.*

ILLUSTRIS & Magnifice Vir, Majorine gaudio affici debeam ex bonâ vestrâ valetudine, & salvo meo ad *Pragam* reditu, an ex contumeliis hinc interim, dum abfuerim, contra me confictis, & variis ejacula-

latis reprehensionibus & quasi minis, dolore torqueri, penè incertum videri possit. Ego quod statui, hætenus feci: Supellectilem scilicet ex *Cracovia* meam, cum tota familia mea, huc jam adduci curavi, cum magnis quidem laboribus meis; & sumptibus haud modicis. Ædes (ex quo jam veni) tales quales etiam cum aliqua difficultate conduxì. Et hac præsentì Septimanâ, omnia hîc nostra ad easdem citissimè transferri, remque familiarem & Oeconomicam quodam crasso modo disponi, negotiorum meorum requirit ratio. Interim vestram Magnificentiam enixè oratam habere velim, ne ullo modo ægrè ferat, quòd eandem nondum inviserim, officioque meo, in hac parte accuratè satisfecerim. Spero, quòd unà mecum sentire velitis, jure merito in proverbium hoc abiisse dictum,

Satis citò, modò satis benè.

Non solum literæ ad me vestræ in habitu meo mihi magno interim fuere solatio: sed & absente me, sæpe testificata bona vestra de me concepta opinio magno me delinivit gaudio: de contumeliis igitur, & literis vestris, & vestrà de me opinione, sive judicio, cum opportunum fuero nactus otium, prædictis negotiis meis confectis, vestræ Magnificentiae adero, ut aliquid dicam: & paratissimus futurus, ut omnia, quæ poterò, faciam, quòd vobis & posteritati constet, fideliter & sincerè, prout statueram, ad sacræ suæ Cæsareæ Majestatis egregia servitia animum me applicasse meum.

Pragæ Januarii 6. Anno 1585.

*Allocutio JOANNIS DEE ad Stephanum Regem
Poloniæ.*

CONSOLATIO, pax, & misericordia Dei sit tibi, ô Serenissime Rex: coram quo divinitus recepi admonitionem, ut me sisterem, quod nunc humillimè facio: paratissimus cum omni fidelitate & sinceritate eâ cum Regiâ vestrà Majestate tractare quæ mihi divinitus injungantur. Quotum Mysteriorum historias de ordine in ordinem, referre, prout occasio dabitur, non recusabo, aliaque omnia peragere quæ Deo & vestræ Majestati Regiæ grata fore intellexero.

R E-

REGIS RESPONSUM.

UT de vestrà Personâ multa bona audivi absente, ita jam mihi gratus valdè est adventus vester, & si quod sit, in quo vobis mea gratia & favor possit esse commodo, non deero me vestrum fautorem & protectorem existere. Atque de istis & aliis majoribus rebus aliquid magis opportuni loquendi tempus post festos istos dies: quo tempore vos ad me accersi curabo.

† *Nyepolonicze in Aula Regis Poloniae.*

Anno 1585. Maii 23. A Meridie hora circiter 6.

Allocutio brevis Regis Stephani ad J. DEE.

EGIT necum Dominus *Palatinus*, ut vos audirem de rebus istis magnis & raris fusiùs loquentes: quod libenter feci: & tamen hoc considerari debet, quòd Prophetæ omnes & revelationes jamdiu & in tempore Christi cessaverunt. Tamen si nihil in istis contra Dei sit honorem, eò lubentiùs sunt audienda: & ego quidem haud dubito, quin Deus nunc possit multis modis secreta quædam hominibus detegere, ad hæc usque tempora, inauditis & inusitatis.

Responsum J. Dee ad Regem Stephanum.

Δ Considero in oratione vestrà Regia tria quasi capitula, in quibus totius oratio vestræ est medulla. *Primum* de Prophetiarum & revelationum cessatione. *Secundum*, an aliquid in nostris actionibus vel Exercitiis insit contra Dei honorem: & *Tertium* (quod animo meo est valdè gratum) quòd Deo non præscribatis certos aliquos modos vel tempora, quibus sua hominibus velit aut debeat secreta detegere. De *Primo*, hoc possumus vestræ Majestati Regiæ asserere quod ille Scripturæ locus haud rectè à plurimis intelligitur: & ab illis pessimè, qui velint omnimodæ Dei potentiæ & misericordiæ & sapientiæ præscribere certos modos, & tempora certa: asserendo nullorum his temporibus esse Prophetiam, vel post *Christum* fore: quia omnes in *Christo* cessavere: hoc est, quia omnes de illo quæ erant Prophetiæ scilicet, de Dei filio in carne venturo, & *Messia* vero, & redemptore generis humani futuro, & de totâ illâ,

Kkkk

quam

quam nos agnovimus & confitemur Christiani, completam & consummatam esse, *Christi* historia, jam cessavere: adeo quòd illa neque jam futura sunt, ut putant Judæi, neque repetenda sunt, cum jam sunt consummata & peracta, quemadmodum Prophetæ prænunciabant: Nam ob hanc causam, cum *Christus* Jesus in Cruce pendens scivisset, quòd omnes de eo Prophetiæ completæ fuissent, & præcipuus scilicet omnium Prophetiarum (ante Christum) scopus jam esset collimatus, & juxta præscientiam & propositum Dei redemptionis humanæ consummatum esset Mysterium, ipse dixit, *consummatum est*: Nam & *Paulus* dixit ad Judæos, nam cum consummassent omnia quæ de eo scripta erant, deponentes eum de ligno, posuerunt eum in monumento.

Joan. 19. Et post Resurrectionem suam ipsemet *Christus* suis discipulis (pergentibus versùs castellum *Emaus*, & de illius morte & Resurrectione dis-

serentibus & dubitantibus) dixit, *O stulti & tardi corde ad credendum in omnibus, quæ locuti sunt Prophetæ: nonne hæc oportuit pati Christum, & ita intrare in gloriam suam; & incipiens à Moyse & omnibus Prophetis interpretabatur illis in omnibus Scripturis, quæ de*

ipso erant, &c. Et paulò post iterum ad eosdem vobiscum: *quoniam necesse impleri omnia quæ scripta sunt in lege, Moyse, & Prophetis, & Psalmis de me.*

Sed quantum ad alium sensum, quòd post *Christum* nulli essent Prophetæ vel revelationes, ipsæ Scripturæ planissimè contrarium docent. Nam quid dicendum erit de Revelatione, sive notabili illà Beati *Joannis* *Apocalypsi*, quæ post *Christum* erat? quæ & ab eodem *Joanne* Pro-

* Cap. 1.
Apoc.

phetia vocatur, dicendo * *Beatus, qui legit & audit verba Prophetiæ hujus, & servat ea, quæ in eâ scripta sunt; & in ultimo capite ejusdem Apocalypseos sive Revelationis ter eandem vocat Prophetiæ librum.*

Quare manifestum est post *Christum* esse Revelationes & Prophetias. Præterea quæ erat illa *Paulo* facta revelatio in ejus vocatione & conversione per ipsum *Jesum Christum*, ut in Apostolicorum apparet *Actuum*

* Act. 10. libro cap. 9. quid de illa dicemus * *Cornelio* Centurioni? Quid de illà *Petro* de animalibus mundis & immundis. Et *Paulus* ipse dicet si glo-

Act. 11. riarì oportet, (non expedit quidem) *veniam autem ad visiones & Revelationes Domini &c.* & paulò post: *Et ne magnitudo Revelationum extol-*

2. Cor. c. 12. *lat me, datus est mihi stimulus carnis meæ, Angelus Satanae, qui me colaphizet; & notum mihi factum est Sacramentum, sicut supra scripsi: prout potestis legentes intelligere prudentiam meam in mysterio Christi, quod aliis generationibus non est agnitum filiis hominis, sicut nunc revelatum est sanctis Apostolis & Prophetis in Spiritu &c. ubi etiam Pro-*

phe-

phetas post Christum esse apparet: & cap. 4. *Et ipse dedit quosdam qui-* Ad Ephe-
dem Apostolos, quosdam autem Prophetas, alios verò Evangelistas, fios.
alios autem Pastores & Doctores, ad consummationem Sanctorum, in
opus Ministerii, in adificationem corporis Christi, donec occurramus
omnes in unitate fidei in mensuram ætatis plenitudinis Christi &c. ubi
 tam diu Prophetas fore in Ecclesiâ Christi post Christum apparet, donec
 occurramus omnes in unitate fidei, &c. quod nondum post Chris-
 tum factum fuisse benè scimus, & jam hac ætate nostrâ maximè
 sumus circa negotium fidei discordes, maximè videntur esse necessariæ
 non Prophetæ solum, sed etiam Revelationes valdè expressæ de Mysteriis
 divinis. Et de locutione Angelica * ad Philippum, & ejus de loco in * Aët.
 locum invisibili quasi translatione per spiritum Domini, quid putandum cap. 8.
 est? Et de Prophetis post Christi tempora testificatur Actuum undeci- Philippus
 mum caput, ubi legimus, quod eodem tempore, quo primùm discipu- defertur
 li Christi Antiochia cognominarentur CHRISTIANI, supervenerunt locum
 ab Jerosolymis Prophetæ Antiochiam, & surgens unus ex eis nomine per spiri-
 Agabus, significabat per spiritum famem magnam futuram universo or- tum Dei
 be terrarum, quæ facta est sub Claudio. Ad secundum autem vestræ
 Majestatis Regiæ capitulum, sic respondeo, quod coram Deo & beatis
 ejus Angelis assero, quod Conscientia mea nihil adhuc deprehendit, no-
 tavit, vel dijudicare potuit, neque possit in omnibus nostris Actionibus,
 vel illarum aliquâ, quod sit, contra Dei honorem vel gloriam, immo,
 quod ad Dei honorem & gloriam valde spectent, poscimus.

Denique tertio in loco, quòd cum magnâ & verè piâ Regiâque discre-
 tione existimetis Deum omnipotentem iis temporibus posse modis suis va-
 riis, hominibus quibusdam sua manifestare mysteria & secreta, valdè
 lætor: & eò magis, quòd tam ex nostris præteritis id constare potuerit
 multis actionibus, quàm ex futuris: quibus interesse & adesse præsens
 (si ita illi visum fuerit) vestra possit Majestas Regia. Et præteritarum
 nostrarum actionum libros 24. paratus sum (quocunque vestræ serenif-
 simæ Majestati placuerit tempore) videndos exhibere, quorum quæ-
 dam Latinâ linguâ, Gracâ aliâ, aliâ Anglicâ linguâ, sed ex maximâ
 parte Anglicâ sunt conscriptæ ipsæ actiones: Angelorum viz. Dei bo-
 norum instructiones, admonitiones, exhortationes, conciones, Pro-
 phetiæ & quocunque alio sunt censendæ nomine nobis factæ Revelatio-
 nes, reales vel verbales, & per spatium jam trium ferè annorum à no-
 bis receptæ & annotatæ.

*Oratio ad Deum, qua usus est in Actione, cui interfuit
Rex Poloniae.*

† Nyepo-
lonizæ in
Aula Re-
gia præ-
sente ipso
Stephano
Rege.

Die Lunæ Maii 27. mane, horam 7. circiter, in camerâ
privatâ Regis.

In lapi-
de quem
Angelus
mihi ad-
duxit: &
præscrip-
ta erat
nostra ac-
tio cum
eodem.

* A. I. E.
K.

† Δ &
E. K.

OMNIPOTENS, sempiternæ, vere, & unæ Deus, ô tu misericors
Pater mi, qui me de patriæ meæ funestâ contra me conceptâ ma-
litiâ, per Angelos tuos bonos admonuisti, & per eosdem, inde me cum
uxore, liberis, & familiam mea istisque * Duobus, egredi iussisti, &
egredientes nos ex Syrtibus Maris, quasi miraculosè liberâsti: Et qui ex
Homicidarum & Hæreticorum manibus & fraudibus variis nos expedi-
visti: & qui multis nos modis (partim nobis cognitis, partim incogni-
tis) à periculis & morte protexisti, ab eo tempore, quod ad tua secre-
ta judicia & negotia testificanda, tractanda & promovenda nos vocâs-
ti: ideo propter hanc tuam tantam & tam admirabilem misericordiam,
immortales tibi à nobis deberi laudes & gratias humillimè agnoscimus.
Ot tu Pater noster clementissime qui † Nos Duos vinculo tuo divino
arctissimè copulâsti: & quasi unum ex duobus esse voluisti: ô tu fortissi-
me Deus meus, qui hunc tuum *Lasky*, quasi Athletam meum cautis-
simum, animosum, & meum amantissimum, nobis adjunxisti: verum
catholicæ tuæ & orthodoxæ religionis amantissimum, & Anti-Christia-
nismi omnis acerrimum hostem; denique ô Sapientissime, potentissime,
& optime Deus, & Pater meus, qui tuis mox incipiendis Regiis, mag-
nis, mirificis conatibus, quem faciebas, Regem, tandem invenisti *Ste-
phanum*, tuum futurum bellatorem; qui tuo Nutui & jussis ex animo
totis suis viribus, & maximo zelo obedire velit: & cui nos honorem &
obedientiam ut exhibeam, in mandatis dedisti: & propter quem labores
(tibi notos) ut subiremus & sustineremus, statuisti: & ad quem, post
laboriosas Peregrinationes nostras multiplices quidem, per 7 Menses
factas, directas aliquas, alias autem (humano iudicio) quasi retrogra-
das, tua maxima gratia, favore, & auxilio incolumes & salvos nos
perduxisti: nos quasi hîc tuos, tuo nomine & una mente convenientes,
tuâ digneris paterna misericordia, à totius vitæ meæ omnibus purgare
spurcitiis: & charissimi tui filii Domini & Redemptoris nostri *Jesu Chris-
ti* intercedentibus meritis, nobis condona, quicquid contra leges tuas
sanctas & justas, volentes, vel nescii, vel negligentes, verbo, facto,
vel

vel cogitatione ad hanc usque horam offenderimus; omnes & singuli, ut tibi jam possimus massa pura & azyma offerri: una divina & abundantissima fermentanda; & tuæ charitatis igne in cordibus nostris per te accenso; quasi quidam propositionis & sacri in templo tuo efficiamur panes. Et sit nobis interim Filius tuus Dominus noster *Jesus Christus* Panis vitæ: quem gustando suavissimum, & fidei viribus transglutiendo vivacissimum Manna eundem habeamus nobiscum in perpetuum. Mitte igitur nunc lucem & veritatem tuam, ô Deus omnipotens sempiterne, vive, & vere, & tuo *Stephano* (nostro autem Serenissimo, gratiosissimoque Regi) appareat, Te Deum nostrum verum, vivum, omnipotentem, Doctorem Nostrum in iis Actionibus & Mysteriis esse, me autem (licet peccatis obnoxium) voto & conatu magno, fidelem tuum & sincerum esse servum: omniaque tua jussa mihi maximè esse curæ: Nosque singulos singularibus in te ante mundi exordium præordinatos esse muneribus in tuo sancto servitio tractandis.

Epistola D. ROSENBERGII ad J. DEE.

Magnifico Domino JOANNIS DEE, ad manus
proprias.

Magnifice Domine, Pater observande, & Charissime.

LÆTATUS sum in his, quæ mihi dixisti. Cognovi enim quoniam exaudivit deprecationem meam pius pater & misericors Dominus. Itaque maximoperè desideravi, ut quam sæpissimè ea mihi legere, perlegere, & semper ob oculos habere possim: per amorem Dei oro, ut saltem eorum, quæ mihi perlecta, & ad me pertinent, verborum mihi transmittas descriptionem. Non tantum mihi multum gratificabitur, sed & consolabor plurimum,

Obsecro præterea Dominationem vestram, assidue pro me orare velit, ut confirmet hoc Deus, quod operatus est in nobis: & dirigat omnia Consilia, opera, actiones, immò & cogitationes nostras ad laudem & gloriam sanctissimi nominis sui, commodum multorum, & animæ nostræ salutem. Neque desinat, pro amore suo paterno, quo, uti spero, Dominatio vestra prosequitur me, semper in omnibus, quæ pro ho-

nore Dei & commodo vestro à me fieri & debent & possunt, admonere & significare. Rem summoperè mihi gratam & expectationi meæ dignam & consentaneam faciet. Et cum his me commendo suis precibus & orationibus, nec non paterno suo amorì & cordi. Optimè valeat Magnifica Dominatio vestra. Dominica, cantate, Anno 1586.

Filius & Amicus vester ex animo

WILLIELMUS V. *Manu propria*

Rogo, ut meliùs intelligat Dominatio vestra ea quæ scripta sunt, ut consideret plus mentem meam, quàm verba. Quia mihi in usu non fuit à multis annis Lingua Latina, & nemini in hac re confidere volo.

To the right Honourable, Sir FRANCIS WALSINGHAM Knight, her most Excellent Majestie's principal Secretary, my singular good Friend and Patron.

With Speed

RIGHT HONOURABLE SIR.

Albeit I have (almost) in vain come a hundred Miles (from *Prague* to this *Leipsich* Mart) hoping either to meet my Servant there, with answer to my former Letters, sent in November last to her Majesty, (when also I wrote unto your Honour, and divers other) and so with speed from this *Leipsich* to have sent again most speedily, as occasion should have served; and now, I find, neither Servant, neither Letter from him, neither word of mouth: yet all this notwithstanding, and whatsoever the hindrance or delay hereof be, (whether the keeping back of my Letters from her Majesty, or the manifold and importune, most weighty affairs publick hindring or delaying her Majestie's most gracious,

ous, discreet and wise resolution herein: or what other occasion herein: or what other occasion else hath and doth cause this long and wonderful delay of Answer receiving: all this notwithstanding, I thought good, before I set up to my Coach, to visit, and most humbly to salute your Honour very faithfully, dutyfully, and sincerely, with great and the same good Will, that my Letter some years since written to your Honour, (but then, a stumbling block unto your Honour and other, for the strangeness of the Phrases therein) doth pretend; so it is, right Honourable, that the merciful providence of the Highest, declared in his great and abundant graces upon me and mine, is so wonderfull and mighty, that very few, unless they be present Witnesses, can believe the same. Therefore how hard they are to be believed there, where all my life and doings were construed to a contrary sense: and processe of death contrived and decreed against the Innocent, who cannot easily judge?

I am forced to be briefe. That which *England* suspected, was also here, for these two yeares, almost (secretly) in doubt, in question, in consultation Imperial and Royal, by Honourable Espies, fawning about me, and by other discoursed upon, pryed, and peered into. And at length, both the chief Romish Power, and Imperial Dignity are brought to that point resolutely, that partly they are sorry of their so late reclaiming their erroneous judgement against us and of us, and seek means to deal with us, so as we might favour both the one and the other: and partly to *Rome* is sent for as great Authority and Power, as can be devised, and likewise here all other means and wayes contrived, how by force, or for fear, they may make us glad to follow their humours. But all in vain; for force humane we fear not: as plainly and often I have to the Princes declared: and otherwise than in pure verity and godliness, we will not favour any (my words may seem very marvelous in your Honour's ears: but mark the end, we have had and shall have to deal with no babes) I have full oft and upon many of their requests and Questions, referred my selfe to her Majestie's Answer, thus in vain expected. *Nuncius Apostolicus Germanicus, Malaspina* after his year's suit unto me to be acquainted with me, at length had such his Answer, that he is gone to *Rome* with a flea in his ear, that disquieteth him, and terrifieth the whole State Romish and Jesuitical: secretly they threaten us violent death, and openly they fawn upon us. We know the sting of envy and the fury of the fear in Tyrannical minds, what desperate attempts they have and do often undertake. But the God
of

of heaven and earth is our light, leader, and defender. To the Worlds end his mercies upon us will breed his praises, honour, and glory. Thus much very rhapsodically, (yet faithfully) *tanquam dictum sapienti*, I thought good to commit to the safe and speedy conveyance of a young Merchant here, called *Lawrence Overton*: which if it come to your Honour's hands, before my Servant have his dispatch, I shall or may by your Honour be advertized. Your Honour is sufficient from her Majesty to deal and proceed with me, if it so be thought good. But if you make a Council-Table case of it, *quot homines, tot sententia*: and my commission from above is not so large. *Qui potest capere, capiat*.

Sir, I trust, I shall have justice for my house, library, goods and revenues, &c. Do not you disdain, neither fear to bear favour unto your poor innocent neighbour. If you send unto me Master *Thomas Diggs*, in her Majestie's behalfe, his faithfulness to her Majesty, and my well liking of the man, shall bring forth some piece of good service. But her Majesty had been better to have spent or given away in Alms, a *Million of Gold*, than to have lost some opportunities past. No humane reason can limit or determine God his marvellous means of proceeding with us. He hath made of *Saul* (E. K.) a *Paul*: but yet, now and then, visited with a pang of humane frailty. The Almighty bless her Majesty both in this world, and eternally: and inspire your heart with some conceiving of his mercifull purposes, yet, yet, not utterly cut off from her Majesty, to enjoy.

Your Honour's faithful well-willer to ute
and command for the honour of God,
and her Majestie's best service:

JOHN DEE.

From *Leipsich* this 14. of May 1586.

at *Peter Hans Swarts* House.

*Epistola JULII ASCANII ad JOANNEM DEE
& EDWARDUM KELLÆUM.*

*Illustrissimis & Magnificis D. Joanni Dee & Edwardo
Kellæo, &c. Dominis & Amicis meis colendissimis.*

Illustriss. & Magnifi. D. mei colendissimi.

BENEDICTIO Dei Patris & mera gratia, & misericordia per unicum meritum *Jesu Christi*, illuminatio Spiritus Sancti confirmet nos cum omnibus Christianis, qui magno cum zelo, propter gloriam ejus, crucem, tribulationem, & persecutionem à rancido atque putido scorto *Babylonico* in turbulentissimo hujus mundi oceano patimur, ut exemplo *Jesu Christo*, qui est in Patre, virtute & auxilio Spiritus Sancti, hæc omnia perferre patienter valeamus ad nominis sui gloriam & animarum nostrarum salutem. Amen.

Mirum fortassis videbitur Dominat. V. quod ignotus ad ignotos scribo: imputabitis bonam hujus culpæ partem justissimo dolori, quem ex rumore sparso, & ad me delato, propter D. V. concēpi: mirari enim non satis possum pertinax studium bestię istius *Babylonica*, quæ nihil intentatum relinquit, nullum non movendo lapidem, quo hominibus vestræ nationis, præcipuè piis & amantibus Dei, non solummodo nocere, sed & funditus perdere studet. Elapso enim undecimo die hujus mensis Legatus Pontificius Libellum Supplicationum, ut vocant Rom. Cæs. Majestati obtulit, quo D. V. Necromantiæ & aliis artibus prohibitis insinuat, aliisque calumniis graviter accusat. Copias hujus libelli habere potuissem, sed nimis serò hac de re sum certior factus, nec tutum & absque suspitione est, ab illo qui illum ex Italico in Latinum sermonem transtulit, petere. Quare cum hæc omnia vana à D. V. ut hominibus Christianis & Philosophis, certò sciam, epistolam hanc tum leniendi tum admonendi causa exarare libuit, ut promptiores & paratiores D. V. ad respondendum offendant. Peto itaque ut eo animo suscipiatis, quo scripta est, scilicet Christiano, integro, & candido. Valete meque precibus vestris *Christo* commendate.

POST-SCRIPTUM.

ANte aliquot dies transmissem D. V. Literas, sed D. V. peregrè profectas esse mihi significatum fuit: postquam autem à servitore generoso D. à *Bikerstein*, cognovissem (*Ferdinando Harnik*) D. V. ad hanc nostram patriam rediisse, literis istis significarem.

Prof. A.

JULIUS ASCANIUS VERDEMAN.

Illustrissimo Principi & Domino, Domino Willielmo Ursino, Hæreditario Domino inclytæ Domûs à Rosenberg, Domino in Crommaw, Equiti aurei velleris, Cesareæ Majestatis intimi Consilii Consiliario, & Regni Bohemiæ supremo Burgravio, &c. Domino & Patrono meo colendissimo.

ILLUSTRISSE PRINCEPS, Nihil mihi gravior à Magnifico Domino *Schombergio* narrari poterat, quàm vestram Celsitudinem prospera interim frui valetudine, dum ego vario, diverso, & intricato quodam fuerim jactatus itinere, per montes, per valles, per sylvas densissimas, per apertos campos, & per nivem profundam, & nobis fere imperviam: & (semper tamen nos protegente Altissimo) tandem sani salvique illæsis tam equis quam curru Celsitudinis vestræ, reversi sumus. Pro quo prospero successu summas Altissimo agimus gratias, & vestræ Celsitudini infinitas à nobis deberi fatemur. Dum absum, contra nos nescio quid falsi incipit iste Apostolicus Nuncius vel leviter nimis credere, & temerè conqueri, vel à seipso excogitare perversè: verè, si ita pergant, (habito jam nostri per biennium experimento satis accurato) illi quidem, qui pietate & sapientia, saltem vulgares, deberent superare homines omnes, omnium hominum semet declarare maximè invidos, malitiosos, perversos, sanguinis humani appetentes, superbos, innocen-

tum

tum carnifices, & piorum in Christo calumniatores exitiosos, &c. Verè dico, cogemur pulverem ex calceis nostris excutere, & alias inmundi partes nos conferre. Et nisi vestræ Celsitudinis haberemus eam, quam debemus, considerationem, & nisi nos ipsos vestræ Celsitudinis præsidio quocunque armato (quasi) munitos existimaremus (præter illud invincibile Dei Opt. Max. agmen invisibile) statim abire ex hoc regno conaremur. Curare etiam debet sua Cæsarea Majestas, ut aliquo modo, & citissimè, perspectum toti huic Regno esse possit, nos duos non solum verè Catholicos esse, sed etiam veræ pietatis & pacis Christianæ esse amantissimos. Per literas istas non est opus, ut plura effundam Spiritus mei fervore quodam. Sed diligentissimè & circumspectissimè respiciamus nos utrique inæstimabile Dei, quod nobis utrisque contulit, donum. Sumus enim quasi tres, sed in uno Deo, unus quasi vir esse debemus. Mysterium hoc notate J. D. E. K. W. R. Nam qui me habet, habet & E. K. & quem ego meum habeo, ille etiam ipsius mei E. K. censendus est esse. Omnipotens ille Deus, qui cuncta creavit, vestram Celsitudinem illustrissimam suæ divinæ justitiæ & gloriæ comministrum & cooperatorem nobis conjungat & diutissimè conserve.

Illustrissimæ Celsitudinis vestræ fidelissimus in Christo servitor,

J O A N N E S D E E.

Prage, Maii 26.

Anno 1586.

Epistola J. DEE ad RUDOLPHUM Imperatorem.

Invictissimæ potentissimæque sacræ suæ Cæsareæ Majestati, Hungariæ, Bohemiæ &c. Regi &c. &c. Domino meo clementissimo, & Patrono incomparabili.

ad manus proprias
expeditissimè.

PER aliquot jam hebdomadas, Invictissime & gratiosissime CÆSAR, aures nostras circumsonabant Rumores varii, quasdam contra me & socium meum præparari accusationes graves & exitiosas, vestræ sacræ

Cæsareæ Majestati offerendas fore, vel jam oblatas esse: & præterea sacram vestram Cæsaream Majestatem quorundam persuasionibus penè eò perductam esse, ut aliquam malam, & nobis periculosam, de nobis conciperet opinionem. Vestræ igitur sacræ Cæsareæ Majestati humillimè supplicamus, ut auctoritate suâ Cæsareâ interpositâ, illius, cujuscunque contra nos exhibiti Libelli, copiam, accuratè & verbatim exscribi, nobisque tradi, mandare, gratosè dignaretur. Sic enim nostris responsis ad accusationis contra nos confictæ collatis articulos, citissimè & clarissimè intelliget sua sacra Majestas Cæsarea, quid in præmissis, cum justitia, ad Dei honorem & Reipublicæ Christianæ utilitatem, arbitrari vel statuere possit aut debeat. Et de hoc certissimi nos sumus, favente Deo, (quod adhuc, & nimis diu, aliquorum negligentia, & contra nostram voluntatem, vestram sacram Cæsaream latet Majestatem.) Nos, cum vestræ sacræ Cæsareæ Majestatis personæ, tum Reipublicæ Christianæ, per vos longè utiliores gratioresque esse posse, quàm omnes, & quocunque hîc nostri præsentis adversarii: veluti ipsa docebit veritas, si penès vestræ Cæsareæ Majestatis aures proprias eum possit habere favorem, ut gratosè audiri queat. Deus Opt. Max. sacram vestram Cæsaream Majestatem sua divina abundantissimè illustret gratia, brachioque suo extento contra Christi atrocissimos hostes Imperatorem reddat triumphantissimum.

Amen.

Sacræ vestræ Majestatis Cæsareæ
humilis & fidelis Servitor, ad
Dei promovendam gloriam.

JOANNES DEE.

28. Maii 1586.

Ilus.

Illustrissimo reverendissimoque Domino, Domino Episcopo Placentino, apud potentissimum & invictissimum Romanorum Imperatorem Rodulphum, ejus nominis secundum, Apostolico Nuncio, Domino mihi in Christo colendissimo.

Illustrissime & reverendissime Domine, mihi colendissime.

IN nomine sanctæ, beatæ, & individuae Trinitatis, vestram illustrissimam reverendissimamque Dominationem, eâ quâ virum Christianum decet, animi affectione & humilitate saluto, non præsumptione aliqua, vestris manibus oculisque istas meas obtrudens literas, sed ex istius Nuncii vestri verbis admonitus, non gratas solum, sed (ferè) expectatas fore, hæc aliquot, haud invitus, exaravi lineolas. Quibus cum non potero 40. annorum continuum & ardentissimum vitæ meæ cursum in tam limatioris quàm vulgaris veritatis philosophicæ indagatione transactum, describere, vel adumbrare saltem, satis præsentī nostro esse possit instituto, si præsentī rerum metamorphosi, & admirandæ negotiorum nostrorum actioni, itinerumque circuitiōni multiplici, aliquid exprimam, quod maximè quadret.

Divinctus antè aliquot annos * informati, & deinde ex *Anglia* evocati, non solum fortissima Dei omnipotentis manu, & miraculosè, ex multis magnisque evasimus maris periculis: sed etiam, ex variis hominum fraudulentis & truculentis contra nos & vitam nostram consiliis & conatibus, liberati hætenus, eidem Deo nostro gratias laudesque canimus mente gratâ, mente læta, mente profectò Christianæ, Catholicæ, Apostolicæque religionis amantissimâ, & (Dei nos confirmante gratia) tenacissima futura. Ast suæ, tamen, qui ejusdem nostræ piæ matris, sanctæ Ecclesiæ Catholicæ, legitimi etiam censentur esse filii, nos, fratres suos, in omni modestia, quiete, pace, & civili justitia, inter illos, & coram illis, *Pragæ* conversantes, subito in exilium quoddam sive exterminium, Cæsareo emitti mandato procurabant, nulla nobis, nulla prorsus, neque privatim neque publicè declarata tam violenti Mandati causa, sed vulgari solum, & aulica relatione nobis facta, intelleximus ex libello quodam, per vos sacræ Cæsareæ Majestati exhibito, conflata contra nos fuisse maximam Cæsaris indignationem & quasi exandescen-

* Ab anno 1581.
Δ Anno 1583.

* Anno tiam: unde ex Cancellaria *Bohemica*, acerbissimum ad nos sacræ suæ
 1586. 30. Cæsareæ Majestatis nomine missum sit *mandatum (nulla in eodem ex-
 Maii. pressa ejusdem mandati causa, vel ratione legitimâ) ut infra tunc sex
 proximos sequentes dies, ego, consors meus, uxores nostræ, liberi mei
 omnes, immò & ipse infans noster *Michaël Pragensis* natus, & bapti-
 zatus, atque ad matris adhuc pendens mamillas, famuli etiam mei, &
 ancillæ, mei denique omnes, & domestici, ex ipsa *Praga*, atque ita
 consequenter, ex universo regno *Bohemia*, & aliis quibuscunque sacræ
 Cæsareæ Majestatis regnis, ducatibus, & terris migraremus nunquam ea-
 dem vel easdem reversuri, sub terribilis infligendæ poenæ periculo. Nos
 autem, nullâ interpositâ morâ, huic mandato Cæsareo fideliter & hu-
 militer obedire nosmet accinximus, bonaque nostra mobilia, peregrina-
 tionis nostræ supellectilem, tam librariam quàm domesticam, in duos
 magnos Currus conjicii curavimus: reliquorum nostrorum bonorum par-
 tem unam, amicis dedimus, & pauperibus dispersimus & distribuimus:
 partem autem, de facie terræ, propter causas Deo non ingratas, pridie
 ante exitum istum nostrum, per nos deletam esse sciatis. Ast optimam
 partem, divino jussu, decima die Aprilis (quando etiam, de tota hac
 afflictione & persecutione nostrâ, & aliis adhuc futuris eramus divinitus
 præmoniti) ignis luculentissimis flammis commisimus: quando illa, ejus-
 dem optimæ partis, quæ nullus unquam naturalis vulgarisque ignis pote-
 rat lædere vel consumere, visibili angelici ministerio, ex ipsis summis
 flammis in divinam, angelicamve invisibilem recipiebantur custodiam.
 Ast librorum divinorum thesaurus maximus, tunc, & ibidem, duorum
 adhuc viventium testium diligenti opera, ab ipsis flammis in cineres fa-
 villamque conversus est totus: renovationem, restaurationem, & quasi
 regenerationem vel resurrectionem quandam, per divinam manum, op-
 portuno recepturus tempore. Sacellum denique cum altari, quod om-
 nipotenti Trinitati consecrandum fore cupiebamus, media ex parte ab-
 solutum, intactum relinquimus. Ego verò, cum consorte meo, Uxo-
 ribus nostris, liberis meis, & reliquis exulibus, sive exterminatis, no-
 stris rhedis tribus aucti, transmigrationem hanc, nobis injunctam, die
 præfinitâ ingressi sumus. Atque nondum ex Imperii *Romani* finibus
 egressi, ita gressus nostros disponimus & de cætero, Deo favente & gu-
 bernante, disponemus: ut toti orbi Christiano clarè apparere poterit,
 patienter nos hæc qualiacunque tolerare posse, aut saltem velle: & para-
 tissimos esse nos, reddere Deo, quæ Dei sunt, & Cæsari, quæ sunt
 Cæsaris. Obedientissimos etiam nos esse, & humillimos sacro-sanctæ
 Catholicæ Ecclesiæ filios, & summi Pontificis Romani, & aliorum Ec-
 clesi-

Anno
 1586. 10.
 Aprilis.

Anno
 1586.
 Junii 4.

clasticorum Præsulum Catholicorum, in Christo & propter Christum tam esse observantes & fore, quàm ipse, qui Judex futurus est vivorum & mortuorum, variis nos esse modis haud rarò admonuit. Vestræ verò illustrissimæ reverendissimæque Dominationi hoc à Deo optamus bonum, ut per secundas vestras de tota causa nostra meditationes, nostræ innocentiae, sinceritatis & fidelis coram Deo & hominibus in illa Republica *Bohemica* conversationis nostræ justa habeatur ratio: Meæque honestæ famæ, existimationisque (sine quâ ne vivere quidem cupio) ea fiat in integrum restitutio, ut talis posthac esse indicetur indubitè, qualis ante vestrum Cæsareæ Majestati exhibitum contra nos Libellum, per 30. Annos & plures, in omnibus penè Christiani Orbis tam Academiis, quàm regnis & provinciis, ex Dei immensa bonitate, gratia abundantissimâ, & singulari providentia exstitisse, haud obscuris confirmari possit testimoniis. Ex his igitur paucis historiae ipsius veritatis scintillis, vestræ illustrissimæ reverendissimæque Dominationis prudentia magnum sibi lumen allicere sive accendere potuit: ad nos, nostrorum animorum affectiones, nostrorum ita mirabilium & adhuc incredibilium negotiorum progressum & statum dijudicandum, & denique de ipso futuro horum omnium exitu haud leves sibi contexendas conjecturas: cum nos ex solo Deo omnipotente, & vero, & vivo, in omnibus nostris pendeamus, & ab ipso dirigamur & protegatur. Cui soli nos ipsos, nostraque omnia, animæ, corporis, & fortunæ nuncupata bona, tanquam holocaustum, quotidianis nostris humillimis & spontaneis offerimus precibus: cui denique soli sit omnis laus, honor, gloria, & gratiarum actio nunc & semper. Amen.

Fidelis in Christo, & propter
Christum Servulus,

JOANNES DEE.

Data Erphurdia

Anno 1586. die

16. Julii

Epistola

*Epistola Episcopi PLACENTII ad J. DEE.**Magnifico Domino JOANNI DEE, Anglo, &c.**Magnifice Domine,*

LECTIS tuis literis, fui miratus, quòd intelligerem te illius esse opinionis & sententiæ, me apud Cæsarem tibi ac consorti tuo officiis meis non parum obfuisse; quod sciam ita me & religione & natura comparatum, ut omnibus quàm maximè cupiam prodelle, nemini autem obesse. Quod autem præstiterim, quod mei erat officii, mihi vitio verti non debet. Cæterùm cùm inter summum Pontificem & Cæsarem merus sim interpres, non video, quid in hoc vestro negotio præstare possim. Consulo autem, ut vestram innocentiam, de fide Catholicâ sensum, & de Angelorum conversatione & assistentiâ, quam visibilem habere dicitis, juxta Concilii *Lateranensis* in undecimâ Sessione decretum, coram summo Pontifice & Sede Apostolica deducatis, & ita exponatis, ut non possit cuiquam esse dubium, quid sentiatis; quin, Sede Apostolicâ approbante, fides tutò ab omnibus Angelicis assertionibus vestris præstari possit, & tum demum & obtrektoribus, si qui sunt, ora obcludentur. Nec, ut arbitror, grave vobis videbitur consilium meum; Si enim ea vobis est in fide Catholica puritas atque constantia, ea in præsentis Angelorum communione sinceritas, vitæ integritas & innocentia, ut asseritis; me etiam tacente, occasionem quæritis declarandæ vestræ fidei & bonitatis, & hac una ratione honori vestro, (cujus vos rationem habendam dicitis, & cui tantùm abest, quod per me aliquid sit detractum, ut illum etiam pro viribus, quantum officii mei & injecti muneris ratio patietur, fovere sim paratus, ut Domino *Puccio* pluribus dixi) & omnibus vitæ commodis vel maximè consuletis. Deus gratiâ sua vos ita regat, ut Angelorum conversationem in cœlis aliquando habere possitis.

Vale. *Pragæ*, die
28. Julii 1586.

Magnific. D. V.

Ex corde in Christo frater, PHILIPPUS
Episcopus *Placentinus* Nuncius.

Epi-

Epistola FRANCISCI PUCCII *ad* J. DEE
& E. KELLÆUM.

FRANCISCUS PUCCIUS præstantissimis ac Deo dilectis viris, DD. JOANNI DEE & EDWARDO KELLÆO, generosis *Anglis*, majoribus in Christo fratribus, & ipsis tanquam patribus colendis, precatur gratiam & pacem à Deo Patre nostro, & Domino Jesu Christo, *Amen*.

EX quo à vobis discessi, toto illo itinere, quod octo diebus confeci, vendito *Lipsiæ* equo, haud parum vexatus fuit meus Spiritus, dum animo meo volverim, quot modis Satanas divinum opus retardare & nostram conjunctionem dirimere, adhibitis exterioribus & interioribus machinis & armis, tentaverit, & adhuc tentare non cesset. Neque enim possum, nisi ab eo, agnoscere afflatus illos diffidentiae, rumores ab invidis hominibus sparfos, suspiciones nobis injectas, absque certis indicis, adversus fidem non levibus argumentis probatam, atque hujusmodi impedimenta & offendicula, quibus cursum nostrum impedire, ac sanctam amicitiam, divinis auspiciis inter nos coeptam, convellere ac labefactare malignus ille Spiritus aggressus est. Itaque in illa luctâ, ne ullo modo manus illi darem, aut fatiscerem, decrevi me magis ac magis munire certa fide in Deum, ac spe & promissionum ejus, quas illum servaturum non dubito, tum precibus frequentioribus magis instare apud Summum Patrem, ut nos quamprimùm donare velit illo Spiritu, quo nostri humeri montibus ferendis, ut ille inquit, pares evadent; ad hæc austeriorem vitam instituere, nec mensas lautas amicorum adire, sed panem doloris solus comedere decrevi, ne sim meliore conditione, quàm vos, qui tantoperè affligimini, ut benignissimus Dominus quamprimùm vos in integrum restituat, atque ad solita colloquia piaque exercitia nos unà revocet, & eventu, consentaneo suis sanctissimis dictis, singulos nostrum exhilaret. Hanc viam sequenti Domini mihi spem facit fore, ut vobis & aliis faciliùs meam fidem probem, & multas tentationes vitæ, quæ apud hujus mundi homines facilè nos invadunt. Ideo, nisi necessitate urgente, aut communibus negotiis, familiaritatem omnem & convictum cum Aulicis fugio, & me hoc modo minùs ineptum precibus

cibus sentio, meamque vitam & mores in dies emendare conor, ne videar omnino indignus ea Scholâ, in quâ Dominus me erudire dignatus est; nec interim cum Publicano illo precari obliviscor, ut Deus propitius sit mihi peccatori. Vos, non dubito, me vestris votis & supplicationibus juvabitis, ut vocationi meæ respondeam, & in opere Domini vobis adjumento & consolationi esse possim: & benignissimus ille pater propediem hoc adverso vento ignem suum magis excitari curabit, ac nos majori, quàm unquam antea, jucunditate recreabit. Ac de his hæcenus. Quod verò ad nostra negotia attinet; perveni huc die 24. Julii sub vesperam, ac statim adivi illustrissimum Dominum Nuntium, cui vestras tradidi, quas læto vultu accipere visus est: Sed colloquendi non fuit otium, cum, parata cœna, jam discumbere vellet. In posteriorem diem igitur rejectus, ad Dominum *Carpionem* me conferebam, cum didici eum ad vos missum, quatrduo antè hinc discessisse. Dolui admodum eum non esse mihi obviam factum, tum ratione vestrarum, tum mearum literarum, quoniam fasciculum quendam ad me quoque ferebat. Sed quod maximè me torquebat, erat cura de literis illustrissimi Domini *Rosenbergii*, quas sciebam inclusas Domini *Carpionis* literis, nec eas aperire, aut alii tradere audebam; cum disertè esset Scriptum illud ad manus proprias. Dum itaque occasionem quæro & exspecto, ea sese obtulit, quam mox audietis. Reversus sequenti die ad illustrissimum Dominum Nuntium, invenio apud illum Jesuitam *Italum*, qui mihi fuit à Confessionibus; blandè ab ambobus accipior, sedere jubeor, à Jesuita nomine candoris & ingenuitatis non parum laudor. Tum lepide moneor ab illustrissimo Domino Nuntio, ut ipsi adsim in convertendo Jesuitâ illo: (is enim erat, quicum expostulaverat, quod nimis facile mihi dedisset, testimonia triumphantis Ecclesiæ non subijci judicio militantis.) Respondeo, me fecisse, quod in me erat, ut docerem eum præferre cœlum terræ, ac tribunal superius inferiori; sed cum id mihi minimè successisset, ejus esse, sua doctrina & auctoritate, hominem de sententia illa dejicere. Illustrissimus Dominus Nuntius haud gravatè nostram sententiam, hæc in parte, probat, & exemplis confirmat, atque ita concludit, ut statuatur, certitudinem videntis & audientis Dominum, aut ejus Angelum, non pendere à probatione ecclesiasticâ, neque ab illo esse rationem repetendam suæ revelationis, dum nihil publici muneris exercere audeat: Sed si incipiat palam profiteri, se à Deo doctum & missum, ita ut non ipsius solum, sed aliorum quoque intersit scire, quo Spiritu agatur, tunc Ecclesiasticorum munus esse, illius Spiritum examinare & probare, neque ipsum jure posse examen hoc detrectare, licet suas revelationes eis subijcere minimè teneatur.

Nam

Nam si ordinaria auctoritas eum admiserat, benè habebit, nihilque turbarum excitabitur: Sin per injuriam aut inscitiam aliquam, aut per aliam hujusmodi causam rejicietur, suum erit appellare superiorem Dominum, qui ipsum misit, quo suum servum & legatum defendat, aut ordinario judice commonefacto, aut alia ratione: quod probabat decreto *Lateranensis* Concilii, cujus mentionem facit in suis literis; ac præterea historia S. *Francisci*, qui primùm expulsus ab *Innocentio* Pontifice, mox revocatus fuit, cùm per quietem apparuisse Pontifici pannosus ille, qui *Lateranense* templum suis humeris fulciret. Addebat præterea, viros Dei non esse solitos deterreri una aut altera repulsa, & hoc repellendi modo dicebat Præsules aliquando usos esse, ut probarent spiritum, & constantiam eorum, qui res novas magnasque proponerent. Ego verò inquam, ut hæc ita se habeant, vos hætenus publicum munus exercere non tentasse, & intra privatos parietes, summa modestia vos continuisse. Tum ille, longiori ambitu verborum, sic de vobis disseruit, ut ex vestris verbis ad serenissimum *Polonia* Regem, ad invictissimum Cæsarem, & ad illustrissimum Legatum *Hispanicum*, jam constare diceret, vos aliquid amplius, quàm privatum, moliri, ac summo Pontifici, sedenti in specula super totam Christianam Rempublicam, potuisse meritò suspectas esse vestras personas, hoc modo Principum animos & interiores aularum recessus scrutantes: idque ratione vestræ Reginae, infensissimæ Apostolicæ sedi, & cum ipso *Turcæ* conspirantis, nec non spiritus familiares habentis, ac præterea ratione vestræ summæ peritiæ in artibus & scientiis reconditis, quibus facilè plebi & imperitis imponi potest. Cùm enim sitis magni Astrologi, dicebat ille, & facilè vobis sit habere geneses Principum, nec non magicas artes calleatis, haud difficulter possetis bonorum Angelorum nomine ea proponere, quæ à Spiritu Ecclesiæ hoste manarent. Ideò summum Pontificem, (cui duo illi Principes sunt maximè observandi, utpote qui inter hæreticos vivant & regnent) prudenter fecisse, qui jussit, ut in vestros mores & doctrinam inquireretur. Accidisse autem præter ejus postulatum & voluntatem, ut, indictâ causâ, expelleremini. Se verò vicem nostram dolere, & paratum esse ad curandum, ut vos justificare possitis, idque sibi esse in votis, non semel asseruit. Quapropter hortatus est me, ut ad illustrissimum Dominum *Rosenbergium* contenderem, atque ipsius bonam propensionem erga vos ei significarem. Nam ille à summo Pontifice facilè impetrabit, ut causa vestra hîc cognoscatur; & si ille vobis faverit, ut hætenus fecit, se quoque ad futurum vobis omnibus officiis, ac primum fore, qui se vestris genibus obvolvatur, si tales eritis, quales vos

nonnulli prædicant. Eo igitur recta ad illustrissimum Dominum *Rosenbergium*. Sed quater redeundum mihi fuit, antequam admitterer. Die 27. tandem admissus, exposui meum studium erga vos resque vestras, ac quomodo illustrissimus D. Nuncius affectus erga vos esset; ac tandem oravi, ut non desereret patrociniū & defensionem illam, quam suscepisset, peregrinorum pientissimorum, qui à Cæsare minus bene informato ad Cæsarem meliùs informatum provocarent, ac suam innocentiam Deo & hominibus probatam cuperent. Ille humaniter respondit: vos non admodum sibi notos esse; se bis cum seniore, semel tantum cum juniore collocutum; judicasse vos doctos & pios, & præclaris donis instructos: existimare vobis hoc accidisse malâ aliquâ relatione, cui incommodo res Principum sunt obnoxia: vestrum esse id æquo animo ferre: non se poenitere, quod vobis faverit, & si sciret, quid potissimum à se peteretis, daturum operam, ut vestris votis responderetur. Tunc mihi visum est nonnulla dicere de optima spe, quam de ipso concepissetis, & quomodo me non dimiseratis sine literis ad illum: sed erant inclusæ fasciculo D. *Joannis Carpionis*, quem statim protuli, atque eo instante ac respondente, D. *Carpionem* non ægrè laturum, si ipsi dedissem, tradidi fasciculum ei, qui dixit se per otium lecturum, ac, sequenti die, mihi responsurum. Discedo igitur ab illo ad illustrissimum Dominum Nuntium, atque otium nactus, tum per me, tum per illustrissimum Legatum *Florentinum*, pluribus cum eo agere instituo de insigni injuria vobis factâ: expono, quantoperè laboraveritis, ut considerare possitis apud Catholica templa, & quàm inhumaniter in hospitibus & civitatibus ratione hujus præjudicii Cæsarei tractaremini; doceo, quàm sordido & angusto loco vestras familias reliqueritis, ita ut vestram supellectilem & libros explicare nequiveritis; moneo, ut Domini *Dee* jam grandis natu, aut potius senis, & nihil tale hætenus passi, vicem doleat; ejus ærumnas non tanquam simplicis hominis considerandas esse, cum vir sexagenarius, quatuor tenellis suavissimisque liberis (quorum major septimum annum vix exceßerit) ac dilectissimæ conjugis adjunctis, longè gravius affligatur, ratione uxoris suæ, lectissimæ foeminæ, & pignorum charissimorum, quàm sui ipsius; ostendo, quanto offendiculo hoc futurum sit Catholicis *Anglis*, ac cæteris, & quanta ansa præbeatur hæreticis invehendi in Ecclesiasticum ordinem: declaro periculum imminens ordini illi, si fortè Deus facultatibus vestris ad eos plectendos eorum inimicos armari permitteret: demonstro, Deum aliàs per *Israëlitas* hæreticos Catholicos *Judæos* punire consuevisse: ac denique declaro, quàm absurdum sit vos indictâ causâ condemnari, si id meriti sitis: quanto absurdius,

si non meriti sitis quicquam tale: absurdissimum verò, cum à catholicâ Ecclesia honor potius vobis deberetur. Ac cum non petatis, nisi ut vobis vos purgare liceat, nihil magis consentaneum rationi excogitari, nullo alio modo errorem admissum emendari, atque hoc negotium bene dirigi & redintegrari posse.

Ille mihi legit vestras literas, id est, D. Dee; sed de rebus, ambobus vobis, aliquo modo, communibus: dicit, se non credere ea, quæ de divinis monitis & miraculis in illis continentur; petit, ut ipse declarem obscuriorem locum de libris combustis: audit à me testimonium oculatum de illis concrematis, & quomodo vobis audiverim eos esse coelitus restitutos, ac denique concludit illis literis esse multa laudabilia, multa admirabilia, multa itidem incredibilia; sed cum non sint Deo impossibilia, se sustinere assensum, nec velle quicquam certi, re non penitus explorata, pronunciare: vobis tamen responsum humaniter, ac daturum mihi literas, quod fecit postea die 28, quas literas ad vos cum hisce mitto. Et quia legendi eas mihi fecit copiam, satis jejunas & frigidas mihi esse visas, haud dissimulo. Tamen quia mentionem aliquam mei fecit, tanquam hominis, cum quo fusiùs de suo animo erga vos egerit, visum est mihi accuratè & particulatim exponere, quid inter nos actum dictumve sit, ut verba cum factis conferre possitis, & pro vestra prudentia & pietate consilium capere, & si operæ pretium videbitur, rescribere. Quantum enim ex ejus sermonibus colligo, videtur ipsi necessarium novum mandatum à summo Pontifice, antequam quicquam vobiscum agat; nec se scripturum dicit de vobis *Romam*, nisi prius petatis, quod ab ejus sanctitate cupitis: utpote qui, in hac causa, fuerit merus interpret. inter Pontificem & Cæsarem nec possit, nisi verbis sui Domini, quicquam promittere & statuere. Idcirco, quantum videre possum, res diutiùs protrahetur, quam vellemus, nisi Dominus noster & Pontifex cœlestis alio modo nobis providerit. Die 28. & 29. inveni illustrissimum D. *Rosenbergium* tam occupatum, ut admitti non potuerim, sed per cubicularium significavit, se valdè cupere, ut colloqueremur, itaque redirem die 30. Interim fui rursus cum illustrissimo D. Nuncio, mox discessuro ad sancti *Caroli* Monasterium, ubi commorabitur, quamdiu hi æstus sævient. Et cum commodo cecidisset in colloquendo, visum est mihi interrogare hominem an probaret meam sententiam de discernendo ex certis notis & terminis verum verbum Dei à ficto & fucato; cum possit Angelus malus transformare se in Angelum lucis, & Apostatæ falsi non rarò se transfigurent in Apostolos Christi.

Dicebam enim duo mihi videri necessaria, ut hoc judicium ritè fiat.

primum quidem, in homine audiente, bona propensio & animus benè affectus ad Creatorem, totusque ex eo ita pendens, ut nihil antiquius habeat, quàm ei placere, & qui de ejus benignitate aut veritate non dubitet erga eos, qui ad ipsum confugiunt, ut bonum spiritum hauriant. Deinde in sermone nomine Dei proposito requiri eas proprietates, quæ

- Heb. 4: tantum auctorem deceant; quas graphice describit *Paulus*, cùm dicit, 12. 13. *vivus est enim Sermo Dei & efficax, & penetrabilior omni gladio anticipi, & pertingens usque ad divisionem animæ ac Spiritûs, compagum quoque at medullarum, & discretor cogitationum & intentionum cordis, & non est ulla creatura invisibilis in conspectu ejus.* Cui adstipulatus Jer. 23. Deus, qui apud *Jeremiam* dicit; *Propheta, qui somnium habet, somnium narret, & qui verba mea habet, verba mea narret.* Quid paleis cum tritico? dixit Dominus. Nunquid non verba mea sunt quasi ignis? dicit Dominus, quasi malleus conterens petram? Concludebam igitur, hominem Deo fidentem ex efficacitate & ardore illo, quo affici se percipit, deprehendere Sermonis Dei veritatem. Nam vox lupi & alieni pastoris non potest permovere veram ovem, ut ipsum diu sequatur, & hanc esse regulam qua judicarem divinas sententias à non divinis distinguere posse. Ille probabat meam sententiam, atque addidit, sine bono studio auditorum non apparere efficacitatem divinorum Sermonum, ut constat ex Christi historia. Dum enim simplices *Israëlitæ* dicebant, *nunquid sic loquutus est homo*, & similia de Christi doctrina, *Pharisæi* & perversi Sacerdotes eum deridebant & contemnebant. Tunc ego, si contingeret igitur, ut cùm congrediemur, fieret ad te verbum Domini, num hujuscemodi regula uteris? Hic ille inquit, cùm posset accidere, ut mihi de hac re judicandum esset, nolo hoc tempore, meam sententiam declarare, sed hujuscemodi ratio non mihi mala videtur. Ex quibus verbis nescio quid mihi visus sum odorari minus candidum, quàm in re tantâ opus esset. Sed Dei esto judicium de ejus interiori sensu. Ego bona fide colloquia nostra exposui, ut vobis usui esse possint, ratus hoc vobis gratum, sicut foret mihi, si vestro loco essem. Reversus die 30. ad illustrissimum D. *Rosenbergium*, vidi eum tandem exeuntem ex cubiculo ad quosdam Nobiles, & dixit, se tantopere districtum esse, ut mecum colloqui non posset, sicut cuperet. Ego verò inquam, me S. Celitudinis monitu toties reversum expectare ejus responsum, & an vobis rescribere vellet. Tunc ille inquit, prius tecum colloquendum est mihi; itaque (ut ejus verbis utar) habeas patientiam aliquot dies, donec ego pro te mittam, & sic me dimisit. Docui igitur *Venceslaum* cubicularium nostras ædes, qui dixit se optimè callere locum, ac suo tempore me-

memorem fore mei, cum Dominus me accerseret. Expectans igitur aut responsum illustrissimi D. *Rosenbergii*, aut aliquid aliud dignum vestris auribus, non visum est mihi ad vos expressum nuncium mittere: monente præsertim Domino *Sevenbergio*, vobis esse paratas nescio quas ædes in oppido *Naitu*, in Comitatu *Suarreburgensi*, & ut expectarem reditum Domini *Carpionis*, quem propediem reversurum sperabat, ne sine magna causa atque incertus de loco vestræ Sedis ad vos literas dirigerem. Igitur non parum sollicitus de vobis & de reditu D. *Carpionis*, semel ad minimum in die ejus ædes adeo, atque interrogo, si quid de illo significetur, nec quicquam, per multos dies audio. Tandem die 12. Augusti sciscitor D. *Millerum*, an aliquid mihi de Amico dicere possit. Respondet, se quoque expectare hominem, atque admodum mirari tam diuturnam moram, præsertim cum D. *Gregorius*, qui cum ipso *Carpione* ad vos venerat, sit triduo ante reversus. Ego igitur, qui nihil prius de D. *Gregorii* aut itinere aut reditu noveram, ad illum rectâ contendo. *Gallus*, ejus contubernalis humaniter me admittit, jubet expectare D. Doctorem, & ad illum accersendum currit. Sed cum diutius moraretur, ego jam discessurus, video D. *Gregorium* seorsum cum ipso colloquentem, & me torvo vultu intuentem. Saluto illum, & gratulor reditum, ac demum de vobis interrogo. Ille respondet, se nihil quicquam de vobis aut rebus vestris scire, nec vobiscum fuisse. Tunc ego aliquantulum hæreo, ac tandem dico, si nolit quicquam dicere, me æquo animo laturum; sed jam mihi constare, eum vobiscum fuisse. Ille stomachatur vestrum nomen, ac totius mundi fallacias & imposturas; dicit sua sibi esse curæ, non vestra; vos multa quidem promittere, sed parum præstare; nescire se, quare conqueramini; se per sesquiannum vanâ spe lactatum, vobis adhæsisse, ut aliquod e minoribus vestris arcanis disceret, nec quicquam alicujus momenti percepisse. Hic ego: an parvum tibi videtur arcanum illud contra luem veneream? Ille verò subridens, à D. *Sconto*, inquit, longè præstantiorem habeo. Denique his omissis, librum meum *Postelli* repeto: ille negat se habuisse; interrogat, à quo audiverim; ac me laudante D. *Dee*, ille rursus negat se vidisse; nisi fortè, inquit, ex manibus D. *Sevenbergii*, vis dicere librum nescio quem sine titulo: ac denique de restituendo nullam spem facit. Ego, qui cum illo verba commutare nollem, abeo: ac puerum vestrum *Stanislaum* in atrio offendo, & ab illo intelligo, vos *Erfordiam* usque cum D. *Gregorio* & D. *Carpione* venisse, ante octiduum D. *Carpionem* illinc *Bambergam* ad exigendas nescio quas pecunias, profectum; se cum D. *Gregorio* nunc venisse. Interrogo an literas aut aliquod verbulum à vobis ad me

fer-

ferret; respondet, nihil prorsus; quia fortè putabant, inquit, te hìc non esse: se post triduum aut quatrimum ad vos reversurum. Laudo ejus consilium & constantiam in serviendis Dominis, ac doceo meas ædes, ne sine meis literis ad vos veniat: promittit se non discessurum, me insalutato. D. *Gregorius* interim percipit, me cum illo colloqui, atque iratus (quantùm ex voce clamantis judicare possum) puerum revocat. Ego cogitabundus discedo. Die quinto decimo hujus mensis, tandem nactus servulum vestrum *Stanislaum*, in loco libero, eum accuratiùs de vestris rebus ac statu examino, atque non sine magnâ animi mei voluptate audio vobis concessas esse ampliores ædes: illustrissimum D. *Langravium* præstantissimo D. *Dee* multùm tribuere & favere, & summo Deo pro tanto munere magnas gratias ago, atque puerum ad meum cubiculum duco, ostendoque illi literas ad vos paratas, ne sine ipsis ad vos revertatur. Sed paulò postea pater *Carpionis* me monet, se velle ante noctem ad vos unicum expressum mittere, & ut scribam, si velim: nam se à D. *Kellæo* monitum hoc mihi significare. Ingentes gratias ago D. *Kellæo*, qui mei non sit omnino oblitus, & hæc, per hunc, quem vobis spero fidum, nuncium, significare statuo, scripturus rursus per *Stanislaum*, si operæ pretium videbitur.

Oro vos atque obtestor per Deum illum vivum, qui auctor est nostræ amicitiae, & qui disertè præcepit, ut nos invicem ac mutuò amemus, ne obliviscamini mei, cùm datur vobis occasio invisendi me per literas aut per internuncios, & reddendi me certiolem de statu vestrarum nostrarumque rerum; nam ego certè vestri non obliviscar, & officia mea id testabuntur, non solum coram Deo, sed etiam coram omnibus hominibus. Si vester reditus aliquandiu differetur, invisam vos proximo mense Septembri; longè enim à vobis vix vivere possum, immo si propriè loquendum sit, me vitæ tædet: ac præsens agam de nonnullis rebus, quas scribere minimè decet.

Jam elapsi sunt 18. dies, ex quo illustrissimum Nuncium Apostolicum non vidi; & cùm satis superque satisfecerim obedientiæ non adibo illum, ne verba nobis dare sibi tam facile fore persuadeat. Ostendit literas D. *Dee* Legato *Veneto* & *Florentino*, & uterque mihi summo opere eas laudavit, dixitque sibi visas disertas, graves, & plusquam vulgaris spiritus, & optassent exemplum illarum. Sed ego offerre non poteram, & dubito, ne illustrissimus Nuncius eas supprimat; nam haud obscure innuit, se timere vestrum congressum, præsertim æquum & rationalem, & id quærere videtur, ut vobiscum agere possit more *Hisp.* &c. D. *Joan. Carpio* nondum revertitur, & D. *Rosenbergius* cras dici-

citur discessurus, & nescio, an recuperare potero literas ad eundem *Carpionem*, in quibus de pecuniolis illis agebatur. Si dubitatis, ne ille diutius, quàm par sit, solutionem differat quæso curetis, ut aliquo alio modo mihi prospiciatur. D. *ab Offa* per 20. dies non vidi, ac Jesuitis palam dixi, & dico, quandocunque occasio se offert, vobis factam ab ipsis insignem injuriàm; eos plus pendere ab aulis terrestribus, quàm à coelesti; timere collationem æquam cum vobis, ac suæ causæ animum haud obscurè diffidere; itaque jam sum eis minus gratus.

Saluto Uxorem D. *Dee*, lectissimam foeminam, ac mihi non minus quàm matrem venerandam; nec non conjugem D. *Kellai*, rarum exemplum juvenilis sanctitatis, castitatis, atque omnium virtutum. Saluto omnes alios vestros domesticos sanctos, vosque inprimis D. D. *Joan.* & *Ed.* desiderabilia mihi nomina, felices ac beatos in Domino cupio ac precor. Quantum tribuam, & tribuere debeam vestris precibus, notis, eis oro atque obsecro me apud D. Deum juvetis, ut vocationi meæ respondeam, & cursum meum hilari animo ac firmo corpore perficiam. Sanctissimus ille pater, qui nobis jam suscitavit Pastorem illum magnum D. *Jesum*, filium suum, mox reversurum ad subigendos omnes inimicos ejus sub pedibus suis, atque extremam manum impositurum renovationi rerum, nos omnes suo spiritu foveat ac recreet, ut læti adventum ejus præstolari, atque nuptialibus vestibus lampadibusque accensis ornati, ipsi occurrere possimus.

Idem Dominationibus vestris
addictissimus, atque ex ani-
mo Frater.

P u c c i u s.

Prage xv. Kal. Octobr.
M. D. LXXXVI.

Epistola D. ROSENBERGII ad J. DEE & E. KELLÆUM.

*Magnificis viris, Domino Joanni Dee & Domino Edwardo Kellæo,
& ad manus proprias.*

MAGNIFICI Viri, fratres & amici charissimi. Hodie hora 9. ante meridiem istæ mihi allatæ sunt literæ à Domino *Schombergio*, quæ datæ sunt 5. Martii, & debebant jam devenisse in manus meas antea. Ex quibus intelligo, ipsum cum Domino *Holek* expectare responsum *Munsterbergii*. Quandoquidem omnipotens ille omnium rerum moderator, & rector vos delegaverit ad hoc Ministerium & opus perficiendum: Ego nihil scio, quid agendum, nec ullum meum consilium eò accedere potest, ut disponere aliquid possim, sciam, aut velim, nisi quod sapientissimo illi moderatori visum fuerit. Proinde omnia vobis transmittito. Orate sedulo, & quod placuerit Altissimo & Potentissimo Domino, hoc fiat, & me etiam in omnibus informate, & in tantis libenter obedire cupio & volo; & ita nolim neque diem istam prætermittere, quin statim rursus ad vos transmittam. Interim vos & meipsum Dei omnipotentis bonitati immensæque misericordiæ commendans.

Vester amicus & frater,

G U L I E L M U S.

Manu propria.

Dat. *Cromovæ*, 16. Martii,
Anno 1587.

Alia Epistola ejusdem ad eosdem.

MAGNIFICI Domini, Charissimi amici & fratres. Ad literas vestras nihil respondere potui, quandoquidem per suas mihi literas D. *Schomberg*, de suo & Socii ipsius adventu significaveras, volui primùm quæ mihi. dicentur audire. Et si aliqua nova essent vel non audita, dominationem vestram magnificam denuò certiore reddere. Heri noctu solus ad me venit D. à *Schomberg* relicto socio in Monasterio meo

Ca.

Coroniensi dimidium abhinc milliare, & negotiis mihi multa exposuit, de quibus, uti intellexi, ex ipso & Dom. vestris mag. significaverit, uti potui intelligere, satis circumspectè & providè negotia sunt tractata usque huc, & spero etiam fideliter. Ad omnia ista respondi, prout sæpissimè à me intellexistis, & nuper etiam literis, quæ illi dicenda putabam, Dominationi vestræ scripti. Tota res videtur consistere in adjuvandis aliquibus personis pecuniarum aliquo auxilio, & prout & scriptum sive. . . memoriale mihi tradidit, quod transmitto Dom. vestris perlegendum & considerandum, & post, mihi remittatur oro. Charissimi Domini, scitis, quæ sit voluntas Domini; si *proxima actio* & aliæ (mihi videtur) annuunt ipsos adjutandos, fiat secundum ipsius, cujus omnia sunt voluntatem & misericordissimam dispositionem, & expediantur eò celerius, prout cum Domino *Edwardo* locuti sumus. Ipsi respondeant Domino altissimo & potentissimo de fide, quam ipsi præstabunt; sin verò aliter visum fuerit omnipotenti Domino, fiat ita. Rogo Dom. vestras Magn. quàm amantissimè piis suis ad Deum orationibus & mediis à Domino vobis traditis & concessis promovere, & adjuvetis Domini Dei nostri opus & voluntatem exequi.

Socius remansit in Monasterio, ut supra dictum, & conclusi cum Domino *Schombergio*, ut neque videam neque tractem cum illo, certis de causis, quas vobis significabit, & à me etiam intelligetis; tamen ut eò sit melius contentus de duobus vel tribus millibus tallerorum, ipsi procurabitur ad quædam sibi necessaria comparanda in lucro sperat ipsum benè fore contentum pro tempore, modò cætera, quæ majora sunt, propter reliqua, ut supra scripsi, procurentur.

Ego non sum ab Imperatore vocatus, sed meam de aliquibus expetivit sua Majestas sententiam, de quibus rescripti, ut decuit.

De actione intellexi Dominationes vestras paratas ad præscriptum diem esse velle; bene est. Semper nos paratos esse decet & convenit. Ipse benignissimè, quæ in nobis desunt, sua misericordia & clementia inenarrabili perficiat. Placet mihi sententia Dominationum vestrarum; & quæ initio & in procæmio actionis proponere velletis, de quo me informabitis, ad hoc me componam, & expectabo humiliter responsum.

Quæ proponenda putabam, nulla sunt alia, nisi illa.

1. Si Imperator de rebus *Polonicis* à me quicquid sciscitari vellet, aut suspicione aliquâ de me concepta aut fingendo sibi aliquid, quomodo me gerere debeam?

2. Si Imperator de successione Regni hujus pro fratre aliquid tractare vellet, quomodo me gerere debeam?

3. Si electio *Polonica* successura sit, quid de bonis meis paternis disponat Dominus, & mihi quid faciendum?

4. Debeo - ne de negotio *Polonico* aliqua cum Electore *Brandenburgico*, aut aliquo Principe Imperii confidenter conferre, vel non? Cum quibus, quando, & quâ ratione?

5. Si miles aliquis conducendus, & quando?

6. Si Pontifex aut Imperator de personis Dominationum vestrarum vellet aliquid attentare, vel eas iterum relegare, vel quovismodo perturbare, quid agendum & iplis respondendum?

7. Si de thesauro nobis concredito, aliquid Cæsari sit communicandum, quando, quomodo, & quantum?

8. Si Imperator meâ operâ uti vellet pro agendis Comitibus in *Moravia* & *Silesia*, si hoc suscipere munus debeam?

De cæteris humiliter supplicent ut me ita disponere dignetur altissimus ut sibi soli placeam, & serviam fideliter & constanter ad sui nominis æternam gloriam & Reipublicæ Christianæ salutem.

Si Dominationes vestræ putant aliqua omittenda, aut quæ offendere possent, per amorem Dei oro bene considerent: omittant aut emendent sua pietate & prudentiâ.

Unum est, quod omisi de propositionibus. Quod constitueram in animo de Thesauro Domini benignè concesso aliquas fundationes hîc in patria istâ constituere. Deus scit mentem meam, quem nihil latet. Si placeat hoc meum misericordissimo Domino propositum, vel non?

Et præsertim si mihi aliò (divinâ ita disponente gratiâ) sit commigrandum, vellem Patria mea cognoscat, & tota posteritas, quòd amaverim illam, & optimè de salute ipsorum & posteritatis senserim.

Vester ex animo & frater & amicus sincerus

G U L I E L M U S.

Manu propria.

Dat. *Cremovæ* feria Sta. post
Pascha Anno 1587.

Quæ in quadam actione proponenda statuit J. DEE.

IN nomine Patris, & Filii, & Spiritûs Sancti. Amen.

Gloria Patri, & Filio, & Spiritui Sancto: sicut erat in principio & nunc & semper & in secula seculorum. Amen.

In Actione Tertia, proponenda.

1. Deo omnipotenti, Patri, Filio, & Spiritui Sancto, offerimus nos humillimè, paratos ad divina Oracula, Monita, instructiones, informa-
tio-

tiones, & alia quæcunque in hac generali Aetione, suscipienda, intelligenda, & exequenda, quæ sua divina Majestas pro suâ gloriâ & nostrâ consolatione maxima fore præviderit & decreverit.

2. Humiliter requirimus, an hîc plenaria hæc transfigetur Actio: vel an nobis ad *Cromoviam*, cum necessariis nostris rebus, (& quibus illis quidem) properandum fuerit.

3. Has nostri Domini *Rosenbergii* Quæstiones 12. generales, & alia quæcunque in eisdem particulariter continentur, humiliter offerimus, tam ejus-quàm nostro nomine, illa & talia expectantes responsa, quæ & qualia à sede Majestatis Divinæ in suorum Servorum consultationibus procedere, & olim & semper solent.

4. Et quia in eisdem Quæstionibus, nulla facta est mentio de usu pulveris, quem sibi divinitus concessum habet, & aliquoties prius dictum fuerit, quod in hac Aetione informaretur de illius pulveris usu, nos jam humiliter illam desideramus informationem.

5. Et quia extraordinarius iste vehemens favor *Moschovitici* Principis erga me incognitum jam est mihi & multis aliis contestatus & manifestus, (ago Deo Optimo Maximo gratias quantas possum maximas) & quia incertus sum, ad quem finem Deus illum ejus favorem erga me dirigere velit: humiliter peto, ut mihi à te, omnipotens Deus, informatio detur de isto fine, & voluntate tuâ in hac parte, & quomodo ejusdem Nuntiis respondere debeam, si qui jam venerint de cætero.

6. An non debeamus nosmet disponere, (ut aliàs aliquoties præmonitum est) ut hîc *Lapidem Philosophorum* ex methodo *Dunstani* conficiamus: quæ methodus, quia mihi non constat, sæpe me hætenus fecit videri quasi in hoc labore tardum, otiosum, vel ignavum. Ubi contra, quàm est paratus animus meus, & manus, & pedes, & omnes vires tam animi quàm corporis mei, tu nosti, tuque, ô Deus, testis esto meus.

7. Illa praxis, cum poculo ferreo, canali vitreo, calce &c. nondum nobis succedit; idcirco, ad illius quoque conclusionis veritatem practicam obtinendam libenter sciremus, quid est, quod nos hætenus impedit, vel quid nobis deest ad veram intelligendam, & perficiendam praxim illam.

8. *Thomæ Kellæi* decumbentis valetudinem & sanitatem tibi, ô Deus, commendamus, & supplicamus, ut illi nobisque propitius esse velis: illumque sanum & saluum nobis reddere & confirmare digneris ad nominis tui laudem, honorem & gloriam, ex fideli ejusdem posthac servitio & officio erga divinam tuam Majestatem. Amen.

9. *Joanna*, uxor *Ed. Kellæi* nostri, omnipotenti divinæ Majestati tuæ supplicat per me, & ego humillimè, (ejusdem *Joannæ* nomine) tibi (ô Deus) supplico, ut illi velis esse misericors, clemens, & benignus; & ut ejus multiplices ad te preces pro fœcunditate cum hoc ejus marito obtinendâ paternâ respicias charitate: & ut illi hoc contribuere velis gaudium, & quasi sui fidelis Servitii (erga hunc suum maritum) præmium,

ut prole per eundem & cum eodem gaudere possit beata: respice, quæsumus, hanc nostram petitionem, ut à multis olim piis fœminis & viris eandem accepisti, & etiam concessisti petitionem, misericordissime Pater, per Filium tuum, Dominum nostrum Jesum Christum. Amen.

10. Pro mea *Jana* (ô Deus) humillimè gratias ago, quòd hætenus tam clementer & piè illam liberaveris à suæ radicalis infirmitatis contagione: contra quam & medicinam facere me docuisti: & me, ut facerem, adjuvisti, factæque eam virtutem concessisti, ut illa remedii optati nobis præberet signa, qualia nostra imperitia magis sperat esse bona & certa, quàm recta ratione dijudicare potest; hoc igitur symptoma egestionis sanguinolentæ, quid sit, nescimus, an morbi alterius indicium, an dictæ medicinæ, adhuc in suâ virtute & efficacîâ procedentis, operatio. Tuum, ô Deus, ne dedigneris impertire mihi consilium: & de fluxu illo frequenti ex ejusdem *Janae* auribus libenter audire vellemus remedium aliquod.

De *Angliæ* & *Reginæ* ejusdem statu, si aliquid scire nobis expedit, libenter audiemus.

FINIS.

ERRATA graviora corrigenda, & omiffa reftituenda.

IN Præfatione. Pag. iv. l. 3. de bonis. ix. l. 16. celeberrimi. xii. l. ult. producendis, negare poterit, xv. l. 26. indigna, explicandis.

In vita J. Ufferii. Pag. 9. l. 30. dele ut. 20. l. 15. de ipfo. 21. l. 5. Lectori. 24. l. 25. immunis, amore. 27. l. 4. emerfit. 28. l. 25. Ufferio in honorem. 31. l. 18. eandem methodum. 33. l. 5. quâ. 42. l. 14. opposuerint. 44. l. 21. præmunitus. 45. l. 10. affiduus. 49. l. 18. M. D. LXII. 51. l. 8. Puttocus. 58. l. 34. feliciffimè. 61. l. 34. manu, meo rogatu. 65. l. 11. & solidæ. 80. l. 17. dele ut. 83. l. 19. pro ne lege ut. 82. l. 11. Exoniensî. 86. l. 16. indicio. 87. l. 21. formulam excogitarent. 93. l. 19. consulturus. 94. l. 1. Hic. 97. l. 5. Rebellibus Hibernis. 101. l. 24. moderandâ. 102. l. 22. manantes. 104. l. 28. corruptum. 106. l. 29. tam. 107. l. 14. Nolo. 108. l. 29. dele id. 110. l. 16. Deum rogavit. 111. l. 27. præscriptum. 115. l. 12. Ministri. 116. l. 16. introduxiffent. l. 29. pro & isthoc lege ab isthoc. 119. l. 24. Leyum. 122. l. 35. istud munus. 127. l. 17. dele J. Baingridgius. l. 19. publicatum. 145. l. 13. Στασις. 147. l. 12. copulatas.

In vita J. Cofini. Pag. 4. l. 6. Branspethæ. 8. l. 12. commendabile. 12. l. 32. ovantibus. 15. l. 14. exceptus. 19. l. 28. charitate, uti ille putabat. 22. l. 28. Cartwritum. 25. l. 22. consignavit. 26. l. 13. perceperat. 27. l. 13. Hayward. 37. l. 20. occasio se. 38. l. 4. in re qualibet.

In vita H. Briggii. Pag. 6. l. 21. 10000. 13. l. 17. ὄλγος. 14. l. 29. conantes. l. 35. seculi.

In vita J. Bainbridgii. Pag. 7. l. 1. debet) inventis. 8. l. 26. latitudinum. 9. l. 2. dele cum. 10. l. 10. communiffimo. 11. l. 9. Mertonensis adscitus. l. 29. suppetiisque.

In vita J. Gravii. Pag. 7. 30. notæ, five Græcos, five. 8. l. 3. atque a. l. 6. admiranda. l. 8. relecturus. l. 20. usum nancisc. 11. l. 29. eundum. 16. l. 26. & Scholæ. 21. l. 19. dele ad. 23. l. 30. non levis. 36. l. 13. videre.

In vita Petri Junii. Pag. 1. l. 5. æquitate. 11. l. 36. enarrandis. 24. l. 21. Marriæ. 25. l. 15. Sidueio - Suff. 25. l. 23. A. 1618. l. 27. Lindfæus. 27. l. 22. Langfund. l. 29. Ruthvenorum. 29. l. 19. hyperoo. 31. l. 14. pofcit. 32. l. 23. ferreus.

In vita Patricii Junii. Pag. 7. l. 30. inimis. 8. l. 37. Dounæum. 15. l. 13. amovendum. 16. l. 10. eque. 18. l. 22. ad hunc. 20. l. 1. & se femper. 27. l. 7. conditione. l. 21. ex propens. 32. l. 25. quo dudum. 33. l. 3. tumultuum. 36. l. 19. Equitem. 45. l. 10. verò V. T. 46. l. 2. Apostatæ. l. 14. jam certè.

In vita J. Dee. Pag. 4. l. 5. annis. 5. l. 24. pro formam lege famam. 7. l. 15. Mizaldus. l. 18. Postellus. l. 21. usus est. 8. l. 28. Tribunale fuisset recognita, ita. 10. l. 13. amore. 13. l. 6. graviffimum. 15. dele filia, & repone ante secundo-genita. l. ult. amicitias. 18. l. 23. Braheanas. 20. l. 26. or verifying. l. 39. Barkero. 21. l. 12. centenariis. 22. l. 32. quæ per. 23. l. 38. memoratam. 25. l. 14. famâ. l. 35. magnas. 26. l. 18. maritimis. l. 32. 1579. l. 37. decoro. 31. l. 12. caussatus. 33. l. 37. prophetiæ. 35. l. 10. spoliato. 37. l. 7. Cassellas. 39. l. 23. A Conjurer. 40. l. 30. profert. 42. l. 29. edendis, uti &. 44. l. 15. elocationibus. 45. l. 29. in Oratorio. 46. l. 22. solennes. l. 31. diffusus fuisset. 50. l. 5. officiis affiduum. l. 12. pro ut mystas lege ne mystas. 52. l. 1. Glastoniensis. l. 2. apposito. l. 7. decimæ. l. 32. gratificaturus. 55. l. 10. senectutis. 59. l. 14. Vitell. C. VII. 60. l. 33. Latinum. 61. l. 15. Streeti. 70. l. 12. inter cæteras. 73. l. 6. opportunè. 73. l. 10. 74. l. 22. 75. l. 10. prophetiæ. 76. l. 16. O tu. in Marg. l. 18. A. L. 79. l. 1. dele or what other occasion herein. 81. l. 11. Christi. l. 26. pro vana lege aliena. 82. l. 5. rediisse, adde, non potui, quin illud, quod vestrum interesset scire. 85. l. 19. divinitus. l. 26. pro suæ lege ecce. 86. l. 22. Angeli. 88. l. 21. quæretis. 89. l. 24. evadant. 99. l. 1. Cromoviensî. 100. l. 27. feria quinta. Reliqua levioris momenti, puta vocales permutatas aut omiffas, & accentuationes punctuationesque malè collocatas, Lector vel mediocris ingenii facillimè observabit, & pro candore suo corriget.

THE HISTORY OF THE UNITED STATES OF AMERICA

The history of the United States of America is a story of growth and development. It begins with the first settlers who came to the continent in search of a new home. These settlers, known as the Pilgrims, established the first permanent English colony in 1620. Over the years, more and more people came to the United States, and the country grew in size and population. The American Revolution was a turning point in the country's history. It was a struggle for independence from Great Britain, and it resulted in the United States becoming a sovereign nation. The Constitution was written in 1787, and it has since served as the foundation of the country's government. The United States has since played a major role in world affairs, and it has been a leader in the development of science and technology.

The United States has a rich and diverse culture, and it has been a source of inspiration for people around the world. The country's history is a testament to the power of the American dream, and it is a story that continues to inspire and motivate people today. The United States has a long and proud history, and it is a country that has made a significant contribution to the world. The history of the United States is a story of hope and possibility, and it is a story that we can all be proud of. The United States is a country that has the potential to make a positive impact on the world, and it is a country that we can all look up to. The history of the United States is a story that we can all learn from, and it is a story that we can all be inspired by. The United States is a country that has the power to change the world, and it is a country that we can all be proud of. The history of the United States is a story that we can all be a part of, and it is a story that we can all be proud of.





